

清名家詞

一

294009

甲行

~~100190~~

上海图书馆藏书




A541 212 0014 9601B

# 清名家詞

共讀樓校輯

夏敬觀題



## 清名家詞序

余嘗論清代學術有數事超軼明代而詞居其一。蓋詞學濫觴於唐，滋衍於五代，極於宋而剝於明。至清乃復興，朱陳導其流，沈厲振其波，二張周譚尊其體，王文鄭朱續其緒。二百八十年中，高才輩出，異曲同工，並軌揚芬，標新領異，迄於易代，猶綺餘霞。今之作者固強半在同光宣諸名家籠罩中，斯不可不謂之極盛也已。顧篇章流播，散在羣書，甄綜貫串，有待賢哲。百十年來，以地望結集者，如粵西詞見湖州詞錄之類，以聲氣結集者，如薇省同聲集題襟集之類，以品類結集者，如閨秀詞鈔百花詩餘之類，或蒐羅雖富而抉擇未遑，或執德未宏而規模較隘，手摺華擷秀之道，尙或未逮。余曩者有清詞鈔之輯，欲網羅有清一代之詞，擇尤選錄，經營五載，所集蓋五千餘家，以矜慎從事，猶未勒成。復欲選其最者爲清六十年家詞，以確有本原能自立門戶者爲限，牽於人事，亦未成書。海寧陳乃乾先生承學好古，今之汲古閣知聖道齋也，頃出其清閣所藏清詞，擬付印廣傳，先以百家爲一集，詞宗碩匠，大致無遺。



表一代之宏規。存百年之文獻。與吾所擬者正復相去無幾。後生可畏。先我著鞭。此書出而余之清六十家詞殆欲焚筆視矣。方今聲家競起。萬派爭流。余恆持通變之說。謂後將創爲新體之歌。以應時會。顧體製必有所承。以資蛻化。而胸襟意境與技巧之誠。中形外則固歷劫而不能刪者。學者欲究知二百餘年斯道之蕃變。以期能自得師。則此書固可其扁鑰也。是爲序。民國二十五年六月番禺葉恭綽。

## 清名家詞序

往者朱彊邨侍郎常欲甄錄有清人詞爲百家詞選因循未就嗣於庚午年始鳩合海上詞人倡爲清詞鈔之輯馳書遐邇廣爲搜訪而以上海爲之樞紐余與遐邨映厂諸公皆嘗襄理其事因得遍觀諸家詞集洞悉其源委派別遐邨並總十一朝詞人爲之約計順治朝得一百八十八人康熙朝得一百十七人雍正朝得三十六人乾隆朝得三百六十二人嘉慶朝得三百二十八人道光朝得四百四十人咸豐朝得二百零二人同治朝得一百十人光緒朝得一百七十八人宣統朝得一百三十二人此僅就庚辛間所見詞集嬖摧言之其闕後徵集及散見各選本者尙不在此數烏乎何其盛哉常謂文學之隆窳恆視政教爲轉移詞雖小道然非積學深見聞廣與哀樂過人者輒不能造其極故溯源出于詩而感人之深則與樂同功清代學術昌盛度越前明康乾之交兩開制科才雋輩出國初詞人大半爲鴻博之士故能恢暢元音黼黻盛治風尙所趨浸成流別迦陵振采于三吳竹垞明禪于兩浙並銜

華佩實質有其文焉。迨陽湖張皋文輩崛起乾嘉，標舉意內言外之旨，一洗側豔餽飭故習，世益知詞學託體之尊。咸同以來，兵事倣擾，外患日亟，才智之士，蘊其憂閔，忠愛悱惻芬芳之懷，一寄於詞。越世孤往，其緒益昌。遠若蔣鹿潭，近若王半塘、鄭大鶴、朱彊邨諸人，雖各胥暨陽湖，至其廣己造哀，寄心家國，以蘄合拙重大之旨，雖起茗柯諸老于九泉，要不能無前賢後生之畏。庸非遭際之迥殊，而造詣有獨至邪？觀於此，可以察世變，稽政教焉。清詞鈔之選，雖已逾四千餘家，而卷帙紛繁，殺青有待。海寧陳君乃乾，近以彙刻清名家詞來丐一言，覈其人選，雖不逮清詞鈔之十一，而清代詞人專集之卓然可傳者，略備于是。斯亦一代著作之林，與風俗史也。在昔宋槧詞集，若長沙百家詞、閩中琴趣外編之類，皆成于書肆，之可考見者，宋詞閱世復顯，不至終熄者，實有賴于是。乃乾值茲世衰文敝之際，珍視文獻，綿典雅之墜緒，嘉惠士林，厥功甚偉。嗣後費力所及，遍取清人詞集，增益刊行，當以此爲乘韋焉。歲在丙子四月，劬疒黃孝紓識於上海寄廬之墨詭廡。

有清一代詞學蔚盛浙西導其先河  
吾鄉尊其宗緒上追天水遠軼朱明  
策蘭畹於米茲勵金荃於前燭為承  
學右文之士所不可潛研探討者也惟是  
珠玉紛陳瑛珉出廣徵則既鮮扶擇  
分致則難得善本三百年来但有送家  
初無合刻方之汲古彙邗揚乾宋元不可  
同日而語學者病焉乃乾先生頃以餘

畧輯刻清詞先得百家方之長沙舊  
槩臨安書棚何遽多讓軼近言詞事  
者踵起余知其手茲一編百川納海萬  
花炫影可以進推其途轍私辨為師  
讀蓋有勝於余之露纂晨鈔窮攤  
冷卷辛勤所得者何止倍蓰矣欣觀  
其成書此以告望磬而之曰音者

丙子四月武進趙尊嶽



七百年來樂苑荒  
究心聲律漸微茫  
只應託體鄰風雅  
何必分庭話浙常  
羅放佚感滄桑  
長沙舊繫苦難詳  
殷勤留得騷魂在  
絲盡春蠶莫自傷  
鴈鳴天

清名表詞題辭

丙子初秋龍沐勳



新園承平一時才士崇信  
豫富介白石好碑常  
州福 叔唐信羊柳是竹  
良 秦烟理信  
歌身起身右白如地 既  
何魯

詩名宗詞遠詞意主  
詩





一朝文獻度越朱明爭笑  
見聲黨連翩蘭畹金荃若  
箇順花菴絕妙未抵長沙  
坊本好汲古功深尚論千秋  
一樣心減蘭

共讀梅校刻清名家詞題辭陳蓮影





共讀人間有散仙  
拓華擷秀此瑤編  
萬千象樂窺清閨  
竟接騷魂三百年  
斯道從知託體尊  
浙常門戶細推論  
於今汲古得修綆  
百輩詞流慧業存

清才學浙蔚盛度述前修詞正其一清室說約深宏華厚

浙西常州四派前後倡導若標宗尚而探其源流正其

於大成蓋宗全元詞之刊自彊邨蕘書出盡善盡美

以有清作家之林獨無彙刻學者以為憾海寧陳乃乾

先生出其清閨校刊清名家詞草略備傳先盛後具

功偉矣 丙子長夏白蕉

## 序例

填詞始於李唐。盛於南宋。下逮元明。雜劇代興。而詞學寢衰。清代三百年間。問學之業絕盛。經史辭章。遠邁前代。詞亦勃然中興。其流變涯略。可得而言。竹垞迦陵。挺生前期。起衰振絕。情深氣厚。夙乎尙已。樊榭繼響。審音琢句。追蹤宋賢。始立浙派門戶。然論者猶惜其以姜張爲止境。偏尙體物。形不副意。其末流不免餽釘。於是毘陵二張。別標意內言外之旨。晉卿止庵。爲之推衍發皇。半塘崛起。其實始副。鄉之視倚聲。爲小道者。乃恍然於其業之固與經義詩賦方軌也。

四庫全書之網羅搜訪。可謂至博。而當代詞集。僅收曹貞吉一家。存目亦僅七人。豈廟堂之彥。猶目爲詩餘。小道而卑之歟。顧填詞之風。靡問朝野。若納蘭之貴。憶雲之富。以至畸人逸士。往往專力於此。無所靳惜。其間遞變演進。終乃底於大成。良以抒情之作。抑之適所以昌之。固非人力所得而遏之也。

夷考宋金元詞。有毛氏汲古閣刊行於前。四印彊邨雙照復一再校輯於後。可以無憾。毘陵趙叔雍先生輯刻明詞。亦殺青逾半。而清詞振兩宋之墜緒。蔚成大國。獨無彙刻之者。庸非以單卷孤帙。流傳不廣。藏書家亦罕見著錄耶。僕自忘儉陋。竊有志於此。輒就行篋所儲。別裁版本。正譌補闕。以付鉛槧。纂輯之例。條舉如左。宏達君子。幸垂教焉。

一。清代詞人。數以千計。茲先印百家。俟續有匯萃。再印二集。非謂清詞名家止於此也。

一。茲編所採。皆詞集之有成書者。若僅見選本。或詩集後附刻數闕。並無別集單行者。雖佳勿錄。

一。明代遺民。眷懷故國。使與新朝顯宦並列。有違作者本意。如王夫之屈大均輩。概從割愛。

一。閨秀方外之作。概未採入。他日當別爲一編。

一一人之集。每有數刻。篇帙多寡。或不相侔。今取以互勘。俾成足本。如吳偉業詞。以本集及家藏稿本孫默刻本合校。龔鼎孳詞。以本集及香嚴齋三十二芙蓉詞合校。納蘭性德詞。以通志堂本顧貞觀輯本袁氏汪氏許氏諸刻本合校。惟晚年自定者。則探定本。如王鵬運用半塘定稿。朱古微用彊村語業。

一單行詞集。以不分卷爲多。其篇葉較富而分卷者。亦隨刻本而異。如陳維崧詞三十卷。或作二十卷。茲以鉛槧縮印。合數家爲一冊。故卽以一家爲一卷。

一。圈點符號凡三。爲韻。爲句。爲讀。惟清初名家。沿嘯餘譜之誤。如十六字令。應以一字起句。嘯餘譜引「眠。月影穿窗白玉錢。」誤眠作明。遂以明月影三字爲句。句讀常有不合律處。今惟隨文句讀而已。讀者諒之。

丙子首夏海寧陳乃乾

# 清名家詞總目

李 雯 蓼齋詞

吳偉業 梅村詩餘

曹 溶 靜惕堂詞

宋 琬 二鄉亭詞

龔鼎孳 定山堂詩餘

曹爾堪 南溪詞

尤 侗 百末詞

吳 綺 藝香詞

徐石麒 坦菴詞三種 靈吟 且謠 美人詞

梁清標 棠村詞

清名家詞總目

清名家詞總目

嚴繩孫 秋水詞

毛奇齡 毛翰林詞

陳維崧 湖海樓詞

王士禛 炊聞詞

朱彝尊 曝書亭詞三種 江湖載酒集 靜志居琴趣 茶煙閣體物集

彭孫遹 延露詞

王士禛 衍波詞

宋 榮 楓香詞

鄒祇謨 麗農詞

董以寧 蓉渡詞

董 俞 玉鳧詞

董元愷 蒼梧詞

曹貞吉 珂雪詞

李良年 秋錦山房詞

徐 鉉 菊莊詞

顧貞觀 彈指詞

李 符 未邊詞

汪懋麟 錦瑟詞

高士奇 清吟堂詞二種 蔬香詞 竹窗詞

沈皞日 柘西精舍詞

沈岸登 黑蝶齋詞

查慎行 餘波詞

性 德 通志堂詞

龔翔麟 紅藕莊詞

趙執信 飴山詩餘

厲鶚 樊榭山房詞

蔣士銓 銅絃詞

王昶 琴畫樓詞

王百孫 瑤想詞

吳翌鳳 曼香詞

洪亮吉 更生齋詩餘二種 冰天雪窖詞 機聲鐙影詞

吳錫麒 有正味齋詞五種 佇月樓琴言 三影亭寫生譜 鐵撥餘音

江上蘆煙話 紅橋笛唱

趙懷玉 秋籟吟

黃景仁 竹眠詞

楊芳燦 芙蓉山館詞



樂 鈞 斷水詞

凌廷堪 梅邊吹笛譜

張惠言 茗柯詞

錢 枚 微波詞

劉嗣綰 箏船詞

張 琦 立山詞

郭 麀 靈芬館詞四種 蕘夢詞 浮眉樓詞 懺餘綺語 鑿餘詞

彭兆蓀 小謨觴館詩餘

嚴元照 柯家山館詞

改 琦 玉壺山房詞

趙慶熺 香銷酒醒詞

宋翔鳳 浮谿精舍詞三種 香草齋詞 洞簫詞 碧雲龕詞

王敬之 三十六陂漁唱

湯貽汾 畫梅樓倚聲

葉申薌 小庚詞

周 濟 味雋齋詞

董士錫 齊物論齋詞

周之琦 心日齋詞四種 金梁夢月詞 懷夢詞 鴻雪詞 退菴詞

馮登府 種芸仙館詞三種 花墩琴雅 釣船笛譜 月湖秋瑟

楊夔生 真松閣詞

顧 翰 拜石山房詞

方履錢 萬善花室詞

董佑誠 蘭石詞

龔自珍 定盦詞五種 無著詞 懷人館詞 影事詞 小奢摩詞 庚子雅詞

項廷紀 憶雲詞

姚 燮 疏影樓詞四種 畫邊琴趣 吳涇蠻唱 翦燈夜語 石雲吟雅

黃燮清 倚晴樓詩餘

蔣敦復 芬陀利室詞六種 綠簫詞 碧田詞 紅衲詞 青瑟詞 白華詞

拈花詞

陳 澧 憶江南館詞

龍啓瑞 漢南春柳詞

承 齡 冰蠶詞

周壽昌 思益堂詞

王錫振 龍壁山房詞二種 茂林秋雨詞 瘦春詞

杜文瀾 采香詞

邊浴禮 空青館詞

清名家詞總目

勒方錡 太素齋詞

蔣春霖 水雲樓詞

薛時雨 藤香館詞二種 西湖艣唱 江舟欸乃

端木埰 碧瀨詞

周星譽 東鷗草堂詞

劉履芬 鷗夢詞

李慈銘 霞川花隱詞

張鳴珂 寒松閣詞

莊棫 中白詞

譚獻 復堂詞

王闓運 湘綺樓詞

葉大莊 小玲瓏閣詞

馮煦 蒿齋詞

王鵬運 半塘定稿

陳銳 袞碧齋詞

文廷式 雲起軒詞

鄭文焯 樵風樂府

朱祖謀 彊邨語業

況周頤 蕙風詞

王國維 觀堂長短句

菊  
齋  
詞

運  
彰



李 雯（萬曆三六——順治四）

字舒章。江南華亭人。明諸生。少與陳子龍宋徵輿齊名。稱雲間三子。清兵破北都。以薦授弘文院撰文中書舍人。充順天鄉試同考官。以父喪歸。卒於家。著有蓼齋集。

# 蓼齋詞

雲間李 雯 舒章

長相思 詠秋風

楓葉飛。柳葉飛。飛向空閨無盡時。搖搖千里思。  
西風吹。北風吹。吹入君衣知不知。  
香帷薄暮垂。

生查子 秋夜

風動碧琅玕。翠戶生寒淺。斗帳宿鴛鴦。繡被雙鸞偃。  
獨自擁雙鬢。不覺銀缸暗。明月下梧桐。玉漏遲金翦。

浣溪沙 初夏晚景

紈扇輕裁蛺蝶羅。杏黃衫子晚晴多。捲簾雙燕引新雛。  
衣潤先教籠鵲尾。髻鬆常自約犀梳。薔薇小浴納涼初。

又 詠繭



淺碧柔黃玉顆長。情人垂手入蘭湯。溫存心性怎禁當。方束素時纖指滑。欲纏綿處粉襟香。爲誰無語在匡牀。

又 詠五更

歷盡長宵夢不成。欲明人自怕天明。蘭湯初滅小銀屏。露染花枝常滴滴。香寒繡被更清清。早知新恨又重生。

菩薩蠻 守漲遣懷

越溪暮雨何曾歇。鷓鴣聲裏沙痕沒。曉起不勝愁。愁橫舴艋舟。灘頭龍子浴。爲洗千山綠。阻斷去時程。教儂莫遠行。

又 憶未來人

薔薇未洗胭脂雨。東風不合催人去。心事兩朦朧。玉簫春夢中。斜陽芳草隔。滿目傷心碧。不語問青山。青山響杜鵑。

又 題擣衣圖

香閣夜警秋風度。青砧冷落梧桐露。淡月白離離。看人欲擣衣。犀甌香茗潔。無意嘗蘭雪。玉杵不曾鳴。誰聽腸斷聲。

巫山一段雲 題美人洗桐圖

好浥清絲絹。輕摩碧玉枝。秋來猶有綠陰時。香袖鎖相依。洗卻風中淚。將爲月下期。冷閒心事小鬟疑。應有玉人知。

謁金門 紅葉

青楓浦。染出空江天暮。隔岸胭脂新雨墮。小樓腸斷處。疊疊亂紅秋露。又被西風吹去。翠袖拾來看幾度。欲題無一語。

又

夜飛鵲。夜夜把人驚覺。殘月侵牆猶未落。風吹鈴動索。不是鴛衾常薄。擁枕難教夢着。夢裏落花飛燕掠。羅裙寬幾約。

清平樂 秋曉

雁聲初到。遠夢驚回早。殘月殘燈和淚照。閒憶去年秋草。起來檢點芙蓉。愁紅恰與人同。贏得一身憔悴。那堪更對秋風。

畫堂春 秋柳

長條梳盡影珊珊。烟啼露冷風寒。暮鴉棲遍小憑闌。無限堪憐。猶傍朱樓舞袖。心驚落葉哀蟬。昔時攀折已相關。重對青山。

醉桃源 秋海棠

愁紅低影碧闌干。玲瓏風佩寒。背人無語小屏山。相扶秋病闌。宜翠竹。近苔錢。嬋娟庭戶間。相思種子隔年年。幽芳和淚鮮。

阮郎歸 閒愁

滿簾暮雨對青山。樓高香袖寒。綠帆亂落水西灣。銀箏無意彈。金鴨冷。淚珠殘。一庭紅葉翻。鷓鴣飛去又飛還。人如秋夢闌。

又 秋晚

夕陽庭院鎖芭蕉。涼風和雁高。芙蓉紅褪滿江湖。金塘知路遙。羅袖薄。晚香飄。歌梁空燕巢。添衣小立紫闌橋。淒涼聞鳳簫。

山花子 初夏

乳燕初飛水簾涼。菖蒲葉滿小池塘。七尺蝦鬚簾半捲。杏衫黃。竹粉新黏搖翡翠。荷香欲暖睡鴛鴦。正是日長無氣力。倚銀牀。

又

一捻紅微雙鳳尖。半彎翠抹遠山聯。素着輕綃無粉汗。近風前。打馬怎教玉指動。采花應貼綠鬢鮮。真個日長看影倦。惱人閒。

又

細雨楊花薄暮天。鳳簫聲斷壓重簾。好景遍教紅袖倚。籠春纖。細語玉牕輕燕燕。暗香夜蛤影鷓鴣。半綰鴉鵲渾卸卻。落金蟬。

秋蕊香 詠桂

昨夜涼風微度。吹下青腰仙女。多情細翦金衣縷。款款寒香無緒。月中露下尋芳去。空延佇。綠雲初染輕檀炷。暗入羅幃深處。

眼兒媚 畫眉

曉來獨自上妝樓。攜筆近簾鉤。菱花未掩，朝霞初暈，直甚風流。青青常壓兩星眸。難畫幾重愁。盈盈只在，遠山峯上，柳葉梢頭。

又 秋思

藕絲欲斷更菱絲。香徑晚涼披。梧桐半落，蒹葭相對，荳蔻無枝。淡黃衫子月明時。無計是相思。歸期尙可，燕方飛去，雁未來遲。

桃源憶故人 春寒

無聊獨自探春早。花影今朝風悄。吹透越梅多少。兩點青山小。淒清繡戶人難到。惟有一庭春鳥。掩着銀屏正好。簾外餘香裊。

又

小池過雨荷香潤。簾幙重霞紅襯。有箇人人相問。垂手芙蓉近。試摘一莖涼酒暈。插向銀鉶未穩。暗數蓮房則甚。密意消殘粉。

甘草子 春

春暮。煙鎖垂楊。未斷清明雨。螺盒數紅兒。蘭露調雲母。悶悶騰騰。慢看風絮。任送暖。添寒無緒。十樣眉峯遍。描許不似張郎嫵。

又 夏

長夏。日影梧桐。玉枕東牕下。手擘水晶瓜。香霧清寒瀉。涼沁冰盤。蘭莖亞。把小幅。蠻箋輕寫。寫得鴛鴦字成也。更被人牽惹。

又 秋

秋半。捲起流蘇。人與金波滿。風吹羅帶寬。桂落香枝遠。天上清宵。霓裳舞遍。羨雙影。月華初見。琥珀釵頭露珠泫。把玉鬢輕按。

又 冬

冬盡。手冷金針。愛與黃昏近。合歡□□深。匣匣紅池緊。碧瓦彫甍。霜鬆銀粉。煨紫  
□□□香沁。剔指纔勻。口脂潤。還倚鴛鴦枕。

太常引 消暑

紫蘭香處鎖琅玕。深影亞牕寒。纖手弄冰絃。把一曲、相思漫彈。流泉三峽。瀟湘夜  
雨。移入畫屏間。曲罷理青鸞。看兩點、春山翠灣。

少年遊 冬暮

綠窗烟黛鎖梅梢。落日近橫橋。玉笛纔聞。碧霞初斷。贏得水沈銷。口脂試了櫻桃  
潤。餘暈入鮫綃。七曲屏風。幾重簾幙。人靜畫樓高。

又 代女郎送客

殘霞微抹帶青山。舟近小溪灣。兩岸蘆乾。一天雁小。分手覺新寒。今宵霜月照燈  
闌。人是暮愁難。半枕行雲。送君歸去。好夢憶江南。

又

樓高望絕楚雲重。春水漫流紅。鷓鴣聲暖，海棠深處，濃綠鎖眉峯。王孫寶馬隨南陌。年少慣相逢。怎是輕佻，惹人牽繫，更錯怨東風。

西江月 梅花

素手深知花重。羅幃更耐香寒。玉笙吹徹暮憑闌。消得春風一半。淡月黃昏常待。清霜曉夢無端。水晶簾外影相看。不被紅雲遮斷。

月中行 采蓮

新絲輕染石榴紅。吐掛小牕東。淡煙深柳晚來風。結伴采芙蓉。縠紋細浪牽花漿。雙鷺下，綠水搖空。藕花裙溼鬢雲鬆。人在落霞中。

留春令 和湯若士

緩約雙紋繡被私尋。獨見香鞋。金荷粟小背妝臺。暗處消魂猶在。昔喜春風到日。今愁秋月來時。已拋蓮葍見菱絲。心事牽雲帶水。

鳳來朝 和周美成



秀靨宜春面。碧雲□好風透亂。近闌干、素影承紈扇。猶記得月中見。小語風情溫軟。玉枕涼、輕分一半。問絳河淺。怎禁得、鵲橋斷。

醉花陰 重陽

絳紗愛把黃金縷。鬢影清香袖。一晌又重陽。滿目雲山。不待人歸後。江天落雁垂垂久。好景知依舊。不是怨黃花。只爲離人。誤得黃花瘦。

南柯子 冬曉

霜痕隨碧甃。素縷斷銀餅。香銷翠被五更清。慣是獨眠人起。見壺冰。亂雲拈指凍。暖筆畫眉輕。菱花寒浸遠山青。記得當年攜手。近牕櫺。

又 窗外芭蕉

入雨朱絃咽。臨風碧簾垂。鎮常相守綠窗時。憶得嬋娟。和袖捲金泥。小院苔移穢。空簾月印眉。晚妝偷淚滴羅衣。幾幅長箋。何處寫相思。

望江南 詠螢

朱闌暮。點點動春星。來近燈前常黯淡。去時花下忒分明。曾伴玉人行。迎風度。斗帳兒盈盈。待得月華分一照。也隨珠露溼三更。遮莫上銀屏。

又 無題

釵頭玉。常自伴香雲。燈暈奄奄成小睡。醒來猶未脫羅裙。月影正中分。閒消悶。刀尺與爐熏。寶帳空垂連理帶。香衾漫疊舞鸞紋。玉漏夜深聞。

浪淘沙 春遊

春嶺鷓鴣啼。花暝煙低。葡萄潑水燕初飛。盡日乘蘭羅帶緩。香重金泥。芳草綠痕齊。無限長堤。歸時莫遣畫簾垂。記得曲闌橋畔路。玉勒遲遲。

又 燕子

小苑午陰長。梅子初黃。三三兩兩過池塘。不管羅幃人倦起。斜入紗窗。細雨費端詳。只近迴廊。纔飛北館又南廂。啄破海榴紅欲溜。嬾上雕梁。

又 秋月

明鏡破青桐。近轉牆東。樓高人靜影重重。露脚斜飛驚鵲語。香墜寒空。金井望雕  
欄。芳樹瓊瓏。碧天涼落水晶宮。爲問嫦娥愁幾許。無限秋風。

又 早起

常被五更鐘。驚夢回空。枕痕輕暈冷金蟲。不許愁人眠不起。窗外梧桐。鏡裏惜芳  
容。曉日朧朧。綠沈庭院鳥啼紅。淡畫春山垂粉淚。滴與芙蓉。

雨中花

漫說海榴開遍了。怎無緣、玉山一倒。寫破狼毫。題殘蠶紙。總爲愁人道。庭院深深  
清晝好。奈相思、夢兒不到。反插牙籤。傾翻藥裏。只是閒煩惱。

鷓鴣天 夕陽

半壁深陰響杜鵑。淡黃雲樹日啣山。妝殘人在闌干角。目斷天晴蓮子灣。情薄暮，  
最相關。碧紗閒捲小萍翻。可憐鴉背無多景。慣鎖星眸罨畫間。

南鄉子 秋桐

高影出紅樓。碧簾先散一庭秋。昨夜清商叩哀玉。聲幽。盡在雲屏角枕頭。清露向晨流。淚珠點點滴新愁。爲近雕闌常獨倚。凝眸。殘月依依下玉鉤。

又 冬閨

斗帳欲溫香。池水冰紋樓上霜。半鞦綠雲無意緒。思量。翠袖深深玉指長。斜日又西黃。匝匝銀屏小洞房。折得梅花和影瘦。淒涼。簾外風高斷雁行。

又 閨情

涼雨似新秋。簾捲湘波不下鉤。看盡青山和黛溼。新愁。壓下雲屏角枕頭。常把帶圍收。銀蒜低垂寶篆浮。暗數松兒人不見。凝眸。濃綠陰晴燕子樓。

玉樓春 秋閨

城頭月出驚栖羽。寶瑟清清傷玉柱。空庭懸杵數千聲。半枕寒蛩聞一箇。綠窗月對相思樹。□□難傳心上語。娟娟幽草怯黃昏。炯炯清眸憐白紵。

又 秋思

西園剩有黃花蝶。南浦驚飛紅杜葉。秋來獨自怕登樓。閒卻吳綾雙素襪。亂鴉啼起愁時節。料峭西風渾未歇。兩行銀雁十三弦。彈破梧桐梢上月。

又 代客答女郎

角聲初展愁雲暮。亂柳蕭蕭難去住。舴艋舟前流恨波。鴛鴦渚上相思路。生分紅綬無人處。半晌金樽容易度。惜別身隨南浦潮。斷腸人似瀟湘雨。

又 苦雨旅懷

千山染就朦朧碧。杜宇驚人啼怨魄。綠牕長日守芭蕉。簾額沈沈無燕入。溼雲底死連朝夕。不管相如猶倦客。好將軍枕畫瀟湘。夢到巫山□里隔。

又 美人午睡

綠陰掩過屏山疊。玉子彈棋渾倦歇。碧綃正好貯行雲。花骨閒支隨夢蝶。流黃水簾冰肌貼。午院亭亭蘭氣徹。半鈎羅襪籠綉裙。疑是纖纖波底月。

步蟾宮 晏起

沈香漫爇青絲帳。看睡醒、紅潮初漾。花深霧重不如眠。把合鎖、窗兒推上。牀前鸚鵡無心想。弄足上、金繩頻響。這回渾是不成酣。且喜得、溫存一晌。

虞美人 春雨

廉纖斷送荼蘼架。衣潤籠香罷。鷓鴣啼處不開門。生怕落花時候近黃昏。豔陽慣被東風妒。吹雨無朝暮。絲絲只欲傍妝臺。卻作一春紅淚滿金杯。

又 孟夏停吳氏館見桂花開雨中寄調賦之

誰偷月下金絲縷。開向黃梅雨。寧馨愛近石榴紅。爲怕年來憔悴見秋風。數枝先綴蟾宮玉。芳影排如粟。不勞珠露拂新涼。自有生綃帳子籠溫香。

翻香令 本意

微翻朱火暖金猊。綠烟斜上玉牕低。龍香透、雲英薄、近流蘇、常自整羅衣。輕分麝月指痕齊。博山餘篆潤丹泥。只贏得、籠兒熱、但灰成、心字少人知。嶺南有心字香

一斛珠

雨痕新過。迴廊月影青林度。有情院宇無情坐。檻外吟蟲。先把秋聲做。天涯有客憑闌語。山空水落涼千樹。梵鐘不警愁來處。踏破蒼林。蕭蕭驚飛羽。

踏莎行 立春

芳草迴心。平沙轉翠。朧朧曉樹如新醉。縈烟初繫玉樓人。釵頭空帶宜春字。青鳥銜還。銀幡傳至。石華裙上東風細。開簾鎮日待春來。春來渾是無情思。

又 秋雨

涼館清深。巧雲迷散。絲絲不斷如春線。傷心無奈急迴風。枝枝暗落無人見。香稻低天。芙蓉疏岸。離離又溼江南雁。芭蕉清聽歷空階。情人似隔瀟湘遠。

又 子規

花鳥紅沈。香谿綠染。無端啼破斜陽岸。王孫春草遍天涯。憑君一語頻頻喚。五月江深。三更月半。相思一夜驚千徧。有情莫向異鄉啼。飛歸巫峽何曾遠。

小重山 詠別

江浦潮生紫楝花。垂楊移素艇。暮雲遮。眞珠小淚。滴窗紗。春山盛。樓外欲棲鴉。猶記鬢雲斜。枕痕紅潤玉。籠朝霞。自從相送六萌車。金跳脫。鬆似那時些。

又 除夕

樓上低垂翡翠簾。玉鉤紅袖內。隱春纖。繡額初教綵燕添。梅信早。檢點鬢雲邊。香幙水沈烟。燈花凝絳蠟。不成眠。明朝春色上眉尖。須好夢。隨意卜金鈿。

臨江仙 春潮

一曲畫橋春水急。綠帆遠掛斜陽。誰家艇子近垂楊。杏花新雨後。初浴兩鴛鴦。暮暮朝朝來信准。教人無奈橫塘。新愁恰與此平量。慣隨明月上。更弄柳絲長。

又 柬友

不覺新愁催彩燕。難忘宋玉東鄰。梅花已夢曉雲深。借君玉指上。彈出鳳求音。魚鑰先通金鎖信。莫教紅葉沈沈。盧家待暖畫堂春。願將雙綵線。繡作月中人。

又 暑夜



茉莉微含香乳。紅蕉半吐腥脣。窄衫不耐研羅新。輕分蓮瓣子。暗卜意中人。洗髮  
金盆礙月。擎漿犀液涼心。鴨闌庭畔每逡巡。玉簪花名黏粉露。丹鳥上承塵。

一翦梅 別意

紅蓼秋深白鷺飛。半啓葳蕤。嬾畫星眉。芙蓉初落水平池。記得來時。不見來時。樓  
外摧寒暮角遲。月滿金徽。人近羅帷。雁行無字寫相思。妾意君知。君意難知。

鵲踏枝 風情

荳蔻枝頭紅粟小。半整雲鬟。知是傷春了。幸得玉樓香未杳。人間有信傳青鳥。聞  
說柳梢青渺渺。一翦橫波。如對瀟湘曉。爲語東風吹蝶早。教人着意憐芳草。

又 落葉

慘碧愁黃無氣力。做盡秋聲。砌滿闌干側。疑是紗窗風雨入。斜陽又送棲鴉急。不  
比落花多愛惜。南北東西。自有人知得。昨夜小樓寒四壁。半堆金井霜華白。

又 初夏湖上雨懷

半枕催寒。更漏雨。夜合香開。初試閒愁緒。好夢醒時。鶯鶯語。纖纖又溼梧桐樹。越水吳山情幾許。翠幙烟波。不見花飛處。怕向西陵聞杜宇。空庭依舊蒼苔暮。

又 雨舟紀夢

四圍山色新安路。谿滑雲深。喚起離人緒。點點黃梅天上雨。五更溼盡相思樹。飄已作浮萍侶。角枕蓬窗。無計推愁去。石上菖蒲長幾許。夢回香閣逢端午。

唐多令 春思

楊柳織成愁。枝間掛玉鉤。這幾番、花信到妝樓。盡道踏青明日好。曾許下、又還休。窗外鳥鉤。玉人應到否。看東風、不解促驂騑。池上楊花飛遍也。春去了、倩誰留。

蘇幙遮 春曉

花影深。簾額重。斗帳微寒。一枕香雲擁。何事起來常慳恹。繡被紅翻。顛倒思前夢。畫樓高。香陌迴。千萬垂楊。又被東風送。門外鶯啼芳草動。獨自開奩。檢點釵頭鳳。

又 詠枕

翠屏高羅帳小。半鎖香雲。自共愁人倒。一幅瀟湘圖未了。斜倚金鈿。夜夜巫山曉。鳳釵寒。玉漏悄。獨自溫存。只索和衣抱。夢到君邊常草草。幾度香銷。更有誰知道。

破陣子 秋夜

白露涼驚玉樹。明蟾秋映金繩。帳底葡萄看數顆。階前絡緯聽三更。燈花銷復生。總是愁來角枕。那堪風度簷鈴。自分人間憐隻影。不知天上喜雙星。銀河無限清。

漁家傲 新柳

半吐流蘇蘸水面。弄愁一縷青絲短。小閣春寒簾不捲。風冉冉。纖柔未許鶯兒串。可是江南風景晏。嫩黃初破春潮濺。此日章臺人近遠。芳草岸。漸垂長帶教儂縮。

又 詠雪

半啓朱扉寒粉面。騰騰更愛燈前見。簾外玉梅香近遠。羅襪淺。盈盈踏破銀泥軟。浙浙雕闌風力短。清光又照黃昏院。怯把鴛鍼穿彩線。愁婉轉。玉樓人共金燧暖。

又 詠灘水

山色蒙蘿圍四壁。葡萄一瀉傾千尺。羅襪盈盈輕未溼。留不得。莫教比翼鴛鴦立。龍卵丹青和水碧。縠紋細蹙飛花急。映得清眸雙黛色。溪月白。明珠翠羽無消息。

風中柳 閒情

暗鎖離愁。端是樓前楊柳。凭闌干、月痕初透。腕兒越瘦。眉兒越皺。怕黃昏、燕歸時候。粉薄香銷。簾額清清依舊。試蘭湯、微溫荳蔻。常垂纖手。輕披羅袖。倚屏風、夜深燈後。

青玉案

慣消玉腕鏤金釧。細數佳期春半。牆外風箏雲裏斷。櫻桃花下。鞦韆紅索。整個閒庭院。無憑無准。青禽翰。愁雨愁晴芳草岸。常鎖葳蕤春不管。施香小烏。伴人憔悴。學語低聲喚。

天仙子 初晴湖上

湖上清陰半明滅。燕子掠波飛貼貼。好風輕送木蘭舟。芳草合。芙蓉葉。橫翠落霞紅

未歇。柳外斜陽移粉蝶。風景教儂無處說。嫩涼微酒薄更衣。雲際月。人天未愁到。青山三四折。

江城子 秋思

一篙秋水淡芙蓉。晚來風。玳雲重。檢點幽花斜綴小窗紅。羅襪生寒香細細。憐素影。近梧桐。栖鴉零亂夕陽中。歎芳叢。訴鳴蛩。半捲鸞箋心事上眉峯。玉露金波無意味。冷。愁滅燭。聽歸鴻。

千秋歲 和王介甫

別館青桐。雕闌紫萼。曉夢添愁無數着。捲簾吹入南風雨。推窗驚起西飛鵲。女蘿絲。落秦草。相牽縛。黃蘗嶺紅日落。翡翠閣中羅襟薄。欲語先教心緒惡。那時催促燈前影。今番冷淡花間約。五更雞。三更月。難忘卻。

滿路花 和秦淮海

蝶粉黏花萼。桐淚沾簾額。羅衣渾不整。難消息。屏風數尺。疑有雲山隔。憑著青鸞翼。

月影通廊。那回相見加密。好天良夕。一別真輕擲。但有金縷枕。餘香迹。碧雲何際。照那人顏色。無語深相憶。得來時。有個夢兒成匹。

滿江紅 和張孝祥詠雨

回首高唐。涼天近、暮雲不捲。白蘋起、金塘嫩綠。細生池館。瑟瑟未隨平楚盡。珊瑚只共江蘿遠。也不合、阻斷木蘭舟。青楓岸。游魚唼珍珠點。風柳外、離人畔。做朦朧一幅。瀟湘秋怨。玉潤初臨金粟紙。綺窗半溼紅絲硯。且題作、夜雨響芭蕉。教他看。

滿庭芳 七夕

粉席迎涼。彤雲送暑。晚風初度紅樓。玉爐香篆。彩線絡瓊鉤。露脚斜飛鵲羽。明河瀉。淡淡清流。中宵靜。黃姑織女。又值一年秋。悠悠。看此夜。方填銀浪。旋解星綯。漸月迷津渡。雙盼難留。雖是人間天上。離別處。一概都愁。穿針罷。蛛絲未斷。聞整玉搔頭。

又 中秋

玉樹風疏。朱樓雲捲。桂枝新翦輕黃。藕絲牽斷。蓮粉墮紅房。此夜平分秋色。金波轉。

紈扇初涼。開羅幕、鵲爐微暖。香散楚天長。玉顏寂寞處，雙橫翠袖，自整明璫。漸月華空館，露滑銀牀。破鏡半銜雲樹。九秋恨、一概平量。又何待、霜凝畫角，飛雁兩三行。

鳳凰臺上憶吹簫 次清炤韻

漏咽銅龍。風銷蠟鳳，醒來猶倚香篝。對雙鸞臨鏡，妝罷還羞。滿目青山畫裏，繫別緒、生怕凝眸。難消受、一庭芳草，半隻簾鉤。悠悠春風度也。這千萬垂楊，不繫扁舟。自吹簫人去，鳳鎖雲稠。應念別時清淚，登臨處、回首江流。江流下，落花飛絮，遍寫離愁。

玉蝴蝶

慣是離愁天氣。未休暮雨，又見朝雲。半起斜臨寶鏡，懶織迴文。弄長槐、黃鸝初滑。催捲幕、紫燕輕分。自溫存。漫調珠柱，更倚蘭薰。思君。綠窗細語，蠻箋心事，翦燭殷勤。好夢纔醒，又依燈影伴黃昏。畫乘鸞、丹青紈扇。裁連理、石竹羅裙。暗銷人。香閨歲月，幾浥紅綸。

念奴嬌 端午藍谿卽事

藍谿新漲。看金塘幾曲。畫樓臨水。不捲湘簾。人影動。水戲魚龍起。朱果雕蒲。粉盤繡  
虎。長縷飄香細。雲鬢著雨。更縈一川煙翠。回想家在東吳。彩衣聯臂。今日人千里。  
有箇凭闌凝望處。繭綵香囊誰寄。草號宜男。花開夜合。都是傷心地。雙雙碧鴨。幾回  
驚起沙際。

望海潮 寄壽家君

登樓翹首。白雲堆處。懸弧此日高堂。石髮梳風。荷裳映日。三三兩兩成行。好鳥奏笙  
簧。正新飛黃口。送語雕梁。目極心搖。青山遙隔舞衣長。堪憐遊子迴腸。恨烏衣此  
會。不捧霞觴。且禮慈雲。勤依佛日。細添一縷沈香。九頓祝無疆。更顏隨歡笑。心入清  
涼。解帶長松。臥看鶴影到池塘。

風流子 寫懷

千山梅雨歇。翠微裏。冉冉碧雲歸。想煮蘭庭戶。吳天平暖。罷蠶時候。越嶺低迷。憑闌  
久。朱霞明粉壁。黃鳥度新枝。看水散荷珠。暗成別淚。箋餘蕉葉。寫起相思。登樓攜



手處常牽惹。最是珍重聲遲。爲數幾圍明月。應問歸期。念湘竹簾中。半殘梔子。海棠階下。細點螢兒。好箇惱人天氣。獨自難支。

題西廂圖二十則

蝶戀花 初見

庭院沈沈春幾許。回影東牆。聽得花間語。願作游絲空裏住。隨人更落香風處。芳徑苔侵么鳳履。沒箇安排。冉冉行雲去。轉過薔薇驚翠羽。相思只在旃檀樹。

一翦梅 紅問齋期

綈欄春鎖上方清。身在絃雲。心對愁城。觚稜西下見娉婷。記得香階。細雨聲聲。玉女傳言此最能。曾整蘭衾。也泡銀箏。欲將心事托卿卿。應是多情。莫道無情。

生查子 生叩紅

雲鬢素袖低。口齒清如雪。不惜沈郎腰。爲卿更深折。匆匆姓字通。草草生辰說。憑將連理心。寄與丁香舌。

臨江仙 酬和

牆角清陰花月靜。一聯秀句雙成。不須紅葉更流情。風吹修竹響，傳得鳳凰聲。好影隔來心自語，碧雲細點春星。小桃枝下聽分明。消魂酬五字，清露越三更。

定風波 佛會

貝葉宣聲動法筵。月華燈影照嬋娟。半是傷春眉黛斂。無限。淚珠常近粉痕邊。七寶幡成紅綬帶。人在溫柔、鄉畔白雲天。總是玉人看不了。煩惱。楞伽無語靜爐煙。

清平樂 惠明賚書

風生雲袖。袖底蛟龍驟。一幅嚇蠻書在手。正是護花星斗。朱旗遠望潼關。蕨鞋踏上青山。且看錦囊飛度。便教紅線周旋。

踏莎行 請宴

粉傅何郎。香薰荀令。帽簷低亞花枝並。頻將宜稱問雙鬢。畫簾吹動風流影。鵲尾銀屏。燕涎金鼎。乘鸞指刻成佳倩。春陰立盡海棠東。合歡心事從頭整。

河滿子 聽琴

楊柳風吹鬢影。琅玕竹映迴廊。半疊屏山千里隔。琴心只傍西廂。今日求凰司馬。幾時跨鳳蕭郎。膝上情傳玉軫。花前淚浥香囊。靠損冰肌雙跳脫。不知月過東牆。喚起兩邊幽恨。何消一曲清商。

蘇幙遮 探病

紫苔深。薇幙掩。獨自支琴。賸得相思。領此日文園。眞命短。愁殺東風。總道無人管。念東牀。和夢遠。猶喜青衣。見我曾心慙。莫說相如消渴淺。玉露金莖。只在鸞幙畔。

解珮令 寄詩

蠻箋細襞。墨花輕染。一聲聲。愁紅初斷。字押相思。纔離了。狼毫斑管。早去憐。香綃雪腕。前宵琴曲。那宵玉盞。這衷懷。不堪重轉。寄語青鸞。倘若。是風悽雲暗。怎能勝。蜂吟蝶怨。

青玉案 得信

菱花看罷晨妝了。天外信傳青鳥。蹙損眉尖雙葉小。鴛鴦譜上金鍼初到。怕有人知道。嘗將密意輸春草。春草婢名消息通時又煩惱。誰識銀鈎真字好。微持薄怒。已曾心照。炤見和衣倒。

唐多令 越牆

銀砌粉圍牆。栖鴉淡月黃。做蜂兒、飛度也颺颺。錯抱花枝羞整帽。更小立、聽鳴璫。彈指玉纖長。輕紈映晚妝。對春風、無語不焚香。幾葉芭蕉連曲檻。看咫尺、近高唐。

眼兒媚 幽會

葳蕤金鎖啓春風。人在明月中。那時相見，猶將羅袖，半掩芙蓉。鸞衾整頓和香屑，鬢髮初鬆。溫玉小牕東。端詳此際，星眉微斂，蟬鬢初鬆。

誤佳期 紅辨

織女度銀河。靈鵲空擔怕。昔日燒香抱枕人。跪在湘簾下。不是野東風。錯把桃花嫁。誰移楊柳近牆東。又怪鶯兒詐。

風入松 離別

西風霜葉短長亭。驚動別離情。玉驄慣是催人去。茫茫也荒草雲平。紅袂分開雙淚，斜陽獨照孤征。陽關不唱第三聲。無計殢君行。纔辭鴛帳親銀鐙。迴頭看水綠山青。數兩車移垂柳，幾回雁起沙汀。

惜分飛 驚夢

茅店星霜人靜後。正是相思初透。夢遶風林驟。暗憐孤影清宵瘦。游仙半枕紅妝就。蝴蝶栖香未久。驚起披襟袖。桃花淚染看依舊。

柳梢青 金泥

鵲噪簷牙。泥金字樣。先寫寧家。特爲多情。人宜待月。宮近司花。歡容微靨朝霞。懷袖裏。沈吟看他。杏雨蒲風。惹人縈繫。最是宮紗。

虞美人 寄愁

白玉堂前芳草歇。賦盡江郎別。雙魚誰寄錦書來。正是滿函清淚向人開。濃愁細

數相思字。檢物經人意。嬌心更在不言中。珍重窄衫蘭麝散秋風。

醜奴兒令 鄭恆求匹

海棠已折他人手。待得來時。幾度黃鸝。好處春風別樣吹。人間自有真蕭史。無處容伊。月暗星移。金刀裁斷女蘿絲。

阮郎歸 晝錦

畫簾捲起鬱金堂。弄影過迴廊。宮袍新打內家香。當時解佩郎。攜翠管。近明窗。春山待曉妝。洛陽才子是東牀。西廂春夢長。

南鄉子 春感

滿眼落花紅。雙燕多情語漢宮。一代風流千古恨。匆匆。盡在新蒲細柳中。桃李怨春風。玉笛吹殘看塞鴻。一枕邯鄲無好夢。朦朧。教人莫唱大江東。

虞美人 惜春

蜂黃蝶粉依然在。無奈春風改。小窗微切玉玲瓏。千里行塵不惜牡丹紅。西陵松

柏知何處。目斷金樵路。無端花絮上簾鉤。飛下一天春恨滿皇州。

踏莎行 春夜寫懷

綠染荒丘。紅愁古戍。好春斷送斜陽路。天邊遺下碧桃花。人間競買珊瑚樹。芍藥香消。青梅酸破。這回難寫風流句。燈前尙愛墨花浮。明知宿業相纏處。

風流子 送春

誰教春去也。人間恨、何處問斜陽。見花褪殘紅。鶯捎濃綠。思量往事。塵海茫茫。芳心謝錦梭。停舊織。麝月嬾新妝。杜宇數聲。覺餘驚夢。碧欄三尺。空倚愁腸。東君拋人易。回頭處。猶是昔日池塘。留下長楊紫陌。付與誰行。想折柳聲中。吹來不盡。落花影裏。舞去還香。難把一樽輕送。多少暄涼。

一斛珠 寓言

垂陽如幕。看花每恨東風惡。舞衣雖在薇香薄。撩亂雲鬢。何處安金雀。天上柳綿吹又落。玉顏已破情如昨。當時賸有相思約。今日相思。人倚欄杆角。

小重山 寫懷

上苑苔侵臨砌花。杏梁新燕子，屬誰家。曉風吹破碧牕紗。丁香結，憔悴過韶華。有夢寄天涯。海棠開遍了，月痕斜。三春清淚落鳴笳。愁如海，不着踏青鞋。

錦帳春 遣意

好酒難勝遊絲易斷。片晌沈吟千遍。鷓鴣聲，蝴蝶夢，看夕陽多半。舊時臺殿。花點紅塵。繩牽紫燕。也應是、因緣一段。奈相思，千里月，任東風難教人排遣。

浪淘沙 楊花

金縷曉風殘。素雪晴飈。爲誰飛上玉雕闌。可惜章臺新雨後，踏入沙間。沾惹忒無端。青鳥空銜。一春幽夢綠萍間。暗處消魂羅袖薄，與淚輕彈。



梅村詩餘

運彰



吳偉業（萬曆三七——康熙一〇）

字駿公。號梅村。江南太倉人。弱冠舉崇禎辛未科會試第一。廷試第二。游陞至宮詹學士。清世祖聞其名。徵授祕書院侍講。國子監祭酒。以病乞歸。家居有林泉之勝。日與士友觴詠酬倡。詩文書畫。人爭藏弄。著有綏寇紀略及詩文樂府雜劇數十卷。

序

詞者詩之餘也。乃詩人與詞人，有不相兼者。如李杜皆詩人也。然太白菩薩蠻憶秦娥爲詞開山，而子美無之也。溫李皆詩人也。然飛卿玉樓春更漏子爲詞擅場，而義山無之也。歐蘇以文章大手降體爲詞，東坡大江東去，卓絕千古，而六一婉麗實妙。于蘇介甫偶然涉筆，而子固無之。眉山一家，老泉子由無之也。以辛幼安之豪氣，而人謂其不當以詩名，而以詞名，豈詩與詞若有分量，不可得而踰者乎？有明才人，莫過于楊用修湯若士，用修親抱琵琶度北曲，而詞顧寥寥。若士四夢爲南曲，野狐精而填詞自賓白外無聞焉。卽詞與曲亦有不相兼者，不可解也。近日詞林宗匠，往往專意詩古文，至度曲倚聲，則多擱筆。兼人之才，吾目中惟見梅村先生耳。先生文章，彷彿班史，然猶謙讓未遑。嘗謂予曰：若文則吾豈敢，于詩或庶幾焉。今讀其七言古律諸體，流連光景，哀樂纏綿，使人一唱三嘆，有不堪爲懷者。及所製通天台臨春閣秣陵春諸曲，亦於興亡盛衰之感，三致意焉。蓋先生之遇爲之也。詞在季孟之間，雖

所作無多。要皆合于國風好色小雅怨誹之致。故余嘗謂先生之詩可爲詞。詞可爲曲。然而詩之格不墜。詞曲之格不抗者。則下筆之妙。古人所不及也。休寧孫無言。遍徵當代名家詞。將以梅村編首。亡何而梅村歿矣。孫子手卷不釋。仍寓余評次刻之。可謂篤好深思。而余于先生琴樽風月。未忘平生。故謬附知言。序其本末如此。予觀先生遺命于墓前立一圓石。題曰詞人吳某之墓。蓋先生退然以詞人自居矣。夫使先生終于詞人。則先生之遇爲之也。悲夫。蘭陵鄒祇謨序。

# 梅村詩餘

太倉吳偉業駿公

## 望江南 本意

江南好。聚石更穿池。水檻玲瓏簾幕隱。杉齋精麗繚垣低。木榻紙窗西。

## 其二

江南好。翠翰木蘭舟。穿袖袂衣持楫女。短簫急鼓采菱謳。逆槳打潮頭。

## 其三

江南好。博古舊家風。宣廟乳爐三代上。元人手卷四家中。廠盒鬪雞鍾。

## 其四

江南好。蘭蕙伏盆芽。茉莉縷藏新茗椀。木瓜香透小窗紗。換水膽瓶花。

## 其五

江南好。五色錦鱗肥。反舌巧偷紅嘴慧。畫眉羞傍白頭棲。翡翠逐金衣。

其六

江南好。蒲博擅縱橫。紅鶴八番金葉子。玄盧五木玉楸枰。擲采坐人傾。

其七

江南好。茶館客分棚。走馬布簾開瓦肆。博羊錫鼓賣山亭。傀儡弄參軍。

其八

江南好。皓月石場歌。一曲輕圓同伴少。十反麤細聽人多。絃索應雲鑼。

其九

江南好。黃雀紫車螯。雞臙下鼓澆苦酒。魚羹加茱擣丹椒。小喫砌宣窖。

其十

江南好。櫻筍薦春羞。梅豆漸黃探鶴頂。芡盤初軟剝雞頭。橘柚洞庭秋。

其十一

江南好。機杼奪天工。孔翠裝花雲錦爛。冰蠶吐鳳霧綃空。新樣小團龍。

其十二

江南好，獅子法王宮。白足禪僧爭坐位，黑衣宰相話遭逢。拂子塞虛空。

其十三

江南好，鬧掃鬪新妝。鴉色三盤安鈿翠，雲鬢一尺壓蛾黃。花讓牡丹王。

其十四

江南好，綺飾綺羅仙。百綉細裙金線柳，半裝高屨玉臺蓮。故故立風前。

其十五

江南好，繡帥出鍼神。霧鬢湘君波窈窕，雲幢大士月空明。刻畫類天成。

其十六

江南好，巧技棘爲猴。髹漆湘筠香墊几，戩金螺鈿酒承舟。鍛鏤匠心搜。

其十七

江南好，狎客阿儂喬。趙鬼挪揄工調笑，郭尖儂巧善談嘲。幡綽小兒曹。

其十八

江南好。舊曲話湘蘭。薛素彈丸豪士戲。王微書卷道人看。一樹柳摧殘。

如夢令 閨情

鎖日鶯愁燕懶。徧地落紅誰管。睡起燕沈香。小飲碧螺春盃。簾捲。簾捲。一任柳絲風軟。

其二

誤信鵲聲枝上。幾度樓頭西望。薄倖不歸來。愁殺石城風浪。無恙。無恙。牢記別時模樣。

其三

小閣焚香閒坐。撼撼紙窗風破。女伴有誰來。管領春愁一箇。無那。無那。斜壓翠衾還臥。

其四



煙鎖畫橋人病。燕子玉關歸信。報道負情儂。屈指還家春盡。休聽。休聽。又是海棠開近。

又

昨夜酒闌人醒。移過玉人鴛枕。同到瑣窗前。照見一簾花影。誰肯。誰肯。不怕月明風冷。

生查子 春景

青瑣隔紅牆。撇下韓嫣彈。花底玉驄嘶。立在垂楊岸。纖指弄東風。飛出銀箏雁。寄語畫樓人。留得春光半。

又 閨情

香暖合歡襦。花落雙文枕。嬌鳥出房櫺。人在梧桐井。小院賭紅牙。輸卻蒲桃錦。學寫貝多經。自屑泥金粉。

又 旅思

梅村詩餘

一尺過江山。萬點長淮樹。石上水潺潺。流入青谿去。  
六月北風寒。落葉無朝暮。度  
樾與穿雲。林黑行人顧。

點絳脣 蕉團

細骨珊珊指尖拂。處嬌絃語。著水撩人。點點飛來雨。  
撲罷流螢。帳底輕風舉。眠無  
主。誤黏玉體。印得紅絲縷。

浣溪沙 閨情

斷頰微紅眼半醒。背人驀地下階行。摘花高處賭身輕。  
細撥薰爐香繚繞。嫩塗吟  
紙墨。欹傾。慣猜閒事爲聰明。

其二

一斛明珠孔雀羅。湘裙窄地錦文鞞。紅兒進酒雪兒歌。  
石黛有情新月皎。玉簪無  
力暖雲拖。見人先唱定風波。

菩薩蠻 野景

江天漠漠寒雲白。長橋客醉閒吹笛。沙嘴荻花秋。垂蘿拂釣舟。危峯欹半倚。仄徑蒼苔屐。欲上最高亭。遠山無數橫。

又 閨詞

謝家池館桐花發。畫屏曲屈翹紅袖。欲翦鳳凰衫。青蟲搖羽簪。一枝雙荳蔻。淺立東風瘦。春思遠於山。眉痕凡幾彎。

醜奴兒令 落紅

落紅已拂雕闌近。入手枝低。莫肯高飛。費盡東風著力吹。分明燕子啣來到。因甚差池。墜在污泥。惹動游絲不自知。

又 村居

溪橋雨過看新漲。高柳鳴蟬。荷葉田田。指點兒童放鴨船。前村濁酒沽來醉。今夜涼天。明月初圓。一枕西窗自在眠。

又 豔情

低頭一霎風光變。多大心腸。沒處參詳。做箇生疎故試郎。何須抵死推儂去。後約何妨。卻費商量。難得今宵是乍涼。

減字木蘭花 題畫

藤谿竹路。鳥道無人雲獨過。鹿柵猿棲。布襪青鞋客杖藜。江頭尺鯉。展罷生綃天欲雨。記得曾遊。古木包山五月秋。

又 美人足

香趺淺印。不浣春泥紅一寸。羅襪鉤鉤。點拍輕勻小鳳頭。歸來路滑。醉把雙纏微笑脫。撥醒檀郎。眼底端相白似霜。

謁金門 題美人圖

人離別。屏上小山淒絕。欲寄相思教誰說。梧桐初下葉。窗外綠鬟輕撇。立盡閒階。周折。慢把羅幃向前揭。早是愁時節。

憶秦娥 代沈初明

愁脈脈。江山滿目傷心客。傷心客。長干夢斷。滿橋聞笛。天涯攬鏡看衰白。秦川對酒青衫溼。青衫溼。冷猿悲雁。暮雲蕭瑟。

清平樂 題雪景

江山一派。換出瓊瑤界。凍合灘舟因訪戴。沽酒南村誰賣。草堂風雪雙扉。畫圖此景依稀。再補吾廬佳處。露橋一笠僧歸。

山花子 閨情

阿母頻催上玉鉤。侍兒先起護香篝。曉氣撲簾花。尙睡怯梳頭。鬢暈有情眉岫遠。額黃無盡眼波流。細骨輕軀春一把。許多愁。

柳梢青 有贈

紅粉牆高。風吹嫩柳。露溼天桃。扇薄身輕。香多夢弱。腸斷吹簫。誰能一見相拋。動人處。詩成彩毫。帳底星眸。窗前皓腕。又是明朝。

西江月 靈巖聽法

昔日君王舞榭。而今般若經臺。千年霸業總成灰。只有白雲無礙。看取庭前柏樹。那些石上青苔。殘山廢塔講堂開。明月松間長在。

又 詠別

烏鵲橋頭夜話。櫻桃花下春愁。廉纖細雨綠楊舟。畫閣玉人垂手。紅袖盈盈粉淚。青山翦翦明眸。今宵好夢倩誰收。一枕別時殘酒。

又 詠雪塑僧伽像

透出光明眼耳。忍來冰雪心腸。坐時兩手且收藏。捏弄兒童無狀。著體生成冷絮。開門自在齋糧。大千世界儘銀裝。到得來朝一樣。

又 春思

嬌眼斜迴帳底。酥胸緊貼燈前。匆匆歸去五更天。膽怯誰瞧見。臂枕餘香猶膩。口脂微印方鮮。雲蹤雨跡故依然。掉下一牀花片。

南柯子 涼枕

頰印紅多暈。釵橫響易尋。美人一覺在花陰。怕是耳珠鉤住鬢雲侵。有分投湘簾。無緣伴錦衾。眼多唧溜爲知音。受盡兩頭牽繫像人心。

又 竹夫人

玉骨香無汗。從教換兩頭。受人顛倒被人勾。只是更無腸肚便風流。嬌小通身滑。玲瓏滿眼愁。有些情性欠溫柔。怕的一時拋擲在深秋。

浪淘沙 題畫蘭

枉自苦凝眸。腸斷歸舟。依然明月舊南樓。報道孫郎消息好。楊柳風流。花意落銀鉤。一寸輕柔。生綃不翦少年愁。看取幽蘭啼露眼。心上眉頭。

又 端午

纏臂綵絲繩。妙手心靈。眞珠嵌就一星星。五色疊成方勝小。巧樣丹青。刻玉與裁冰。眼見何曾。葫蘆如豆虎如蠅。旁繫纒絲銀扇子。半黍金鈴。

又 枇杷

上苑落金丸。黃鳥綿蠻。曉窗清露溼雕盤。恰似戒珠三百顆。琥珀沈檀。纖手摘來看。香色堪餐。羅衣將褪玉漿寒。怕共脆圓同薦酒。學得些酸。

鵲橋仙 夜景

園林晚霽。池塘新漲。明月窺人縹緲。萬木陰森。穿影過。驚噪起。一羣山鳥。度銀河斜轉。露溼桂花香悄。少年此夜不須眠。把鐵笛橫吹到曉。 纖雲暗

鷓鴣天 遊仙

絳節電旌降下方。玉卮娘怨瑣瑤房。桃花阿母難拘管。流出桃源賺阮郎。 紫鳳輦。碧霞觴。麒麟爲脯玉爲漿。人間別有黃姑夢。笑把雲和引鳳凰。

南鄉子 新浴

皓腕約金環。豔質生香浸玉盤。曲曲屏山燈近遠。偷看。一樹梨花露未乾。 扶起骨。珊瑚裙衩風來怯。是單背立梧桐貪避影。更闌。月轉迴廊半臂寒。

又 春衣



玉尺剪裁工。鬪色衣衫巧樣縫。深淺配來纖手綻。重重。蒲紫蒲青雅澹中。斜領叩金蟲。透肉生香寶袜鬆。茜袖半垂鴉襪淺。從容。百折羅裙細細風。

又 牡丹頭

高聳翠雲寒。時世新妝喚牡丹。豈是玉樓春宴罷。金盤。頭上花枝鬪合歡。著意畫煙鬢。用盡玄都墨幾丸。不信洛陽千萬種。爭看。魏紫姚黃總一盤。

臨江仙 逢舊

落拓江湖常載酒。十年重見雲英。依然綽約掌中輕。燈前纔一笑。偷解砑羅裙。薄倖蕭郎憔悴甚。此生終負卿卿。姑蘇城上月黃昏。綠窗人去住。紅粉淚縱橫。

又 過嘉定感懷侯研德

苦竹編籬茅覆瓦。海田久廢重耕。相逢還說廿年兵。寒潮衝戰骨。野火起空城。門戶凋殘賓客在。淒涼詩酒侯生。西風又起不勝情。一篇思舊賦。故國與浮名。

醉春風 春思

門外青驄騎。山外斜陽樹。蕭郎何事苦思歸。去。去。燕子無情。落花多恨。一天憔悴。  
私語牽衣淚。醉眼佯人覷。今宵微雨怯春愁。住。住。住。笑整鸞衾。重添香獸。別離還未。

又 春情

眼底桃花媚。羅襪鉤人處。四肢紅玉軟無言。醉。醉。醉。小閣迴廊。玉壺茶暖。水沈香細。  
重整蘭膏膩。偷解羅襦繫。知心侍女下簾鉤。睡。睡。睡。皓腕頻移。雲鬟低擁。羞眸斜睇。

江城子 風鶯

柳花風急糝清明。小兒擊。走傾城。一紙身軀。便欲上天行。千丈游絲收不住。纔跌地。  
倏無聲。憑誰牽弄再飛鳴。御風輕。幾人驚。江南二月聽呼鷹。趙瑟秦箏天外響。彈  
不盡。海東青。

千秋歲 題袁重其侍母弄孫圖

吳中佳士。獨有袁絲耳。營筆墨。供甘旨。但期慈母笑。敢告吾勞矣。願只願。年年進酒。春風裏。少婦晨妝起。抱得佳兒侍。珠一顆。駒千里。石麟天上送。蠟鳳階前戲。回首道。待看兒長還如此。

風入松 題和州守楊仲延所寄鷹阿山人戴君畫

長松落落蔭南岡。亂山橫砌銀塘。梅花消息經年夢。慢支頤、老屋繩牀。葉几風吹散。帙紙窗雨洗疎篁。丹青點染出微茫。妙手過倪黃。寒雲流水閒憑弔。誰能認、當利橫江。翰墨幽人小戴。文章太守歐陽。

金人捧露盤 觀演秣陵春

記當年。曾供奉。舊霓裳。歎茂陵、遺事淒涼。酒旗戲鼓。買花簪帽。一春狂。綠楊池館。逢高會。身在他鄉。喜新詞、初填就。無限恨。斷人腸。爲知音、仔細思量。偷聲減字。畫堂高燭。弄絲簧。夜深風月。催檀板。顧曲周郎。

紅林擒近 春思

龜甲屏還掩。博山香未焦。鸚鵡暖猶睡。曉鶯上花梢。醒來擡身半晌。細雨溼夢無聊。女伴戲問春宵。笑頰暈紅潮。黛眉新月偃。羅襪小蓮靴。更衣攏鬢。背人自折櫻桃。怨玉郎起早。日長倦繡。小樓花落吹洞簫。

柳初新 閨思

畫欄深鎖鴛鴦暖。照素影、花枝軟。綠雲斜鞞。寶釵欲墜。倦起日高猶嬾。嗔道是風簾捲。半擡身、慵開嬌眼。閣外青山點點。問平疇、綠蕪誰糝。玉驄嘶去。欲窺還避。肩倚侍鬟微掩。凝望處、雙眉斂。似不禁、燕拘鶯管。

洞仙歌第一體 梅花

梅花獨自倚東風。低說那一枝、向誰折。更高處偏寒。玉手徘徊。知有贈、惹我梅心如結。晚來憐素影。影亦誰人。偏是今宵共明月。正傳柑時候。薄袖輕衫。蟬鬢動、腰肢清切。但屈指、年來攜手處。又不道梅花、像人離別。

意難忘 山家

村塢雲遮。有蒼藤老幹。翠竹明沙。溪堂連石穩。苔徑逐籬斜。文木几。小窗紗。是好事人家。啓北扉。移牀待客。百樹梅花。衰翁健飯堪誇。把癭尊茗椀。高話桑麻。穿池還種柳。汲水自澆瓜。霜後橘。雨前茶。這風味清佳。喜去年。山田大熟。爛漫生涯。

滿江紅 題畫壽總憲龔芝麓

楚尾吳頭。僅斗大、孤城山縣。正遇着、青絲白馬。西風傳箭。歸去秦淮花月好。召登省閣。江山換。更風流、黨籍總尋常。思量徧。文史富。才名擅。交與盛。聲華健。正三公開府。張燈高宴。綠鬢功名杯在手。青山景物圖中見。待他年、揀取碧雲峯。歸來羨。

又 白門感舊

松栝凌寒。掛鍾阜、玉龍千尺。記那日、永嘉南渡。蔣陵蕭瑟。羣帝翱翔騎白鳳。江山縞素。觚稜碧。躡麻鞋。血淚灑冰天。新亭客。雲霧鎖。臺城戟。風雨送。昭邱柏。把梁園未寢。燒殘赤壁。破衲重游山寺冷。天邊萬點寒鴉黑。羨漁翁、沽酒一蓑歸。扁舟笛。

又 過虎邱申文定公祠

相國祠堂看古樹。蒼崖千尺聽斷澗。轆轤聲緊闌干吹笛。士女嬉游燈火亂。君臣際會松杉直。任年年急雨打荒碑。兒童識。今古恨興亡蹟。白社飲青門客。歎三公舊事。吾徒蕭瑟。歌舞好隨時世改。溪山到處還堪憶。儘浮生風月倒金尊。千人石。

又 贈友

顧盼雄姿數馬稍。當今誰比論富貴。刀頭取辦只應如此。十載詩書何所用。如吾老死溝中耳。願君侯。誓志掃秦關。如江水。烽火靜。淮淝壘。甲第起。長安裏。尙輕他絳灌。何知程李。揮塵休談邊塞事。封侯拂袖歸田里。待公卿。置酒上東門。功成矣。

又 感舊

詩酒溪山足笑傲。終焉而已。回首處。亂雲殘葉。幾篇青史。昔日兒童俱老大。同時賓客今亡矣。看道旁。爭羨錦衣郎。曾如此。遭際盛聲名起。跨燕許。追蘇李。苟不知一事。吾之深恥。年少卽今何所得。孝廉聞一當知幾。論功名。消得許多才。偶然耳。

其二

滿目山川。那一帶、石城東冶。記舊日、新亭高會。人人王謝。風靜旌旗瓜步壘。月明鼓吹秦淮夜。算北軍、天塹隔長江。飛來也。暮雨急。寒潮打。蒼鼠竄。宮門瓦。看雞鳴埭下。射雕盤馬。庾信哀時。惟涕淚。登高卻向西風灑。問開皇。將相復何人。亡陳者。

又 贈余澹心

綠草郊原。此少俊、風流如畫。儘行樂、溪山佳處。舞亭歌榭。石子岡頭開奏伎。瓦官閣外看盤馬。問後生、領袖復誰人。如卿者。雞籠館。青溪社。西園飲。東堂射。促松枝塵尾。做些聲價。賭墅好尋王武子。論書不減蕭思話。聽清譚。聲聲逼人來。從天下。

又 重陽感舊

把酒登高。望北固、奔濤中斷。還記得、寄奴西伐。彭城高讌。飲至凌歊看馬射。秋風落木堪傳箭。歎黃花、依舊故宮非。江山換。獨酌罷。微吟倦。斜照下。東籬畔。念柴桑居士。高風誰見。佳節又逢重九日。明年此會知誰健。論人生、富貴本浮雲。非吾願。

又 賀孫本芝壽兼得子

老矣君謨。曾日啖荔枝三百。拂袖去。筇輿芒屨。彈琴吹笛。九日登高黃菊酒。五湖放棹。青山宅。論君家住處。本桃源。仙翁石。門第盛。芝蘭集。五福滿。雙珠出。看龍文驥子。鳳毛殊特。竹馬鳩車階下繞。朱顏綠鬢。尊前立。問今朝。誰捧碧霞觴。同年客。

又 感興

老子生平。雅自負。交游然諾。今已矣。結茅高隱。溪雲生閣。暇日好尋鄰父飲。歸來一枕松風覺。但拖條。藤杖筇鞋輕。湖山樂。也不赴。公卿約。也不慕。神仙學。任優游散誕。斷雲孤鶴。健飯休嗟容鬢改。此翁意氣。還如昨。笑風塵。勞攘少年場。安耕鑿。

又 蒜山懷古

沽酒南徐。聽夜雨。江聲千尺。記當年。阿童東下。佛狸深入。白面書生成底用。蕭郎裙屐偏輕敵。笑風流。北府好譚兵。參軍客。人事改。寒雲白。舊壘廢。神鴉集。儘沙沈浪洗。斷戈殘戟。落日樓船鳴鐵鎖。西風吹盡。王侯宅。任黃蘆。苦竹打荒潮。漁樵笛。

又 壽金豈凡相國七十



雒社耆英。高會處。門前雙戟。風景好。沙堤花柳。錦堂琴瑟。北叟南翁須健在。東封西  
禪何時畢。羨蒼生。濟了錦衣歸。神仙客。法醞美。雕薪炙。燈火照。笙歌席。正珠樓雪  
滿。早梅消息。矍鑠青山霜。鐙馬歡娛紅粉春。泥屐願百年。父老進霞觴。昇平日。

又 壽顧吏部松交五十

拂袖歸來。閒管領。煙霞除目。算得是。與人無競。高飛黃鵠。眼底羊腸逢九坂。天邊鱷  
浪愁千斛。脫身時。還剩辟疆園。浮生足。尊酒在。殘書讀。拳石小。滄洲綠。有風亭月  
榭。醉彈絲竹。嫩籜雨抽堂下筍。蒼皮霜洗窗前木。倩丹青。寫出虎頭癡。山公屋。

又 題尤悔菴小影和原韻

納納乾坤。問才子。幾人輕許。人爭道。北平司李。騷壇宗主。碣石宮傾北海酒。令支塞  
捲西風雨。更翩然。解組賦歸來。雲深處。三毫頰。平添與。虎頭筆。神相佇。似元龍百  
尺。樓頭高踞。鷓蚌利名持壁壘。觸蠻知勇分旗鼓。只莊周。爲蝶蝶。爲周。都忘語。

六幺令 詠桃

一枝穠豔。蘸破垂楊色。到處倚牆臨水。妝點清明陌。障袖盈盈粉面。獨倚斜柯立。深紅淺白。無言忽笑。鬪盡鉛華半無力。年年閒步過此。柳下人家識。煙臉嫩霧鬢斜。腸斷東風客。燕子欲來還去。滿地愁狼藉。芳姿難得。韶光一片。囑付東君再三惜。

水調歌頭 題贈

三月鶯花盛。十里小紅樓。輕裘肥馬。年少錦帶佩吳鉤。人道季心兄弟。還是翁歸伯仲。談笑擅風流。下馬飲君酒。消盡古今愁。燒銀燭。張筵宴。繫蘭舟。主人開閣招我。別墅好淹留。家有風亭水榭。伎奏玉絲金管。妙舞擘箏篴。二十四橋夜。明月滿揚州。滿庭芳 道場山麓太白山人亭成吳蘭次置酒同諸子分韻得人字

鐵笛橫腰。鶴瓢在手。烏巾白袷行吟。仙蹤恍惚。埋玉舊煙林。多少唐陵漢寢。王孫夢。一樣消沈。殘碑在。詩人高士。留得到而今。雲深。記此地。相逢五隱。白石同心。喜今朝吾輩。酌酒登臨。忽聽松風驟響。蘇門嘯。彷彿遺音。歸來晚。峯頭斜景。明日約重尋。

燭影搖紅 山塘卽事

踏翠尋芳。柳條二月春風半。秦娘家在畫橋西。有客金錢宴。道是留儂可使。細沈吟、迴眸顧盼。繡簾深處。茗椀爐煙。一牀絲管。惜別匆匆。明朝約會新亭館。扁舟載酒問嬋娟。驀地風吹散。此夜相思豈慣。孤枕宿、黃蘆斷岸。嚴城鐘鼓。凍雨殘燈。披衣長歎。

倦尋芳 春雨

欺梅黯淡。弄柳迷離。一幅煙水。醉墨模糊。澹插浮屠天際。卷湘簾。憑畫閣。白鷗點點飛還起。視吾廬。如掀翻一葉。空江深處。記今朝。南湖禊飲。士女嬉游。此景佳麗。細馬輕車。不到斷橋西路。雙屐衝泥。僧喚渡。一瓢沽酒。柴門閉。料今宵。對殘燈。客情憔悴。

念奴嬌 卽事

東籬殘醉。過溪來、閒訪黃花消息。小院高樓門半掩。細雨闌干吹笛。側帽狂呼。擲筆緩唱。翠袖偎人立。欲前還止。此中何處佳客。卻是許掾王郎。風流年少。爛醉銀釵。

側。十載揚州春夢斷。薄倖青樓贏得。徧插茱萸。山公老矣。顧影顛毛白。凭高惆悵。暮雲千里凝碧。

木蘭花慢 過濟南

天清華不注。搔首望白雲齊。想尙父夷吾。雪宮柏寢。衰草長堤。松耶柏耶在否。祇斜陽七十二城西。石筍功名何處。鐵籠籌算都非。儘牛山涕淚沾衣。極目雁行低。歎鮑叔無人。魯連未死。憔悴南歸。依然洋洋東海。看諸生。奏玉簡金泥。誰問礪礪戰骨。秋風老樹成圍。

又 話舊

西湖花月地。櫻筍熟。鱖魚肥。記粉袖銀箏。青簾畫舫。煙柳春隄。驚風一朝吹散。歎西興兵火渡人稀。白髮龜年尙在。青山賀監重歸。恰相逢紫蟹黃雞。猶唱縷金衣。奈狂客愁多。秋娘老去。木落烏栖。無情斷橋流水。把年光。流盡付斜暉。世事浮生急景。道人抱膝忘機。

又 壽嘉定趙侍御

仰頭看皓魄。切莫放酒杯空。記六詔飛書。百蠻馳傳。萬里乘驄。天南碧雞金馬。把枯棋。殘局付兒童。雞黍鹿門高隱。衣冠鶴髮衰翁。歎干戈滿地飄蓬。落日數歸鴻。喜歇浦寒潮。練塘新霽。投老從容。菊花滿頭須插。向東籬。狂笑醉顏紅。高館青尊紅燭。故園黃葉丹楓。

又 中秋詠月

冰輪誰碾就。千尺起。嘯臺東。記白傅堤邊。庾公樓上。幾度曾逢。今宵廣寒高處。問嫦娥。環佩在何峯。天上銀河珠斗。人間玉露金風。聽江樓鶴唳橫空。人影立梧桐。有宮錦袍緋。綸巾頭白。鐵笛仙翁。欲乘明月飛去。過嚴城。下界打霜鐘。醉臥三山絕頂。倒看萬箇長松。

又 壽汲古閣主人毛子晉

向湖高隱處。較漆簡。定遺經。正伏勝加餐。揚雄強飯。七略縱橫。爭傳殺青奇字。更五

千餘偈叩南能。夜雨蒲團佛火。春風菌閣書聲。臥荒江投老遺民。兵後海田耕喜。柳塢堂開。月泉詩就。貰酒行吟。高談九州風雅。問開元以後屬何人。百歲顛毛斑白。千年翰墨丹青。

水龍吟 送孫浣心之真定

無諸臺上春風。燕南魏北聲名起。金戈鐵馬。神州沈陸。幅巾歸里。種柳門前。藝瓜陂下。北窗煙雨。遇天涯。故舊貽書到。一鞭行李。滹沱水。挾瑟高堂。趙女問叢臺。幾人珠履。青史紛爭。干戈談笑。陳餘張耳。漢壘秦軍。季龍宮苑。銷沈何處。向孤城。但有寒鴉。落木暮天羈旅。

永遇樂 壽江林有郡丞

二水東流。千山西擁。中有英彥。漢重言詩。齊推善賦。綵筆彤墀薦。大堤驄馬。五嶺朱幡。移向吳雲一片。看油幢。譚笑丰神。紫氣佳哉葱蒨。華堂開處。楊柳千條。拂面玉簫金管。茉莉香清。枇杷果熟。五月榴花宴。黃梅雨足。綠野陰濃。盡說太平重見。願使

君長把瑤觴，輕揮紈扇。

風流子 爲鹿城李三一壽

青山當戶牖，秋光霽，明月倒壺觴。羨金粟道人，草堂松竹，青蓮居士，藜閣文章。傳家久，朱門開累葉，畫省付諸郎。綠酒黃花，淵明高臥，紅顏白髮，樊素新妝。登高頻回首，江南舊恨在，鐵笛滄浪。十載故園兵火，三徑都荒。待山園再葺，讀書萬卷，湖田晚熟，縱博千場。老子婆娑不淺，儘意疏狂。

又 送張編修督學河南

中原人物盛，征驂過，花發洛陽街。羨嚴助承明，連城建節，茂先機近，好士掄才。賓徒滿賦成，誇授簡，鐘鼓遶繁臺。嵩嶽出雲，鬱葱千仞，濁河天際，屈注西來。憑高披襟處，千觴引醺醪，意氣佳哉。回首當年獻賦，綵筆親裁。待尙書尺一，趨歸視草，門盈桃李。學士高齋，領取玉堂佳話，黃閣重開。

又 掖門感舊

咸陽三月火。新宮起。傍鎖舊莓牆。見殘甃廢磚。王遺構。荒薺衰草。一片斜陽。記當日文華開講幄。寶地正焚香。左相按班。百官陪從。執經橫卷。奏對明光。至尊微含笑。尙書問大義。共退東廂。忽命紫貂重召。天語琅琅。賜龍團月片。甘瓜脆李。從容宴笑。拜謝君王。十八年來如夢。無限淒涼。

沁園春 贈柳敬亭

客也何爲。十八之年。天涯放游。正高談拄頰。淳于曼倩。新知抵掌。劇孟曹丘。楚漢縱橫。陳隋遊戲。舌在荒唐一笑收。誰真假。笑儒生誑世。定本春秋。眼中幾許王侯。記珠履三千宴畫樓。歎伏波歌舞。淒涼東市。征南士馬。慟哭西州。只有敬亭。依然此柳。雨打風吹絮滿頭。關心處。且追陪少壯。莫話閒愁。

又 午朝遇雨

十里紅牆。樹色陰濃。銅扉洞開。見觚稜日炫。金銀照耀。朱霞天半。避暑樓臺。忽起奇雲。琉璃萬頃。燕雀罍風動來。西山上。有龍迎返照。急雨驚雷。涼生殿閣佳哉。但



瀟灑瑤階絕點埃。聽御河流水。琤琮雜佩。黃滋細柳。翠逼宮槐。玉管銀毫。冰桃雪藕。枚馬詩成應制才。承恩久。待歸鞭晚霽。步月天街。

又 雲間張青瑀從中州南還索詞壽母

極目中原。慷慨平生。濁醪一杯。念高堂老母。桓嫠志行。窮途游子。仲蔚蒿萊。雅負經綸。文章小技。三尺遺孤。何壯哉。辭家久。到燕南趙北。赤日黃埃。吾徒造物安排。且布襪青鞋。歸去來。有蓴羹鱸膾。能供蔬饌。魚村蟹舍。可葺茅齋。貧賤安親。詩書養志。世上機雲少棄才。成名後。把懷清築起。百歲高臺。

又 觀潮

八月奔濤。千尺崔嵬。砉然欲驚。似靈妃顧笑。神魚進舞。馮夷擊鼓。白馬來迎。伍相鳴夷。錢王羽箭。怒氣強於十萬兵。崢嶸甚。訝雪山中斷。銀漢西傾。孤舟鐵笛風清。待萬里乘槎。問客星。歎鯨鯢未翦。戈船滿岸。蟾蜍正吐。歌管傾城。狎浪兒童。橫江士女。笑指漁翁一葉輕。誰知道。是觀潮枚叟。論水莊生。

又 丁酉小春海棠與水仙並開王廉州爲余寫秋林圖初成因取瓶花作供

輒賦此詞

有美人兮。宛在中央。仙乎水哉。似藐姑神女。凌波獨步。瀟湘極浦。洗盡塵埃。忽遇東鄰。彼姝者子。紅粉燕脂。笑靨開。須知道。是兩家妝束。一種人材。東風著意安排。蚤羯鼓催成。巧樣裁。豈陳王賦就。新添女伴。太真睡起。共倚香臺。玉骨冰肌。豔梳濃裹。妙手黃筌未見來。霜天晚。對膽瓶雙絕。點染幽齋。

又 吳興愛山臺禊飲分韻得關字

妍景銷愁。輕衫乘興。扁舟往還。遇使君倒屣。銀牀枕簟。羣賢傾蓋。玉佩刀環。下若新醅。前溪妙舞。落日樓臺。雨後山。雕闌外。有名花婀娜。嬌鳥綿蠻。衰翁天放。疏頑。況廿載重來。詎等閒。歎此方巖虎。青絲白馬。孫吳時山寇嚴白虎與呂蒙戰于吳興之石城山當年宋態綠鬢紅顏。唐李涉有贈吳興妓宋態詩所謂解語花枝在眼前也春色依然。舊游何處。剩得東風柳一灣。吾堪老。傍鷗汀雁渚。石戶松關。

賀新郎 送杜將軍弢武

雙鬢愁來白。數威名、西州豪杰。玉關沙磧。家世通侯黃金印。馬稍當年第一。磨盾鼻、縣毫飛檄。雅吹投壺詩萬首。舊當陽、虎帳春秋癖。思往事、頓成昔。天涯寂寞青門客。念平生、鞭笞萬里。布衣之極。滿地江湖漁歌起。誰弄扁舟鐵笛。正柳色、依依南陌。日暮鄉關何處是。故人書、沒草摩崖石。漫回首、淚沾臆。

又 病中有感

萬事催華髮。論龔生、天年竟夭。高名難沒。吾病難將醫藥治。耿耿心中熱血。待灑向、西風殘月。剖卻心肝今置地。問華佗、解我腸千結。追往恨、倍悽咽。故人慷慨多奇節。爲當年、沈吟不斷。草間偷活。艾灸眉頭瓜噴鼻。今日須難訣絕。早患苦、重來千疊。脫屣妻孥非易事。竟一錢、不值何須說。人世事、幾完缺。

梅村詞有數刻。多寡不一。家藏稿最晚出。校舊刻梅村集。溢出甚多。惟取以校孫默刻本。則孫本更多十首。而家藏稿之可補孫刻者亦四首。茲彙

次之梅村詞之傳世者。殆盡於此矣。丙子六月朔校。

靜  
惕  
堂

詞

蓮  
影



曹溶（萬曆四一——康熙二四）

字潔躬。又字秋岳。號倦圃。浙江嘉興人。明進士。考選御史。順治初。起河南道御史。督學順天。累遷戶部侍郎。左遷廣東右布政使。遭喪歸里。服除。補山西按察副使。備兵大同。缺裁後。籤發四川軍前候用。丁憂不復出。康熙中。舉博學鴻詞。以疾辭。薦修明史。亦不赴。家富藏書。勤於著述。有靜惕堂集。

吾鄉倦圃曹先生著述之富。在牧齋梅邨伯仲間。乃錢吳專集。行世已久。近且墨渝。紙敝。獨靜惕堂詩文。未之雕刻。豈著述之傳否。固有數存焉耶。抑其出也愈後。則其傳之者彌永耶。從孫愷仲昆季。取所填詞。先付梨棗。彝尊憶壯日從先生南游嶺表。西北至雲中。酒闌燈炮。往往以小令慢詞。更迭倡和。有井水處。輒爲銀箏檀板所歌。念倚聲雖小道。當其爲之。必崇爾雅。斥淫哇。極其能事。則亦足以宣昭六義。鼓吹元音。往者明三百祀。詞學失傳。先生搜輯南宋遺集。尊曾表而出之。數十年來。浙西填詞者。家白石而戶玉田。春容大雅。風氣之變。實由先生。當世君子。得先生詞誦之。必有思雕先生之詩文者。先生之著作。雖出之也晚。庶幾傳之彌永焉。同郡年家子朱彝尊序。

# 靜惕堂詞

嘉興曹 溶潔躬

## 十六字令 閨情

輕。認得伊家畫屨聲。花邊繞。蛺蝶不曾驚。

## 荷葉杯 怨思

細雨江邊春纜。綠暗。玉筍溼羅巾。佳期定約藕花新。真麼真。真麼真。乳燕銜泥飛過。獨坐。邂逅粉郎遊。捧觴含笑撥箜篌。留麼留。留麼留。

## 望江南 本意

江南遠。乳燕不曾來。千里信回春水闊。一年人去野棠開。香閣在塵埃。江南小。近日不藏春。朱戶半開眠宿酒。粉娥成隊散輕塵。絃管正愁人。江南別。舊淚一雙流。笛弄夜涼關路黑。蟲懸葉老玉衣秋。且莫盼蘭舟。江南恨。亭榭少人看。醉裏不堪啼鴉早。夢餘初覺賣花寒。風雨又漫漫。



如夢令 有感

喚起殘紅鶯困。銜取餘香蝶嫩。獨坐此何年。閣外飄來幽恨。休問。休問。都遶眉峯一寸。

又 有懷

夢斷金爐不暖。春到櫻桃小苑。驚起燕雙飛。斜倚闌干晝短。人遠。人遠。心被東風吹軟。

相見歡 與蔣前民飲酒

霜天敝了羊裘。荻花秋。恰遇織簾高士倚江樓。垂柳罅。琵琶砑。是揚州。觸著一生心事到眉頭。

酒泉子 春情

翠陌人遙。和淚銀泥欲滴。帳中香。牆外笛。冷春宵。畫裙空綰鴛鴦帶。夢去重簾相礙。月嫌明。花倦戴。待歸橈。

生查子 代贈

簾外響銅籤。雁唳秋宵遠。羅帳燭光微。不信檀郎淺。  
惜別展幽歡。夢逐銀屏轉。飛去學鴛鴦。一枕花魂軟。

點絳脣 寄興

斜掩紅窗影。迷前日桃花路。送春三度。只有人如故。  
瘦減腰圍。每被征衫訴。歸心誤。雨聲深處。江上扁舟暮。

又 平遠臺秋眺

媿殺陳琳磨殘鐵。倪收軍後。喜逢涼晝。千里都穿透。  
高處生寒。漸逼蠻花瘦。人如舊。海光一溜。熨盡青山皺。

浣溪沙 閒情

陌上髯蘇唱柳綿。載花須趁越江船。惜春春去又今年。  
靜館碧樽閒客夜。軟風紅藥恨人天。新來何處得輕憐。

又 倦圃山礬盛開

飄盡紅英陌上塵。雕闌重倚玉腰身。仙花喚得小名真。  
膩粉愁銜蜂翅軟。溫香舊憶麝臍勻。春歸偏要惹遊人。

又 四十年來所見歌姬某氏最麗贈之

仕女行來樂部同。雙垂羅帶鬢蟬鬆。心兒旖旎錦堂中。  
浪滾舞茵憐靜婉。塵輕香跡認翔風。幾曾容易得相逢。

玉笛先將密意通。新聲一縷絳雲籠。把人薰得口脂濃。  
屏裏撲成驚蛺蝶。燭前捏就軟芙蓉。只愁春到不禁風。

又 獨坐

檀板休催日暮天。烏程信斷冷銀船。杖頭飛盡阮家錢。  
芍藥開時心易怯。鷓鴣啼後夢難圓。僧樓閒看雨聲眠。

又 湖上

屐齒驕奢謝客兒。愛尋蘇小看腰肢。不知誰作有情癡。倚醉自貪山一簇。舞殘剛剩柳千絲。今年總是憶人時。

又 春怨

鶯粟花開又別家。蘼蕪綠上小窗紗。粉牆西去卽天涯。白雨偷將春令換。黃昏慣使客心邪。愁來那得好山遮。

一絡索 行中僧將賣藥賦此堅之

焦團坐破添雲甑。佛多長命。白堤遊女十分嬌。偏喚出、韓康姓。一派冷香詩徑。淹留無定。直饒手挽上池來。怕未識、英雄病。

霜天曉角 春怨

亭陰弄碧。嬾把金樽側。莫怪淚痕常滿。與東風、舊相識。芳信連朝隔。玉簫吹不得。最是慊慊心性。比垂楊、更無力。

又 同香山敬可夜坐倦圃

月華千頃。畫燭搖花冷。恰。到五湖深處。平生事。付漁艇。鶴警。銅壺靜。做成今夜永。正是愁腸無限。幾片葉。送秋影。

巫山一段雲 偶詠

蝶戲湘裙帶。花啣寶髻絨。深深妝閣乍相逢。眉黛爲誰濃。婉步疑生月。嬌歌不耐風。寄情搖曳玉光中。休更託春葱。

菩薩蠻 茉莉

家本枕榔江上住。江南恰是留儂處。金屋尙愁寒。春前莫借看。綠窗垂嫩雪。小院人難別。催送夜情來。珊瑚枕畔開。

又 與侍兒

眼前萬事隨流水。閨中也灑英雄淚。淚罷拊雕闌。玉情生暮寒。主人空放誕。屢見金釭爛。休恃酒如泉。解憂須少年。

卜算子 伊璜再攜歌姬過

宮樣晚妝鮮。一隊湘蘭弱。道是才人撮合成。嫵媚終難學。簫管鬧花場。舞袖搖金雀。漫信雛年不怨春。意思燈前覺。

又 偶見

孤簾隔花涼。雙燕催人起。香徑秋波瞥地生。綠皺眉峯底。咫尺對芙蓉。未許鴛鴦倚。若問從今悶若何。心在重門裏。

又 題琴士隱庵畫像

客裏適逢君。十指如冰玉。陶令無絃太寂寥。辜負樽中綠。畫裏又逢君。紫綺臨修竹。何處青山解惜人。好奏歸鴻曲。

採桑子 雲塞秋夜

隔牆絃索無心聽。挑滅銀燈。暗憶平生。白髮蕭蕭酒易醒。月華風定芭蕉冷。樓上三更。不住雞聲。一枕江南夢未成。

又 懷香侯

春衣歇馬行山道。重見涼颿。雁字相挑。回首錢唐北上潮。

頽陽漠漠黃沙苦。鬢影

初凋。憶弄詩瓢。落盡燈花又一宵。

又 查伊璜兩度出家姬作劇

舞衣貪著吳宮錦。花簇雙靴。山畫長蛾。待訴衷情隔絳河。

新詞填就勤分付。衆裏

驚波。道字偏訛。惹得周郎顧轉多。

又 姑蘇顧氏席上小鬢

踏歌未曉歌中意。荳蔻初含。荳蔻初含。飛到楊花便不堪。

羅巾欲乞題紅句。眉語

相探。眉語相探。懊惱檀郎夢已酣。

又 寄赤豹

芭蕉幾陣簷前雨。瘦盡多情。小小溪亭。一種離愁畫不成。

梅花斷碣江天遠。枯淚

猶零。莫聽瑤箏。恐有何堪舊日聲。

又 鞏都尉席上

古藤花下銀釭滿。紫鳳斜飛。賈涕沾衣。吹徹秦簫事已非。  
圖書只似蓬蒿冷。碧瓦雙扉。宮漏霏微。說劍青燈客未稀。

減字木蘭花 沈家歌姬

編雲作隊。避人慣在深簾內。已許相看。卻又移燈遠翠盤。  
腰肢漸瘦。惜春不耐清明後。莫和秦箏。要聽香喉第一聲。

又 紅葉

霜酣千樹。踏遍洞庭西去路。不會傷秋。只當花林爛漫遊。  
山橋野岸。尙有垂楊青一半。落盡金風。看入誰家錦字中。

清平樂 冬夜

月波秋瀉。松冷穿窗罅。散步湖干漁笛下。的是含情者。  
夜闌蟋蟀如年。浮花倦理。舫船吟遍滿階黃葉。奈他心在秋邊。

又 題壁



雲屏十二。僊客曾同醉。草沒建炎碑上字。歲月憑誰語。  
花樓。抖擻喉間秀句。雪斜猶倚樓西。

臘痕水出平堤。鷓鴣只檢

銅駝巷陌。較遜吳天碧。乳燕未來香寂寂。王粲成閒客。  
行裝。少許麴生風味。費他一夜迴腸。

鬢絲新點春霜。佛樓冷盡

偶來津館。望裏冰花滿。月白夢迴雞不管。只覺銅壺緩。  
層城。任說鐵腸難挽。淚痕還到銀箏。

雲芽細煮孤鐺。蓬山隔了

憶秦娥 坐黃鶴樓上

江千尺。晚來風景秋蕭瑟。秋蕭瑟。斜陽檻外。數行金戟。  
柳憐孤客。憐孤客。飛仙安在。喚他吹笛。

杯乾重把闌干拍。楚宮垂

眼兒媚 旅情

衣錦軍中恨如麻。美酒近難賒。春衫溼透。唐家司馬。不爲琵琶。  
山影綠窗紗。夜長天倦。數聲簷鐵。瘦盡梅花。抱琴卻到誰行宿。

攤破浣溪沙 憶廣南胡家歌姬

緩步藏春進酒來。好風微覺畫裙開。料是君家常作使。莫嫌猜。送恨將心吹玉管。含羞當面整金釵。輕薄未應嫌杜牧。且徘徊。

青衫溼 田戚畹家姬東哥甲申後爲教師遇之有感

定場娘子霜棲鬢。先唱渭城花。重翻宮調。開元舊曲。知付誰家。此身似燕。春巢畫棟。秋宿平沙。相如抽管。長門寫怨。輸與紅牙。

又 廣林飲李太虛寓中出家姬作劇

紅橋舊日深情地。一片玉簫吹。畫蛾青斂。著人多處。不在歌時。教師催出。齊登繡毯。擺落遊絲。曲終簾掩。堂前黃月。占斷相思。

又 記湖上彈琴之會

流蘇盡日垂珠箔。門外紫苔斑。喚茶鸚鵡。金籠前後。徐露青鬢。自憐纖指。大家風調。寫盡幽閒。繡囊深掛。撥殘香獸。一片寒山。

西地錦 題虞山蔣文從雪泛卷

一抹玉沙平野。且莫停杯罌。有時臥雪。有時歌雪。恣高人陶寫。吹火打篷堪畫。在讓王山下。誰家曲水。誰家輞水。又相隨來也。

少年遊 寄項帽雪

客囊清減似窮秋。典盡酒家裘。桃花競笑。鹿車還後。楚館日悠悠。定研蘭露裁新句。分付雪兒謳。最好今年。兩番上巳。偏少晉人遊。禾輿溪上草連天。不見翠樓煙。黑頭潘令。滿襟離怨。贏得唾珠圓。送歸野艇無多日。皓魄已初弦。春信將闌。可能相就。開榼海棠前。

又 遊橫山園悼李舒章

雲峯百尺引蒼虬。著意寫芳秋。斜暉窈窕。螭蛄啼出。才子不能留。鰕鬚如有神山隔。畫棟只藏愁。舊日池塘。情波無盡。難蕩木蘭舟。

又 壽客

楸枰敲罷拂花茵。相對玉麟峒。龍劫修來，秦灰不染，拾得太平身。當歌難拾鷓鴣

西江月 再過某宅聞歌

蓮影頻催象拍。粉香難透鰕鬚。人間恨事可消除。惟有聰明最苦。數對雛鶯自語。一行弱柳誰扶。醉魂飄蕩憶當初。又被橫波約住。

南柯子 旅恨

馬度離人地。山銜去國程。孤身都似雪花輕。僥倖不知春色，過清明。小榭低金鎖。重簾冷玉笙。那家沽酒甚多情。又被晚風催送，宿沙城。

又 王家歌姬

映座蘭心巧。穿窗柳線斜。斛珠買遍五陵花。記取十分春暖，在君家。畫鼓剛過了。瑤笙較嫩些。此宵易惹病根芽。怨殺天邊銀漢，一痕沙。

青門引 焚香

乍入消魂徑。旖旎相期不定。名園花氣惱人多。困來無力。不敵金猊靜。輕翻宿火。寒猶凝。甲煎嫌他硬。今宵似有憐惜。隔簾送出春情性。

醉花陰 席上

繡幄籠寒穿小徑。簾外微風定。勸酒碧笙嬌。玉漏將殘。好夢如春令。青衫江上憑誰贈。豔曲連宵聽。久已割柔腸。翠影侵人。添卻當年病。

又 春怨

嫩柳亭前黃幾許。雪密鶯無語。指冷入瑤絃。畫燭微昏。祇覺情如縷。人生最是離時苦。問故園歸路。不惜馬蹄忙。香草連天。擬逐東風去。

又 雲署五月初見芍藥

簾捲清湘寒影皺。香逼蜂鬚透。花信憶金盤。密約雖遲。傾國還依舊。玉欄風露端陽後。塵土淹衫袖。幾日費清醪。強欲留春。又怕因春瘦。

又 同辰六紅橋泛舟

庾信才多無著處。堤上微雲度。莫看紫桃花。相趁遊蜂。畫屨聲中去。三臺催齋牙。檣暮。到玉鉤殘路。須念有情難。苦論興亡。直是書生誤。

浪淘沙 閒情

青鳥信沈沈。淚滴羅襟。落紅無力上瑤簪。最是橫塘風乍緊。吹散柔心。玉盞惜空斟。冷落從今。夢迴人倚畫牀陰。借問誰家香閣裏。占得春深。

又 詢孔子威墜馬

野岸石橋濱。雪色初勻。揚鞭一試紫駟新。記取黃沙沈戟地。不是花茵。持酒酌芳辰。年少腰身。羅衣低拂五陵塵。回首微聞相痛惜。樓上佳人。

又 題吳蘭次收繪小像

癡絕此漁翁。不釣三公。吳南越北柳陰濃。萬事且須看脚下。海闊山空。百怪舞蛟龍。雨雨風風。熱腸斂手是英雄。欲展絲綸還有待。人在圖中。

又 夜思同芝麓作

清月喚愁心。酒罷空吟。隔牆斜墮海棠陰。故國千門難鎖夢。歸路沈沈。鶯囀舊時音。芳樹成林。自從離後損瑤琴。欲寄青山添黛色。莫待春深。

又 初春

不脫木綿裘。閒倚空樓。呼兒整頓舊觴籌。殘雪溪門剛待掃。莫放扁舟。綠意逗簾鉤。欲上還休。黃鶯無力囀香喉。春正關人何事也。依約心頭。

鷓鴣天 送項帽雪遊山陰兼訊劉薰臣

有客乘船氣吐霓。千山先禁子規啼。玉壺沈釀微風起。斑管籠鵝落日低。離紫邏。得青泥。納涼剛值藕花堤。定裁樂府劉生曲。寄我相思到越溪。

南鄉子 訪傅青主

淚點爲誰紅。曾踏天街柳絮風。執手松莊春恨晚。冥濛。倦向河山數晉宮。逃世轉情濃。破衲閒披鬢策中。說是道人終不信。豪雄。白髮難令酒榼空。

又 許家土窟中有侍飲者

沙路驟華韉。愛覓君家暖室眠。定向袁閔傳舊樣。天然。花吐冰芽分外鮮。皓腕快  
餘寒。夜夜張燈玉影圓。不用繡帷遮朔氣。纏綿。借得三春到酒邊。

又 徐電發自錢塘署中貽菊莊詞寄此

古寺客翛然。誰遞鱸香到枕邊。無限紅情歸錦字。爭妍。蕭九娘家聽冷泉。官閣疊

花甃。四壁名山夜不眠。已倩東風吹夢去。春前。叱撥驕嘶御柳煙。蕭九娘家去菊莊

後語也

又 陳集生遺酒

白髮苦相勾。腸斷西湖聽雨樓。難喚柔奴吹玉笛。歸休。割取天涯一段秋。無復鷓

鷓裘。好友初停日暮舟。滿載葡萄三百斛。淹留。看到醅釀綠未愁。

吳地有情人。話徹聯牀隔幾春。眼底銅槃銷夜漏。逡巡。高築糟丘閣畫輪。富貴竟

誰真。花絮同飄陌上塵。無奈熱腸閒不得。殷勤。好爲青山惜此身。

虞美人 同徐敬可看林家紫牡丹



城南水漲前村路。險被青泥誤。好風扶我畫欄前。玉琢吳宮小字正當年。王家步  
幃棲香滿。暈逐脂痕轉。醉中不奈拍聲催。從此映花驕馬帶愁歸。

又 陳路若寤軒酒坐

琵琶錯落亭中雨。沒箇忘情地。三臺催得唱黃雞。遙想插花馬背踏春泥。朦朧倚  
玉頻推枕。失卻纏頭錦。嫌他喚我作狂生。起看夕陽城角幾峯青。

又 同龔芝麓沈止嶽席上觀伎

翠眉初盪情波轉。午夜觥籌暖。一身重疊好風吹。誰念客腸離恨卻千迴。歌闌惱  
殺鄰雞報。塵暗長安道。明朝還約臥花茵。無奈今宵已瘦看花人。

又 泊京口有寄

故園寒食看花客。眠盡雲帆窄。王郎難信不風流。慣學吹簫弄酒石城遊。南朝一  
抹沈煙霧。喚作銷魂路。別來相寄彩牋頻。縱使春山無恙也愁人。

又 春情

月斜新試珠衣舞。欲解離情苦。天涯作客更勾留。又向畫橋西畔賦春愁。玉鞭佳興隨芳草。萬事催人老。勸君長倚燭花看。莫待子規啼後憶輕寒。

又 蠟梅

檀心半吐圓如磬。別作孤山境。鴉黃本出漢宮人。直待涪翁句裏一枝新。斜吹滿樹寒香蹙。此後春應續。霜天依約縷金泥。可惜銜花么鳳不曾栖。

又 夜懷

紅香最易辭人去。瘦損金荃句。客衣不耐晚風尖。癡憶夜情年少倚春纖。初更忽送城頭角。酒病時時作。出遊何用費沈吟。占斷五湖冰雪到如今。

翻香令 史赤豹貽宜興所製瓷爐

紫沙團就百花泥。玲瓏壓倒博山低。安排處。宜深帳。看篆煙、裊過錦帆西。從今軟暖把人迷。寶鳧長日不須攜。惜無箇、真消受。出春葱、籠袖熨冰肌。

夜遊宮 唵叭香

石葉金鳧帶潤。較聲價、龍涎猶遜。暗向重帷探芳信。玉關來、漢宮方傳不盡。莫使  
黃昏近。伴姣語、粉渦眉暈。獨倚熏籠覺春困。憶人時、暖雲中心一寸。

玉樓春 張爾唯命寇白勸酒

開筵喜近東籬節。撩亂黃蜂孤館熱。禁城宮漏已三催。未許麗人容易別。霓裳著  
意明肌雪。北里聲高心尙怯。恨經羌管一番吹。揉碎齊梁風與月。

又 同止岳南湖舟中聽歌

船窗倚處蘋風曉。淡學內家妝束好。和歌休用十三絃。看取櫻桃紅綻早。五湖今  
夜遊船少。猶勝五陵添蔓草。玉容扶起玉山頹。鸚鵡一生花下老。

踏莎行 答客問雲中

堠雪翻鴉。城冰浴馬。搗衣聲裏重門閉。琵琶忽送短牆西。當時不是無情地。帳底  
燒春樓頭熱浴。百錢便博征夫醉。寒原望斷少花枝。臨風也省看花淚。

又 春憶

宿醞紅凝。新篝綠翦。柔腸全爲雙蛾轉。最難調護是輕寒。簾旌斜帶楊絲捲。宮額  
棲鸞。仙娥舞燕。花欄密縫曾偷見。今年春氣倍撩人。能容幾箇閒消遣。

唐多令 戲答方敦四

吳舫出嬌娥。輕衫蹙繡羅。踏花田、冷透雙鞵。任是錦帆催去急。留客意。有迴波。  
擬聽清歌。維摩奈病何。不如人、千種蹉跎。飲到旗亭剛吐氣。腸斷句。柳家多。時

又 沈石友宅同王覺斯聽歌達旦

何物號多情。秋波心畔青。古長安、不少銀箏。會得中年陶寫意。商女唱。也輕盈。休  
便踏霜行。今宵換鬢星。捲金蕉、添箇茶鐺。縱是沈郎能譜韻。聽醉語。不分明。

又 阻風銅陵

谿館漲愁煙。寒沙落雁前。對牀頭、短劍蕭然。恨乏故人攜酒送。漁燈畔。枕書眠。無  
語淚空懸。征衫似舊年。望江心、白浪連天。盡把香車吹散了。剛留我。倦遊船。

又 憶人

新綠到芭蕉。汀洲上淺潮。倦來時、難過溪橋。幾尺錢塘門外路，晴不定，雨連宵。客影任飄飄。羅裙瘦滿腰。攜殘酒、重買雙橈。縱使藕花開遍了，人去後，也蕭蕭。

又 乙酉七夕感悼

梧葉一聲乾。瑤華再見難。洞簫中、清淚成團。惆悵仙郎騎白鳳，剛遇得，漢宮殘。乞巧欲追歡。銀河入夜寒。鵲雙飛、不到長安。從此天孫新樣錦，空付與，玉樓看。

又 同晉賢泛舟

鼻陣起前汀。橫斜尚有亭。信蘭橈、徑指南屏。欲踏鳳凰山下路，金粉迹，已零星。漁唱最堪聽。相邀倒玉瓶。問夷光、何似湘靈。若使天公牋可上，先乞取，六朝青。

臨江仙 同俞右吉看牡丹

曾是洛陽遊俠客。銷魂的爲名花。相俛鄉路酒重賒。暖香開未遍，疑待鼓聲撾。亭上樂章多協律。傾城今在誰家。日光須用錦絲遮。也知蜂蝶性，春暮最天邪。

又 甲寅中秋同吳瑤如蘭次香爲痛飲

高柳忽推明月出。生公呼上湖船。世間難得有情圓。相逢常此夜。忘卻用兵年。潑  
飲但愁鳴酒甕。傾囊再買江鮮。萬人耳語聽三絃。更深遊女散。便借石場眠。

又 次日復同瑤如諸公飲

樓上忽驚燈影歇。吳儂不重餘宵。銀蟾靜看十分嬌。酒星還作伴。相贈彩雲高。莫  
話錦堂京洛事。山中畢竟風騷。秋娘爲我吮霜毫。去留無限恨。倦鵲起僧寮。

又 旅恨

風日麗人楊柳岸。玉沙曾驟花鞦。舊遊不見柳飛絲。錢神交已絕。憔悴五侯筵。雪  
封滄海猶垂釣。羊裘破自今年。俠腸百折酒罏前。何戡頭已白。誰與訴鶻絃。

蝶戀花 杏花

深巷賣花將客喚。候逼清明。記取韶光半。玉勒城南芳草岸。少年情味天難管。斜  
倚一枝嬌盼遠。沽酒他家。細雨空零亂。淚溼粉渦紅尙淺。有人樓上和春倦。  
幾度尋芳穿繡陌。燕子初來。便覺寒無力。人倚玉樓成舊識。春衫也借花顏色。不

比桃夭能暖客。曲曲江邊。零落尤堪惜。煮酒香時重見憶。賣餠天氣曾吹笛。

又 宿半村草堂

凍掩雲屏知幾曲。山滿簷牙。幻作玲瓏玉。翦盡芭蕉前度綠。銜花鶴夢誰能續。浮雲往事傷幽獨。萬里關河。苦語銷銀燭。野鹿自無鐘鼎福。此生只合林中宿。

蘇幙遮 中秋無月

葉聲繁。鴻信斷。懊恨孤眠。時序頻頻換。桂子平分秋一半。銀漢空明。午夜寒簾看。短簫邊。雙杵畔。玉殿依稀。薄霧輕遮斷。不遣嫦娥將酒勸。怕酒醒時。喚起愁無算。

又 城東柴家木樨垂枝直下貼地皆花密不見本中穹如屋壁其廣受四筵

與他種異記之

錦幢低。青幄緊。結伴來遊。箇箇沾金粉。宛有瑤臺千尺分。高處生寒。較是橫看穩。種爭新。名尙隱。除了焚香。又喜攀條近。紫雁斜飛開自準。本與秋期。翻惹三秋恨。

醉春風 有懷

歌館留殘醉。麗句揉花碎。當年百種說風流。易。易。一路鳴蛩。半窗斜月。便成憔悴。  
冷色搖空砌。寶鴨爐煙細。背人爭解不思量。記。記。似柳將眠。如鶯欲語。小樓春  
賦。

酷相思 旅情

象拍何須歌豔句。又燒燭、紅窗暮。歎今古、韶華留不住。花落也、催歸去。葉落也、催歸  
去。失意多因杯酒誤。辜負春無數。只樓外、江山成客路。鴻斷也、書來處。雲斷也、愁  
來處。

青玉案 沈家姬卯娘善度曲戲詠卯字

花前舉樂何須忌。薄曉瞳瞳初麗。啓戶逢君嬌不語。三秋兔魄。平分留影。垂柳東邊  
去。鏤成新玉剛爲字。十二時中排第四。中酒嫌人知也未。芳名檢點。春光已半。會  
取相迎意。

江城子 雪夜



誰移臘信破春枝。翦成絲。瑞難知。凍逼羅衾。香閣費禁持。欲覓胭脂相襯好。留不到。杏花時。打窗連曙響參差。酒盈卮。付歌兒。溼透重裘。前夢耐尋思。幾度關山驢背苦。歸縱美。已嫌遲。

又 冬雪

谿南密把萬山遮。斷遊車。較寒些。作伴盧仝。敲火聽煎茶。莫羨朱門羅帳底。斟美酒。撥琵琶。夢回香燼繡衾斜。是他家。隔天涯。獨對蘭缸。玉浸綠窗紗。不恨東風吹尙緩。妝閣畔。預添花。

金人捧露盤 豐臺看花

跨雕鞍。攜紅袖。出城中。望古臺。煙靄濛濛。漫雲步障。弄春傾國帶深宮。春如留戀。歇馬處。驀地相逢。罷金樽。停檀板。癡客淚。點青銅。舊題詞。柳絮輕籠。遊絲不斷。香車餘地。長新叢。落花難喚。鳥銜起。費盡東風。

祝英臺近 太白酒樓

贖汾陽。呼杜甫。笑脫錦裘舞。古柳千條。還識酒人否。夜來鐵笛聲高。徘徊騎鶴。更何處。漁陽鼙鼓。舊遊處。荒草空嵌唐碑。飛仙已歸去。憔悴青衫。詩瘦向誰語。憶他春在樓中。登樓更苦。恰剩得。滿樓煙雨。

又 同楊香山次辛稼軒韻

鳳凰山。烏鵲渡。錦纜逗寒浦。抱膝空林。世事幾煙雨。羨他漉酒先生。蕭蕭三徑。把江左。黃花留住。那堪覩。昨日燕市悲歌。霜髭鏡中數。殘漏荒雞。耿耿十年語。漫嫌愁向春深。春光好處。便策取。紫騮前去。

一叢花 再飲唐濟武寓中

蕊珠簪筆舊名都。深意托征途。移牀直踞芙蓉頂。勅銀鹿、休擾松廳。埋雪小亭。團圞琴趣。此樂世間無。閒來說餅勝新酥。紅友映冰壺。排憂勸我須沈醉。聽城上、三度啼烏。無分珥貂。嵇公嬾也。歸倩好山扶。

又 三飲濟武寓中

午陰招去踏芳堤。記得宋時谿。層冰舞作蛟龍勢。恨難上、千仞霞梯。深坐解愁，金缸乍燼，春在畫簾西。紅牙拍遍正如泥。蕉葉又編題。山光鉦鼓沈埋後。有狂客、方許幽棲。還怕分襟，多將松竹，付與杜鵑啼。

御街行 題程雲來小像

珊瑚隨處繫漁竿。香水對浮巒。風光況肯留人住，也誰能、復據雕鞍。古今高士，龍蛇變化，同作五湖看。連朝相訊酒腸寬。歡伯報平安。如君豈忍拋春去，也正當、綠遍紅攢。喬松倚杖，名花拂履，難信草堂寒。

踏青遊 閨情

幾陣楊花，院落淒然寒食。又墮向、送別樓側。任笙歌闌珊去，旗亭野草如織。休說東風舊識。爲東風惹他相憶。自起捲簾，凝眸乍疑金勒。有杜宇聲聲將息。拚清淚常流到、大江南北。日長怕春倦，淚也有時無力。

慕山溪 與王襄璞飲酒

閒心千種。惟有秋難着。孤雁不禁寒。又邊鼓、吹開畫閣。曾移小舸。吹笛弄江煙。多少事。耐尋思。斜倚闌干角。新添白髮。回首平生錯。無故踏征塵。早辜負、花間翠箔。飛觥相屬。同是客中人。檀板急。舞裙輕。贏得肌如削。

洞仙歌 同葉星期探桂未開感賦

今年白露嫩蕊簾前賣。生怕風飄滿羅帶。到湖陰、蕩槳閒逐文魚。思折得、付與納涼人戴。誰家留古墅。草沒窗楞。似向愁時把愁賽。老榦只參天。冷碧斜飛。鋪一片、影娥詞債。算此世、黃金百無情。併月底幽花。暗螢啼壤。

又 贈崔兔牀

寫詩江上。割蕉峯蒼蘚。如虎鬚髯向風撚。迴眸驚、薄暮貯酒空腸。葫蘆側、難憶盛年歌管。戍樓微夢在。宋玉情孤。十二巫雲翠輪短。喚樵舟共載。綰柳成鞭。島瘦郊寒。應不免。許我再相逢。白頭時。但密雪書牀。將燈細翦。

華胥引 題畫梨花牡丹次張叔夏韻

徐熙妙腕。團合花魂。尺縑疑溼。曳露含風。胭脂到底輸淡白。借他閉雨門深。夢洛陽香國。狂客成詩。酒酣殿上小立。何處濃華。遽相惱。素娥閒逸。雪妝初就。冷落歌鐘不得。三月紛紛車馬。遍江南江北。撩亂休嫌。要人緊護春色。

江城梅花引 秋思

夕陽山闕戍樓空。厭西風。已西風。何事風吹偏向客愁中。沙草斜連銅狄路。酒旗捲。一程程。遶漢宮。漢宮。漢宮。掃殘紅。花一叢。柳一叢。憶也憶也。憶遠送。又泣孤鴻。可惜鴛鴦湖上冷歸篷。謾道夢魂能識路。今夜裏。比春來。夢不同。

又 除夕和赤豹

蕭蕭疏影弄新紅。盼東風。未東風。眼角一杯香氣透簾櫳。酒自着人人自嬾。淒涼甚。莽關山。剩倦翁。倦翁。倦翁。小樓中。燈又濃。夢又重。夜也夜也。夜過半。難解詩窮。賴有長牋清響寄高鴻。總把寒更吹教暖。春動也。怕春光。不屬儂。

惜紅衣 美人鼻

黛角稜分。山尖樣軟。淺渦雙鞞。界破花鈿。何曾用梳裹。酸來自擁。剛配得、目低眉鎖。  
婀娜芳縷乍迎。勝櫻桃含顰。凝脂欲浣。搓粉無痕。遮他杏衫可。攀枝臭蝶。寶鼎撥  
新火。爲問鏤金羅帶。拭涕背人知麼。感噫頻應是。思我好春閒坐。

東風齊着力 春怨

寒食初分。酸風猶急。敝盡貂裘。賓朋廣坐。樂事也難留。況值頻吹畫角。人消瘦、嬾上  
秦樓。駝峯底。絲絲鬢雪。塵滿吳鉤。遠淚不須流。從此去、歲華暖到筵篔。陌頭草綠。  
輦道美人遊。競勸金壺酒罷。輕帆動、細雨蘭舟。誰知是、依然冷塞。不斷新愁。

法曲獻仙音 南滿鐵塔

茉莉編毬。毬毬裝錦。霸府猶傳香土。蜃海璇宮。劉郎無恙。棲禪似憐兒女。向逐鹿、神  
州日。南天墜花雨。大豪舉。聚宮中。黑金生鑄。磨滅盡、只剩紀年數語。想像出遊時。  
擁珠旃。人影如絮。鐵石非堅。問千年、活計何許。儘情癡論古。殿角鷓鴣飛去。

又 飲濟武寓中

小幔籠香。短牆圍玉。認得元龍庭院。獸炭排寒。蟲編映日。都將塵世偷換。看屋裏、青山好。煙城已天半。尋詩伴。捲葱溼。澆漿澆餅。酣適甚。花底似聞鶯管。淡泞客心長。總無殊。飛絮春軟。恁劈紅牋。選瓊瑤。隨風宛轉。願江南且住。曳杖柳陰頻見。

滿江紅 錢塘觀潮

浪湧蓬萊。高飛撼、宋家宮闕。誰盪激、靈胥一怒。惹冠衝髮。點點征帆都卸了。海門急鼓聲初發。似萬羣、風馬驟銀鞍。爭超越。江妃笑。堆成雪。鮫人舞。圓如月。正危樓湍轉。晚來愁絕。城上吳山遮不住。亂濤穿到巖灘歇。是英雄、未死報讎心。秋時節。

又 程古狂招集舟中

雨後潮平。依稀近、龍舟令節。高會處、風塵逆旅。幾迴愁絕。謝客詞多蘭蕙瘦。石家春去珊瑚折。送閒情、千種到杯中。真蕭屑。鐵漢老。心如鐵。雪兒媚。歌成雪。恁良宵遊覽。月圓無缺。湘水寄書梁燕遠。秦樓吹笛林花咽。買沙棠、艇子繫湖干。人難別。

六么令

張老四曾事雲間周勒卣。度曲甚美。遇之悵然。

奈何聲裏。微見兩眉皺。珠盤乍調宮徵。訝出殘鶯口。欲喚周郎再起。帳底親傳授。誤來知否。含思不語。坐待屏深燼香獸。客願圓蟾蕩漾。合樂圍青岫。我愛孤鶴飄飄。緩酌拋紅豆。心事非關粉黛。借取消儻。淚光漣透。浮雲誰在。每爲多才更回首。

又 宮香餅用辛稼軒韻

一從仙去。莖上露盤折。龍奩競開珠鎖。斜印花紋滑。舞袖宜教薰透。莫睡屏間鴨。玉階遙接。着人春氣。未試輕煙已頻覺。心事多隨逝水。含怨憑誰說。長記宿火温温。繡被深宵壓。近日披裘老大。荀令難重學。石腸新怯。許辭蕉醜。靜聽松聲掃庭雪。

玉漏遲 宣府嚴弁宅女樂

鸞聲喧古榭。良宵坐我。通明簾下。十八女郎。須用大蘇描寫。莫被柳家惡句。把膩粉。塗污春社。剛一罇。洞簫歇處。濃香來也。肯道夢雨無情。便釀就悲歡。雜些真假。乍遠屏風。欲團好花輕打。筵外貌貅盡散。蘭膏焰。尙融霜瓦。辭送者。空餘淚珠墮馬。

又 宿耕石山房



雲根林外遠。卜廬恰在。吳天拂曉。約我高凭。漸覺杖頭綿邈。南園那時柳色。知閱過、  
騶驂多少。眼底一浮漚。莫管蘆笙世老。池上狎遍羣鷗。況玉醴盈瓢。醉醒多好。借  
我閒宵。夢斷王孫芳草。手弄一簾花霧。盼不徹、兩湖青裊。誰解道。直把吟情壓倒。山  
房遠近皆韓氏南園故址

滿庭芳 金龍池祠唐鄂公傳收龍馬池中

野隴餘寒。長橋無板。已到蛩語荒祠。古泉吹雪。鐵石響參差。彷彿金鑣欲出。秋濤壯、  
綠滿平池。驂騑逝。唐家勳業。一片土花滋。樓煩西盡處。山圍舊翠。柳曳新絲。問畫  
船安在。漁舍誰施。雨歇鴛鴦自浴。軍壘上。蘆管驚遲。回頭望。春江脈脈。目斷故人思。

又 李晉王墓下作

殿宿莓苔。岡平最屬。虛寢遙控簾鉤。義兒成隊。左右列松楸。誰放沙陀雁影。盤仙李、  
飛入并州。收京闕。赤心家世。長拱紫宸樓。英雄誇亞子。提刀百戰。囊矢前騶。漸司  
香遺廟。埋玉荒丘。事去棠梨漫落。滹沱化。淚點長流。金鳧出。優伶天下。麥飯一時休。

又 賀吳菌次遷居

笠澤湖邊滄浪亭畔。而今始結芳鄰。論丘數壑誰主復誰賓。自卜浣花深處。更辭他、嚴武車輪。依然好。年年松菊。占斷六朝春。使君高世度。紫衫蒼珮。不博閒身。但移書十乘。草閣無塵。安問鄉關遠近。得徜徉。便屬佳辰。奇懷在。休營一室。裘馬正嶙峋。

又 止岳有和憶廣南胡家二姬之作再賦

錦席相招。麝飀對列。樺燭銷盡銅壺。醉人天氣。蘭露溼金鋪。翠黛雙雙自掃。篋部、密甚還疏。清音顫。猶疑教就。窈窕世間無。當時年尚盛。飛觥按拍。意大情粗。只等閒看過。不解成圖。忽到青衫冷落。鮫淚灑。一半模糊。臨高望。煙條雨葉。嶺路付蘼蕪。

又 武陵寓舍與介皇兄

天與深情。樓頭花萼。晴煙最是氤氳。葛巾拖杖。同采峽山雲。忽復移船入市。三通鼓、軍帳驚聞。鄉關近。葦鱸佳趣。小隱幸曾分。建安無俗調。名香寶鴨。竟夕須薰。挹芙蓉清露。五色成紋。誚我金元弱藻。握蘭莖。濡首辛勤。懷遺事。驅車洛水。徐出宓妃裙。

又 寄徐蘭生

飄盡桃花。幾年相念。詞場寂甚寒冰。松籬竹磴。黛色遠千層。夢想敲殘玉子。分曹賭、清酒三升。方瞳好。蠅頭蠶尾。烏几日堪憑。香奩添軟語。羌排風月。占斷溪藤。是愁多丰度。混俗無能。築就橫秋小閣。臥山中。白髮難增。情深處。紅絃綠撥。豔煞一宵燈。

鳳凰臺上憶吹簫 題朱竹垞詞集

燒燭鴻天。惜花雞塞。馬卿偏好傷春。正翠鈿盈袖。弱絮隨輪。無限柔腸宛轉。秋雨夜、夢想朱脣。抽銀管。湘簾乍捲。寶鴨橫陳。眞眞。此番瘦也。酒醒後新詞。只索休頻。待繡帆高挂。遲日江濱。齊列瑤箏檀板。攜妙妓。徐步香塵。歸難定。寒宵坐來。一對愁人。

漢宮春 人日雪

金縷新妝。過帖雞時節。酥酪堆盤。愁人合遇此日。舊臘剛殘。天公着意。厭蕭條、遊戲千般。依約借。并刀翦水。和花飄到欄干。邊地沒些梅柳。儘無情山色。飛去漫漫。先生向來閉戶。迴避征鞍。將裘換酒。踏瓊瑤。領略春寒。知只有同心鳳侶。高樓自捲簾。

看。

又 借寓畊石山房

僻好巖居。倩猊薰石枕。蟻汎金船。顛毛似欺暮雪。特地爭妍。樵童解意。剪藤梢、疏出飛泉。成逸致。鄰家聲叟。打門來送蕉牋。行樂須連上日。看簇蛾妝豔。啣鳳燈圓。長生亦自餘事。玩世當然。耘花飼鶴。小經綸、常廢宵眠。誰并贈。西湖一曲。宋時宮月嬋娟。

水調歌頭 釣臺

行過富春渚。絕壁倚青天。披裘男子高臥。安取客星懸。手弄桐廬煙霧。秋水不隨人老。花覆打魚船。青史幾興廢。竿影至今圓。摘松鬣。摩蘚石。恨高寒。謝家如意偏到。山頂泣嬋娟。欲起雲臺將相。羅拜先生牀下。漢鼎定千年。舊事休深論。谿畔且安眠。

又 贈琴士程隱庵

鐵笛老仙去。無復採花船。剛存湖角煙靄。夕照助蒼然。晞髮橫觥旅舍。恰得提嵇挈。

阮。古意滿朱絃。象板不須奏。大雅正當前。青冥處。無人會。調空傳。一切浮華剝盡。高對逸人眠。攜到蜀都眉黛。又拜漢家官爵。此福恐難全。曲罷且危坐。香雪舞翩跹。

天香 姚氏牡丹

麝檻融脂。蜂衙纈翠。遊人顧影宜晝。幻出珠含。斜分錦護。宛是雒京時候。依稀穀雨。枝共葉。難容春瘦。歌樓叢粉。爭翹酒國。千紅密罽。壓倒羣芳不謬。和清平、玉環能否。此際爲伊憐惜。任伊薰透。野老毫尖禿盡。又誰料、風情尙如舊。遠餞歸檣。林香晚奏。

燭影搖紅 答香侯

秋色中分。銀蟾催徹樓頭晏。五湖歸浪隔芙蓉。徙倚朱欄遍。誰寄題詩紈扇。仗賓鴻、彩毫重見。遠山停雪。野帳傳烽。愁來庭院。未脫征衫。一年聽盡銅壺箭。錦駟成隊。玉關開。近息沙場戰。不信孤臣身賤。但看取、冰華拂面。難醫白髮。任說丹砂。夜涼人倦。

又 楊州己未正月十四夜

江左名宵。六街化作流蘇結。讓他燈影乍分明。最愛朦朧月。攪動閒愁不歇。遍相逢、鬧花驚蝶。裁紈扇小。塗粉車輕。陳隋時節。冷落紅橋。頓看簫管吹教熱。肯嫌芳藥未開園。火樹層層葉。今夜何人報帖。記三生、杜郎曾說。曲殘簾下。酒醒樓頭。春愁尙怯。

聲聲慢 七夕媚雪敬可過用禁體

前宵雨急。翻海排江。草閣幸自無憂。汛掃山廚。百錢權買涼秋。眼中好友都在。擊珠盤、高按歌喉。任相誚。把烟波一曲。換卻封侯。翠幌濃香似夢。指疏星、幾點練影垂鉤。暗想羅衣。飄動爭倚危樓。老夫正發清興。肯學他、兒女含愁。願此去。折巖花、頻記勝遊。

倦尋芳 湖口

晚風乍急。山勢茫茫。曾詫龍踞。一片雲帆。遊子寄愁何處。戰艦橫空天際落。百年都

付漁樵語。算羈棲。甫羊城挑菜。又飄江絮。念處士、葛巾漉酒。解組投閒。田舍如故。手種黃花。那管怒潮來去。孤帳驚寒。蘆荻岸。石鐘聲送長宵曙。正無聊。喜猿啼。對銷蘭炷。

又 招赤豹飲倦圍

五陵遊歇。催買花枝。重上吳阜。抖擻衣塵。旋覺野雲生肘。誰載銅官山色到。屐高驚破。門前柳。撥寒灰。把昇平樂事。一番回首。怪作達。於吾何有。起舞闌珊。敲缺壺口。筆底風華。恨乏按箏纖手。自與侯鯖長話別。故人能共青蔬否。論歡場。儘千般。不如醇酒。

揚州慢 與林鐵崖陳鹿友程古狂飲

讀罷離騷。客閒無賴。臨春強自支持。向流鶯聲裏。問往日花枝。話神武。門前軼事。澄湖魚鳥。悵快歸遲。有糟丘百尺。黃金盡買蓴絲。飛塵塞眼。謝公山。臺榭參差。少如雲歌伎。安邊壯略。譜入新詞。共訝狂奴老矣。蒼生淚。猶似平時。仗三更漁笛。迴風吹

散情癡。

孤鸞 招夏樂只張登子程古狂沈逢吉張較書集舟中

承平人物半敝盡征裘。滿頭飛雪。如此湖山空鎖一城風月。遙天儘多蔓草。柁樓邊、黛鋪青抹。客裏陰晴時候。任蜀鶻啼徹。且賣文沽酒自存活。對萬馬停嘶。漁舍明滅。蠻柳乍來。恰補白堤春缺。藏鉤試他皓腕。出輕衫、響生條脫。無語繫情何處。指暮雲千疊。

又 悼亡姬

鳳城春黑。條冷到羅衾。教人痛惜。王謝門風林下一時標格。新妝總看大雅。花鈿送、陽昌酒值。靜夜揮毫並坐。聽數聲羌笛。更念我遊多添惻惻。但走馬歸來。牀頭無色。相勸忘憂。屈指江南江北。黃塵忽棲玉鏡。話依稀、莫聞將息。良友同心臥內。盡此生難得。

瑣窗寒 敬可貽醉戲詠之



杏子催黃。橙絲待熟。一般酸楚。多嫌畫繡。酷愛書生爲侶。望秦樓、量珠買歌。閨中腸斷。邀郎語。惹舊愁滋味。雙眉蹙罷。絨尖徐吐。春入清明路。便減麩加餳。柳條如許。宵寒病渴。花甃偷將伊補。正黃金零落。漢宮鷓鴣不到。沽酒處。怪張華、博物烹龍。小字呼他苦。

玲瓏四犯 答袁籜庵

渚苑籠雲。莎臺換暖。茶煙花底初颺。閉門眠雪客。鶴髮心猶壯。長風此來破浪。莫相忘。送行邗上。親寫烏絲。頻催象拍。傳與雪兒唱。主人舊誇豪蕩。近神疲盾墨。骨瘦茅瘡。百年白鳳管。五嶽蒼藤杖。平生萬事摧頽盡。剛留得、酒腸無恙。看此刻、春生更欲傾家釀。

東風第一枝 園中摘茄

老子年來。犁鉏手把。滿襟渾是風雨。帳前不動金戈。謾誇雁門險處。平沙冷淡。幸留得、斜陽同住。爲菜羹、夢想江鄉。倦聽數聲砧杵。看席上、紫毬青乳。知過了、五原野。

暑。華筵空說羊羔。腐儒自須伴侶。掀髯一飽。試檢點。荒宮禾黍。漸月移、樓掩蟲絲。莫問好秋誰主。

念奴嬌 雲署碧桃花

清明已過。怪龍堆無賴。酸風還翦。誰寄武陵花數朵。彷彿畫船紅軟。扇影堤邊。粉香人面。倚樹聞嬌喘。傾城難遇。且將塞上簾捲。最愛輕暖輕寒。隨蜂趁蝶。乍嬉遊心展。宿雨弄姿。渾似夢。年少賦情深淺。飄墮旗亭。胭脂萬斛。恨事空消遣。今朝酒醒。流鶯如訴春遠。

又 偶見

春將歸去。爲相如四壁。臨邛無伴。特送好花樓上影。斜捲押簾銀蒜。眉語呼郎。弓韉倚婢。蛺蝶誰拘管。橫波迎笑。又穿紫陌西畔。此際依約窺臣。催成新句。寫當年團扇。風動湘裙。最苦是。香氣教人驚顫。粉帛頻施。湖光作鏡。着意回嬌面。重逢何處。願隨輕絮吹遍。

又 采友堂夜集

晚潮煙裊。望樓頭、篙底琉璃雲淨。揖冷侯門多倦羽。猶自高談觴政。雀領堆盤。蕝羹下鼓。雅集真相稱。釭花紅燦。夜深留取春剩。筵上絕少韶年。風霜憔悴。同有憂時病。末路紆迴。鐃鼓地。清淚教人偷迸。蠟屐山中。華蘄塞外。欲去悲塗。寧不如長聚。醉來聊枕松磴。

又 同鐵崖古狂逢吉集登子寓樓吳姬適至

小樓燈地。喜屏山、近與眉峯對映。酒冷黃昏聽宿雨。客子愁腸無定。銀管生塵。玉奩隨浪。各自成孤另。相憐何事。語香簾側紅凝。回想年少風流。絲管吳城。強半因花病。春色拋人容易也。蝴蝶空餘情性。錦纜橫江。珠鞍驟馬。總是淒涼境。追歡今夕。一聲夢斷清磬。

又 登子招同鐵崖循蜚古狂飲采友堂坐有張較書

連朝花謝。惜名花、強欲留春同住。倦起疾書金縷帶。鬪鴨闌邊舊句。羽棧傳觴。香塵

按舞快事渾無據。阮途相識。飄零還倚芳樹。夜半如意敲殘。顧影低徊。莫解傷心處。堂下溼雲飛不起。堂上美人清曙。淺黛吳妝。橫波楚態。翦燭殷勤語。掀髯一笑。陶公自合歸去。

又 端陽後二日籀庵招飲

淋漓梅雨。恣銷沈。南渡宮垣煙月。龍舸爭標。前日事。剛剩奔濤飛雪。顧曲周郎。開筵相命。擬待嬌歌發。藉花眠柳。此中寧少英傑。何限上苑思量。銀燈迴影。歡會翻淒切。弈局觴籌和屐齒。妝點東山風物。勒箇金鐘。拖條藤杖。誰免星星髮。與君談笑。旅愁多付鵲舌。

又 感春和芝麓

遊絲吹盡。爲春歸。撩亂幾人心緒。欹枕長亭。聞玉笛。萬事何如故土。花墜宮簾。燕巢陵樹。付與漁樵語。踏歌燈下。讓他年少爲主。鎮日病酒孤眠。征衫不暖。憶得分離苦。芳草香銷南國恨。僥倖新來雁羽。畫槩徐開。珠屏曲掩。莫識留儂處。東風方便。願

隨輕絮飛舞。

又 長干秋夜

僧樓聽雨。厭花側蟲鳴。好秋過半。記得微醺上畫橋。十五雛姬迴看。柳掩箏牀。風吹舞帳。的是秦淮岸。歸來閒歎。涼殺也無人伴。蕩子青衫失意。轉眼江山。便把三春換。藥圃糟丘計未成。何況羅襦粉汗。月落城烏。露沾宮草。舊事君須算。且留殘夢。莫被鄰雞催斷。

又 戲與侍兒和李易庵春情韻

載花西去。聽霜天玉笛。江城初閉。柳外重山飛白鷺。愁殺他鄉秋氣。雁透平沙。蘆鳴驟雨。那得佳情味。王郎陶寫。豔歌桃葉須寄。自顧短鬢蕭騷。難銷磊砢。把香扇笑倚。鐵石肝腸寒似水。又被鴛鴦呼起。中酒停杯。傷春倦繡。一樣灰頰意。五湖無恙。但卜征帆歸未。

又 將赴雲中留別胡彥遠兼戲其賣藥

瘡痍四海笑澄清。計短鬢髯如戟。酒社飄零。詩友散。高臥元龍百尺。女子知名。男兒失意。聊學韓康劇。千金肘後。何妨堪愈愁疾。我亦北阮窮途。鮫人淚盡。雙鬢多添白。風雪差排關塞去。不喚傷心不得。馬背多寒。貂裘易敝。秉燭娛今夕。渭城歌徹。樓外晚山重碧。

又 俞右吉自言近日眼明喜爲此贈

禾城冷淡阿誰是。司馬漢時顏色。有眼只教看富貴。對坐那分清白。春到君家。鳳巢書帳。虎臥珊瑚格。乍逢巖電。一雙秋水曾識。新爲讀史功成。橫陳千古。把浮雲多擲。打算暮年行樂事。閣住傷時珠滴。爍破神州。風流映帶。不用揩磨力。酬他再顧。夜闌香泛瑤席。

又 賀帽雪生子

賦歸陶令。但鋤成南野。雲溪一曲。忽送石麟天上種。繡襍珠光相續。左倚琴心。右提玉樹。此事平生福。嘉賓填戶。隔花催暖醞醖。須信穩臥名山。芝蘭圍繞。慰中年幽

獨詩篋酒瓢多付與。安用黃金萬斛。翠帳聞啼。朱絃伴笑。恰許聰明足。多多益善。勸君攜滿絲竹。

又 拜太白山人墓

四山荒棘猶爭道。國士和詩葬處。岡勢峻嶒。吞雪水。寫就三秦風度。彈遍青萍。興來拂袖。不向人間住。幾番花落。問春曾否如故。莫恨短碣模糊。高塚麒麟。更銷沈無數。歷算古今誰壽考。百種輸他詞賦。結客東南。長留生氣。吹散泉臺暮。一杯相酌。石門松鬣羣舞。

又 送卜聲垓北上

綠香塘上。又催君去。踏塵沙爲客。匣有鑊鏹。龍夜吼。函谷曾織草賊。口不言功。松楸拄筵。暫與鴻溝隔。時來起舞。種花先問南陌。也擬祖道長亭。垂楊離恨。怕挽絲千尺。遙望紅纓驅駿馬。脫帽寶釵樓側。自致雲霄。手提編戶。換了閒鋒鏑。經過燕趙。寄情應把春惜。

又 碧巖茶至

雲芽乍啜，恐新來肌骨全因君瘦。活火煎成，丘壑味略似初含荳蔻。七椀頻煩，惡詩傳寫，甚覺盧仝陋。請辭歡伯，無愁是此時候。盡說產自深崖，佳人獨處，隱約春難透。笠澤下方，留不住，絕頂和他青皺。一片煙橫，盤旋肺腑，冷液猶堪漱。玉甌誰捧，寶臯閒配芝書。

又 雪中過陳氏山莊

肯嫌春謝，但隨雲飄動，冷眠湘簟。蠟屐正宜，苔徑澀，此處清暉荏苒。親扣柴關，瀑香斜掛，全把吳山掩。長廊鳥散，我來玉雪微糝。欲攜一縷茶煙，和他幽意，不放笙歌染。南宋風華，蕭颯盡，惟剩頑雲數點。又被閒心，十分搜剔，松竹添春靨。雁聲催到，客中佳興難減。

又 爲宗定九賦東原草堂和顧庵弟韻

金風吹遍，剩隋家堤影，江皋書屋。一洗近來荒索氣，玉髓蘭膏同沐。四壁雖空，芙蓉



相對還壓新籀熟。催歸小艇。漁歌聲振林木。應爲毫底花繁。逢春調弄。占盡三生福。沈約郊居多賦草。雌霓連蜺誰讀。七尺珊瑚。百年軒冕。孰與餐松菊。讓君高嘯。世間餘子豚犢。

萬年歡

唐濟武太史過訪畊石齋小寓次史邦卿舊韻

藥駕蕭寒。鶴巢空。俊人來共烹雪。蠟就東山雙屐。頓教豪發。世界蒼茫未辨。覺此地、亭皋清絕。巒坡邈。楚調爭彈。好官偏惱狂骨。軍城暮笳漸歇。算青迴陌上。芳草難別。惜取風流。卿相恐是癡物。重約秦樓酌。想像裏、蓮花承襪。漏聲促。柳巷旋車。夜深誰餞瑤月。

又

濟武命飲白鹿泉亭再疊前韻

玉局無塵。又邀賓十洲。分賦甜雪。吳練天門。曾覩布帆南發。襖被澄湖上下。信只有、三冬奇絕。寒威緊。勒住花期。此番疑鍛柔骨。槌牀放歌未歇。羨盤空硬句。風調全別。除卻相如。餘子碌碌常物。猶怪毫成五彩。不肯賦、鴉頭香襪。他年記、瑞石流光草

堂人倚斜月。

又 濟武同諸子過周雨文山房

小徑平分。駕高軒、碾破袁安深雪。何意催將春到。柳絲爭發。戶外瑯戈拄眼。且靜對、瑤琴聲絕。黃金去、意冷封侯。荷鋤來、鬪山骨。酸心壯遊已歇。待天涯息戰。彈劍留別。休學湘纍。桂醕畢竟神物。人澹修筠欲舞。莫便是、淩波仙襪。今宵縱、凍影遮窗。不妨峯頂尋月。

又 同楊香山周雨文夜坐

病渴詞人。水雲鄉繫篷。微點鴻雪。屈指星橋將近。故園梅發。鄰肆純灰百甕。顛倒把、酒腸枯絕。飄零際、握手荆高。悲歌多見丰骨。瑤音宋宮遽歇。似蕭關祖帳。哀管催別。離卻青氈。無復王郎家物。叵耐縑緗債滿。牒座右、吾將爲襪。乘閒好、撥遣浮漚。一簑籬外畊月。

又 濟武席上聞歌

午漏陰陰。許忘機翠禽。屏罅啣雪。太息年光逝水。客裝難發。忙過幽亭痛飲。放誕使、俗流驚絕。嬉遊慣、秉燭彈棋。塵埃誰識清骨。朝簪唱雞又歇。況林間伴侶。長聚休別。殘蠟無多。堤上漸有春物。重奏沈香樂府。不忍問、楊妃遺襪。從今去、鏤管難停。白家全要煙月。

又 答星期

嬾上燕臺。續吳吟錦囊。剛貯涼雪。極目沙場。征馬控弦齊發。更送清砧一片。帶晚景、亂鴉飛絕。香篝小花。夢牀寒。山中貪鍊愁骨。歡娛半生竟歇。錯紅樓灑淚。和美人別。欲浣蕭騷。杯外總是餘物。珍重填詞麗掌。定載得、如鉤輕襪。相逢再、料理浮家。隔江吹起虹月。

又 同濟武香巖雨文星期雪中小飲是夕沈生度曲程生鼓琴

兆應豐年。下重帷沈郎。腰瘦歌雪。互祝羌池。倦羽鹿車停發。裊裊晴絲不斷。被落雁、數聲彈絕。浮塵隘、通計彭殤。平原高塚留骨。鄒枚賦心已歇。奈時當縞紵。何以爲

別。骯髒須存。窮豈挫人之物。聊屈匡扶鉅手。刻畫到。陳隋妖襪。燈前只滿汎。蘭觴麝  
煤庭下薰月。

又 和濟武感懷

路掃行蹤。白漫漫。萬家。炊冷啼雪。頗似哀猿。巴水晝長聲發。布帽橋頭策蹇。正逼出、  
詩情酸絕。折花罷。幾度淩兢。滑稽應笑波骨。征饒有時定歇。只蒼生況瘁。焉敢言  
別。冷炙侯門。方悟錯解齊物。燄燄名場利藪。或不免。口中含襪。何如且。孤嘯繩牀。野  
鷗同臥黃月。

又 答于畏之

變態難窮。炫遊人。碧翁能造炎雪。況值悲涼節候。壯懷宜發。篋裏楓天似鏡。歎一線、  
圖書遙絕。金鞭彈紫陌。輕裘少年多恨無骨。唾壺擊殘且歇。論高陽栗里。英氣無  
別。厝火乾坤。舊是痛哭中物。招向家山隱處。赤脚踏。層冰無襪。遨遊快。擺落纖塵。珊  
瑚枝上撐月。

又 答曾青藜兼留別雨文諸子

百斛明珠。遍江南幾家。能繪空雪。逆旅逢君。意氣買舟同發。見許柔情旖旎。笑鐵板、髯蘇粗絕。小紅倚、白石吹簫。西湖堪換枯骨。青萍電光怨歇。捲高臺酒幔。如與春別。調弄英雄。不過旦暮間物。起賦臨風弱絮。彷彿見、江妃綃襪。幽人事、蝦菜猶存。曰歸分賦吳月。

桂枝香 望羅浮山

江霞萬疊。乍影到艤艫。梅花飛雪。怪石叢邊。猶是晉時薇蕨。山村幾許佳人夢。被青鸞、一聲啼歇。葛洪存否。鱸空煮藥。夜寒碑碣。又何必、仙橋踏月。怕坐來深洞。十分難別。較似髯蘇。官舍共眠冰鐵。風塵無限關心事。算丹丘、應屬豪傑。戲鞭啞虎。瑤笙更把海雲吹裂。

又 祖園春讌

侯家第宅。有野水朱橋。錦帆輕渡。一架藤花索裊。玉鈴新護。賣餠天氣爭遊冶。畫樓

前是東風路。乍停珠勒。半揜翠袖。女郎無數。愛筵上、笙歌似霧。儘杜鵑啼遍。不教春暮。絮撲征衫。重與麴塵相遇。多情本是江南物。到長安、牽惹如故。倚闌半醉。誰家蛺蝶。換人愁去。

水龍吟 與蘭生飲酒

蕭蕭阮杖猶存。得錢便覓餘杭姥。茂陵芳草。聯翩裘馬。今成塵土。欲稱情懷。鄒枚捧硯。美人歌舞。自蓬萊清淺。新愁隔斷。空留下、對牀雨。兄弟二三零落。各匆匆。漁樵爲伍。霜花布帽。杜家詩瘦。逢春更苦。青山無恙。尙堪行樂。莫嫌豺虎。徵往事、古屋燈昏。閒數盡、城頭鼓。

又 垂絲海棠

對花疑對佳人。問他欄外將誰倚。成都陌上。秤量顏色。似君無幾。搖漾芳年。莫驚飄墮。蜂鬢扶起。憶唐宮舊事。楊家姊妹。同午夢。新妝洗。漫說纖茸自喜。護餘寒。正當愁際。丰姿想像。蟬光綠潤。分簪紅珥。引罷迴波。啣來嬌靨。軟綿如此。願縈牽不斷情。

絲萬縷。把東風繫。

又 午日湖上

一年鶯外時光。藕花將滿湖。南路綠陰斜帶。層層珠箔。惹人深處。倚遍重樓。共移清景。尋他簫鼓。悵吳霜染鬢。難簪艾葉。佳夢逐奔駒去。剛覺山川如故。別靈均。漸凋蘭杜。紅情待續。小吟消夏。誰傳紈素。徐掛輕帆。此身宜稱。閒風浪雨。算歸來未得。鷗盟七澤。被杯中誤。

木蘭花慢 題項東井畫爲文公壽

禾興慳岫色。賴張環。富霜毫。恣翠暈安籬。煙絲倚瀑。全取空寥。登臨送情不淺。帶斜暉。又聽暮鐘飄。疑有支公故業。閉關安問。征橈。名山何許。傍雲根。吾欲借書寮。向王猷買竹。蘇耽釀橘。兼種芭蕉。春應去人未遠。肯蹉跎。三萬六千朝。除卻圖成景物。眼前都是蓬蒿。

又 采山亭北杏花盛開

問豔春何處。三四點雨聲中。便舊影栽成。疏紅不鬧。襯粉玲瓏。枝頭有些冷在。笑尙書、賦物未能工。好認一帘牆外。那如雙鬢樓東。是他不放小園空。略比玉臺鬆。諒有意、佯人煙橫漸拆。日淡斜烘。追看上林遊侶。趁垂楊、夾道馬蹄濃。舊夢不隨妖冶。嫩情多寄微濛。

花犯 重過林家看牡丹

爲春忙。名園踏遍。笙歌迹如掃。嫩陰開後。動白拾青鞍。遊侶都好。幾時不到城南道。湖濇多弱草。記舊日、小庭鶯燕。因他憔悴了。流蘇步障更留人。盛衰翻下涕。洛陽年少。杯待舉。妖紅溼。微傳風調。迴車覺、暖香入座。湘箔掩、花房眠乍曉。恐逗起、一睚幽恨。雕欄隨世老。

齊天樂 錢爾斐過訪

晚登虛閣徘徊遍。孤懷餞秋偏早。古渡蘭橈。平皋玉轡。零謝和誰知道。橫塘百里。夢青雨低迷。紫煙斜抱。勤寄鱗書。相思相見尙嫌少。雲林終是念舊。頓攜花買酒。披



襟天表。拂劍餘年。枕流僻巷。牀上塵埃難掃。留君不了。約此後春嬉。莫辜芳草。笑指瓊花。壑中人未老。

又 倦圃秋集和沈客子

任他華穀長安隊。偏覺座中人好。井巷斜連。蓬蒿綠滿。娛晚剛宜耕釣。癡狂各妙。肯月令方佳。被蛩吹老。冷石欹眠。隔江真喜戰塵少。摩挲柳色最古。夜來空想像。白家蠻小。黑子禾城。無多賣酒。賒取兒童慣到。盤餐草草。儘別緒歡場。一時圍繞。屋裏青山。至今留晉嘯。

珍珠簾 題畫

黃鶯屢喚支筇去。黛香濃。石隱心情如故。文杏小亭臺。消得王維幽句。脈脈筠簾遮不定。又一派、動人愁處。何處。是碧沼流花。漁梁飛渡。頻念訪戴新盟。把詩瓢掛了。再攜茶具。難買此時閒。況舊遊曾住。裘馬平生揮斥久。付玉笛、吹開遲暮。未暮。聽松底鷗吟。萬山春曙。

又 對菊

山家大有歸來事。草堂前、滿眼橫天秋思。臺上采茱回。又見薄裘初試。晉代殘花開未了。慣占卻、許多情致。須記。愛幾尺蝦鬚。酒邊香細。今夜短燭西窗。縱良朋見訪。石牀難寐。鋤菜此衰翁。倚畫欄十二。似錦年光消滅盡。更叫月、蛩吟盈耳。誰寄。怨飄葉空江。霜華千里。

瑞鶴仙 壽薛楚王八月十三日時在雲中

稚川仙竈碧。向堂前、玉樹好秋如滴。嫦娥寄消息。把徐圓蟾兔。良宵留得。風流似昔。倩天香、飄來舞席。看年年、琥珀杯濃。浮出武夷山色。相憶。五湖曲處。錦帳珠圍。海籌堆積。安邊報績。正媿見、陶彭澤。況江南時候。送鴻清調。遙映關門龍笛。待攜歸、張翰鱸魚。爲公座客。楚玉閩人。而居我里。

又 和赤豹弔朱買臣墓在福城寺中

問泉臺俊傑。曾掉下書囊。橫飛金闕。歸來便華髮。況歷殘唐宋。幾朝煙月。蒼松疊雪。

是樵斤留餘枝葉。踏荒丘。三五僧雛。又見晚鐘明滅。傷別。羅裙迎馬。玉鏡分鸞。那堪重說。陰風淒切。孤眠處。儘嗚咽。想當時豔說。還鄉富貴。不道浮榮易歇。只稽山、遠作豐碑。宛然漢物。

石州慢 詠雪

禁住梅花。閒夜捲簾。銀霰輕灑。憑誰知我。綠樽罷舉。彩毫勤把。茸裘破帽。傍他范蠡荒祠。十年不鞆。關城馬重聽。打窗聲恰。邊愁偷寫。牽惹似曾年少。翠靨壚頭。寶箏樓下。翻借調冰。刻玉添成遊冶。而今休矣。祇剩松火堆盤。此身孤負。鴛鴦瓦。寒意滿人間。任先生臥也。

春雲怨 鐵崖招飲湖中

心情似昨。識桃榔庵底。一囊丘壑。雨洗平蠻碑額。銅鼓唱聲歌不惡。送客南還。鳳凰山曲。十二雕欄。鬪紅藥。鐵石肝腸。龍蛇翰墨。肯負舊時諾。新酥試餅。玻璃薄。更洞庭春色。詞人風味。畫舫沿流汀畔泊。酒語淒然。半入潯陽。夜深絃索。綠鬢何如。青衫

在此。淚與晚潮並落。

又 悼錢葆汾中翰

最難將息。怪山鬼不情。催人如織。瘦損帝臺鸞鳳。渤海迤南無翠色。絮語蕭齋。無多時候。忽報蓮花鏤雙翼。泡幻前生。翩然夢斷。笑擁衆香國。卿雲絢錦真當惜。步西清。複道蓬萊宮側。愁滿瑤琴。太相逼。彩管塵飛。孰賦吳天。綠窗鸚鵡。雅骨長留。九峯猶在。但喚醉遊未得。

喜遷鶯 湖上值朱子蓉

菰蘆暫起。看古意夕陽。一肩行李。竹艇輕帆。錦囊新句。渾似鶴洲煙水。襖被吳山佳景。柳外高樓頻倚。臨長笛。勸加餐。不用澄江雙鯉。狂喜與爾共。松菊故園。少小陶朱里。瘴雨蛇懸。邊沙虎踞。我獨塵埃驅使。世事浮沈失算。雪點垂垂過耳。再相遇。只搥鼓燈前。賞花杯底。

綺羅香 雲中弔古

壘學流雲。溝成積雪。搖落城頭軍鼓。鎖鑰千門。高去舊京尺五。雜花映美酒人家。軟沙到玉驄歸路。詫無端、衰草牛羊邊聲瞬息便今古。金輿曾過譙賞。愁入瑤箏變。貌貅新譜。錦帳嫌寒。肯管征人辛苦。看輦道、數改鶯啼。有亂山、不隨黃土。幾時再、楊柳春風。朱樓燈下舞。

探春慢 立夏日看汪園鶯粟

湖雨斜收。錦帆脈脈。閒遊一任疏散。弄酒臺荒。買歌金盡。白髮難教且緩。聞道臨風處。剩無數、腰肢香軟。愁紅怨綠平分。韶光還放輕暖。細數隔年花信。過老圃商量。翠靨重翦。乳燕來時。杜鵑啼後。別占誰家池館。不向東君笑。似失路、琵琶天遠。客裏憐伊。憑欄喚將春轉。

霓裳中序第一 詠鏡

繡囊冷雲軟。古意何年讀秦篆。餘的的水心清淺。伴羅薦春衫。珠璫玉串。凝愁不捲。似新蟾、樓側初轉。怪生就、影兒無幾。終日向人滿。消遣。綵絲雙綰。仗頻磨、鉛華吹

暖。依然相對天遠。況霜杵魂驚。淋鈴路斷。濃妝近來嬾。只描得、長蛾一半。菱花裏、自看妖冶。卻勝薄情眼。

南浦 木瓜

庭下結芳心。好移栽碧。瓚梧桐雙井。猶記蕊初含。妝痕淡、嬌學棠梨紅靜。金颯翦翦。抱枝纔覺輕衫冷。仙露成團。秋弄色、縹綠微頰難定。摘歸珠閣相偎。奈溫柔不改。花時本性。誰忍泛香甌。羅帷裏、旋買玉盤高映。餘酣乍醒。夜來纖手和香凝。明把春情逗着。還許療人愁病。

又 寄香侯

無限故人懷。住荒谿。漁市晚來天氣。赤手散千金。歸來早、快意藥爐風細。豪遊舊夢。鳳凰樓側花驄繫。徒識祖生。鞭尙在、博得幾番清涕。新晴欲買輕舟。啓書幃研北。苔香滿砌。長負酒家錢。詩喉渴、同對隔牆螺髻。關愁不小。劫灰身世誰根蒂。也知青雪催春近。別後荆扉深閉。

送入我門來 夏日塞上

山射蛟冰。牆高燕麥。桃花五月難開。魏家遺跡。石馬繡深苔。連宵羌管離亭奏。寫一半江淹賦。恨才春何在。只有風翻雨坼。前日池臺。南國嬉遊此日。拋殘墮釵枕簟。湖上安排。遍種紅蕖。潮動畫船回。數年不見輕羅扇。聽銀箭空將蠟炬催。祝良宵好夢。箇人相送。到客窗來。

花心動 與籀庵諸子夜泛

吳越名都。倚船窗。滿幅髯蘇遊稿。翠滴愁霖。玉噴飛泉。催客釀成清醪。浮沈四海無拘繫。論麋鹿。何知煩惱。探囊底。題花彩筆。可隨春老。已掛城頭片月。有紅粉新妝。慰人懷抱。左把金蕉。右挹珠鈿。極目萬山清曉。夜深鶴背寒如水。終難稱。麻姑纖爪。願揮手。蓬瀛只生江表。

又 得蕙臣書報之

聞笛樓頭。剖雙魚。當關殘照。柳作氍毹。鶯送笙竽。纔稱狂奴風調。酒龍渴飲澄湖隘。

記射虎。珣弓猶嘯。更何日。鷓絃再鼓。側簷前帽。見說天翁有意。出千種徘徊。摧人年少。倜傥心情。瘦損身軀。三月黃鸝亂叫。稽山百仞清難極。遙傳與。箇儂知道。且收拾。芒鞋好春還到。

永遇樂 雁門關

眼底秋山。舊來風雨。橫梁之處。壁冷沙雞。巢空海燕。各是酸心具。老兵散後。關門自啓。脈脈晚愁穿去。一書生。霜花踏遍。酒腸澀時誰訴。闌珊鬢髮。蕭條衣帽。打入唱驪新句。回首神州。重重遮斷。惟有翻空絮。歲華貪換。刀環落盡。草際夕陽如故。嗟同病。南冠易感。登樓莫賦。

又 蕪城答宗定九

杯酒平生。乍分煙月。良友難遇。瓊蕊城邊。開襟話舊。俯仰論吳楚。芙蓉別苑。幾年增築。管領豔秋蟲語。問人間。誰當行樂。噉名祇成相誤。香詞脫腕。碧茸紺蝶。羞與周秦爲侶。客艇空江。繫花不定。同屬關情處。勤來慰我。雪毛盈頂。萬事莫如鄉路。愁腸



動、吳州聚鐵。難將錯鑄。

尉遲杯 有感

鸞簫寂。向晚歲、難藉交遊力。奚囊誰貯驪珠。劍氣樓中傲客。茸裘小敞。賒酒慣、陽昌定相識。約梅花、早發巖垆。雪銷來聽橫笛。曾經繡被銀鞍。向粉黛深叢。大寫胸膈。市上賣、跌跌不了。徒仰睇、星河夜白。縱龍塞、有人深憶。飄泊去清江。寄孤翮。爲臘醅。訪遍村帘。寸腸休放愁入。

一萼紅 憶辛卯歲湖上五日事

變柔花。向朱欄借得。春影最玲瓏。粟玉纖環。泥金雙帶。嬌小渾不勝風。櫻桃試、菖蒲碧醞。知有意、分我醉顏紅。粉汗生涼。繡巾香蹙。人在樓中。身本三生杜牧。賦鴛鴦遺恨。綠葉茸茸。錦眉星移。雕輪雨散。聽徹清晝疏鐘。縱留取、同心舊約。對湖光、空畫兩眉峯。況是黃梅天氣。冷到薰籠。

又 題香山半村草堂

近城樓。剩清陰數畝。剛許結煙蘿。逸士移梅。佳人倚竹。名園那得如他。分明是、五陵  
俠少。拋紫綬、不肯聽鳴珂。自渡江來。百年心事。渺渺關河。此際水幽林寂。坐幼輿  
一箇。丘壑增多。石戶堆書。雲窗裊篆。時光總付消磨。頻回眺、天台仙侶。領春情、脈脈  
畫雙蛾。約我爲鄰。硯北。各占青螺。香山燕人。倅台州。後寓武林三十年矣。

疏影 夏鹵均再招集舟中

漫空柳絮。似斷雲獨鶴。飄泊難遇。寫怨塵途。綰帶題襟。蒲觴預約相聚。清波遠照三  
湘影。不肯放、屈平醒去。泛中流、靜夜彈碁。落子忽驚松雨。盛事莫嫌無據。藉右軍  
筆陣。親記遊處。屬玉橋邊。潮信初生。可着龍舟飛翥。尊前一半蒼顏叟。喜濟勝、尙驕  
童孺。遣紫駟、重覓妖姬。譜我薦春新句。

風流子 寄登子

芳堤春絮老。今張緒。只與六朝同。悵遠山不絕。乍迷屐齒。隔江相望。如在簾櫳。送行  
後。歌場銷舊翠。浣女泣新紅。陶令素琴。晚風空裊。柳家長句。殘月難工。南華亭臺

好。娛。清。晷。屏。際。寶。鴨。香。濃。偏。是。梅。天。多。雨。常。阻。郵。筒。想。三。影。詞。成。銀。箏。斜。抱。四。愁。懷。切。玉。案。輕。籠。無。限。斷。腸。滋。味。分。付。杯。中。

沁園春 戲贈陳較書

姬。汝。應。知。客。況。無。聊。嚙。妃。女。脣。漫。珠。圓。鳳。撥。婢。呼。樊。素。煙。橫。蘇。佩。師。事。湘。君。富。貴。漂。萍。不。隨。碌。碌。榎。柁。中。流。尙。有。身。歸。來。早。向。浮。名。斷。處。勾。管。佳。辰。茸。城。月。色。如。銀。休。信。道。天。邊。散。彩。雲。願。當。筵。搖。筆。愁。山。匿。影。連。朝。中。酒。恨。海。揚。塵。起。五。柳。生。當。蘇。小。菊。圃。雙。棲。八。百。春。姬。微。笑。謂。彭。錢。以。後。還。有。癡。人。

又 題綠谿園

近。喜。休。兵。架。壑。千。尋。疏。泉。一。灣。是。袖。中。石。暈。蘇。公。東。海。琴。邊。菊。秀。陶。令。南。山。招。魯。諸。生。修。晉。禊。事。乞。得。君。王。此。日。閒。優。游。地。遍。秋。懷。綠。森。春。信。紅。殷。有。時。醉。臥。苔。斑。又。絕。勝。珠。樓。十。二。間。想。寒。更。留。客。盤。堆。玉。髓。香。辰。挾。妓。戶。列。煙。鬢。金。谷。飛。觥。輞。川。縛。帶。雲。護。雙。屏。不。用。關。無。塵。跡。止。載。書。車。到。泛。雪。人。還。

又 節飲傲稼軒體

醇酒何爲司馬曾言。信陵與遊。苦浸淫過量。藥翻成病。解排寡效。恩易招尤。縱誕形骸。消磨歲月。從古舖糟少俊流。逃名事。盍辭嵇放阮。伶婦堪謀。長安風雪紅樓。笑貫去行裝。乏軟裘。況進前妖女。癡心搔癢。突逢俗客。狂語衝喉。老子如今。絕交書就。封爵何勞。署醉侯。書無據。且三杯兩醖。權取忘憂。

又 和右吉老眼詞

東郭先生。契闊旬來。神光若何。想清藏膚理。晉人點漆。空兼定慧。竺氏凝波。疇昔書城。十行齊下。賈策猶虛。漢殿過。憂時甚。數驚呼。決皆淚滿關河。郵筒報我。摩挲似斜日。難揮戰士戈。待鳳凰。啣蠟華燈自照。芙蓉湛水。長劍須磨。雲霧叢中。無邊輕薄。正合朦朧倦思多。盧醫說。要迴君顧盼。端藉嬌娥。

又 病痔自嘲

閩徼歸休。曬阮家棍。送韓子窮。忽茄盛腐血。莫騎尻馬。毒連枯髀。空老尸蟲。細檢方

書膏梁釀患。藜藿何爲不見容。支離態。久年辭壁觀。晝戀衾濃。五金八石難攻。類  
闍尹潛居省闈中。暫羅襦罷解。邯鄲有恨。麴塵驅散。風月無功。病鬼癡愚。貴人迴避。  
偏嗜林間鶴髮翁。休勤療。倩麻姑爬癢。山友扶筇。

又 右吉和我病痔作用前調寄之

問疾維摩。疾隱難瘳。勢如毒痛。見雕鏤窟穴。自分牝牡。根芽風火。遽染肌膚。危坐應  
妨。緩行堪借。閨閣偏招楚大夫。生權要。便望門求舐。奔走當塗。何緣摧挫微軀。笑  
束手倉公兩月餘。祝哲人謀國。先除衆蠹。雄師克敵。易剪孤雛。姿愧神清。修期漏盡。  
健甚逢花倒玉壺。酬賓戲。向禪中體物。孰免粗疏。

賀新郎 答橫秋見壽時將行役雲中

玉宇秋如水。爲黃花、滿襟離恨。雁筇頻倚。落日馬蹄窮塞主。白髮一肩行李。銅柱北、  
曾經脫屣。又怪風旗沙柳外。對磨崖、片石揮毫起。呼屈宋、且休矣。故人相見平安  
喜。寫新詞、龍蛇飛動。牢騷心事。刁斗河山今不閉。敢詫封侯萬里。笑老子、疏狂未已。

范蠡湖邊蓴菜熟。肯羊裘、敝盡車生耳。痛飲酒、眞男子。

又 答右吉

玉塞秋無主。近重陽、月斜簾幙。黃花半吐。列戟西風高樓上。空說雄心似虎。欵客枕、  
寥寥戍鼓。淥水畫橋楓未落。料南鴻、那解相思苦。呼酒伴、唱金縷。平生歲月成塵。  
土任顛狂。秦娥趙女。琵琶難譜。獨有江州青衫在。溼透當年淚雨。吾老矣、中宵起舞。  
馬蹄踏遍陽關道。便腰懸、侯印終何取。悲髀肉、不堪拊。

又 書懷

一派平林闊。騎森森、銀槍玉帳。了非英物。身世芒鞋太辛苦。晚踏戰場深雪。刁斗外、  
羣鴉啼絕。宛轉桑乾留不住。喜行山、北去環宮闕。飛動意、待君發。菱花碧浸星星  
髮。買涼州、葡萄百斛。寶箏初歇。閒坐秤量眼中客。誰似龍蛇滅沒。憑浪語、古人三窟。  
盾墨磨殘征袖冷。少黃金、鑄就封侯骨。心萬里、對秋月。

又 送籛庵會稽之遊

草露何須久。擁油幢、荊州部曲。布袍依舊。芍藥闌邊老供奉。閒卻裁雲妙手。漸醉墨、題殘玉斗。海畔扁舟成獨往。定中宵、對月思良友。寫別怨、短亭柳。牀頭錢罄休搔首。問唐宮、黃冠賀監。至今存否。故物千秋塵埋盡。惟有顛狂不朽。敢浪說、才人陽九。下榻再聯修禊飲。況娥江、暑漲清如酒。借萬壑、爲君壽。

又 問嬾真堂牡丹消息用辛稼軒雨中遊西湖韻

秀色盈春野。怪觴籌、經旬不動。禾輿城下。屈指雕闌殷勤護。十五名姬欲嫁。閒鎖卻、紅情誰畫。往日娛賓華裯地。解疏狂、一躍青驄馬。殘醉好、夢中寫。鄉心珍重遨頭社。訪河山、洛陽西去。沈香頰也。留取佳人傾國影。偏薄錦堂瑤榭。信麗晝、何如嬌夜。穀雨闌珊寒猶在。恐催花、專待能歌者。韶景促、近初夏。

又 嬾真主人招宴花前用前韻

性癖宜山野。任嬉遊、煙濃日淡。滯留花下。節到黃鸝枝頭語。千萬蛾眉齊嫁。餘一種、胭脂重畫。生長唐宮風流態。遠馱來、玉砌須嬌馬。花有恨、倩君寫。君家已結桑麻。

社爲高朋，差排蛺蝶。草堂開也。冰濯詩囊，無阿堵，堆積紅香成榭。泛綠蟻，蘭膏終夜。急雨驚吹簷前鐵，嘆春光，將謝無知者。一醉罷，且休夏。

又 客招賞藤花以事不赴用前韻

紅瘦三吳野。有風鬢、虬蟠虎臥。紫茸飄下。竄入名園，無姿媚。自許蒼松可嫁。看百尺、深軒如畫。合向山中高眠去。又抽梢、斜冒王孫馬。繚繞意，最難寫。狂夫樂赴繁華社。見定巢、呢喃乳燕，報春歸也。釀酒東鄰能好事。淨掃粉廊香榭。投玉楮、招娛良夜。肯向花前逡巡避。爲花神、不愛沈酣者。剩古榦，足銷夏。

又 題梁承篤郡丞西湖圖次吳慶百韻

笑折垂楊去。問當年、昇平佚事。唐堤宋渚。春老滄洲，踏歌散。芳序醉紅猶舞。便洗盡、蒼生灰土。留取笏牀香草畔。向斜暉、傲睨高前古。瀟灑意，合相許。羣山曾化貌貅。字餉雄軍，一番辛苦。鳳毛難翥。月轉六橋，遲遲下。此是舊愁來路。有羈客、牽船同住。錦作奚囊，償酒債。舍桃花、漁父誰爲主。毫五色，勝簫鼓。



又 答顧天石時在維揚寓舍

才子今無幾。向長途、茸裘跨馬。衝寒千里。笑拂黃塵胡姬側。自解醇醪妙理。況所至、諸侯倒屣。閒喫墨花題紈扇。濯春江、徐庾難爲綺。羈旅恨、待君洗。當年曾進先生履。悵推移、錦堂清月。一溪流水。有美英姿丹丘翮。轉憶牙籤堆几。便聯袂、高歌不已。兵後山川摧頽甚。看元龍、此日呼能起。牀上臥、客休矣。

摸魚兒 讌米山堂

聽風鈴、遍傳春去。荼蘼紅發留客。善和坊裏馱嬌馬。不讓小蠻顏色。愁似織。望複嶺迴谿、隱隱星窗隔。浮生作劇。便刻竹題詩。揮裘換酒。清嘯古今窄。開筵處、松下危樓倚碧。流連難至頭白。微溫氣候宜人甚。秉燭再遊始得。吾有癖。縱弱絮沾泥、何損鬢髯戟。拋殘可惜。須畫鼓催花。香羅剪蜨。長著阮家屐。

又 吳菌次招集米山堂

展瑤牋、近尋嵇阮。開襟長倚疏竹。乾坤落落存芒屨。自信了無拘束。春不足。最可惜

芙蓉千點埋濃綠。遊蹤待續。看簾捲微波。堂深瘦影。清語漱寒玉。高歌後。槽底梨花正熟。更闌四照銀燭。紅塵舊夢浮雲散。少壯去如飛鏃。閒是福。莫喚起龜年重唱。開元曲。新愁幾斛。只買斷嬋娟。攜多鑿落。相約臥空谷。

又 集米山堂觀劇

翦濃陰。雨餘池館。飛花正點瓊瓚。龍眠愛寫西園集。不念客窗人瘦。遊馬驟。仗好鳥啼開。三徑苔錢繡。低回晝漏。恰翠暖氎。丹浮琥珀。屏側燼香獸。征衫袖。情淚年前。過透。傷離便合相就。教坊樂部何哉。在料理記歌紅豆。聊訪舊。是手解金龜。投老家山後。東方射覆。識歡伯藏春。柔鄉銷夜。中有兩眉皺。

又 聞周青士有詞緯之選寄之

喜瑤樽。細傾醞醖。茗溪已倦雙槳。寒崖紫霧濛濛地。鴻過影留疏幌。遲見訪。乍斷篋書成。好對羣山爽。情多自獎。儘受得春憐。載歸朱戶。斜月墮羅帳。休孤賞。擬倩麻姑仙爪。挑動人間技癢。名花不乏沈酣處。掩抑方堪寄想。空追悵。似燭淚堂開。楚楚

聞清響。秦歐既往。仗象管吹香。驚迴弱夢。身老鈿箏上。

又 濟武見訪示一詞次韻奉答

解塵羈。天容聳叟。年來餘少清思。書奩藥架。勤收拾。錯愕隙駒方駛。吾倦矣。拚冷落。交遊。孤坐談秋水。五湖陰裏。忽露宿鷓鴣。風翻蘆荻。相助挽征袂。貧家具。回聽朝雞萬里。陶公欲釀無米。此心漫詫同頑鐵。又被高歌催起。人世事。料不過。對花對鳥。千回醉。閒情自寄。看瑤海飛灰。珠林斷響。九鼎寸絲繫。

又 疊前韻答吳寶崖見懷寶崖武林人

溯詞源。六飛南渡。諸家全鬪才思。叢山漠漠。青如昨。獨覺流光驚駛。秋到矣。趁十幅蒲帆。錯繡層層水。唐公瓢裏。見炳燭裁詩。題蕉紉碧。累月共仙袂。勞相念。麋鹿何須爵里。太倉剛剩稊米。鼎鐘無處堪容我。聊逐沙鷗眠起。悽惻事。問故國。交朋雨散誰同醉。浮蹤遠寄。倩山作綸巾。江爲羅帶。牢把客愁繫。

又 濟武同諸君過飲倦圃三疊前韻

偶攜壺。空明小徑。背時偏有微思。黃鸝兩兩啼初罷。門外雪翻波駛。咸集矣。任脫帽。喬柯濯足階前水。白蘋香裏。更越瀨經寒。吳灣度夏。從此絕分袂。懽相接。通德真。慙記里。簞簿鳳到生米。休嗤下國輿圖儉。五岳中心崇起。添快事。堪借得。夷光歌舞。深宮醉。悠然謾寄。只左掘陶泓。右傾鑿落。斯世本無繫。

又 酒間答星期四疊前韻

別吳州。便穿荒圃。此中應蓄深思。嘹嘹哀雁清笳外。鐵甲往來何駛。君悟矣。且玩弄。垂虹魯望吟殘水。故人杯裏。有松籟疑絃。魚梁近晝。莫溼感時袂。浮沈處。遊俠難逢軹里。丹砂轉訝成米。男兒胸次多冰雪。興到誰嫌騰起。眼底事。怪幾日。濃陰未解。如酣醉。癡腸可寄。願花月常輝。天公註定。也似赤繩繫。

又 答止岳五疊前韻

掩荆扉。筆牀蛛網。都無蘭畹佳思。親逢八詠樓頭客。驅策駑駘皆駛。吾病矣。聽枕上桐聲。一夜隨溝水。小山叢裏。只三百青銅。換他珠榨。相聚解羅袂。荒祠畔。遙射菰。

蔣十里。少伯祠在倦圃側。其下五湖遺址。江鄉徒詡魚米。紫芝曲避咸陽燄。肯愛子房招起。非細事。有北斗量金。難博今生醉。卮言是寄。怕春去多時。柔腸撩亂。空用柳條繫。

又 答王邁人六疊前韻

曳青藜。筇輿休御。炎光常帶寒思。錢神脈脈無消息。何計挽遲爲駛。堪隱矣。有作隊鷗鳧。棲向當年水。五噫聲裏。更置網高張。麟枯鳳老。相泣反前袂。天壤內。空闊仍同梓里。齊名敢覩蘇米。書生習氣難鐫削。漢柳多情三起。些子事。莫近捨尊前。追憶黃壚醉。有家似寄。要縮取方壺。天風海屋。長劍輓轡繫。

又 同止岳過濟武寓中疊前韻

叩琳宮。乍聞鳴鶴。滿庭堆塚幽思。遶城川路千迴折。猶悵去帆難駛。相狎矣。請健筆題牋。勘破南湖水。無分表裏。取玉局丰華。收歸海岱。明月照雙袂。耽遊戲。勿復占星帝里。羞將青史酬米。吳山久付先生臥。卻被索郎扶起。須耐事。恐見說世緣。觸眼

心如醉。鴻音莫寄。待紫陌驪駒。鬧花深草。繫了又重繫。

又 病坐采山亭懷濟武

正秋閒。藥囊斜掛。此家竟日含思。腐毫嗣詠。高軒過。差喜竹深溪駛。天闊矣。再何時。褰裳徑度蓬萊水。建安年裏。記追逐西園。芙蓉承蓋。煙月絡珠袂。儒冠老卜築。停車廢里。桃花任昉遺米。牽船或傍鴛鴦宿。漁市一番歌起。真異事。看倂大南朝。只讓淵明醉。情來輒寄。欲飽乞風流。冰壺同映。浩浩免拘繫。

又 題寶崖像

妬年華。翻然四照。何人畫出閒思。揚鞭直踏龍門路。止憾驂騑難駛。君過矣。君不見。大江日夜無情水。柏梁宮裏。想金母頻來。露莖高揭。仙淚已濡袂。論行樂。掉臂遨遊戚里。東方倦索珠米。那如癡倚吳山枕。指點桑田塵起。增盛事。早結就同心。日索梅花醉。雄風所寄。直大嘯成雷。鼻端出火。車上一壺繫。

又 約濟武遊鶴洲

羨攜錢、陳留北阮。斯人殊妙豪思。不然義轡情慳極。曉夜行天嫌駛。涼動矣。轉望斷  
飛樓。森森銀河水。玉壺光裏。使鶴擎參差。戲拖拄杖。猶是杏壇袂。經南郭。此去桃  
源幾里。聚圖何處尋米。羣書亂積藤梢下。拔地一峯隆起。成雅事。煩轉語昌黎。不作  
紅裙醉。餘生寄寄。看攬勝歸來。川靈獻媚。篷背錦囊繫。

又 金明寺訪燈公疊前韻

噪秋蟬。澄潭界道。入門疑釀涼思。觀空的是英雄業。鞭影不施而駛。身到矣。正踏破  
機緣。隨分佳山水。寶華輪裏。覩碎碣蟠蝸。四垂青薜。禪客半無袂。天街返。佚老鷗  
夷舊里。菴藺間續廚米。家風肯受龍蛇雜。鐘散月斜香起。因此事。痛舉世沈沈。總被  
文章醉。縱橫各寄。要汛掃蓬蒿。撥塵相對。驢橛定休繫。

又 送曉山師住如如庵

訊毘陵。烏衣甲第。投閒正屬雄思。金鱗直透千重網。霞氣赤城遙駛。良健矣。好不涉  
程途。幻出蓮花水。名山社裏。怪采菊狂生。蜉蝣晉宋。親執遠公袂。情偶結。樂土移

歸瘠里。溪田雀啄香米。儒門淡泊相傳久。那得無人飄起。奇特事。本李耳啣杯。卻見瞿曇醉。逢場曰寄。貴出匣吹毛。彌天伎倆。重把馬駒繫。

又 答帽雪疊前韻

怨城空。冷風黃葉。君來始獲精思。去年放眼章華上。彷彿獵徒飄駛。堪樂矣。聚司馬元龍。入我毫端水。嬾真堂裏。遇花譜唐宮。十分春色。邀客展芳袂。塵途濁。耐可敲眠井里。侏儒恥向分米。移居只在秋塍畔。東望海雲初起。文章事。似雪乳盈甌。續取連宵醉。蕉筒索寄。縱鑄就并刀。象觴雙佩。難解此心繫。

又 和濟武夢趙韞退疊前韻

七年餘。未逢珠節。索居那免淒思。河山命駕衝風苦。信覺神尻多駛。飛動矣。是碧月樓寒。斷續銅壺水。竹林遊裏。看太乙蓮舟。橫穿戟戶。狂喜各舒袂。人何在。西接堯都舜里。鋼輪陸遞軍米。天中自昔蕭閒境。猝受怒笳吹起。偏好事。每襍被漳臺。四顧應劉醉。雙魚卽寄。讓拊枕纏綿。綠紗煙語。先我寸腸繫。



又 陳用亶堯夫攜尊濟武寓中同集疊前韻

命長筵。秋澄物候。窮鄉足浣憂思。阿誰不恨鹽車困。絕影奔塵之駛。深坐矣。話少伯。無端。泛盡江南水。半牀花裏。盼弦月斜流。參橫樹杪。先判隔城袂。繙韻譜。何異徵歌北里。揀沙私幸留米。燈前擊鉢聲希後。戶外雲璈徐起。狂奴事。可賤乞天公。日買新豐醉。一時興寄。作藝海盤遊。不須樓櫓。堅瓠也堪繫。

又 勉宏略疊前韻

古賢豪。聚書抽藻。舍旃更有何思。康莊待付凡流去。歷塊連錢方駛。兵偃矣。應笑我淋漓。淚點如鉛水。少年場裏。恣燕翦紅殷。花幡翠繞。拏得麗人袂。輕塵外。數歲安居。苧里。嫩蒸波面飄米。長風逆溯西京上。收召鄒枚齊起。傳心事。第敵屣浮榮。先學懨懨醉。名因迹寄。慮史氏占星。霎時蓬散。權借彩虹繫。

大酺 同張蘧林餞別袁籜庵

看楚雲飛。吳煙遠。良約都因春誤。紅樓聽雨罷。又恁恁無定。意如飄絮。幔鎖荷香。梁

招乳燕。知是懷人深處。填詞付歌管。正陳隋舊夢。寓情瓊樹。恨三幅江帆。一雙山屐。撰成離緒。沈沈絲雨暮。亂流急。翹首迷前渡。且近覓。投簪狂客。負局先生。解征衣。酒邊同住。自古誰豪舉。身與世。總成羈旅。更休疊。陽關句。浮樽相屬。西子夜來傳語。停舟鏡湖待汝。

多麗 雲母燈

小庭前。象板瑤樽齊設。納新涼。宜呼蠟炬。半遮無礙。清徹。是何人。巧裝密釘。一層雲。一層明月。掠取餘英。羣仙餐粉。劇來幽洞。九枝疊雪。總貪看。素光千片。寧使好山缺。渾疑向。綃衣對舞。玉琢宮闕。恨剛被。屏風隔斷。又添朱火高揭。巧藏身。衆中偷覷。歷歷歡場。助愁絕。勸惜蘭膏。護開花蕊。防他流淚易銷歇。夜深也。寸心灰後。還有留髡物。催移去。雙影半昏。莫照羅襪。

又 星期與諸子讌集涉園遙同次韻

尺縑殘。俊人再集西園。送蘆笳。邊風絕遠。歡場許駐韶顏。聽鶯迴。晴窗染紺。浮花去

春渚拖藍。宦海難經。錢神易別。逍遙總讓竹皮冠。昂首望、橫穿斗柄。歷歷酒星圓。驚相問、善和坊曲。欠取端端。算香辰、未逢修禊。早看煙月雙娟。要離塚、誰嗤竈熱。臨邛市、肯怕琴寒。禁苑停呼。侯門漫刺。宏詞合在客窗間。溯澄湖、蓴羹新熟。勤買檝頭船。吾衰甚、願分蘭畹。洗盡愁山。

詞二  
鄉亭

運  
軒



宋 琬（萬曆四二——康熙一二）

字玉叔。號荔裳。山東萊陽人。順治四年進士。授戶部主事。累遷永平兵備道。寧紹台道。族人誣之。對簿西曹。久之得白。流寓吳越間。尋起四川按察使。工詩古文詞。與施愚山齊名。著有安雅堂集。

序

萊陽宋荔裳先生以文章名海內久矣。乃人稱其登臨讌集之暇。好爲小詞。甫脫藁。輒爲好事袖去。尙書紅杏郎中花影之句。恆津津人齒頰。問云。閱讀安雅堂所載古文辭。暨各體韻語。絕似昌黎廬陵諸大家。與建安開元時人。不禁歎曰。美哉泱泱乎。東海之風。于鱗以後。一人而已。顧以未得讀其詩餘爲恨。一日先生駐驂五茸。得追隨杖履。采蓴澱湖。翫月九峯。歷壽夢之遺墟。弔平原之故館。夕陽蔓草。流水寒鴉。相與徘徊不忍去。于是出其奚囊中諸長調歌之。多商羽之音。秋颿拂林。哀泉動壑。不足以喻其崢嶸蕭瑟也。已而置酒名園。銀屏絳蠟。掩映于花榭竹嶼間。檀板紅牙。肉唱絲和。先生復出其小令。爲曼聲歌之。如新箏乍調。雛鶯初轉。尖佻新豔。不數齊梁子夜讀曲諸歌。噫。觀止矣。湖海之作。傖父辛劉。閨帷之製。衙官秦柳。此真子建天人之才。邯鄲生能不爲之咋舌汗下乎。余嘗謂之曰。不朽之道。人患其少。公患其多。豈欲占盡文苑諸家耶。抑公以生平風波危懼。跋胡蹙尾者尙少。而更將深造物之忌。

耶先生爲之捫腹微笑而已。康熙己酉暮春下浣雲間年家後學董俞蒼水題於玉屏梵閣。

# 二鄉亭詞

萊陽宋 琬荔裳

## 夢江南 湖上早春

郎有約。草草畫雙蛾。行到西陵松柏下。遊人爭似蜜蜂多。偷眼送春波。  
妝閣外。一帶綠楊煙。冶葉倡條今盡矣。春來那得到三眠。何處繫郎船。

## 憶王孫 菊花有名二喬者一朵中紫白各半蓋異種也

前身曾喜嫁周郎。近託柴桑處士莊。姊妹爭如鬪草強。效鴛鴦。偷得徐娘半面妝。

## 又 閨怨

絲絲嬌柳逐風斜。曉日瞳朧掩碧紗。強起還慵理鬢鴉。白楊花。猶自多情入妾家。  
越來溪上采蓮舟。偷照蛾眉向淺流。女伴相呼怕舉頭。羨沙鷗。飛去飛來只自由。  
兒家門對白蘋洲。夫婿經年事遠遊。楊柳青青古渡頭。恨輕舟。不載郎歸載妾愁。  
空房膽怯夢多訛。長向花前斂翠蛾。幽恨詩成嬾去歌。背吟哦。悶倚朱欄教八哥。



如夢令 離情

剛到鳳凰臺上。無那驪駒三唱。願作博山爐。魂逐沈煙遊颺。羅幃。羅幃。高築愁城千丈。

織女黃姑月月。偏受天公磨折。正爾拜雙星。驀地燕南越北。新月。新月。乍缺乍圓似妾。

小膽空房多恻。那更烏啼蛩嚏。簾捲看銀河。心與繁星俱碎。紅淚。紅淚。長浸合歡翠被。

別後雲鬢慵整。蛛網罥囊金鏡。羅襪步空階。幾曲雕欄獨凭。花影。花影。滿地月明清冷。

長相思 吳門夜泊

大江東。五湖東。地主今無皋伯通。誰人許賃舂。聽來鴻。送歸鴻。夜雨霏霏舴艋中。寒山寺裏鐘。

生查子 春閨 俱戲用藥名

別日杏初紅。新來黃白瘦。  
梔子幾時回。驗取丁香扣。  
兔絲蔓已長。枳殼花開又結。  
哽畫雙蛾。青黛眉兒皺。

又 夏閨

二月算當歸。于今將半夏。  
誰與醉菖蒲。芍藥吹殘也。  
啼鳥宿紗窗。清淚珍珠瀉。  
紅豆盡拋殘。笑把林禽打。

又 秋閨

涼夜正懸參。貪看牽牛臥。  
欲睡復防風。故紙窗櫺破。  
曉起鬱金堂。篆裏沈香盞。  
纖手泛茱萸。滿地黃金澆。

又 冬閨

人言歡欲來。續斷龐兒吠。  
寒夜轉相思。相思增五倍。  
儂似款冬花。心爲檀郎翠。  
十斛買香醪。此夕因沈醉。

點絳脣 劉峻度席上聽女郎度曲

子夜清歌。隔簾疑在青天外。瓊簫玉管。莫把鶯喉礙。  
紗帽籠頭。卸卻殘妝戴。嬌羞  
壞。廣場無奈。初學男兒拜。

又 簡陸元見徵士

牧豎樵兒。斧斤漸逼篔簹谷。梅花有福。逃入幽人屋。  
甫里先生。邀我供茶粥。頻來  
熟。丹經同讀。牀下眠麋鹿。

浣溪沙 題余澹心五十小像

白髮平頭五十人。依然居士淨名身。盟鷗狎鷺有誰嗔。  
伯玉行年非已斷。少陵垂  
老懶逾真。冶城花月樂千春。

白髮平頭五十人。洪厓拍手笑相親。會須騎鶴訪三神。  
爲愛煙波來角里。肯將名  
姓謁平津。莫釐峯下且垂綸。

白髮平頭五十人。布衣曾未染京塵。往來求仲不嫌頻。  
鬪鴨欄邊芳草合。鳳凰臺

畔柳條春。批風抹月葛天民。

白髮平頭五十人。疏狂聊以樂天真。四時佳氣在君身。

桃葉渡頭雙槳在。樵青歌

罷調方新。爲君滿引莫逡巡。

又 芳草

乍暖猶寒二月天。玉樓長抱博山眠。沈香火冷少人添。殘雪纔消春鳥哢。畫闌干外草芊綿。幾時青得到郎邊。

卜算子 榆莢錢

良冶讓天工。不怕銅山賈。鑄就青蚨億萬緡。亂向枝頭寄。鵝眼易飄零。貫朽還垂地。欲付新豐舊酒樓。少箇開元字。不見鼓洪爐。但見泉刀瀉。嫋嫋垂楊欲聘梅。千萬春風價。舍鬪草兒童撲滿輸。一擲斜陽下。撒漫古城邊。暴富田翁

宜向庫中藏。卻向林端挂。蕩子東君不作家。散作鶯花債。萬選繞叢懸。赤仄連青

靄滿地殘英。誰主人賤把春光賣。  
花作五銖衣。偏被桃花晒。女伴閒將歸信占。恨殺無憑準。  
窳不信東風解愛錢。一夜偷將盡。  
樹也有貧時。俄看枝頭

采桑子 贈歌者陳郎並東西樵

櫻桃時節櫻桃鄭。改作崔徽。奪得鸞鏡。輕燕翩翩掌上飛。  
羅衣一段嬌癡。羞殺西樓穆素輝。是日演西樓記  
紅牙按罷黃金縷。卸卻

燈前倦倚嬌無力。臂作匡牀。重理清商。一串驪珠繞畫梁。  
催妝何物王郎。醉裏溫柔更有鄉。  
暮雲朝雨今宵夢。錯賦

又 舟中見雁有感

今春曾送回鄉雁。欲賦歸歎。欲賦歸歎。爲報閨人掃敝廬。  
其除歲聿其除。卻悔今春枉寄書。  
今秋又見南飛雁。歲聿

又 梅花

試將風格閒評品。誰得相宜。誰得相宜。除卻湘妃定洛妃。枝頭只許棲幽鳥。燕子來遲。不見雲英未嫁時。

減字木蘭花 招友人遊湖

孤山之下。雨中正好看花也。待得晴時。杏嫁梅娠綠滿枝。空囊烏有。三百青銅難貫酒。亟典春衣。莫待東君致政歸。

菩薩蠻 閨情再用藥名

桃腮杏靨春風面。車前馬上曾相見。蟬鬢退鴉黃。氤氳蘇合香。淚光雲母慘。絮絮燈心短。螺黛麝蘭膏。憑誰贈阿嬌。天門東畔天涯遠。摧殘菝葜香痕淺。懊惱不留行。連敲砧杵聲。細心挑錦字。遠志儂愁記。翠鈿共犀梳。封題好寄奴。

清平樂 春怨

楊花飛雪。蕩子心腸鐵。恨殺嫦娥圓復缺。不管人間離別。怕簪碧玉搔頭。妝成懶

下朱樓。樓上銜泥雙燕。呢喃似替人愁。

又 輦上故人有爲予勸駕者作此詞謝之

鼠肝蟲臂。總是君王賜。一曲狂歌千日醉。管領鷗班鷺隊。故人天上吹噓。勸予重整簪裾。只恐中山毛穎。於今老不中書。

憶秦娥 秋感

梧桐落。秋來客睡何曾著。何曾著。萬家砧杵。月明烏鵲。人閒信有風波惡。紛紛世俗成輕薄。成輕薄。五陵裘馬。少年同學。

又 有憶

朱闌畔。莫愁嬌小曾相見。曾相見。翠娥羞斂。半遮團扇。畫梁依舊巢雙燕。藏鴉幾度垂楊換。垂楊換。桃花臨水。那時人面。

又 春閨

春如繡。銜泥燕子黃昏後。黃昏後。愛他雙影。妒他雙宿。恁恁過了梨花候。池塘不

耐東風驟。東風驟。吹將波影。學人眉皺。

生查子 暮春將半桃花始開

梅花開已遲。卻恨桃花晚。把酒問花神。何事今春嬾。  
春風如畫工。粉黛憑深淺。花是女兒家。遲早由他遣。

又 鞦韆

僊僊蝴蝶衣。窄窄檀香板。纖體欲飛颺。只恨春風軟。  
春葱玉指柔。香汗羅襦滿。侍女笑相扶。倩把雲鬢挽。

阮郎歸 春閨

越甌犀液試新茶。困來眠碧紗。夢中何事獨長嗟。  
梅香猜著些。呼女伴。踢晴沙。柳梢啼暮鴉。  
繡裙偏愛合歡花。來生得似他。

攤破浣溪紗 西溪訪陸處士作

三月楊梅正作花。板橋敲側俯晴沙。閒覓柴門無徑路。  
柳陰遮。燕子忽忙營社稷。



蜂兒辛苦作官衙。問著山翁都不識。野人家。

眼兒媚 憶故園作

朝來沽酒典春衣。梅子雨初肥。杜鵑言語。枝頭教誨。道不如歸。  
十年蹤跡沙鷗是。負卻舊漁磯。鄰翁相候。山閒茅屋。松下柴扉。

西江月 索林鐵崖侍史絮鐵不見作此嘲之

閱盡古今俠女。肝腸誰得如他兒。家郎罷太心多。金屋何須重鎖。  
羞說餘桃往事。憐卿勇過龐娥。千呼萬喚出來麼。君日期期不可。林口吃故云

又 秋花有名粉茉莉者

姑射山頭冰雪。僊人散作雲霞。嫣紅姹紫讓天斜。略似文君新寡。  
最愛章江木本。居然壓倒羣葩。嬌香冷蕊較爭些。婢學夫人其亞。

又 無題

傾國先呈皓齒。靈心暗託瓠犀。麝蘭香沁茗甌時。中有醍醐妙理。  
春筍纖纖半露。

燈前低斂蛾眉。禪心果否絮黏泥。珍重阿難戒體。

又 舟中見麗人

淥水芙蓉掩映。青蛾欲展還顰。琉璃千頃碧無痕。恁敵橫波一寸。畫舫搖搖近岸。岸邊偷覷防嗔。長年何幸得相親。半晌輸他福分。

又 錢唐門外作

白馬千羣浪湧。銀山萬疊天高。錢唐潮似廣陵濤。近日潮聲草草。往昔綠陰黃鳥。于今野水紅橋。西陵松柏久蕭條。何處孤墳蘇小。

又 二男阿環日者家云長當學武三男阿端以五月五日生忽屆醉盤口號

志喜

只合呼他豕犬。漫誇圖畫麒麟。與兒戲戴小綸巾。果否提戈取印。莫學王家鎮惡。爭如齊相田文。敢期他日大吾門。孝弟耕田本分。

又 久客杭州歸雲閒度歲兒輩競索衣帛作此自嘲

老去霜顛種種。歸來繡襖重重。辛盤銀燭畫堂中。第一生平好夢。爭學傳柑索棗。挽鬢交問衰翁。空囊更比少陵窮。那有天吳紫鳳。

醉花陰 閨園

雨餘天似柴窰碧。修竹穿籬出。滿地碎秋聲。白鳥青蟲。生長芙蓉國。森然奇鬼池邊石。紅葉纏青壁。屐齒竟忘歸。醉倚層樓。三弄楓林笛。

南歌子 南國牡丹始開吳六益董蒼水過飲薄暮方歸

碧沼看魚媵。雕欄放鼠姑。君來拍手唱烏烏。恰好枝頭啼鳥喚提壺。嫩白全羞粉。嫣紅半點朱。醉眠堪臥錦氍毹。偏要戴花歸倩細君扶。

浪淘沙 昭君套

宜伴鐵兜牟。卻在妝樓。文姬遺製尙風流。扶上雲鬟頻熨貼。紫玉搔頭。臨鏡轉含羞。笑展雙眸。起來呵手戲藏鬪。密語檀郎低附耳。底是溫柔。

又 秋旅

風雨十分驕。怒似江潮。愁來我欲睡鄉逃。促織多言偏不允。枕畔叨叨。強半客僧  
寮。琴劍蕭條。一枝難穩。愧鷓鴣。來歲西窗須記取。莫種芭蕉。

又 楊子中流望金山北面

誰削玉嶙峋。千尺雲根。蛟龍深護海西門。金碧樓臺青黛樹。小李將軍。雁影落紛  
紛。喚起江豚。鐘聲兩岸客邊聞。登陟不如遙望好。倒影斜曛。

又 湖上三舟圖成寄執玉奉常西樵吏部

何處覓星槎。且住爲佳。張融岸上屋堪賒。同在白鷗鄉裏宿。迭作鄰家。有約看朝  
霞。每到棲鴉。南屏寺外藕初花。盪槳歸來驚宿鷺。觸破窗紗。

鷓鴣天 贈說書韓修齡

豹尾班中侍從頻。滑稽似爾絕無倫。投壺那得天顏笑。只爲談諧郭舍人。楓欲落。  
雁來賓。蕪城明月恰逢君。開元供奉今誰在。抵掌雍門淚滿巾。

又 賀相者陳我白生子

聞道明珠入掌中。充閭佳氣靄融融。君家妙手如唐舉。摩頂何須寶誌公。金作埒。玉爲驄。鳳毛五色自超宗。弄璋錯寫休辭罰。試聽啼聲問阿翁。

又 同人約看玄墓梅花以雨不果返棹雲閒阻風四日舟中撥悶戲呈吳仲

徵廣文

鄧尉梅花二月天。欲攜竹杖醉花邊。無端甲子冥冥雨。不爲遊人巧作緣。三泖路。九峯煙。石尤風起纜難牽。輕帆半幅如飛鳥。羨殺東來鴨嘴船。

又 題樊會公小像

曾向車中看壁人。金丸珠勒冶城春。祇今老作青溪長。猶是當時折角巾。姿卓犖。骨嶙峋。畫師摩詰是前身。知君埋照饒深意。新築糟丘號酒民。

又 題佟壽民方伯三世圖

作礪爲舟社稷臣。袞衣應許近星辰。黑頭宰相黃扉客。曾是維摩座上人。鏘劍佩。握絲綸。安排圖畫到麒麟。夢回須記青蓮句。金粟如來是後身。

又 遣懷

咄咄書空喚奈何。自憐身世轉蹉跎。長卿已倦秋風客。坡老休嗔春夢婆。朝梵夾。暮漁簑。閒中歲月易消磨。誰言白髮無根蒂。只爲窮愁種得多。

虞美人 賦得遠遊長兒子

殊方流落頻生子。舐犢真堪喜。尋醫覓乳費商量。何況他年婚嫁爲他忙。生長東吳同燕旅。不解齊人語。故因猶有舊柴桑。待得青春作伴好還鄉。

又 看花作

朱朱粉粉東風面。一夜開將徧。花神料得是鍼神。繡出枝枝葉葉一番新。黃鸝似向風姨訴。莫把花枝妒。趙家姊妹易相嗔。試看南枝如笑北枝顰。

又 遣懷

一從勘破邯鄲夢。遇飲長須痛。醉鄉只道可藏愁。卻被塞鴻呼起又從頭。吳頭楚尾經年寓。岸上牽船住。非關王粲怯登樓。自是吾家家法善悲秋。

又 過錫山秦園訪留仙太史不遇作

辟疆園傍春申曲。翠壑噴哀玉。畫橋宛轉客來稀。驚起一雙鴻。鴻破煙飛。釣船空繫垂楊下。興盡須歸也。蔣家新釀不曾酤。卻笑酒杯也似故人疏。

鵲橋仙 井蛙

草際持頤。泥中齧齒。別號蟲中裸族。一謳羣和爲公乎。偏則向、人前怒目。雄踞東陂。長吟下里。宛矣公孫在蜀。董生何事懶窺園。看不耐、汝曹邊幅。

又 長安邸舍初罷稽勳作

鈞天在耳。晨開閭闔。無奈浮雲蔽日。嵇康曾答巨源書。道臣也、不堪有七。玉珂雕馬。莫來莫往。盡是平生膠漆。孝標著論一何愚。笑勸百、何曾諷一。

又 雨中宿笑隱庵示笑魯和尚

沙鷗睡穩。雨聲驚起。竹裏雙扉開闔。南屏一縷白雲生。早失卻、雷峯殘塔。青苔妨屐。黃柑伴茗。松老應同僧臘。西風蕭瑟柁樓寒。向彌勒、龕中下榻。

又 寓園海棠

東君忒巧。調朱搓粉。繡出紅霞幾幅。朝來細雨一絲絲。似妃子、溫泉初沐。風前欲語。煙中如睡。只合錦禽雙宿。枝閒啼罷不來巢。燕燕說、鶯鶯無福。

蹋莎行 雁

楓落瀟湘。雪深幽冀。霜風吹老蘆花穗。擣衣時節卻飛來。一聲纔斷千行淚。帶雨還飛。飄零無次。蕭蕭清影和雲墜。郎邊莫道少書來。長空寫盡相思字。

又 虎丘試劍石

光淬芙蓉。魂驚魍魅。青苔石上媧皇淚。自從雙劍作龍飛。空聞白虎眠幽隧。歌舞方酣。越人兵至。水犀驚醒夫差醉。鴟夷葬後館娃空。鐺鏤似比干將利。

臨江仙 曹顧庵歸自楚中聞余在白門不及晤而去留書爲別賦此詞奉答

憶在勞勞亭上別。吳江三落丹楓。洞庭西望水連空。共誰過赤壁。高唱大江東。準擬開樽還痛飲。小樓同聽疏鐘。布帆歸去似飛鴻。寄將黃雀鮓。須趁鯉魚風。



又 艾石五兄納姬白門善解琴書攜之入蜀催妝賦此

桃葉桃根豔冶。巫山巫峽嶙峋。高唐雲雨昔曾聞。賦才今宋玉。臣夢果然真。十樣眉誇螺黛。七絃琴拂龍脣。薛濤箋寫洛川神。小窗圖筆陣。親學衛夫人。侄婦姜臨池最工

又 贈少年客

韋曲城南天尺五。翩翩公子豪奢。小平津外綠楊斜。金鞍雄百騎。蠻鼓醉三槌。一擲梟盧輸百萬。吳鉤光閃龍蛇。春衣夜宿杜陵花。情人劉碧玉。俠客魯朱家。

唐多令 孤館

窗外雨澌澌。涼颼戛竹枝。賴征鴻喚起魂癡。安得波斯千里鏡。重照見。曉妝時。孤館被秋欺。啼螿攪夢思。寫離愁。空費烏絲。縱有金鍼五色線。穿不起。淚珠兒。

鵲橋仙 五人墓

揚旗擊鼓。斬蛟射虎。頭顱碎黃麻。天使罇諸匕。首信豪雄。笑當日。一人而已。華表

崔巍松杉森肅。壯士千秋不死。從來忠義出屠沽。慚愧殺乾兒義子。

蝶戀花 桃葉渡舊用小舟亂流而濟。今易以橋往來。差便而名實不副。慮往

跡之湮也。作此詞。

一曲清淮圍畫閣。桃葉桃根。髻子新梳掠。不畏風波江上作。長篙自有王郎捉。誰  
向津頭施略約。高架虹梁。偃臥青龍角。寄語黃姑依樣學。填河不復勞烏鵲。

又 相思鳥

兩兩文禽長並宿。淺碧殷紅。毛羽如新沐。共命迦陵真眷屬。雕籠合用連枝木。飛  
去銜花歸啄粟。雄往雌來。似戀黃金屋。畢竟斑鳩鷹眼毒。晴時相喚陰時逐。

又 閨中秋月

恨殺廣寒宮裏兔。闖入紗窗。無計驅他去。若是嫦娥憐妾苦。只應長伴愁人住。無  
奈團圓纔十五。漸漸虧來。做出愁眉嫵。說向天邊兒女語。人間薄命儂和汝。

又 旅月懷人

月去疏簾纔數尺。烏鵲驚飛。一片傷心白。萬里故人關塞隔。南樓誰弄梅花笛。蟋蟀燈前欺病客。清影徘徊。欲睡何由得。牆角芭蕉風瑟瑟。虧伊遮掩窗兒黑。蟋

又 送春

借問東君何所似。駘蕩風流。性格如遊子。纔過清明兼上巳。瞥然興盡思鄉里。萬樹嬌紅千樹紫。那忍相拋。便付東流水。春風也恐多情死。杜鵑聲裏潛歸矣。

一翦梅 梅花

淺碧深紅擁素裳。楚楚晨妝。澹澹殘妝。霜姨雪姊伴昏黃。月在迴廊。影在迴廊。寂寞孤山處士莊。漠漠湖光。翦翦雲光。思量誰得配孤芳。風裊蘭香。篆裊沈香。

又 梨花

靜女仙姝澹不羣。猜作湘君。喚作文君。輕風嬌雨護香溫。朝展眉痕。夕帶啼痕。欲謝還開映水紋。開是停雲。謝是行雲。幾枝斜倚綠楊村。鶯也銷魂。燕也銷魂。

又 思家作

飄泊東南劇可憐。朝采菱船暮打魚船。愁中看徧好山川。鶯脰湖邊。罨畫溪邊。問  
余何日賦歸田。說道今年。又是明年。故園消息久茫然。春燕來前。秋雁來前。

破陣子 關山道中

拔地千盤深黑。插天一線青冥。行旅遠從魚貫入。樵牧深穿虎穴行。高高秋月明。  
半紫半紅山樹。如歌如哭泉聲。六月陰崖殘雪在。千騎宵征畫角清。丹青似李成。  
營丘有關山圖

蘇幕遮 過廣陵趙都憲故居懷友沂中翰泫然而作

竹西亭。歌吹地。廿四橋頭。曾繫青絲騎。坐上秋娘兼季次。俠客名姝。夜夜春風醉。  
孝廉船。丞相第。絃管淒涼。苔老朱門閉。燕子新從王謝例。太息回車。無限羊曇淚。

感皇恩 冤繫二年一朝解網感荷天恩歌以代泣時癸卯十一月朔三日也

雪窖與冰天。孤臣泣血。魚鑰沈沈隔雙闕。修羅劫滿。等到烏頭如雪。九重消息好。皋  
陶曰。旆下騶虞。雞竿載揭。喜極沾巾轉嗚咽。妻孥相告。今日鶴鳴于垤。黃梁剛夢

醒、炊還熱。

舊雨來

自度曲

客金陵雨中作

會記當年雨後。門前冠蓋客。一何多。銀燭西窗。螢火亂聽枯荷。直到晴時方去。溼鳴珂。今日雨聲猶昨。蕭條三徑裏。有誰過。料得故人無疾病。卻因何。只把天公埋怨。太滂沱。

千秋歲

爲吳門袁生題霜哺篇卅

袁生至孝。鄉國人爭道。身既隱。親將耄。鴛鴦依膝下。瑞映金光草。五十載慈顏。今日方成笑。殊有超宗肖。骨相生來好。竹馬戲斑衣導。驂駟馳上苑。圭璧登天廟。羨只羨重堂。百歲丸熊教。

風入松

淳于棼墓

大槐安國舊邦基。蟻垤尙纍纍。麒麟高冢。邠連象。繁華夢一枕龜茲。爲問秦樓公主。瓊簫曾否相隨。朱幡阜蓋畫熊旗。千里罷征鼙。策勳帶礪。今何在。羊開府。身後同

悲。吾欲題君隧道。南柯太守之碑。

又 訪張瑤星於松風閣不遇

雨花臺畔訪柴荆。匹練大江橫。鍾山紫翠斜陽外，蚪龍影、幾陣松聲。曾共廬山高衲，小樓明月吹笙。短筇重過石頭城。懷舊不勝情。徵君舊刹棲霞寺，梧桐老、白鶴相迎。爲道二鄉居士，來尋三影先生。

滿路花 胭脂井

紅牙歌玉樹。翠袖翻金縷。臨春梳洗罷，調鸚鵡。陳家狎客，慣把江山賭。樓船天塹渡。牀下軍書，錦箋催寫新句。舊宮智井，欄外青苔古。明眸秋水綠，爲黃土。海棠花落，一片胭脂雨。環珮歸何處。泉下芳魂，至今遺恨擒虎。

千秋歲引 題長松柱石圖爲李含馥運長壽

怪石眠雲。孤松偃蓋。亭亭千尺連青靄。五粒曾霑仙掌露。一拳欲下南宮拜。謫仙人。元是李蟠根大。伊呂功名方未艾。何事丹砂句漏外。鄧禹封侯喜將屆。夢松之占。

今驗矣。黑頭堪羨風雲會。紫泥書。丹山鳳。銜來快。

意難忘。爲施校書宛西作。

洗盡鉛華。記苧蘿西畔。曾浣溪紗。徵歌鶯語滑。學舞燕飛斜。攜暮雨。掩朝霞。別館貯嬌娃。采蓮歌。魂銷千載。何況夫差。嬋娟偏在君家。羨朱樓罨畫。楊柳藏鴉。鷓鴣弦時一弄。羯鼓醉三搥。無限恨。向梅花。清淚染琵琶。待學他。鷓夷少伯。共泛仙槎。

滿江紅 燕臺懷古

易水東流。與西去。荆卿長別。祖帳處。三千賓客。衣冠如雪。督亢圖中雷電作。咸陽殿上襟裾絕。恨夫人。匕首竟何爲。同頑鐵。漸離筑。笙歌咽。博浪鐵。車輪折。縱奇功未竟。祖龍褫魄。一死翻令燕國蹙。九原悔與田光訣。歎千年。寒水尙蕭蕭。虹霓滅。

又 王西樵客遊武林曹顧庵賦詞志喜屬予和之

花落錢塘。江流闊。潮痕初漲。問足下。何由至此。布帆無恙。儵爾波濤如夢裏。蹶然屐齒來天上。恰湘湖。蓴菜十分肥。爲君餉。西湖畔。春波漾。疏柳外。歸樵唱。有青油畫

舫烏程佳釀。風暖遙傳靈隱磬。天晴急策韜光杖。倚危欄百尺看銀塘。龍蛇狀。

其二 予與顧菴西樵皆被奇禍得免

痛定追思瞿塘峽。怒濤飛漲。歎北寺。皋陶廟側。何期無恙。莊烏悲歌燕市外。靈均憔悴江潭上。問綈袍。高誼有還無。誰會餉。愁萬斛。東流漾。五噫句。春閒唱。恨埋憂無地。中山須釀。故態狂奴仍未減。尊前甘蔗還堪杖。笑邯鄲。夢醒恰三人。無殊狀。

其三 西樵以南徐游覽諸作見示

北固城頭兼天湧。銀濤奔漲。登覽處。頻經戰伐。金焦無恙。鼓柁鼉鼉深窟畔。振衣鶴雀危巢上。手摩挲。瘞鶴古殘碑。爲余餉。弓樣月。波中漾。欸乃曲。橋邊唱。望鄉心倍切。濃于春釀。禽慶欲偕名嶽履。李邕幸免金吾杖。笑馬遷。貨殖強裁書。無聊狀。

其四 西樵長齋佞佛但不戒酒

春色闌珊。繁花謝。紅銷綠漲。山一似。西施瘦損。捧心微恙。隄上長吟蘇白句。樓頭高話羲黃上。喜清齋。久已絕豬肝。何須餉。風乍捲。輕綃漾。煙欲暝。金衣唱。愛信陵作



達沈埋醇釀。禹穴天台春正好。裹糧且辦青藤杖。倩君侯、綵筆代丹青。雲霞狀。

其五 刀俎餘生欲斷葷者數矣。奈茹素輒飢。故篇中及之。

伏枕吳山。羈愁共、桐江春漲。喜邂逅、客星忽聚。酒徒無恙。楊惲南山歌太苦。鄒陽北闕書難上。向精藍、深處問枯禪。伊蒲餉。雙燕外、游絲漾。六橋側、紅牙唱。惜杜康骨朽。無人能釀。我愧老饕難戒肉。君方強健何須杖。看白衣、蒼狗任他忙。浮雲狀。

其六

吾道榛蕪。狂瀾倒、百川爭漲。賴砥柱、君家伯仲。安流無恙。龜策何勞詹尹卜。龍轡遠過黃初上。況陳思、才藻氣如虹。詩堪餉。請室耗、心旌漾。擊瓦缶。烏烏唱。看霜侵兩鬢。窮蒸愁釀。放逐誰憐亭伯困。登臨願借盧敖杖。坐西窗、翦燭話通宵。悲懽狀。

其七 鐵崖顧菴西樵雪洲小集寓中看演邯鄲夢傳奇殆爲余五人寫照也

古陌邯鄲輪蹄路。紅塵飛漲。恰半晌、盧生醒矣。龜茲無恙。三島神仙游戲外。百年卿相蘧廬上。歎人間、難熟是黃粱。誰能餉。滄海曲、桃花漾。茅店內、黃雞唱。閱今來古

往一杯新釀。蒲類海邊征伐碣。雲陽市上修羅杖。笑吾儕。半本未收場。如斯狀。

其八 招隱也

歸去來兮。東皋下。錦秋湖漲。有不腆。敝廬海曲。年來多恙。避地人辭金馬後。游仙伴。我方壺上。羨冰桃。火棗大如瓜。麻姑餉。微雨過。清溪漾。行樂耳。提壺唱。喜兒童學灌山妻能釀。處士三閒容膝屋。仙人九節齊眉杖。恨衰年。脚疾耳將聾。新來狀。錦秋湖名

又 贈趙千門謫官武陵

竹馬鳩居。游嬉日。追隨里巷。九萬里。風搏羊角。相期同上。作賦無過潘岳敏。論年頗愧袁絲長。記蜃樓。影裏望蓬萊。心何壯。八叉手。誰能兩。三舍退。予非讓。惜蛾眉嫁晚。仙宮蕊榜。一柱觀頭堪拄笏。匡廬飛瀑三千丈。羨滕王。高閣醉憑欄。王恭擎古郡洪都。平反借。經綸妙手。游刃處。昆刀并翦。岷冤立剖。崕曲羊腸真險絕。蘼蕪何事捐新婦。歎樽前。涕淚染琵琶。青衫袖。湖水畔。吳山岫。白傅再。髯蘇又。更窮愁詩

好。外孫齋曰。長笛倚樓誰解道。旗亭歌徧諸伶口。向六朝。煙雨晚尋春。從君後。

又 小女歸次淮北舉第三子真州聞報口占志喜寄五文塔

齊女門前送歸鷓。心旌搖漾。忽報道。石麟墜地。言觀其韞。阿大中郎誰得似。吾家宅第非虛相。羨鳩車。竹馬爛如雲。烏衣巷。駒千里。龍媒覓。歎朱汗。精傲儻。喜元燈耿。耿。後來能亢。蚌老珠胎應有驗。渭陽滾滾肩相望。伴老夫。醉裏蹋青山。扶筇杖。

又 贈既庭弟

玉磬山房。西窗下。論文翦燭。兒女輩。挽衣問訊。酒漿相續。往事堪驚如噩夢。新愁欲話難更僕。悵登山。臨水送將歸。吾家玉。春草句。勞心曲。隋苑外。逢南菊。歎雪中鴻爪。去來何速。才子從來悲失路。斯人豈合棲空谷。約明春。鄧尉看梅花。支公屋。

又 題尤展成小像

賦奏凌雲。真才子。至尊親許。長太息。文章惜命。驂騑失主。放逐身隨麋鹿伴。英雄志。偃蛟龍雨。記錦裘。躍馬出榆關。題詩處。白蓮社。誰偕與。石渠閣。曾凝佇。且南窗寄。

傲東籬高踞。五嶽夢游禽慶屐。三搥醉弄禰衡鼓。笑韓陵一片石峻嶒。差堪語。陶令歸來三徑外。栽松種柳遙集者。湘潭屈子。漆園莊叟。木柄長鑱常在握。竹皮圓笠新加首。置斯人一壑一邱閒。然乎否。白雪調無雙手。曉風句諸伶口。但響門遣子烹葵呼婦。祕笈已窺林屋洞。新篔且醉蘭陵酒。問朱門高蓋幾人存。東門狗。

又 賀馮郡丞公子秋捷

甬上簪纓羨家世。夔龍相繼歌頌徧。青州父老白門子弟。共道平反陰德盛。高車駟馬于公第。果仙郎高折一枝歸。瑤臺桂。丹鳳翻青麟。龍爲友。神英銳。看追風箭電騰驤天際。射策江都偕計日。論年高密封侯歲。問傳臚第一屬何人。馮當世。

又 李方山歸自滇中喜而有贈

西子湖頭送君日。楊花飛雪一萬里。蠻煙瘴雨朱門空謁。雁字不傳滇海路。蘆花正映清溪月。向莫愁村畔話離愁。真奇絕。磨盾志空悲咽。題柱願難消歇。惜白頭成錯。六州之鐵。鄉里兒曹偏面冷。丈夫拓落因腸熱。取囊中詩卷共青萍。燈前閱。

抱瑟歸來。歎遊子、飄零南國。君賀我、商瞿有子。狂歌浮白。大者纔能呼父執。黃雞綠酒。娛今夕。但無如、瓊樹倚階前。誇雙璧。吹玉笛。長干陌。攜蠟屐。江淹宅。曰身將隱矣。北山之北。遠害且尋麋鹿伴。那能老作諸侯客。況竹溪。六逸尙堪招。徂徠側。

又 壽方山時年五十有一

齊魯之間。許君是、鬚眉男子。歌伏櫪。壯懷消滅。肉生雙髀。草檄百蠻功未展。裹糧五嶽游方始。算春秋、三萬六千場。平分矣。鴻鵠志。誰能擬。薑桂質。終難徙。肯隨他、踰淮盧橘。化而爲枳。孔北海豪杯罍在。孟東野老詩篇美。倚江樓。秋夜共吹簫。魚龍起。

又 從姜九綺季索畫

公子才華。問驃騎、何如第五。几席上、千巖萬壑。丹青佳譜。不分胸中藏嶽瀆。無端筆底驚煙雨。歎虎頭、神妙米公顛。今其伍。神禹廟。松杉古。西子里。荆榛斧。記蘭亭曲水。依稀曾覩。拙宦長慚疏屐齒。後游恨不生毛羽。愛雲門寺與赤城霞。須君補。

又 旅夜聞蟋蟀聲作

試問哀蛩。緣底事、終宵嗚咽。料得汝、前身多是。臣孤子孽。青瑣闥邊瓔珞草。碧紗窗  
外玲瓏月。況兼他、萬戶擣衣聲。同淒切。梧葉落、西風冽。蓮漏滴、征鴻滅。似杜鵑春  
怨。年年啼血。千里黃雲關塞客。三秋紈扇長門妾。背銀缸、和淚共伊愁。牀前說。

又 有感

白眼看人。誰作俑、嗣宗爲虐。從此後、爭相模倣。傳來衣鉢。許史府中饒結駟。翟公門  
外堪羅雀。把乘車、戴笠舊時盟。成高閣。交道喪、多輕薄。思管鮑、何由作。笑雲翻雨  
覆。一邱之貉。對面九疑誰得料。填胸五嶽安能鑿。願休將、腐鼠嚇鷄雛。翔寥廓。

漢宮春 秋日同姜如農給諫散步城隅歐陽公集有真州東園記此其遺址

也

白露蒼煙。憶醉翁椽筆。曾記東園。高臺畫舫安在。風物依然。重陽近也。覓黃花、共倚  
危欄。楓林外、澄江如練。寒鴉千點飛翻。頗怪并州舊尹。早蓴鱸夢斷。偃臥邱樊。故  
鄉烏衣門巷。衰草荒阡。干戈滿地。何從問、盤谷斜川。君笑曰。無如此處。濠梁秋水之

閒。

雙雙燕 題佟匯白中丞伯仲漁樵圖

皤然二老似江左風流。惠遠康樂。綸竿七尺。雨笠風蓑同著。長嘯東臨海若。攜手入天台采藥。從公看。奔仙家。拚取斧柯遺卻。行脚。蒼巖翠壑。笑肩拍洪崖。弟酬兄醉。山中留客。童子一雙馴鶴。休戀煙霞高臥。看早晚。蒲輪西洛。須倩妙手長康。重畫麒麟高閣。

高陽臺 爲朱鶴庵侍史王郎作

何處逢君。落花時節。嫩楊乍嘯鶯簧。小閣深沈。鄂君繡被生香。紅牙按罷渾無力。倚東風。更換霓裳。背蘭缸。橫波偷展。低問周郎。東君爲汝徬徨。倩珊瑚作枕。玳瑁爲梁。海燕同棲。一時嬌豔無雙。從此蛾眉參意畫。應見慣。不辯鸞鳳。漫猜他。佳人碧玉。夫婿王昌。

念奴嬌 郭璞墓

弘農太守。挽義輪三舍。乃心王室。龜策如神。撩蜚尾。臣命盡於今日。氣作長虹。魂歸華表。骨葬金鰲。背馮夷舞能。數聲欸乃漁笛。安得溫嶠懷中。通天犀借我。下窺龍國。江左夷吾。今在否。石馬沈埋荆棘。鐵甕旌旗。金山鐘磬。閱盡興亡迹。中泠滿酌。一帆高挂。遙碧。

又 重過汪氏榮園

辟疆池館。是誰翦。瓜步江流餘沚。放逐餘生。雙不借。重看水窮雲起。怪石崢嶸。孤亭窈窕。窳穢藏山鬼。行行且止。呼童爲摘蒼耳。堪歎滄海桑田。洛陽金谷。轉眼荆榛裏。舞榭歌臺。眞可惜。愁殺烏衣燕子。百頃清潭。十圍灌木。桐又生孫矣。故人攜手。爲言樹猶如此。

又 九日王西樵姜如農程穆倩王爾調家伯獻登慧光閣

昔人多事。把今日。名以佳名重九。青女連宵。渲染作淺碧。深黃林藪。傑閣千尋。長江瀉。瓜步晴如豆。帆檣飛下。夕陽還繫隄柳。休問高會龍山。參軍同幕府。其人存



否。古往今來屬我儕。復共天涯杯酒。目送飛鴻。詩成戲馬。莫放持螯手。遠公微笑。醉中應恕狂叟。

又 館金陵馴象門。今廿有二年。孫道宣以詞見示賦此。

長干西畔。記鴉藏新柳。朱樓之下。問是盧家年十五。嬌小莫愁未嫁。鸚鵡籠邊。侍兒教演。曾把髻奴罵。鞦韆時節。玉簫聲在簾罅。惆悵司馬清狂。橫琴三弄。卻鳳求凰也。鞦韆鼓。搗來人世。換都付水流花謝。修竹依然。畫欄何在。俯仰餘悲咤。唾壺敲缺。不禁清淚如瀉。

又 丙午小春善伯希韓招諸同人宴集紅橋之韓園分韻

玉鉤斜畔。最傷心游子。斷腸難續。佳麗繁華誰領略。惟有清狂杜牧。我輩重來。爲歡苦短。急辦三條燭。天寒木落。佳人同倚修竹。況乃詞客都豪。雍容車騎。落筆雲煙簇。樂莫樂兮。今夕會。莫學阮公癡哭。綠酒黃橙。銀箏翠袖。偷送初成目。朦朧別後。知他何處金屋。

水龍吟 乙巳除日得家報新置木峪山莊慨然有終老之意喜而賦此

幾年鼎鑊風波賦。初衣菟裘纔築。白雲萬疊，蒼松千笏，清溪一曲。歸去來兮，臨流設釣，登山驅犢。謝鄰翁問訊，丁寧寄語，第一事，多栽竹。人世竟同蕉鹿。夢驚回，黃梁方熟。天公賜與，一邱一壑，數椽茅屋。急辦長鑱，早營圓笠，樂吾盤谷。笑三閭多事，此身將隱，何勞龜卜。

賀新郎 爲楊漢人納姬作

寶鏡嬌鸞舞。恰蘭舟、迎來桃葉，香凝金縷。八月廣陵秋色好，吹上遠山眉嫵。問今夕，三星在戶。廿四橋頭明月在，倩紅牙、翠管翻花譜。情定句，爲郎補。妝成倦倚梅花隴。問檀郎、未諳心性，偷詢鸚鵡。咫尺蓬山誰得到，長是君家爲主。算只有、信陵公子。一片雄心無處寄。向溫柔、隊裏尋鄉土。歌且醉，戍籌五。

又 蕭山任千之成進士歸里作此詞以贈之

我愛任公子。把珊瑚、綸竿垂處，六鼇連起。三百人中君最少，賦奏天顏有喜。暫勞汝，

烹鮮妙指。杏苑看花青絲騎。敲帽簷。蹋徧長安市。喧驟貴。洛陽紙。宮袍畫錦高陽里。恰湘湖。蓴絲正熟。故人來止。一笑登堂開家釀。盤有青梅朱李。雞再唱。老夫醉矣。萬里長風方破浪。羨龔黃。事業從茲始。天下士。獨卿耳。

又 爲侍御楊琢菴題像

野鶴昂藏意。是當年。彈文柱後。楊球司隸。驄馬連錢霄漢上。騎出五侯爭避。誰信道。蛾眉見忌。飄泊東南天地外。長五湖。不待官家賜。逢醉尉。防其詈。虎頭妙筆真無二。寫元龍。豪舉不似。三閩顛顛。歷徧九州夷險路。惟有醉鄉堪寄。更許我。入林把臂。二八嬋娟彈錦瑟。倩尊前。暫閣英雄淚。歌既闕。唾壺碎。

又 吳蘭次太守五十初度有序

蘭次吳君。延陵華胄。姑射仙姿。藝苑笙簧。執珠盤之牛耳。巖廊珪璧。羨玉署之鳳毛。黃麻紫綵。領絲綸密勿之班。阜蓋朱轡。在山水清幽之地。威行破柱。聿害馬之先驅。惠洽窮檐。見飛鴻之爰集。跂彼織女。七襄弗困于繭絲。嗟我

農人萬井無悲于星畷。行春勸稼。不驚鷗鷺之鄉。載酒看雲。徧踐麋猿之徑。鄭當時之好客。已有飛郵。范史雲之飲冰。釜無餘粟。洵哉才望兼收。政稱廉卓。風流嗣美。吏號神仙者也。節屆迎長。公爲始滿。無疆遐算。隨宮縷以俱添。有美一人。采民風而偕樂。逢斯令序。應南極之星辰。躋彼公堂。進前溪之歌舞。某偶因覽勝。暫維雪夜之舟。幸與論文。屢跋蕭齋之燭。言觀父老。飫聞獻咒之歌。濫廁賓朋。聊展放鳩之悃。敬陳下里。以侑一觴。

山水菰城好。算從來風流刺史。柳顏雙表。君自玉皇香案吏。謫向方壺員嶠。隼旟至。豺狼立掃。鳴鼓放衙無箇事。對堂中。六客據長嘯。誰喚起。孫莘老。駢闐士女歡相告。道吾君。今年稱艾。朱顏彌皎。百榼千觚齊拜舞。不似醉翁潦倒。佳客有。鄒枚顏鮑。洗盞高臺臨翠巘。任觥籌。歷亂霜天曉。何足羨。中書考。

又 題松鶴圖爲金鎮遠憲長壽

甲第誰能亞。一堂中。謝家珠樹。鮑家驄馬。善體重華欽恤意。清問先於矜寡。早貫索。

光芒退舍。父老扶筇來獻咒。道騶虞。幡下無冤者。天賜與萬閒廈。躡蹻雙鶴孤山下。似君侯。雄姿磊落。風期瀟灑。松底茯苓千歲外。堪佐錦堂杯罌。且莫把玉山頽也。三竺六橋新雨後。恰笙歌。畫舫公餘暇。游秉燭。留住話。

又 方繡山同年長郎新娶

海燕雕梁語。認烏衣。舊家宅巷。雙棲偕旅。小謝翩翩如逸少。千里驂騑初舉。羨孔雀。屏風開處。家在鳳凰臺畔住。紫鸞車。簇擁吹簫侶。天付與元霜杵。阿翁早解淵明組。記摩挲。掌中英物。石麟誇汝。佳婦佳兒雙白璧。詩奏蘭陔華黍。劉表男兒。纔尺許。欲倩蹇修他日後。卜西鄰。勉娶田家女。呼老友。烹肥豢。

又 楊商賢病起話舊賦此志感

吾輩今衰也。憶當年。偕游諸子。天街躍馬。跋扈飛揚驚四座。況有禰衡善罵。謂青蚨也同酌酒。昭王臺下。袒裼高樓呼五白。和悲歌。旁若無人者。懷古昔。追風雅。回頭萬事成飄瓦。況新來。友仁凋喪。船餘書畫。惻愴山陽思舊賦。鄰笛何堪中夜。算只有。

窮愁東野桃葉渡頭聊卜筮問秋娘尙復能妖冶君不語淚盈把

又 登燕子磯閣望大江作

絕壁銜飛閣。倚寒空。嶒嶸窈窕。是誰瑯瑤。六代興亡如逝水。煙冷千尋鐵索。夢不到。烏衣簾箔。結綺臨春歌舞散。大江流。尙繞青山郭。悲自語。簷邊鐸。滔滔東下風濤作。俯層闌。鼃鼃出沒。雪山噴薄。況是清秋明月夜。何處船樓吹角。早驚起。南飛烏鵲。估客船從巴蜀下。看帆檣。半向青天落。吾欲醉騎黃鶴。

沁園春 誚白髭

歎息吾衰。兩兩三三。霜雪盈顏。怪素絲若練。偷描病態。銀莖如戟。硬作愁媒。面目生疏。主人訝客。何所聞而不速來。還防汝。入宮見妒。朋輩嫌猜。況逢貝錦蚊雷。更顛倒雌黃。蛇與虺。歎黑雲突起。九關難叫。青蠅欲弔。隻影堪哀。不自我先。不自我後。汝乃乘危利我災。炎涼態。笑星星髯也。果小人哉。

又 代髭問答

兀坐支頤。童子前來再拜致詞。告先生頰上荒蕪不治。非其種者。鋤而去之。鼻堊須斤。眼翳須刮。蘭茝當門亦見耔。先生曰。姑徐徐點染。化白爲緇。鬚言君請無疑。念交絕何須口有疵。試數君素友。丹雘白水。歲寒有幾。能比松枝。我獨憐卿。卿何棄我。患難周旋不暫離。吾知愧謝叟誠長者。下榻于茲。

又 題李考叔聞雞起舞小像

有客于鬢。長劍巍峨。殆奇士歟。憶請纓北闕。曾馳鹿塞。上書幕府。親歷無閭。伏櫪興嗟。投竿空老。三竺橋邊有敝廬。杯闌後。任唾壺敲缺。一枕蘧蘧。當年士稚何如。試酌酒荒原。弔望諸。歎元龍湖海。徒眠高閣。侯王甲第。懶曳長裾。擊筑狂歌。登樓悲憤。變作銀鈎蠶尾書。掀髯笑。倩羊欣白練。揮灑無餘。

又 同繆湘芷前輩及王仲昭諸子看郭園牡丹

惆悵梅花。幾日飄零。青子纍纍。喜盈盈欲笑。洛川游女。亭亭未嫁。溪畔西施。狡獪東君。揉鉛搓粉。傾國妝成第一枝。端詳處。待綠煙滅後。明月來時。丁寧再拜封姨。向

錦石雕欄好護持。羨池邊嬌婉。一雙燕子。香中眠食。百隊蜂兒。座客皆豪。主人拚醉。爭看山公倒接羅。重游數。教柴扉休掩。來往無期。

又

程穆倩六十初度作木蘭花慢自壽中借禽蟲爲喻索題賦此

何以觴君。非狷非狂。石戶之農。更高懷磊磊。如求旦鳥。孤蹤踽踽。號可憐蟲。六十平頭。自嘲自壽。炙轂雕龍。總未工。斯人也。信諸方曼倩。癖似張融。寓言十九。朦朧。笑螺贏。鷓鴣趣不同。看華胥世界。魂游燕國。南柯太守。腹坦槐宮。銅雀崔巍。金貂富貴。烏有先生。亡是公。三杯後。任蠻爭角左。蝨走禪中。

又

題陳其年烏絲詞

天上張星。游戲人間。我幸見之。羨高陽里第。門纔旋馬。西園公子。賦必探驪。八斗才華。五陵逸氣。齋曰爭傳。絕妙辭。旗亭上。有諸伶按拍。玉笛金徽。奚囊白雪。霏霏。信此曲從來和者稀。似秦郵太史。風流旖旎。渭南老子。渾脫雄奇。揚子濤深。洞庭月冷。應有魚龍駭且飛。觀止矣。待曹王敵手。險韻重題。



又 題孫坦夫想想園

達者莊生。寓言十九。天地遽廬。歎世人勞攘。求田問舍。經營慘澹。種柳栽蒲。金谷豪華。平泉佳勝。魚鳥樓臺。總畫圖。今安在。見雕梁去燕。寒樹啼烏。先生晚狎樵漁。早悟卻浮生是夢歟。看朱甍畫棟。都成泡影。丹邱碧海。隨處吾廬。結構徒工。後人誚拙。千頃何須覓木奴。非非想。向羲皇高臥。彭羨爲徒。

烏有園林。幻耶真耶。其如墨莊。問陳家結綺。空餘智井。隋宮錦樹。但有垂楊。孝子追思。悲深肯構。杖履依稀。不暫忘。歸來些。在閨風之圃。廣漠之鄉。誰言大壑舟藏。況電馬飄車。鮮定方。譬生前嗜芟。無忘屈到。沒而尸祝。不替庚桑。神所馮依。精魂來往。月榭風軒。白石牀。真佳話。似桃源雞犬。未是荒唐。

又 題陳希夷大書壽字爲同年張蓼匪祝

西岳峻嶒。有仙人高臥。曾跨青牛。見山蓀亭畔。蒼苔石室。雲臺觀裏。素牒銀鈎。天矯游龍。蹁躑舞鳳。筆陣鍾王。未可儔。裝潢了。向錦堂高挂。第一箕疇。使君文采風流。

賦歸去來兮尙黑頭。羨玉燕開祥。前身昴宿。金貂累葉。家世留侯。甲子初周。鬚眉未艾。種菊栽松。樂事稠。將進酒。喚希夷。睡醒同醉金甌。

又 題陳蟄菴三一三圖

所謂伊人。玉貌頎然。碧瞳紫髯。羨荷裳蕙帶。五陵公子。黃冠葛屨。丈室瞿曇。鶴立仙姿。虎頭妙筆。頰上添毫。一三三。參同契。任洪崖把臂。彌勒同龕。飄蕭素髮。鬢鬢似柱下。猶龍問老聃。向世出世間。先窺太極。用無用處。椎破連環。形影交忘。畫圖三昧。白板枯禪。不待參。從君老。願擔簦五嶽。結制精藍。

又 題王壻五文小像

楚楚王郎。有美清揚。雜佩瓊瑛。羨白玉牀邊。右軍坦腹。烏衣巷口。小女提甕。二十年來。居諸荏苒。驚見兒曹。項領成。還聽得。惹旁人爭說。玉潤冰清。更憐磊落。落英。似遇末封。胡舊有名。喜蠟屐重來。同探禹穴。貂裘垂敝。且住吳城。伏櫪悲歌。題橋壯志。千里驂騑。待一鳴。吾衰矣。賴門楣有客。歸老柴荆。

漢宮春 哭方爾止

吾友方干。果貧如趙壹。賦類相如。平生傲睨成癖。偏愛狂奴。盧龍塞上。踐冰霜、曾策  
疲驢。堪下酒、灤河鮮鮑。君言勝四腮鱸。猶記長干握手。賀更生再世。清淚霑裾。何  
圖此別千載。鄰笛愁余。傳經有女。問何如。六尺遺孤。腸斷處。重開巾笥。未裁劉秣陵  
書。數月前君有書見貽未答

定山堂詩餘



龔鼎孳（萬曆四三——康熙一二）

字孝升。號芝麓。廬州合肥人。明進士。累官御史。入清以原官起用。屢起屢仆。卒以才名受知世祖。洊加擢用。歷官至禮部尙書。與吳偉業、錢謙益齊名。稱江左三大家。所著本名三十二芙蓉齋稿。後裔輯其詩文雜著合刻之。改名龔端毅公全集。從其諡也。

序

文章者。德業之餘也。而詩爲文章之餘。詞又爲詩之餘。然則天下事。何者不當用其有餘者哉。若竟量而出。索焉遽盡。此坳堂之泛觴。而非洪淮巨河之有源有本者也。卽以詩論。古人之樂章也。樂因詩以傳聲。詩藉聲而驗樂。三百篇者。瞽史之徒所按聲而歌者也。古者歌鹿鳴。必歌四牡皇皇者。華三詩以節之。而用南陔白華華黍三笙以贊之。迨後而四詩亡矣。僅存鹿鳴一歌。漢之樂府由是以起。樂府之紀系不傳。於是詩爲有律之文章。而非匏笙之辭曲矣。其近乎樂而可譜以八音者。莫善乎詩餘。然則詩餘者。三百篇之遺。而漢樂府之流系也。其源出於詩。詩本文章。文章本乎德業。卽謂詩餘爲德業之餘。亦無不可者。大宗伯芝麓先生。以人倫之宗鑒。爲我朝之柱石。其德業文章。橫絕乎漢唐以上。弁髦乎宋元以下。千古精華之氣。天地特聚之以畀先生之一人。故其發爲詩歌也。燦爛如日星之昭垂。巖嶙若岱華之聳峙。梅村學士序其詩。詳言之矣。間以其閒情發爲詩餘。合而梓之。附於詩集之後。字刊亥

豕之訛。香辟羽陵之蠹。三臺妙跡。龍伸蠖屈之書。五色芳箋。河北膠東之紙。余竊追憶。邀先生之知者。已數十年。其沐浴教澤者深矣。於是取是編而讀之。泚泚乎有三百篇之遺音焉。其珥瑤槐掖。濡筆承明。則雅音亮節。依然彤弓湛露之賦答也。其遣情山水。放目雲烟。撫白石以流連。漱清漪而淪泝。則逸興遄飛。陶然卷阿荅隰之高致也。其淒心悄志。悱惻纏綿。寄悲怨於花晨。託遙思於月夕。則殷然憂讒畏譏。離夫思婦之蕭騷也。其香閨憶別。霜塞鳴笳。聽木葉於宵砧。響愁鴻於鐵馬。則楊花雨雪。色然以驚。悽然以悲。而瞻望勿及者也。其春郊約友。曲水聯心。就雲中而招鶴。開金井以投輪。則鳥鳴伐木。慕友聲而思蘭。味者也。然則先生之詩餘。非古樂府之餘。盛中晚之餘。而三百篇之餘也。亦非僅三百篇之餘。直可上泝夫八伯卿雲之爛。白雲西母之謠。元首股肱之廣颺。而爲其餘者也。昔歐陽文忠。晏元獻諸公。以詞名宋代。立朝正色。卓立不移。以先生德業文章之盛。何其先後若一轍也。世之讀是編者。性情以是正焉。風會以是醇焉。房中正始之音。以是傳焉。寧僅曰詩之餘而已哉。是爲

序時康熙癸丑仲冬西陵丁澎藥園氏敬題於錫山旅舍。

白門柳自題

暫出白門前。楊柳可藏烏。歡作沈水香。儂作博山鑪。靡曼相傾。恣心極態。江南金粉。奉爲豔宗。吾所云然。不揣斯謂。要之發乎情。止乎禮義。其大略可得而觀焉。

綺懺自題

湖上旅愁。呼春風柳七。憑欄欲語。時一吟花閒小令。爲曉風殘月招魂。脫口津津。尋自厭悔。昔山谷以綺語被訶。針錐甚痛。要其語誠妙天下。無妨爲大雅罪人。吾不能綺而詭之乎懺。然則吾不當懺綺語。當懺妄語矣。



# 定山堂詩餘

淮南龔鼎孳孝升

## 東風第一枝 樓晤用史邦卿韻

鳳絡霞絨。蓮鋪金索。橫橋檀霧吹暖。玉奩半嬾春妝。一笑上樓人淺。朱衾畫幔。緊圍定。夢愁心軟。自題名、年少多情。不及杏梁朝燕。雲母閣、主司青眼。團扇第、書生覲面。醉扶壁、月飛瓊瑣。合柳烏小苑。珊瑚聯枕。楚雨逕、神峯如線。愛紫蘭、報放雙頭。恰好阮郎初見。

## 誤佳期 其二

香定翦風羅幙。客踐籠燈芳約。紅綃沾酒下簾時。失記登樓作。狂枕玉簫眠。軟絆金蟲落。掃眉才子賦多情。可是憐輕薄。

## 鵲橋仙 其三用向薌林七夕韻

紅箋記注。香糜勻染。生受綠蛾初畫。挑琴擘阮太多能。自寫影、養花風下。月低金

管帶飄珠席。兩好心情難罷。芳時不慣是烏啼。願一世、小年爲夜。

杏花天 其四

嬌香院落蓮釘扣。有結陣、都梁彈袖。濃絲麗玉春風守。圍定蓉屏粉肉。搓花瓣、做成清晝。度一刻、翻愁不又。今生誓作當門柳。睡軟妝樓左右。

驀山溪 送別出關已復同返用周美成韻

清波桃葉。幻出劉郎路。兩槳載鴛鴦。透金鎖、重城幾處。低幃促坐。長似玉牕西。行不得。且雙歸。蛺蝶香中去。重來門巷。盡日飛紅雨。消息動陽關。暗凝愁、繞花鐘鼓。朱深碧淺。一幅可憐春。休進酒、與調箏。只結同心縷。

惜奴嬌 離情用史邦卿韻

無賴鸚哥。誰遣喚、花枝醒。闌干外、愁潮恨嶺。一步妝臺。受不起、加餐信。風靜。漾簾櫳、回頭小影。有限天涯。載得了、垂楊病。銷魂牒、權時拜領。說謊高唐。可好託、春衾性。難聽。長嘆與、清鈺乍並。

西江月 渡江作

箭打亂潮柔櫓。鴉翻古渡青旗。春江玉雪鑿鬚眉。俊眼相看似此。長劍錦驄香夢。寶釵鈿瑟男兒。人言無淚灑離時。不稱英雄淚耳。

十二時 浦口寄憶用柳耆卿秋夜韻

隔江樓、月湧銀濤。偏是紅綿難洗。正絮撲、棠艸星稀。蕙幄慙慙花氣。中酒心期。垂簾時候。旅館疏燈起。殘堞外、一片荒雞。一半畫笳。吹到孤眠人耳。幽夢中、重尋後會。豈似麝裙同繫。笛瘦寶鞍。釵斜玉鏡。寸寸含情地。別路千萬疊。長亭只在望裏。暗忖量、藍橋約定。領略三生恩意。兩字驪歌。暫時南浦。豈負濃香被。宛轉官柳側。終憐好春輕棄。

西江月 廣陵寄憶用史邦卿閨思韻

別怨暗移青鏡。春愁倦聽紅牙。揚州燈火絳樓紗。不似石頭城下。伴我郵亭孤月。負他寒食梨花。沒來繇事誤天涯。玉笛當風此夜。

減字木蘭花 途中寄憶

檀脂鳳帶。遠在碧山春草外。耳畔低聲。恰似蘭閨念小名。風巾雨屐。那許偷窺金粉席。只辦銷魂。絮得東風也閉門。

薄倖 春明寄憶

粉城春市。繫馬慣、誰家蕩子。別袖意、菱花偷見。驀地錦簾千里。照小窗、雙蒂銀蟾。深憐密喚。曾如此。有膩玉輕鉤。翠雲濃繞。芳夢黏人難起。數不盡、同心呪。休算作、冶遊驅使。怕金鈴聲瘦。青驄天遠。倚樓腸斷。斜陽裏。晚香橫几。對真真、暗囑情場。不負鸞釵紫。鴛鴦綉。端值龍沙一死。

好事近 其二

走馬到章臺。閒卻綠窗眉筆。記得回頭低喚。怨柳梢斜日。倚欄今夕卜歸鴻。管取蛛絲吉。好夢也須珍重。意中緣難必。

風流子 其三

相思明月社。推桃燕。一代水邊樓。憶黛比岫遙。花和人瘦。玉圍屈戌。珠寫箜篌。銷魂別淚如巫峽。雨心逐廣陵舟。乳燕幕開。錦箋難託。蜜蜂房閉。香粉都收。紅窗攜纖手。雙雙把鴛盟。訂在新秋。只道霎時金屋。管甚閒愁。悵霞生綺陌。誰家弄笛。露涼小苑。何處藏鉤。七夕看看過了。夢見還羞。

浪淘沙 長安七夕和辰六

璧露乍驚秋。月滿西樓。江南簫管正悠悠。報到天邊今夜會。綵線穿愁。薄倖是牽牛。會少離稠。鵲槎一夕錦雲收。我做牛郎他織女。夜夜橋頭。

眼兒媚 邸懷

桐洗紗窗葉墜秋。翻動一春愁。玉鞭酒市。醒來斜月。醉裏朱樓。柔腸憔悴無人見。見卽恐花羞。試拋腦後。陡來衾底。又嵌心頭。

浣溪沙 其二

腸斷鴛鴦錦字文。一雙疼熱在春分。新愁欹枕不能聞。影入菱花留夕照。香凝紈

扇憶朝薰。玉窗還肯受殷勤。

長相思 其三

惜花期。訂花期。訴向花愁知未知。天憐兩道眉。  
望中疑。夢中疑。斗帳檀絲月午時。  
香泥塑蝶癡。

前調 其四

似多情。似無情。玉豔心情是怎生。春衫記不明。  
長歌行。短歌行。多少柔腸攬掇成。  
流鶯只一聲。

小重山 其五

一縷春心託杜鵑。也防人薄倖。靠青天。瓊樓眞負鳳簫緣。無聊賴。劈碎紫鴛絃。  
送  
眼落霞邊。只愁深閣裏。誤芳年。載花那得木蘭船。桃葉路。風雨接幽燕。

浪淘沙 其六

翠幃報花來。春恨重栽。西風吹夢上妝臺。舊夢不留新夢遠。影裏徘徊。  
客思遶秋

苔。鐵馬驚開。銀牀冷落薛濤才。細展紅香溫麗句。一字千猜。

浣溪沙 其七

死向雲英一哭休。藍橋風路不中愁。勾符明註小紅樓。青鳥夢嘗迷繡戶。孤鴛塚  
莫葬芳洲。訴花難放玉搔頭。

念奴嬌 中秋得南鴻喜賦用東坡中秋韻

遠鴻飛送。有傾城玉杵、龍綃蹤跡。小字鴛鴦顛倒認。憑仗晶盤凝碧。密約鐫花。深嚙  
謝柳。打破春愁國。秋燈分照。短長程已親歷。爲想翠管輕籠。綠窗低喚。軟款憐征  
客。迢遞江南天北意。佳事恰宜今夕。鈿合香濃。鸞臺雲熱。狂欲生雙翼。冰蟾遙共。畫  
樓人在吹笛。

蘭陵王 冬仲奉使出都南轅已至滄州道梗復返用周美成賦柳韻

戍烽直。山外寒雲捲碧。香塵道。千里繡弧。凌亂垂楊暮煙色。鴻飛如異國。何況朱顏  
作客。茱萸帶。霜打雨吹。瘦損宮腰恰盈尺。京華旅人跡。正草迓金鞭。花暗瑤席。五

候鯖好無心食。聽白雁風快。紫鸞人遠。鈿轅瞥過渭橋驛。似天限南北。心惻萬愁積。料野館斜曛。芳影淒寂。回頭鳳闕情何極。佇日麗仙掌。柳迴羌笛。經年紅淚向錦衾畔宛轉滴。

祝英臺近

聞暫寓清江浦用辛稼軒春晚韻

綠煙橫。蘭槳渡。金犢偃淮浦。細草春寒。過盡斷腸雨。望中雀扇雲衣。溫存無據。枕邊心。關山留住。莫輕覷。柳外無盡長亭。朝朝背人數。河上雙魚。聽否呪花語。更愁香夢來尋。重添離處。卻也遣。病魂隨去。

風中柳

復聞渡江泊京口用孫夫人閨情韻

天半峯青。遮定玉帷花惱。捲珠屏。依然碧草。過江心事。罵飛鴻難告。問東風。可曾知道。兩點金焦。看遍淺嘸微笑。送粉絲。春潮漸杳。黃昏纔慣。信羅衣寬蚤。又禁得。杜鵑聲老。

賀新郎

得京口北發信用史邦卿韻



鶯館安排靜。待珠輪、逐程屯劄。柳旗花令。預遣探香烏鵲去。露灑星橋玉冷。可曾見、盧家官艇。金字虎頭青烏印。押紅泥、遮抹春愁影。騎鳳月。破烟暝。瑤箱淚疊朱絲贖。試芙蓉、兩行宮燭。對攤芳信。薇雨細揉彈事筆。溫熟低心軟性。料錦鯉、今番情定。霧幔晴衫深打疊。怕秋棠、不耐商飆勁。因蚤雁、囑君聽。

玉女搖仙珮 中秋至都門距南鴻初來適周歲矣用柳耆卿佳人韻志喜

青天萬里。忽下檀雲。送到虬幢鮫綰。六代金霞。三春鶯粉。拾得有情佳麗。便倩秋蟾比。怪年年碧海。成雙非易。儘疇昔。羅裙畫篋。無數銷魂。見面都已。相逢恰今宵。一世團圓。花明月媚。兼有九宵玉珮。五夜香爐。好景安容拋棄。斗帳霧濃。珠綰絲熱。柳毅龍宮輸美。紫幄同心倚。任消受南國。知名才藝。那忍忘。燈前卻扇。笛邊沾酒。上樓歡意。三生誓。玄霜碾入鵝鸕被。

念奴嬌 花下小飲時方上書有所論列八月廿五日也用東坡赤壁韻

畫眉餘興。哂王章、閨閣都無英物。北闕浮雲遮望眼。誰作中流鐵壁。剪豹天關。搏鯨

地軸。隻字飛霜雪。焚膏相助。壯哉兒女人傑。投袂太息花前。仰天長笑。正酒狂初發。赤日金鱗霄漢轉。坐見嶽搖氛滅。一葉身輕。千峯約在。幸少星星髮。與君沈醉。玉臺斜過。佳月。

菩薩蠻

初冬以言事繫獄對月寄懷

冰綃冷織孤烟悄。簷濤響壓花鈴小。夜色上啼烏。青燈一壯夫。嬋娟千種意。莫照傷時字。此夜繡牀前。清光圓未圓。

臨江仙

除夕獄中寄憶

不記今爲何夕。隔牆鐘鼓催春。逞風花草太無因。籠香深病色。罷酒得愁身。料是紅閨初掩。清眸不耐羅巾。長齋甘伴鷓鴣貧。忍將雙鬢事。輕報可憐人。

玉燭新

上元獄中寄憶

天街風定後。想畫鼓雲繁。絳籠星就。虎城豹柝。輕烟外。逗出銅龍春漏。侯家錦毯。醉不了。珠場花候。誰信道。青鬢孤臣。今宵雪霜盈袖。依稀燭下屏前。有翠靨綃衣。月

明安否。小眉應鬪。恨咫尺。不見背燈人瘦。香柔粉秀。猛伴得英雄搔首。千古意。惟許冰絲平原對繡。

萬年歡 春初繫釋用史邦卿春思韻

一笑東風喜寒梅尙繁。香散瑤雪。攜手花前。重見酒杯豪發。鐵石銷磨未盡。算只有、風情癡絕。生拋撇。瘴戟蠻裝。更央珊瑚枕埋骨。而今虎鬚怒歇。料天荒地老。比翼難別。絡粉調笙。還讓引裾人物。儘取頭廳重印。肯換卻、纖纖霞襪。甘心署錦隊。鉗奴五湖徧管烟月。

綺羅香 同起自井中賦記用史邦卿春雨韻

弱羽填潮。愁鵑帶血。凝望宮槐煙暮。並命鴛鴦。誰倩藕絲留住。搴杜藥。正則懷湘。珮瑤碧。宓妃橫浦。誤承受。司命多情。一雙喚轉斷腸路。人間兵甲滿地。辛苦蛟龍外。前溪難渡。壯髮三千。黏溼遠山香嫵。憑蝶夢。吹恨重生。問竹籊。殉花何處。肯輕負。女史萇弘。止耽鶯燕語。

石州慢 感春

香閣春深。庭院晝長。花雨飄灑。清明時候。輕寒小熱。暗愁盈把。呢喃燕子。卻憎畫棟。彫零烏衣。閒恨猶牽惹。拍碎玉闌干。儘黃鸝描寫。游冶。禁烟吹散。寶瑟風前。紫騮花下。何似一燈寒食。柴門初打。樓頭柳色。望裏青斷天涯。絮飛還殢。王孫馬。解道莫愁誰。只長干人也。

望海潮 同前

江山如此。年華依舊。分明又度春宵。銀鴨吐香。蓮銅滴月。朱欄瘦拂長條。閒倚玉屏腰。見鬢雲送嬾。羅襪臧嬌。怕被花窺。一天風露近藍橋。幽情慣是無聊。記青綾寵愛。紅研丰標。隋苑鶯殘。吳宮葉冷。蒼茫昨日今朝。清夢轉迢迢。望碧天草色。烟雨淒遙。無計留春。淚絲偷印美人蕉。

蝶戀花 送春用趙栗夫韻

簾外遊絲飛去了。打疊閒愁。斷送啼鶯曉。一曲畫欄銀月小。玳牀人倦殘春杳。生

怕金鈴催宿鳥。叫過三更。月與花都少。斜倚博山幽恨悄。雙眉做就堆煩惱。

如夢令 題畫蘭裙子

金縷水沈薰透。蛺蝶趁花風瘦。整整復斜斜。淡墨妙於濃繡。生就。生就。搖曳一痕紅  
味。

一落索 小窗夜坐用周美成韻

人影放簾深秀。玉鉤風皺。篆香銀燭豔成堆。全襯貼淩波瘦。清露曲欄吟久。歡愁  
都有。唾壺敲斷五更心。無一事。姑花柳。

前調

失路酒狂悲苦。目隨雲去。等閒畫閣似扁舟。單欠著。風和雨。約定滄江煙樹。先傳  
鯉素。莫將香粉笑鴟夷。天送與。藏身處。

滿庭芳 從友人處分得新茗少許以遺閨人用山谷韻

箬葉雲籠。銀瓶風嫩。旅客魂斷鄉關。箇儂情重。千里歷風烟。憶得春江穀雨。蘼蕪路、

早隔仙凡。今何夕。輕嘗慢啜。紅藥正爛斑。佳人應倦繡。青燈小閣。紺軸初翻。要親扶香影。吹上眉山。恰值珠簾半捲。芳磁送、幽韻無邊。重攜手。欄花莫睡。明月晚妝前。

菩薩蠻 題畫蘭雲扇

春風宛轉朱欄曲。吹花直上烟鬟綠。芳韻一枝斜。鏡中人是花。纖雲搖更曳。襯出芙蓉雪。生愛靠香肩。倒言花可憐。

小重山 重至金陵

長板橋頭碧浪柔。幾年江表夢。恰同遊。雙蘭又放小簾鉤。流鶯熟。喚喚一低頭。花落後庭秋。蔣陵煙樹下。有人愁。玉簫凭倚。賸風流。烏衣燕。飛入舊紅樓。

鎖陽臺 重遊京口用周美成懷錢塘韻

樓枕層濤。屏橫遙翠。捲簾多少黃昏。西風客到。江蓼翦江村。一派天台舊路。金輿送、七寶霞裙。差僥倖。雲階歎息。阮肇不曾聞。牆東諸女伴。蒼苔共踏。爭拾香塵。爲映花人面。常夢題門。記得妝臺小妹。看看改。芳歲天孫。青山外。六朝明月。留照綺羅春。

西江月 春日湖上用秋岳韻

晴日花邊簫鼓。春人畫裏樓臺。鴟夷烟縹碧天開。不記鳴笳絕塞。歲月頻銷濁酒。風波不到蒼苔。小蘇羅帶柳卿才。喜與青山同在。

蝶戀花 湖上春雨用吳修蟾倦繡韻

宛轉珠欄烟共倚。薄倦微寒。小坐香肩比。乍聽曉鶯啼夢裏。海棠又溼鸚哥嘴。柳外蘭橈添漲水。黛淺嚙深。雨過千峯矣。瘦損落花擎不起。春來一味愁而已。

清平樂 春情和吳修蟾韻

淺嚙深語。疼殺櫻桃雨。柳岸人家烟正吐。寒食春陰當午。清波寫影堪憐。春人好處難傳。便爲花愁無賴。禁他風鬢雲鬟。

點絳脣 春閨追和何籀韻

菱鏡堆烟。黛螺過午猶慵掃。茶蘼開了。衣桁楊花小。識字鸚哥。宛轉相排調。愁多少。玉鉤縈抱。羞見紅蘭老。

桃源憶故人 同善持君湖舫送春用秦少游春閨韻

子規絮夢蘭窗曉。哽咽落紅無了。今夜斷腸花鳥。春去愁應少。畫欄十二香綿裊。吹上白蘋難掃。青鬢爲誰催老。又是西陵草。

虞美人 其二用秋岳泊京口韻

春光九十原嫌窄。閃殺飄零客。啼花淚逐水東流。且載銀樽綠鬢盡情遊。 千山罨畫吹紅霧。卻改離亭路。長條攀折一番新。囑付明年還傍可憐人。

臨江仙 其三用歐陽永叔夏景韻

誰遣封姨吹畫幟。晴湖蹴作濤聲。輕寒羅袖最分明。催花落盡。此別太生生。 薄福東君應自悔。一春雲幔風旌。雙蛾小皺縠文平。夕陽無賴。不管鈿釵橫。

蘇幙遮 其四用范希文韻

粉香城歌舞地。明月金宵。偏照雙峯翠。一夜碧蟾涼似水。爲送春歸。特到紅窗外。 五更愁千疊思。對月端詳。不許垂楊睡。珠箔檀肩長共倚。斷鼓零簫。迸入留春淚。



誤佳期 雨後看月用秋岳舟中韻

雨被綠楊黏住。月戀紅屏乍吐。簾香透隙似黃昏。博得當風顧。梧犬吠初星。花鴨  
喧清露。明朝草色太殷勤。襯貼淩波步。

菩薩蠻 其二用李太白閨情韻

嵐光倒影金波織。洞簫吹散孤雲碧。吳越此南樓。遮燈有莫愁。迴廊人小立。漏箭  
催何急。送月兩三程。溼鶯低柳亭。

浪淘沙 湖樓晚坐用陳眉公山中夏夜韻

乍雨又微晴。山外山青。屏風六曲護銀燈。供奉筆牀香一瓣。雪淨花明。坐對古先  
生。病裏人情。芳磁碧乳勝金莖。小艇春鶯誰度曲。添註風情。

水調歌頭 述懷用蘇東坡中秋韻

小住爲佳耳。萬事總繇天。乞天判與沈醉。斷送奈何年。往日寶刀橫吹。入夜清燈疏  
雨。鬢髮暮雲寒。吾老是鄉矣。雙袖百花前。倦司馬。窮阮籍。只高眠。宿醒剛醒。又問

明月可曾圓。長策瓊臺采藥。小隱於陵織屨。雅操仗君全。放眼憑欄久。風露正娟娟。

羅敷媚

五月十四夜湖風酣暢。月明如洗。繁星盡斂。天水一碧。偕善持君繫艇於寓樓下。剝菱煮芡。小飲達曙。人聲既絕。樓臺燈火。周視悄然。惟四山蒼翠。時時滴入杯底。千百年西湖。今夕始獨爲吾有。徘徊顧戀。不謂人世也。酒語清恬。因口占四調以紀其事。子瞻云。何夜無月。但少閒人。如吾兩人者。未易多得爾。

一湖風漾當樓月。涼滿人閒。我與青山。冷淡相看不等閒。藕花社榜疏狂約。綠酒朱顏。放進嬋娟。今夜紗窗可忍關。

前調

木蘭掀蕩波光碎。人似乘潮。何處吹簫。輕逐流螢度畫橋。白鷗睡熟金鈴悄。好是簫條。多謝雙高。折簡明宵不用招。

前調

情癡每與銀蟾約。見了銷魂。爾許溫存。領受嫦娥一笑恩。戲拈梅子橫波打。越樣心疼。和月須吞。省得濃香不閉門。

前調

清輝依約雲鬢綠。水作菱花。蘇小天斜。不見留人駐晚車。湖山符牒誰能管。讓與天涯。如此豪華。除卻芳樽一味賒。

燭影搖紅 方密之索賦催妝卽用其韻

何來才子。自負多情。選豔花叢。旣眼苛於冀北。效顰桃葉。空夢遠乎江南。無處尋愁。歌燕市酒人之曲。有官割肉。慳金門少婦之緣。願得一心。合爲雙璧。今且窮搜粉譜。恰遇麗姝。綰髻相思。能誦義山之句。投珠未嫁。欣挑客座之琴。眉黛若遠山。臉際若芙蓉。風流放誕。驚絕世之佳人。玉釵挂臣冠。羅袖拂臣衣。微笑遷延。快上國之公子。錦茵角枕。良夜未央。白雪幽蘭。新歡方洽。兼

以花杵月拍。並是慧心。璧版烏絲。時呈纖手。攀玉堂之紅藥。比金屋之奇姿。可謂勝絕一時。風華千載者矣。昔宋玉口多微詞。自許溫柔之祖。而其告楚王曰。天下之美。無如臣里。臣里無如東家之子。嘻。何隘也。燕趙多佳。夙矜名貴。文鴛擇栖。未肯匹凡鳥耳。豈必聽子夜於吳趨。載莫愁於烟艇。乃稱雅合哉。

一揖芙蓉。閒情亂似春雲髮。凌波背立。笑無聲。學見生人法。此夕歡娛。幾許喚新妝。伴羞淺答。算來好夢。總爲今番。被它猜殺。宛轉菱花。眉峯小映。紅潮發。香肩生就。靠檀郎。睡起還凭榻。記取同心帶子。雙雙縮。輕綃尺八。畫樓南畔。有分鴛鴦。預憑錦札。時予南鴻初至

菩薩蠻 代友人惜別

子規叫破山花血。銀屏香瘦蘭衾熱。芳草約裙齊。濃愁妬馬蹄。前谿從此渡。記取棲烏樹。今夕定何年。人分月恰圓。

前調

斜陽幻作黃昏雨。天涯就是門前路。莫踏柳絲橋。柔腸一萬條。花愁沾玉罽。回袂春星下。不惜褪歸期。從頭溫別離。

畫堂春 代友人贈所歡

玉芙蓉翦柳絲眉。花因解語頭低。闌干約略小腰圍。不爲春歸。睡重惱開鸞鏡。燈昏揉碎烏絲。淺嗔深妬任嬌癡。畢竟憐伊。

念奴嬌 和雪堂先生感春

凭欄無賴。受東風冷暖。瞞人情緒。一夕梅魂芳霧散。把酒頻澆黃土。露溼金鈴。烟籠粉幔。似聽醪醖語。啼鶻初瘦。月高誰作花主。分付弱柳千條。小闌干外。替兩眉辛苦。薄醉濃香簾幙捲。又是流鶯梳羽。玉管橫吹。霞綃癡寫。怕到酸心處。五侯亭館。當年何限歌舞。

前調

斷魂無那。霎時閒柳絮。蘋花吹合。幾點殘紅隨蝶粉。倒挂蛛絲檐角。鸚鵡呼來。鷓鴣催去。恨與晴波闊。斜陽無語。半天烟岫寥廓。何處麥雨葵風。含桃金碗。九十春光惡。惆悵江南花落盡。玉樹歌聲重作。畫鼓螢流。瓊簫人遠。野草迷長樂。御溝流水。應憐雲鬢梳削。

滿庭芳

章公祠西府海棠數本繁豔甲於京師春時朝士讌賞不減慈恩牡丹也滄桑既變而此花不改三月十八日與諸子社集其下感幸繫之

紅玉籠雲。胭脂侵雪。兩行擷豔驚奇。乳鶯聲裏。香雨一庭滋。繡帶留仙小立。絳霞畔。飄送瓊璣。銷魂處。如嗔欲笑。狂眼任紛披。珠鈿芳草路。憑空十載。拋撇幽姿。那堪過天寶。再趁花期。落日華清似夢。絃索冷。妃子容衰。無情甚。東風賣眼。看殺爛柯棋。

如夢令 惜春

無處訴花啼柳。白拾半沾春酒。芳絮盡情飛。惱得海棠消瘦。難受。難受。說著曉風眉

皺

前調

春去晴絲庭院。丟下枕痕一線。帶恨過簾櫳。又是舊年雙燕。心顫。心顫。陡被落紅瞧見。

風流子 社集天慶寺送春和舒章韻

柔絲牽不住。眉尖小。一蹙又斜陽。問紅雨灑愁。幾番離別。綠蘋漾恨。何代蒼茫。子規說、麝迷青塚。月珠墮。馬嵬妝。苔臥錦錢。橫拋芳影。燕衝簾蒜。偷覷柔腸。前歡真如夢。流鶯嬾風日。枉媚銀塘。擔閣背花心性。淚不成行。歎樓空杜牧。濃陰乍滿。人分綺。落粉猶香。拈合一春滋味。彈出伊涼。

踏莎行 送春用劉伯溫韻

亂綠迷烟。殘英墜雨。東風不肯留春住。問春尙未到天涯。玉驄只索花邊去。羅襪凝香。紅茵沾絮。春歸料是春來處。黃鸝強要訴花愁。夕陽催上相思樹。

大酺 和秋岳春憶

憶柳如烟烏啼月。江左琅邪何處。高樓紅樹裏。有銀箏。純扇。與花相妬。六代鶯聲。三山草色。曾記遊人來否。芳懷隨雲散。悔東華走馬。此行原誤。更風滿敗梧。日斜橫笛。燕穿飛絮。包胥無一旅。看公等。歌舞誇南渡。爲問取。夷吾往矣。祖逖何如。繡芙蓉。那能頻顧。夢逐江流去。還懊惱。數峯遮住。料難到家山路。菱花憐我。蕭索長卿非故。倩誰百斤買賦。

臨江仙 和雪堂先生韻感懷

一陣催花風似箭。小樓昨夜還曾。獨撚衣帶暗香凝。此生惟恨恨。誰解惜惺惺。楚水吳山渾是夢。羨他行脚孤僧。仲宣高處不須登。斷魂千古月。龜淚十年燈。

南鄉子 其二

槐影落宮牆。寶瑟瑤笙恨杳茫。負了多情簾外燕。昭陽。不見臨春鏡裏妝。月地問玄霜。蕭后臺邊鈿粉荒。玉漏不知金井換。悲涼。只記長門一樣長。



杏花天 題錢舜舉畫華清上馬圖

海棠醉罵東風懶。兜不上行雲一片。沈香絃索催春晚。珍重紫駟翠扇。問鞞鼓馬  
崑驚散。偏好殺三郎不管。名花總入傷心傳。怕對錦鞋玉面。

昭君怨 賦牡丹用劉後村韻

依舊紅箋綠譜。褪下春風一步。國色便欺花也憐他。小雨雕欄曲圃。後夜冰蟾玉  
兔。花底唱梁州。疊成愁。

前調 賦本題

玉笛黃沙風韻。彈亂琵琶舊本。誰負入宮妃。是蛾眉。埋沒畫圖覲面。青塚芳魂誰  
見。綠鬢不禁吹。塞雲飛。

醉落魄 飲遂初芍藥花下

勻朱襯綠。碧闌干瘦繁香束。楊妃卯醉春山蹙。央託金鈴。迴避遊蜂毒。沈香亭北  
嬌姿獨。明霞籠定胭脂曲。東君著意俱憐熟。舞罷留仙。繡襪當風蹴。

品令 客有以新茗見餉者用山谷詠茶原韻

小嚼過龍餅。看香色、真清另。寒泉玉淨。淡烟寫月。乳花微瑩。天外金莖。記得長卿渴病。雁魚程永。落花日、多愁境。甚風吹到。故園一片。青山弄影。有底相關。空博萬種思省。

木蘭花慢 和雪堂先生感懷

鏡中腸斷絕。愁萬種、不分明。正柳憶烏啼。雲迷馬角。惆悵前生。東風恰吹恨到。又酸酸楚楚兩眉橫。怪底檐花如雨。杜鵑長是吞聲。昭陽粉黛記將迎。翠袖五銖輕。忽淒管催霜。繁笳沸月。好夢難成。休言畫工妝點。便淺啼微笑也心驚。慚愧紅塵斷梗。負他碧澗香羹。

南柯子 端午前一日社集和遂初韻

逝水滄江遠。浮雲碧漢流。逢時愁上仲宣樓。漫說當年劉表。在荊州。探把菖蒲棗。還膠芥葉舟。隔宵堆怨玉搔頭。弔屈湘波何處。此淹留。

前調 其二

亂後憐芳節。先期集勝流。長安花月酒家樓。爲問幾時絲管、遍皇州。落日餘橫笛。臨風欲掉舟。相看莫只鬪眉頭。自昔錦帆龍舸、可曾留。

望江南 其三

名士會。共泛縷金芽。棋局從誰翻黑白。文章空自絢雲霞。庾信已無家。佳節到。閒日好邀遮。荆楚歲時多感慨。秦淮燈火最繁華。風物故園賒。

前調 其四

苔影綠。宮雨長槐芽。雙燕也知翻玉樹。一杯還許泛流霞。醉處且爲家。榴蕊豔。狂眼絳雲遮。繫夢管簫新殿脚。惱人風露舊宣華。明日恨先賒。

隔浦蓮近拍 春夜同秋岳作

蘭窗紗黏杏子。蝶信梅梢裏。一曲青娥瘦。牀前銀月初起。霞暈紅綿洗。沈檀屑。襯暖飛璫指。繡針墜。花煙欲動。撩人幾許風味。江南碧草。畫出捲簾情事。華燭金樽漫

徙倚無數。閒愁如此春水。

東風第一枝 其二

鳳琯排烟。鸚笙沸月。歲華初到街鼓。柳絲約定歡期。花信吹開恨處。今宵酒醜。又勾引、蝶翻蜂聚。近小窗、紅雨生生。做作一簾芳霧。飛豔縷。紫絨偷度。挑錦字、玉麟舊侶。遠山千疊銷魂。畫屏一聯繡句。旗亭彙榜。訝批抹、雙鬢何據。趁好春、安頓心情。莫遣少年空去。

浪淘沙 春夜同秋岳小飲

銀燭照柔心。欲醉還禁。珊瑚鉤小掛春陰。假暖多情簾外月。玉漏宵沈。鴉語帶宮音。柳色搖金。沈郎消瘦舊時吟。孤負醅醱真薄倖。瞥眼花深。

雨中花 殘梅同秋岳作

半捻銀梨雲乍瘦。一帶碧欄風欲皺。問月似芳魂。池憐春影。可記橫斜候。幽磬押簾燈火後。霞帳薄寒香透。漸花怯籠屏。人慵倚笛。打疊風光漏。

掃花遊 元夕同秋岳作於無外邸中用周美成韻

絳霞萬疊。照曲巷斜欄。黛峯橫楚。遠香幾縷。襯金蟲紫鳳。雅歌妙舞。一帶銀紗。惹霧  
瓊梅散雨。踏花去。問取玉人。春色來處。人醉花不許。又走馬星橋。翠鈿爭路。畫堂  
列俎。趁芳宵好客。發抒情素。報道鸞簫。吹斷天孫舊苦。漫停佇。正高樓。數聲譙鼓。

望江南 又戲和秋岳

華燈畔。春眼溜微波。小閣名香籠繡帶。畫簾人影似輕羅。妙處不須多。癡蛺蝶。生  
就繞纖蛾。玉碾蟾蜍天上夢。風憐翡翠座中歌。多事憶鸞鞞。

滿江紅 爲孫秋我新納姬人催妝和韻

粉井香天。算惟許、何郎竊近。翠亭亭、菱銅斜倚。撲堆可憎。玳瑁衙排。花仗擁。鴛鴦牒  
押紅泥襯。靠雕欄、活現海棠絲。東風幸。遮不穩。將燈倩。兜不起。羞人間。乍流蘇蟻  
子。雙吹檀暈。犀帖燕衝蘭夢小。銀瓶麝裏薇漿嫩。笑玉人、幾許未銷魂。從今定。

念奴嬌 和寄秋我

流煙迴雪。睨晴波一楫。蘭橈春色。雙好天然都道是。公瑾小喬無別。故國樓臺。江南  
鈿粉。往事成悲咽。銀鐙芳醕。半窗梅蕊初折。最恨乍見還離。踏歌攜手。袍袖霜猶  
熱。料得空山風雨夕。繡出愁香千結。客住三峯。雲來五朵。恰直花時節。夢中吹送。舞  
風楊柳殘月。

高陽臺 和秀公爲張維則催妝

桂粉彈牀。銀泥襯屨。芙蓉一笑偏親。黛寫遙山。多情京兆知名。花如百和星前語。便  
倚風。天上難聞。好妝成。夫壻前頭。莫問傍人。當年鵲渡天孫。正九微畫燭。雙袖宮  
雲。豔事誰家。重看寶珞裝輪。曲江柳線章臺月。錦步圍。肯負青春。願金閨。長記盟言。  
緊緊羅裙。

燭影搖紅 吳門元夜值雨和張材甫上元韻

花信爭傳。玉鉤草色寒猶淺。雨絲風片。澹紅愁。誰記張燈宴。粉霧檀雲暗捲。伴名香。  
銀梅小苑。畫橋烟暝。酒市人歸。寂寥絃管。金翠吳宮。燭龍幾照朱門換。青驄紈扇

憶長安。人醉雕闌遠。十里香塵不斷。惜流年、歡長漏短。月迷江館。客散旗亭一行春雁。

青玉案 虎邱踏月用賀方回春暮韻

金閭箇是迷香路。又月底、移船去。風定石坪笙管度。吳王虹劍，貞娘珠粉，兒女英雄處。草痕短薄荒祠暮。入望寒山夜鐘句。自負多情天應許。要離事往，館娃人去，一陣催花雨。

薄倖 秋岳將以病去湖上留飲寓齋命製此詞卽用其題壁舊韻

碧簾風綰。度蚤燕、花橋月棧。喜賽酒、歌樓人在。共試錦燈春眼。倚曉欄、銷瘦腰圍。晴湖十里空絲管。恨鳳珮星遙。瓊箏屏隔。不耐啼鶯冷暖。看麝粉、經行處。調馬路、綺羅飄散。待青迴雙鬢。香添半臂。片帆吹送吳趨緩。聚稀歡短。勸煙篷、彩纜多情。莫負金樽滿。江頭鼓角。惱亂秦臺楚館。

滿江紅 拜岳鄂王墓敬和原韻

鐵騎春寒。英雄恨、何時始歇。對萬古、日飛潮射。抗忠比烈。玉劍氣橫南渡水。靈旗夜捲朱仙月。念青衣、毳帳是何人。關情切。金牌憤。風波雪。社稷事。東窗滅。嘆一堆黃土。河山頓缺。五國冰長封馬角。九天雨。又吹龍血。憶當年。壯髮怒雲高。搖雙闕。

前調

拜于忠肅公墓用岳鄂王韻

萬里神州。當公世、三光幾歇。奉社稷、仰迴天步。義聲霆烈。翠輦不移螭陛草。丹心長照龍堆月。置死生、成敗付蒼穹。孤忠切。弓鳥恨。須臾雪。徐石輩。紛紜滅。視大名諸葛。旂常無缺。策定抗辭靈武賞。事完補灑攀車血。使非公、毋論奪門功。誰陵闕。

滿庭芳

雨中花歎和吳修蟾韻

綠翦裙腰。紅銷眉暈。恰聽鶯囀空階。海棠愁重。羅幄暫徘徊。那更簾鉤燭午。銷魂雨、陡地驚摧。無聊甚。年年花語。多半怨春來。長生私誓後。當風羯鼓。燕惱蜂猜。問亭亭香影。掃盡還開。竟似離雲萬疊。南浦約、經歲纔回。殷勤囑。朱樓意嬾。無力踏青苔。

鎖窗寒

聞子規用周美成寒食韻



幔捲紅樓。蘭缸寫影。玉蟾窺戶。枝頭一派。送到落花風雨。對青山。淚珠暗拋。斷魂說  
向天涯語。爲箇人憔悴。絲絲蓬鬢。十年軍旅。春暮。牽衣處。有柳外鷗雙。桑閒馬五。  
湖光激灩。供奉鶯儔。鴛侶。憶故園。寒食清明。紫駟碧草。依舊否。怕人歸。滿眼斜陽。畫  
角圍芳俎。

阮郎歸 春去用史邦卿韻

垂楊醉軟紫絲鞭。隔橋芳草烟。送春淚灑落紅邊。鶯愁五十絃。雙鬢事。兩湖緣。東  
風又一年。當歌莫奏斷腸篇。而今怕可憐。

點絳脣 詠草追和林和靖韻

簾外河橋。綠圍裙帶無人主。繡鞦行處。踏碎梨花雨。目送春山。南浦烟光暮。牽春  
去。柔腸無數。蘇小門前路。

水龍吟 爲內弟介至壽用辛稼軒韻

繡弧懸在當門。石麟錦璨徐郎手。丹山躍彩。天閒馳駿。駟閭增舊。叔寶神清。終軍年

妙名場推首。羨朱纓玉珥。龍文虎脊。青雲器。人能否。滿目烽橫刁斗。眺中原、難眠清晝。男兒事業。紅旗黃紙。絕塵而走。箇點秋螢。讀書彈劍。且停花酒。願時平一老。婆娑澗石。更爲君壽。

杏花天 送春前一日湖上泛舟卽事用史邦卿韻

紫蘭香重圍清粉。倩柳線彈開酒暈。明蟾恰與珠樓近。行到紅橋又隱。湖山放浩歌狂飲。呆宋玉逢花嬾問。春風不管羅衫恨。明日流鶯欲盡。

百字令 和吳修蟾雨中春恨

薄寒吹酒。中春愁兩點。珊瑚眉合。樓外濃陰飄遠岫。遮斷芙蓉屏脚。玉雁風低。金猊枕瘦。放下丁香幙。爲花長歎。煙林一片空廓。眼見飛絮遊絲。殷勤相傍。軟到鞦韆索。爭悵佳時容易度。誰信懨懨芳閣。夢淺無痕。憐深似病。雪打梨雲惡。關情如許。莫教燕子偷覺。

惜餘春慢 追春用吳修蟾餞春韻

綠幃縫愁。紅泥埋恨。盡是東風花草晴。翻麥雉雨。鬧桑鳩。誰記畫樓鶯曉。當日株移。永豐三楚腰肢。入宮纖小。到如今香雪飄零。何處玉驄稀少。看不上明月無情。鳳簫金管。冷覷黃昏新惱。胭脂井畔。燕子樓頭。一片粉灰珠掃。青帝拋人幾時。潘鬢沈圍。年年空老。尙癡心春在。平蕪夾取。亂峯遮繞。

齊天樂

初夏湖樓看雨用史邦卿湖上卽席韻

烟橈一點如鷗小。衝散碧波來去。蝶老韓憑。花辭謝豹。丟下惱人春雨。青螺幾許。儘鏡暝屏遮。夢迷遙渚。一半樓臺。酒旗低捲畫中樹。依然寒食院落。柳塘蛙鼓畔。榆錢青聚。乍改輕衫。還熏密坐。猜殺雙棲紅羽。雲連繡柱。任門外蕪香。屐痕多阻。奇絕空濛。驗前人好語。

醉蓬萊

爲仲弟孝緒壽用葉少蘊上巳韻

快花前樽滿。十里笙簫。畫船來去。追數流光。嘆年年征旅。雁塞蛟宮。越旗江火。隔對淋風雨。亂後重逢。篝燈如夢。客懷難語。散騎身強。士龍名重。天海行藏。肯同繞絮。

舞榭徵歌笑絳樊何處。去國雄姿。憑高青眼。漸斗橫銀浦。白首相看。丹霄過我。更拈吟句。

羅敷媚 西陵弔蘇小二調

油車寶馬春風路。天付多情。小是花名。占住西陵柳絮城。幽蘭泣露吹羅帶。月與身輕。芳草還生。薄倖斜陽看喚卿。

前調

櫻桃風熟青梅老。雪打蘋香。春去橫塘。不憶當年也斷腸。六朝環珮芳煙散。瘦了鴛鴦。人代淒涼。紅粉英雄哭一場。

天仙子 追和小青

劍戟橫排脂粉塞。鸞鳳死償雞鶩債。翦紅一寸石榴刀。金翠塚。埋香快。白蝶紫烟蓮露界。才子單傳鸚鵡派。碎玉猶存蘭蕙概。人閒薄命是聰明。憐也在。憎也在。彩筆難容雙錦帶。

望海潮 過錢武肅王祠用秋岳坐黃鶴樓弔孫吳韻

銀濤噴鼓。銅牙披戟。雄開王氣之先。虎步鳳翬。鷹揚蜃國。登時擁上凌烟。冠劍錦山傳。有金符玉冊。踵武英賢。吳越高門。尉佗臺接鷓鴣前。千秋舞榭歌筵。賴麾江指海。勇敢秦鞭。餘耳韓彭。紛紛灰燼。會聞偉伐巋然。風景逐時遷。頓蠶潮息。浙艮嶽輸燕。公等無如空言。南渡是何年。

琵琶仙 弔白舍人蘇學士用秋岳琵琶亭志懷韻

絕代西家風流容。二老柳堤花榭。管領公事湖山。芳晨並良夜。開柘鼓。雲裳雪面。似樊素。小蠻初嫁。鵲尾團香。螭頭會食。高韻天假。際昇平。金紫神仙。兩朝人湊合。清狂社。冷眼江峯。又飽。覩銀戈紅帕。飛絮恨。青驄莫繫。羅扇淚。哀松同瀉。試呼公一片吟魂。夕陽之下。

驀山溪 登吳山弔伍子胥用秋岳烏江渡韻

銀戈白馬。跌宕人豪意。歌扇縷金裙。粉軍容。江東絕技。水犀甲士。不上采蓮船。雄略

燼老臣殂。一劍西風淚。吳簫楚墓。鍊就冰霜器。郢樹蠹青天。遠君父。豈同兒戲。倒行鳴怨。七尺等浮雲。生有爲。死何難。濺血非讒忌。

滿江紅 弔林和靖先生墓用呂居仁幽居韻

薇圃芝岑。分幽派、孤山一曲。碧亂翦、此鄉如畫。鶴天梅屋。度關松雲。炊午飯。繞溪香雪。飄寒玉。恣登臨、信宿輒忘歸。苔階綠。無官職。東籬菊。有主客。王猷竹。竟廉花立柳。澗林無辱。西禪東封。何限事。灌園賣藥。生涯足。我欲扶。殘醉訪高墳。春鷗熟。

齊天樂 湖上日用吳修蟾和周美成韻

遠峯吹散雕闌雨。遊人畫橋三五。彩鷁風高。繡旗日麗。又弔一年湘楚。釵符綴虎。也嬌小。窺簾笑。低金縷。如此湖山。半分歌吹。送重午。樽前初拭醉眼。問靈均去後。與誰終古。屏枕薺潮。扇搖玉雪。同賦采蘭新句。菱舟曲度。漸掉人荷心。月痕留處。願趁佳時。普天銷戰鼓。

賀新郎 其二追和劉潛夫端午韻

銀篆香雲吐。晝偏長。碧梧庭院。玉肌無暑。贏得青山安穩在。何處爭龍鬪虎。恰畫艇、一雙飛渡。多少繁華風絮盡。算幾時、重起新簫鼓。身未老、待歌舞。西陵花月應相許。喚深情、大蘇小蘇。對澆芳醕。萬事不如杯共把。請看離宮麥黍。空滿眼、鴟夷濤怒。漁父當年非憤俗。果孤清、獨醒人徒苦。吾醉矣、莫懷古。

癸卯後作

菩薩蠻 七夕飲慈仁寺松下

誰家樓上穿針巧。鵲橋吐出冰蟾小。腸斷隔年秋。西風人白頭。銷磨兒女淚。只有逢場醉。不敢問流螢。一雙何處星。

羅敷媚 戲和友人席上有贈

鏡臺誰寫西湖影。淡抹濃妝。步履生香。秋水亭亭玉一行。青溪烟雨青山畫。金粉鴛鴦。醉是何鄉。花月須排一萬場。

前調 其二

瓊鋪十幅葡萄錦。舞月歌霞。整整斜斜。活現芙蓉一朵花。  
能行能坐能歡笑。真率風華。蛺蝶誰家。卻趁香風到若耶。

前調 其三

紅橋宛轉支機畔。銀漢天梭。一寸秋波。好處佯人不在多。  
雲綃霧縠官家樣。宮畫雙蛾。熱到心窩。試作胭脂汗底羅。

前調 其四

空階璧月團珠露。分外玲瓏。人是春風。吹得銀缸一片紅。  
水晶簾下深深見。略要朦朧。萬事飄蓬。收拾繁絃急管中。

前調 疊前題

□□□□□□□□夜夜新妝。促坐圍香。消得陳思□□行。  
□□□□上深如許。肯嫁文鴛。天與柔鄉。□□□□□□場。

前調 其二



瑤臺婀娜當風立。一抹紅霞裙帶微斜。蹴起珠欄欲睡花。  
沈香笛罷人初倦。月吐雲華。油壁他家。小小松耶與柏耶。

前調 其三

何來一串真珠。輕燕穿梭。點晴波。只在腰身轉處多。  
柘枝畫鼓沈檀拍。鬪了銀蛾。生受眉窩。瘦到弓鞞窄窄羅。

前調 其四

前身定解星前語。生就玲瓏。多謝東風。放出桃花滿鏡紅。  
分明六曲屏山路。那得朦朧。心似孤蓬。長繫殘香薄醉中。

前調 無題

樽前十日相逢九。一夕分攜。人隔橋西。花不分明月又低。  
偏生玉漏殘宵永。啞殺鳴雞。囑付深棲。錦燭濃香索性啼。

前調 其二

已甘薄倖揚州夢。情劫休論。打疊黃昏。硬把啼痕算酒痕。  
花魂不許溫存。領受東風一笑恩。明宵燈影重簾下。圍定

前調 其三

恨人自有傷心事。生怕歡娛。紅淚芳襦。下得閒情喚綠珠。  
羅敷花裏人孤。好夢迴頭一味無。青團扇子誰拋卻。爭看

前調 其四

青菱看熟紅蕖面。只似初逢。何處罡風。吹落穠花豔月中。  
匆匆愁殺秋鴻。送到雲山一萬重。兩行箏笛千場酒。去日

前調 其五

曾從西子湖頭住。雲水周遭。天水空寥。無數鴛鴦戲彩橈。  
柔條薄福難消。玉笛紅亭月一橋。青青恰似長堤柳。生小

滿庭芳 季弟孝積生辰讌集

明月故鄉。白頭兄弟。歡場又是離筵。黃花紫蟹。風物自年年。四壁圖書瀟灑。那更說。問舍求田。坐中客。連車結駟。千里誦豪賢。吾衰今已甚。芳樽翠袖。牽率周旋。算候封相印。不換詩篇。讓汝青雲事業。烏衣巷。簪笏盈前。還相約。五湖煙水。妻子鹿門仙。

採桑子 贈徐木千

韋曲城南天尺五。簾底春星。玉笛微停。唱到消魂不忍聽。並肩一刻濃香坐。消受

前調 贈謝樸先

與樸先別於真源坐上。五年所矣。尙能誦酒中贈欽郎千子病後人憐之句。感其情至。爲賦此詞。吾黨旣星散。而千子亦面上草青矣。言之三歎。

歡場誰記多情句。四海知音。紅淚難禁。病後人憐風露深。繡裙團扇當年事的。酸心別恨侵尋。耐得雕欄玉漏沈。

點絳脣 壽傅太宰八十

山阜岡陵。巍然恆岳稱天柱。去天尺五。傳說爲霖雨。節慶生申。太史占星聚。笙歌度。錦堂香霧。新月銀鈎吐。

西江月 賀陳郎新婚

十里春風人面。二分明月揚州。玉簫吹徹小紅樓。拭汗粉巾香透。錦瑟華年相倚。青驄油壁同遊。芙蓉初日照樓頭。蓮子從今得藕。

念奴嬌 中秋和其年韻

霜新葉老。乍天街湧出。嬋娟孤月。烏鵲繞枝棲不定。萬里關山一髮。蕩婦羅幃。征人鐵騎。搗練聲偏切。瑤階露冷。流螢紈扇飛歇。恰遇揮塵雄才。吹笙小史。暫遣煩憂豁。城角射鵬沙陣陣。催到臨渝早雪。金粟含香。銀蟾愛影。玉斧休輕折。百年此夜。相逢不醉癡絕。

沁園春 讀烏絲集次曹顧菴王西樵阮亭韻

煙月江東。文采風流。曠代遇之。恰臨春瓊樹。家稱叔寶。黃初金枕。人是陳思。如此才

名坐君牀上。我拜低頭竟不辭。多情甚。倩花閒錦筆。描畫崔徽。餐霞吐玉霏霏。任拍遍闌干絕調稀。更雨鈴風笛。傷心綺麗。雲鬢霧鬢。過眼權奇。簾閣香濃。市樓酒罷。錯落明珠萬斛飛。須記取。有曲江紅袖。圍繞留題。

前調 其二

彼美何其繡口檀心。婉孌清揚。怪鬢髯如戟。偏成斌媚。文章似海。轉益蒼茫。玳瑁爲簪。珊瑚作架。十五城償價未昂。朱絃發。聽短歌日短。長恨情長。無端雪涕歡場。儘潦倒荒迷事不妨。勝流黃思婦。鴛機組織。從軍蕩子。馬稍騰翔。有託而逃。是鄉可老。粉黛英雄總斷腸。君試問。任癡人濟濟。誰似羚羊。

前調 其三

髻且無歸。縱飲新豐。歌呼拍張。記東都門第。賜書仍在。西州姓字。複壁同藏。萬事滄桑。五陵花月。闌入誰家俠少場。相憐處。是君袍未錦。我鬢先霜。秋城鼓角悲涼。暫握手他鄉似故鄉。況竹林賓從。煙霞接軫。雲閒伯仲。宛雒褰裳。暖玉燕姬。酒錢夜數。

綰髻風能障綠楊。才人福。定清平絲管。爛醉沈香。

前調 再和其年韻

若爲吾歌。吾復爲君。軒乎舞之。悵天涯香草。魂銷欲別。江南紅豆。淚裏相思。殘葉西風。征鴻故國。神武之冠。我亦辭。偕往耳。肯佳人遠道。夢想桂徽。才華雪豔。煙霏。算世上無多。天上稀。總狂餘故態。嶽崎歷落。情鍾我輩。輪困離奇。入手扁舟。稱心鰕菜。但說招攜色已飛。遊倦矣。卻銅籤夜漏。響徹璇題。

前調 其二

君勿過河。濁浪滔滔。魚龍奮揚。乍城頭吹角。秋陰蕭瑟。橋邊問渡。煙柳冥茫。珠樹三枝。銀缸一穗。醉裏鄉心。低復昂。憑夜話。較青山紫閣。何計爲長。偶然遊戲逢場。有惡客衝泥興也妨。羨人如初日。芙蓉掩映。門開今雨。裙屐迴翔。此客殊佳。吾衰已甚。安用車輪更轉腸。相勸取。且酒寬嵇阮。花駐求羊。

前調 其三

文士何如。不數紛紛。材官蹶張。縱通侯檠戟。烏衣零落。凌雲詞賦。狗監摧藏。清吹西園。錦箏北里。驚坐人來。一擅場。還抖擻。儘新沙似雪。古月如霜。哀絲譜出伊涼。快挾彈鳴鞭。趙李鄉。更雙鬢捧出。春風羌笛。九天吹下。霧縠霞裳。法護僧彌。紫囊玉塵。大小兒呼孔與楊。高詠罷。似明璣翠羽。掃後猶香。

賀新郎 和其年秋夜旅懷韻

玉笛西風發。送賓鴻、一城砧杵，千門宮闕。秋滿桑乾沙岸曲，曲曲蘆花飛雪。又報到、今番圓月。羈宦薄遊俱失意。詫長楸、衣馬多如髮。空刺促、貝刀末。小山叢桂難攀折。眼中過、紛紛項領。汝曹何物。只有窮交堪對酒。況是江東人傑。任夜夜、蘭缸明滅。作達狂歌吾事足。問人生、幾斗荆高血。行樂耳、苦無益。

前調 其二

彩筆龍拏攫。嘆才人、半肩書劍。新豐棲托。濯足須教傾斗酒。詎必南榮企脚。喜大雅、於今重作。老矣吾慚鞭弭役。讓英遊、壁壘驚河朔。拚敵賦、供君索。招邀浪說平津

閣。但清宵、秋燈相勸。秋花相酢。雙手持螯兼持酒。一笑世情雲薄。造物者、因何搖落。便使珠喉能宛轉。怕捲簾、明月今非昨。聊試聽、塞笳樂。

滿江紅 和緯雲見贈韻

伯仲齊名。論著作、吾當束手。六代後、江左清文。飛花拂柳。貂蟬竟贖青氈債。鷓鴣莫。貫成都酒。慨秦川、公子正飄蓬。無林藪。五絲錦。冰蠶繡。五鳳閣。丹霞搆。見堵牆落筆。頓傾朝右。銀漢已過蟾兔夕。玉河甫歇蛟龍鬪。但除君、偕飲復偕歌。三緘口。

前調 其二

牋擘芙蓉。略點染、粉堆金簇。彷彿是、雁排錦柱。龍吟豪竹。長嘯不除湖海氣。清譚自帶烟霞福。有東風、寒食漢宮詩。金閨讀。花前飲。人如玉。星下醉。天爲燭。高歌吾老矣。空摩雙目。誰信倚風巴里調。換來一斛珍珠曲。倩火攻、奇策更先登。難兄續。

賀新郎 其年將發秋夜集西堂次前韻

一曲驪歌發。正秋宵、露寒金井。星疏瑤闕。江上青楓應有約。夜半落潮如雪。留不住、



故人明月。自是五湖煙水好。笑東華、塵土埋黃髮。行路怕、太行末。唾壺如意應敲折。古今來、英雄兒女，都爲情物。孤憤信陵遊戲事。畢竟千人之傑。看轉眼、烟雲變滅。萬事不如歸計穩。聽杜鵑、枝上三更血。寧賣菜、更求益。

菩薩蠻 己酉春日摩訶菴杏花下有感直方舊遊

蔚藍一片山初染。粉紅花底看人面。玉笛怕花飛。花開人莫歸。當時花下客。把酒斜陽立。今日對斜陽。與花同斷腸。

畫堂春 和青若贈楊枝韻

金溝二月鳧鶉黃。揚州人到長楊。絲絲縷縷畫柔腸。瘦得神傷。春色隋隄一片繡。簾香粉千行。相逢飛絮已池塘。誤卻風光。

長相思 和其年韻同前

倒芳卮。訴芳卮。縱不相憐也莫辭。歡多那易離。惱楊枝。惜楊枝。對此青青我鬢絲。腰肢問小時。

玉人歌 再和其年韻同前

花月事。憶東風樓角。落紅滿地。玉簫金管。記取多情未。一團香雪漫天墜。做弄勾魂意。恨年時。小別千山。暫遊萬里。婀娜誰家子。向五陵年少。傲他車騎。水翦秋眸。生就和花死。明燈今夜垂芳穗。人坐濃香裏。藉三眠。綰髻半拋還倚。

浪淘沙 和緯雲同前

花語小長干。玉骨珊珊。風流人似綵雲端。相見匆匆還別去。好夢閒關。芳草一春閒。綠到平山。杜鵑催殺亂紅前。萬疊千紅天不管。煙水瀟瀟。

菩薩蠻 上巳前一日西郊馮氏園看海棠

春花春月年年客。憐春又怕春離別。只爲曉風愁。催花撲玉鉤。娟娟雙蛺蝶。宛轉飛花側。花底一聲歌。疼花花奈何。

滿庭芳 和伯紫韻送錢葆飭舍人

金粉才華。紫囊門第。少年意氣飛揚。輕烟寒食。宮柳正飄颻。那信公車書上。連城價。

猶屈陵陽。且歸去。魚灣蟹舍。雲水好家鄉。求羊藤蘿徑。開樽問字。畫槩垂楊。更鯉盤饌。玉林筍排槍。八座潘輿安穩。花月下。綵舞歡長。待還朝。兩行蓮燭。射策動君王。

菩薩蠻 同韶九西郊馮氏園看海棠

年年歲歲花閒坐。今來卻向花閒臥。臥倚壁人肩。人花並可憐。輕陰風日好。藁吐紅珠小。醉插帽簷斜。更憐人勝花。

前調 其二

錦香陣陣催春急。舊花又是新相識。紈扇一聲歌。流鶯爭不多。紫絲圍步履。小立朱樓側。簾外鬪腰身。垂楊軟學人。

百字令 和緯雲除夕

天涯蓬鬢。嘆如流歲月。今年往矣。雪竹霜筠生事薄。小立窮交赤幟。盡典朝衫。難償酒債。愁撥寒灰裏。殘書插架。炊煙一任遲起。聯袂韋曲花新。長楊鶯到。樂事翻從此。老去風光原有數。生受玉河春水。馬埒銅街。珠盤金谷。過眼人如寐。五湖烟月。潮

迴鰕菜成市。

賀新郎 和曹實庵舍人贈柳叟敬亭

鶴髮開元叟。也來看、荆高市上。賣漿屠狗。萬里風霜吹短褐。游戲侯門趨走。卿與我周旋良久。綠鬢舊顏今改盡。嘆婆娑、人似桓公柳。空擊碎、唾壺口。江東折戟沈沙後。過青溪、笛牀煙月。淚珠盈斗。老矣耐煩如許事。且坐旗亭呼酒。拚殘臘、消磨紅友。花壓城南韋杜曲。問球場、馬弮還能否。斜日外、一回首。

沁園春 前題次韻

驃騎將軍。異姓諸侯。功名壯哉。乍南樓傳箭。大航風鶴。中流搖櫓。溢浦蒿萊。片語回噴。千金逃賞。遮客長刀玩弄來。堪憐處。有恩門一涕。青史難埋。偶然座上嘲談。博黃絹新詞七步才。似籌兵北府。碧油晨啓。把碁東閣。屐齒宵陪。前半爲左寧南此紀范文貞何文端公事春水方生。吾當速去。老子遨遊頗見哀。相攜手。儘山川六代。簫鼓千杯。

瑞鶴仙 祝澹餘曹少宗伯次辛稼軒祝洪莘之韻

泰山連北斗。看碧月、懸霄金甌注酒。宮梅吐寒秀。正朝迴銀燭、香煙滿袖。綵毫揮就。恰遇著、一陽添候。想當日、天上麒麟、藉作調元鉅手。歡否。佳辰初至。水鏡鶯遷。喬松鶴守。春暉並久。北堂上、岡陵壽。更難兼珠蓴、標聯騷雅。繡虎雕龍。世有廿四年、花甲纔開。中書考後。

減字木蘭花 和阮亭題趙閬仙膳部小像

東華塵土。退食攤書恆鍵戶。豪氣凌秋。蓬島三山最上頭。其心如水。才大官閒翻自喜。遊戲逢場。濟世逃禪總不妨。

百字令 送蔡竹濤遊太原和顧菴學士韻

入秦蔡澤。急橫金躍馬。難甘雌伏。今代才名羈旅客。醉倚長楊拋筑。一雁清秋。三關落日。人比蕭蕭竹。薄遊書劍。官齋移榻堪宿。試問懸甕風煙。青城花月。此景曾陵谷。極眺高歌偕騎省。指點殘楓。賸櫺。越石登樓。太真披扇。天湊清狂。福歸來重九。新

詞珠定盈斛。騎省謂次耕也。時在太原幕中。

菩薩蠻 西郊海棠已放風復大作對花悵然

愛花歲歲看花蚤。今年花較去年老。生怕近簾鉤。紅顏人白頭。  
那禁風似箭。更打殘花片。莫便踏花歸。留他緩緩飛。

滿庭芳 爲子翥內人 籀庵西樵作

一笑傾城。使成名士。人間何物堪憐。屏山六曲。開閣對江煙。多少三春花月。攢簇上金粉。匿前凝妝罷。披香博士。長奏衍波箋。難傳嘖喜態。嬌憨宛轉。半笑無言。是繡窗良友。非是情緣。恰好芙蓉並蒂。鴛鴦牒。福慧雙全。從今算。芳華二十。歡燕到千年。

賀新郎 青藜將南行招同槩子方虎維則石潭穀梁集雪客秋水軒卽席和

顧菴韻

簾颺微颺卷。正新秋、一泓秋水。一宵排遣。客舍高城砧杵急。清淚征衫休泣。隨旅燕、棲巢如繭。老子逢場遊戲久。興婆娑、肯較南樓淺。眉總鬪。遇歡展。西山半角藏還

顯。記春星、捫蘿孤照。來青殘扁。早雁漸迴沙柳路。催起臂鷹牽犬。鰕菜夢、年年難免。且飲醇醪公瑾坐。問風流、軍陣今誰典。花月外、舌須翦。

前調 送青藜偕紀郡伯之毘陵再疊前韻

裏劍攜書卷。乍銷魂、黯然欲別。有情誰遣。樽酒旗亭楓葉亂。朝雨輕塵方泫。離話細、春蠶抽繭。望去千峯蒼翠合。試蒜山、瓜步潮深淺。風正和、片帆展。六朝記室名尊顯。況金閨、文章大手。羣推輪扁。指點孫郎遺略在。豈似景升豚犬。行色壯、倚閭差免。到日秋花團竹馬。奉蘭陵、雄郡君同典。襦袴五、自今翦。

百字令 雨夜再送青藜疊緯雲除夕韻

疏燈細雨。正客心蕭瑟、秋行半矣。青眼高歌人乍別。誰向歡場奪幟。六代江山、五陵衣馬。去住今宵裏。更闌酒醒。風帆愁見初起。揚袂司馬遊梁。終軍使越。寂寂聊爲此。一片鬱孤臺上月。直接石頭潮水。樓櫓丹陽。萼羹笠澤。亂攪寒衾寐。朔雲回首。棋枰翻盡朝市。

賀新郎 寄祝辟疆偕蘇夫人六十用其年壽阮亭韻

四海珠盤走。羨英游、才名意氣，喬松同壽。曾過青溪金粉地，香重一圍羅袖。花霧下、橫參轉斗。燕子紅牋誰譜曲，與諸君、撫掌兼揮肘。鉤黨夢，醒何有。攀條休悵桓公柳。未消磨、千林酒月，百年文煙。絲繡平原賓客到，綠水朱欄依舊。曠達士、天難衰朽。況對齊眉鸞鳳侶，指佳兒、肯鎖春樽口。乘駟馬，坐相守。

菩薩蠻 爲嚴就斯侍讀公子彌月

彤墀親見龍鸞草。珠柯又拂庭階好。金粟月中香。吹來小鳳凰。犀錢兼玉果。樂事從今夥。他日對楓宸。黃麻映壁人。

前調 爲許生洲長君佛摩題字

九霄飛下青睛客。鳳肩五色麟。題石檠戟舊家風。經傳太史公。汝南能月旦。人物推東漢。放眼且高歌。摩雲望佛摩。

蝶戀花 問訊韞林夫人卽和其春愁韻兼柬安又



俠客文人心自許。研染芙蓉。鏡染春山雨。雙槳天涯來復去。年年垂柳依張緒。翠袖牽蘿凭日暮。薄病輕寒。似被秋陰妬。靈鷲噪花傳好語。愁銷休與征鴻訴。

賀新郎 送穀梁三疊顧菴學士韻

雨過窗蕉卷。更關河、早鴻嘹唳。被秋驅遣。多少客心難按捺。偏到臨歧淒泫。訝來往、芒鞋重繭。愁是吾曹萍梗散。算名場、失意悲猶淺。紈扇在、嬾頻展。烏衣門第應清顯。盼詞人、沈香奏曲。禁林揮扁。卻向輞川圖畫臥。華子岡頭聞犬。羞獻納、吾冠須免。且共小胥談博奧。儘奚囊、好句芸籤典。燒尾宴、錦綾翦。

前調 中秋後一夕月食寓懷

誰使清光卷。望層空、廣寒宮闕。濃陰難遣。昨夜香風飄桂子。沾溼淚珠還泫。偏此夕、明蟾封繭。怪底天公能耐事。縱金蟆、玉斧揮猶淺。雲母障、幾時展。素娥獨立憑幽顯。任漫漫、銀河如墨。斷雲如扁。橫笛短簫催急鼓。驚起五更鄰犬。看頃刻、綠章除免。變換總隨時與數。料夔龍、也讓羲和典。霄漢上、自裁翦。

前調 影梅菴憶語久置案頭不省誰何持去辟疆再爲寄示開卷泫然懷人  
感舊同病之情略見乎詞矣

雁字橫秋卷。乍凭欄、玉梅影到。同心遙遣。東素亭亭人宛在。紅雨一巾重沓。理不出、  
亂愁成繭。騎省十年蓬鬢改。嘆香薰遺挂痕猶淺。腸斷譜對花展。帳中約略芳魂  
顯。記當時、輕綃腕弱。睡鬢雲扁。碧海青天何限事。難倩附書黃犬。藉棋日、酒年寬免。  
搔首涼宵風露下。羨煙霄、破鏡猶堪典。雙鳳帶、再生翦。

前調 中秋有感兼送穀梁

一葉驚風卷。正天街、白麻將下。青驄行遣。身世多艱誰自料。老淚蒼生頻泫。怕滾滾、  
沸湯投繭。皓月中秋同佇立。謔南枝、烏鵲情非淺。空袖手、力難展。朱輪華轂爭榮  
顯。但低頭、與時聾啞。隨人圓扁。徑欲拂衣長嘯去。何處擔琴攜犬。便狂醉、難乎其免。  
羨汝歸裝煙水路。任驢羈酒盡休輕典。都市語、并刀翦。

前調 願菴先生薄遊京國與同志諸子觴詠甚歡方期露曉寒宵流連唱答

不謂季秋之朔，襟被遠行卒卒，戴星莫繇，瞻送殘燈，老眼摩挲，爲作此詞，仍寄調賀新郎。蓋七疊先生水亭原韻矣。末段並簡秋老西堂夜話彈指弈棋，必將望長安而一笑也。辛亥八月晦日。

一夕征衫卷，恰天涯、重陽將近。中秋纔遣，著慣平生幾兩屐。此度沾巾同法。寫不盡、烏絲殘繭。沙漲郵亭，叢菊路、喜賓鴻、背上新霜淺。煙雨夢、薄衾展。江楓落處，寒山顯。更鄉園、雀脂綿膩，鱸腮銀扁。白馬名都人繡虎。聊試祝雞呼犬。代捉鼻、謝公祈免。萬事浮雲高臥後，怕蘭臺、掌故需人典。借倦圃、薜蘿翦。

前調 問雪客病

心似飛蓬卷。對秋星、藥壺茶竈。試將愁遣。尙記銀河同竚立。汗雨酒痕齊泫。曾幾日、重衾堆繭。霜信五更殘漏急。恨關山、月影窺人淺。憔悴後、鏡慵展。風簾隱約孤燈顯。倚闌干、烏啼伊啞。鷗沙平扁。滾滾長楊車馬外。不少平原籬犬。能免俗、浮沈姑免。病起披裘還強飯。有珠琴、石鼓勞君典。莎徑草、亟深翦。

前調 代人贈別

人與秋雲卷。乍亭亭、紅橋玉笛，柳絲颺遣。羅扇練裙何限淚。今夕背燈偷泣。剝不盡、五絲愁繭。此別竟無魂可斷。笑消魂、兩字言情淺。芳草外、翠屏展。天涯回望雙星顯。憶聞歌、珍珠成串。餅金鎔扁。簾幙幾番花霧重。吠殺胡麻仙犬。今而後、吾其知免。若許都亭攜手去。儘臨邛、酒債將裘典。香唾袖、莫輕翦。

前調 送金粟省親歸梁溪

下直縑囊卷。正梧陰、日斜人散。篆煙風遣。江上白雲遊子夢。幾載青衫常泫。千百結、銀蛾纏繭。歸到洞庭霜乍落。看橘盈、懷袖寒香淺。溫清暇。綵衣展。豈須名就親方顯。趁高秋、鱗松虬曲。珠泉簾扁。手進晨葩雞黍潔。絕勝杞根花犬。料衰病、歡然扶免。自昔英才公府掾。每起家、臺閣諳朝典。裙屐習、早除翦。

前調 代金粟閨怨

幾曲屏山卷。悵離雲、菊開人瘦。將他分遣。兩小鴛鴦裙對繫。誰料啼痕新泫。憎紅豆、

蟾蜍蟠繭。好夢願隨雙槳去。怕江湖、不比桑乾淺。沙雁陣、帶愁展。一牀幽恨臨妝顯。鏡臺前、綠螺拋賸。紫釵敲扁。強倩鴉兒、偎軟玉、鬧殺銅街寒犬。合歡帳、暫時勾免。夜夜名香薰繡佛。乞懺除、花罪從輕典。梅訊待、綺窗翦。

前調 其二

風葉當眉卷。畫橋東、小門長巷。悶來顰遣。簾外馬嘶人去急。玉筍紅潮交沓。繡線澀、吳綿縫繭。落月窗西和影坐。問回頭、可記鴉黃淺。心字篆。博山展。十分憐愛三分顯。半遮燈、玉鉤初下。枕痕微扁。荳蔻瓊酥香百結。那用防綃獐犬。離恨劫。今生饒免。總信風流非薄倖。擲金錢、難覓青春典。鶯舌弄、燕波翦。

前調 爲槩子壽

貯腹書千卷。更空明、一泓秋水。霧飛雲遣。老筆紛披姿媚出。冰灑鐵梅芳沚。高詠遍、蜀箋吳繭。六代江山文酒地。記孝侯、臺畔春陰淺。龍竟臥。螭羞展。客遊不藉縱橫顯。日端居、犀香溫透。墨池摩扁。生受鹿門妻子福。萬態擾龍馴犬。愛白璧、微瑕全免。

相約卜鄰投老去。有青溪、茅屋堪重典。花共插、竹同翦。

前調 九月龍爪槐登高有感。聖秋友沂諸故人同集者爲榘子方虎介玉雪

客時金粟將南歸矣

古陌纖塵卷。恰重陽、好秋節氣。惡緣羸遣。十載雙盤龍樹老。井甃殘雲流。空闊地、素沙鋪繭。滿眼江山風葉下。頓傷離、感舊心難淺。觴詠興、強支展。昔遊蹤跡依稀顯。嘆星霜、銷磨未盡。石坪金扁。後夜犢車曾纏轆。響亂寺門荒犬。俯仰恨、餘生寧免。手把茱萸鄉思急。管明年、高會何人典。天似練、一鴻翦。

前調 秋日蒙遣祭至唐家嶺因遊西山

孤鶴雲中卷。喜三迴、看山奉勅。九天差遣。何處麒麟高塚客。杜宇夢回啼。跳不出、乾坤圍繭。岸柳蕭疏村菊放。任宦情、也向西風淺。筇竹杖、且施展。少豪妄、意功名顯。到如今、殘棋拍碎。唾壺捶扁。望裏關門笳鼓競。千隊射鵬調犬。羽獵賦、衰慵邀免。絕頂藤蘿人共坐。儘今宵、觴政更番典。塵海事、醉餘翦。

前調 題雪客像

且把殘書卷。與周郎談兵顧曲。歡場同遣。當日小喬重見否。熱淚有情堪泫。今古事、紛如攢繭。年少雄姿英發甚。笑紫囊、高屐風流淺。騏驥足過都展。尊公好句青溪顯。傍紅橋、岸連花動。石流潮扁。歸去中林偕嘯傲。冷眼乞憐搖犬。恐避貴、延之難免。愛汝新篇真稟兀。最正而葩藻奇而典。松下塵坐深翦。

前調 爲汪蛟門舍人病中納姬和方虎

璧月蝦鬚卷。報香車、苧蘿人到。羈愁齊遣。病起長卿微倦後。消得露華濃泫。疊繡襪、紅綿含繭。鬢影錢塘雲母楫。渡廣陵、八月秋濤淺。菱鏡黛、曉窗展。倚風生怕腰身顯。護嬌羞、錦屏六曲。銅環雙扁。子夜翠衾龍腦熱。切莫打鴉驚犬。幸放仗、朝參新免。收拾鴛鴦鍼線帖。奉五花、判事妝臺典。琴弈暇、綺吟翦。

前調 祝櫟園先生

萬事浮雲卷。猛回頭、盲風噩浪。盡情麾遣。烽鼓舳艫江海淚。袖手棋枰恆泫。憂國鬢、

簇成霜繭。與我命同磨。蝸住薄湘潭。儋耳遭讒淺。長信簾。怯秋展。謝公邱壑風流顯。自登梯。看山讀畫。笑題樓扁。有客到門頻信宿。迎慣東橋園犬。公健在。吾官甘免。閒日君王親賜與。拜青鞋。布襪新恩典。檐雨燭。對牀翦。

前調 和方虎燈下菊影

新月如眉卷。小窗西。疏燈星放。薄寒霜遣。半壁幽花人燭夜。碧沁銅瓶清泫。傲籬外。薄英飄繭。瘦硬幾枝名士態。擬纖腰。束素傳神淺。真率意。畫中展。一痕墨暈天然顯。漫評量。蜂簧吹褪。玉盤堆扁。纔伴征鴻雙杵歇。又聽柴門歸犬。此坐客。督郵當免。酒冷香殘標格在。儘年年。秋事銀缸典。紅吐穗。肯頻翦。

前調 題王山樵先生鏡閣

萬疊烟光卷。羨天生。人豪清福。湖山資遣。綠浪紅欄春雨足。菰米蕓絲紛沓。倩屋角。女桑催繭。岳廟于墳悲壯地。說六橋。歌舞風華淺。江海氣。一茅展。經綸何必封侯顯。任胸中。嶽崎歷落。嶺橫峯扁。鐵馬金戈沙塞夢。拋擲浦鷗林犬。曲突賞。飄然逃免。



才子青箱傳素業。勝平泉花木無人典。桐葉笏。白雲翦。

前調 題宋荔裳觀察小像

鄴下推詩卷。秋岳一見公詩。最爲擊節。正才人。亂餘入雒。悲秋初遣。文藻江山爭映發。花雨上林春。泣。驚落筆。冰絲縈繭。萬里關河。笳吹出。怪清郎。執戟承明淺。盤錯地。器方展。盛名翻藉崎嶇顯。似輕帆。峽穿象馬。灘凌孤扁。麟鳳世閒能幾見。何暇較他。鳴犬喜玉燕。頻投身免。公連舉佳兒。從此天衢皆坦步。合旂常。雅頌公兼典。添半臂。紫綾翦。

前調 爲杜湘草四十壽

柳浪荷珠卷。正新豐酒釀花麗。詠陶觴遣。風調樊川詩老杜。玉濯彩毫光。泫。織龍鬪。天孫雲繭。國士祠邊。彈劍出笑千金。一飯酬恩淺。燕趙地。壯懷展。縱橫八法臨池。顯傲諸家。隸人寒餓。墨豬肥扁。膂力方剛兼慧福。休問鼎雞丹犬。不識字。神仙今免。奇絕大書呼陛下。借赤刀。和壁藏圖典。袍袖溼。勝初翦。

前調 題沈雲賓小像

薄宦青衫卷。也隨人、西風滾滾。擗憑秋遣。落拓浮沈燕市裏。舊雨漉巾微泫。驚攬鏡、一雙蓬繭。老伴歲寒能幾客。悔清歌、濁酒爲歡淺。巖壑韻。頰毛展。身今隱矣名猶顯。憶紅窗、柳綿吹弱。花茵堆扁。游戲半生天海意。豈學檻猿牢犬。呼上殿、君恩傳免。疇昔貴遊星散盡。羨五湖、泉石留卿典。攜手去。髮同翦。

五福麗中天 賀梁玉立司農生子次汪蛟門韻

三公府第鶯花繞。不數畫眉京兆。東閣郎君。槐庭兒子。入手英啼初抱。都人歡笑。恰鎖院詞頭。紫綸新草。宰相金倉。先判福德臨門早。官事生來能了。陸倕王仲寶。年皆小。上苑春風。華堂文讌。朱履賓朋齊到。黑頭鼎鼐。魯後周前。拜稽偏好。貞敏勳猷。貽謀天下少。

風入松 遙和方虎電發燕市小飲

客心搖曳任西東。柳絮空中。爭傳紫陌青帘下。倩雙鬢譜出歡儂。一陣催花梅雨。滿

簾消夏松風。五陵裘馬鬪誰工。湖海相逢。唾壺擊碎狂歌發。勝淒清。露滴新桐。寄語酒樓高李。論文吾欲過從。

羅敷媚 朱右君司馬招集西郊馮氏園看海棠

今年又向花閒醉。薄病深春。火齊纔勻。恰是盈盈十五身。青苔過雨風簾定。天判芳辰。鶯燕休嗔。白首看花更幾人。

蝶戀花 和蒼巖西樵阮亭蛟門飲荔裳園演劇

韋曲穠花鋪繡纈。一派流鶯。催到含桃節。人柳三眠春漸歇。池臺處處飛香雪。一紅豆記歌頻換闋。萬事東風。不醉憐癡絕。欲去還留宵已徹。棲烏踏碎玲瓏月。

前調 其二

鐵撥鶻絃眉總纈。青史人豪。慷慨鳴奇節。啼鴉一聲芳草歇。仰天孤憤何由雪。清淚樽前彈此闋。不待悲愁。春夜銷魂絕。世事到頭須了徹。瓊樓正掛高寒月。

前調 爲詔九

春絆情絲千縷。夢裏人來。乍暖輕寒節。何處玉驄曾小歇。海棠飄落胭脂雪。重倩紅霞溫舊闋。張緒風前。好是腰身絕。樓閣水明光四徹。羅衣影漾波心月。

前調 爲幼文

好句推敲江錦纈。珠瀉泉流。不犯騶呵節。賈島苦吟衝京尹。第三節遊冶五陵花事歇。竹枝行踏巴渝雪。人壓場圓歡奏闋。衣帶微寬。瘦到休文絕。惆悵黃雞三唱徹。離雲已暗關山月。

前調 送韶九還廣陵

紅淚一巾心百纈。春盡纔逢。剛過菖蒲節。懊恨子規啼不歇。生生催就雙蓬雪。莫聽陽關朝雨闋。禁得年年。腸爲分攜絕。芳草黏天難望徹。杏花人面揚州月。

前調 代韶九閨情

綵線鴛鴦愁暗纈。花雨新添。水暖銀塘節。燕子穿簾飛又歇。冰紈襯貼芙蓉雪。悶倚玉簫吹半闋。報道人歸。喜極還噴絕。別後心情明鏡徹。日長挂到如眉月。

前調 其二

隋苑烟花羅綺纈。小別重圓。交代歡愁節。腸轉車輪今始歇。夢回關塞沙如雪。爲問逢場歌幾闋。比並雙蛾。畫就誰嬌絕。天欲爲人須爲徹。一生乞作團圓月。

芝麓詞刻入定山堂全集者分四卷。首卷題白門柳。次卷題綺幘。三卷之首則題曰此卷以下皆癸卯後香嚴齋存稿。別有一本名香嚴齋三十二芙蓉集。不分卷。爲康熙壬子吳江徐電發所刻。宋旣庭尤展成爲之序。合兩本勘之。知徐本所收適當全集本前二卷及卷三之半。字句小有異同。如七夕菩薩蠻結句。不敢問流螢。一雙何處星。徐刻本作不敢問雙星。流螢記畫屏。又如題中稱善持君者。徐刻本均作內人。蓋徐本刊布尙早。全集則晚年所定。而白門柳綺幘諸名稱。亦爲後來分卷時補題。非徐刻時所有也。丙子清明節校訖並記。

南  
溪  
詞

蓮  
影



曹爾堪（萬曆四五——康熙一八）

字子顧。號顧菴。浙江嘉善人。順治壬辰進士。官侍講學士。博學強記。多識掌故。有杜鵑亭集南溪集。

序

記二十年前與顧菴相樂也。每當湖山宴集。毫墨淋漓。酒旗歌扇。逢迎不暇。此真少時之極致矣。顧菴既登上第。直內庭。簪筆視草。飛聲京洛。忽以細故下吏。放歸草廬。而余襍被灌園。已及十載。握手相看。顛毛半白。回思二十年前之樂。恍焉如夢。其能無慨于心乎。獨詩歌興會。至老不衰。予間以花草之餘。度曲梨園。陶寫絲竹。而顧菴出所著近詞。一唱三歎。遂使鐵板承前。紅牙侍後。狂奴故態。吾兩人可相視而笑矣。予惟近日詞家。烘寫閨襜。易流狎昵。蹈揚湖海。動涉叫囂。二者交病。顧菴獨以深長之思。發大雅之音。如桐露新流。松風徐舉。秋高遠唳。霽晚孤吹。第其品格。應在眉山渭南之間。會須訶周柳爲小兒。嗤辛劉爲僮父。予又何人。敢與之較長絜短哉。假使今日有上官昭容。秤量天下。則顧菴必受明月夜珠之寵。而予則紙落如飛矣。又使今日有旗亭妙伎。雙鬢發聲。則顧菴必擅黃河遠上之名。而予且未得畫壁。然則顧菴之詞。予豈惟不敢望肩背。雖欲品題甲乙。亦不能贊一辭也。蓋新城王阮亭亟稱



之矣。曰學士詞。其源出于豳風。一洗鄭衛。予嘗以爲知言。吳門尤侗悔庵撰。

# 南溪詞

嘉善曹爾堪顧菴

搗練子 乙亥冬暮曉行

風欲靜。凍交加。冰嚙霜痕閣岸斜。流水無聲波不起。冷烟微月寫輕霞。

又 春思

人正倦。晝偏長。夢醒微聞繡閣香。花徑尋芳誰是伴。金衣公子雪衣孃。

又 廬州廣華寺旅懷 甲辰

江北路。廡東頭。白恰青驪絆客愁。梧雨滴殘蛩語咽。他鄉明日是中秋。

望江南 題疑舫

眞曠遠。空碧捲簾收。爲道岸高知是屋。如逢水漲便疑舟。身世可沈浮。

又 戊寅初夏

初夏好。門外嫩涼吹。筍點斑痕抽玳瑁。水添綠暈漲玻璃。新結竹邊籬。

又 紀游五首

金陵好。豔集記前朝。桃葉清尊銀甲鬧。雨花都講柘衫嬌。春在木蘭橈。  
蕪城好。魄動舞衫中。翠黛波心商舶曉。紅燈店口市橋風。小杜醉樓東。  
西湖好。鎮日冶游天。青雀暮還菱作鏡。紫騮春競柳飛綿。鶯語畫簾前。  
山塘好。匙雪虎邱茶。近水雕梁頻坐燕。護晴油幙巧分花。滌器麗人家。  
蘭亭好。簫鼓越中行。石馬古苔南鎮廟。臥龍新柳夏王城。流水十分清。

憶王孫

侍兒新沐避芳叢。整理簪花笑語工。爲愛新晴垂柳濃。掛簾櫳。風攪山茶滿地紅。

如夢令 江村

芳蕨桃花江渚。管領漁蓑歸去。唱起竹枝詞。獨自輕移柔櫓。深處。深處。添得半篙春雨。

又 初寒卽事

溪畔蘋花開小。牆角低垂紅棗。深夜卷西風。牀下莎雞來早。傾倒。傾倒。秋社新醅正好。

長相思 寄跡荒塢一月感而有作

溪邊蘆水邊梧。我唱新詩興未孤。錦囊隨小奴。樽常枯。偈常逋。舊識僧徒和酒徒。年來多半疏。

又 荻溪農家

朝來晴。晚來晴。罩屋桑陰分外清。短簷鳩婦聲。雲須耕。雨須耕。新織蓑衣掩肝輕。竹枝歌太平。

又 有懷

寒潮生。暮潮平。綠柳朱欄繡戶明。有人花下行。晨調笙。夜調箏。博得風流隊裏名。唯留年少情。

相見歡 春曉

早春數徧庭梅。雪中開。果是深深院宇，印莓苔。無箇事。牽愁思。儘悠哉。百舌驚人  
不管、枕邊催。

又 江村

水痕新漲苔磯。杏花飛。江岸蒲芽如箭，鰲魚肥。蠅頭利。爭無已。昨元非。只有子規  
明白、喚人歸。

生查子 和澹心

花開別後枝。草滿來時路。白藕五更風。紅豆三更雨。歌喉月互沈。舞影雲同去。留  
只爲人留住。肯隨君住。

又 別思

柳枝離別多。杜牧風流在。薄倖不成憐。休挽荷花戴。燈前印口脂。鏡裏留眉黛。愁  
緒問如何。雨滴蕉心碎。

昭君怨 己卯二月周斯羽兄弟招集舟中觀演家劇魏子一於雨中爲余圖

扇因調小詞題其上

日暮畫船微雨。圖取春陰縷縷。煙氣散江湄。柳痕垂。一筆遠村如抹。望去胭脂欲潑。屋角有桃花。是誰家。

女冠子 秋日述懷

淡煙濃水。正值江南秋美。力田嘉。小巷晴收秫。山廚晚煮瓜。鵝黃家醞酒。猩赤手栽花。一雨重陽近。覺寒些。

又 山房寒思

吳船來往。愛聽畫眉停槳。冷紅飛。石醜猶稱丈。花嬌卻字妃。佇看千藥綻。空憶四腮肥。松鼠簷前落。已忘機。

點絳脣 丙子夏日村墅

長晝方炎。畫梁歸喘尋泥燕。桔槔聲斷。露稻幽香遍。倚樹當風。欲比閒雲倦。蘋花院。小池波淺。綠上窗紗半。

又 江村

苦是春陰。桃花半落江村暮。垂楊千樹。縹緲漁船渡。步野鷗飛去。只愛無人處。

青滿田疇。難認牛羊路。溪邊

又 感舊

記得黃昏。眉梢微見紅潮印。夜深低問。釀作分離恨。另欲通佳訊。人遠天涯近。

翻悔當初。合了鴛鴦枕。嗟孤

又 遣夏東除菴

蓮褪紅衣。迴塘雨蓋藏鷓鴣。柳絲嫌直。故倩鶯來織。黑細魚吞墨。道士鵝難得。

蒲戟青稠。點綴清溪色。方池

又 沛上懷古

禾黍風清。亂山高下供憑弔。龍吟虎嘯。絳灌由屠釣。料漢家遺廟。明月依然照。

轉眼興亡。陵闕餘殘燒。誰能

又 陸舫春思

沙暖蒲香。鳳池漲綠。晴波皺。搓黃御柳。三月春方透。  
小徑閒吟。碧蘚生鴛鴦。消晴  
晝。雨絲拖逗。似補梨花瘦。

又 秋暮旅懷柬翼蒼

衰草重岡。雁燈吹滅。諸陵火。誰家菊朵。開近扶風左。  
無限悲秋。難覓江淮柁。耽枯  
坐。閒門深鎖。紅葉堆中我。

又 旅曉柬漢思

幔卷同雲。平皋木介。霜威肅。柳條吹禿。猶映晴淮綠。  
道德微言。爲目寧爲腹。堪三  
復。他年空谷。活火煨黃獨。

浣溪紗 曉起

樂事貧家竟不貪。疏風斜雨過城南。單紗消受嫩涼甘。  
宿硯頻催童子滌。好花頻  
與侍兒簪。暗將私語賭宜男。



又 秋日園居二調

謝客微軀不願勞。病餘覺減酒狂豪。花間行礙撥羅高。  
箇箇蔓牽黃荔子。垂垂架掛紫蒲萄。曉盛芳露和蘭膏。  
消夏如忘伏日高。藤牀一枕著能逃。起呼童子候茶濤。  
書有蠹巢思曝卷。箋遺蠅墨阻揮毫。編來團扇鶴遺毛。

又 春詞

荔子紅綾窄稱身。輕籠淡墨舞衫新。回眸檢點著芳塵。  
黃雀夜飛歸玉輦。紫駟日暖鬧朱輪。青樓梳掠惹游人。

又 夏詞

八尺龍鬚一尺綃。初離涼枕印紅潮。自然香膩洗難消。  
玳瑁簾垂留紫燕。珊瑚架倒戲金貓。藕絲香裏送鸞簫。

又 秋詞

玉盃低斟酒力微。風前團扇未停揮。砧敲紅淚落征衣。  
愁見月高寒繡箔。起乘人靜弄金徽。鴛鴦幔冷一螢飛。

又 冬詞

翠被難溫夜似年。珠簾輕捲霧如煙。寒鴉啼到畫梁邊。  
鸚鵡怯風攢綠羽。金猊貯火熨紅氈。秦箏凍斷十三絃。

又 過靈塔菴

棘刺杉針墓外田。鴨頭勻綠瀉堂前。山僧擁衲只高眠。  
粉堞影深垂柳畔。石橋路仄野鳧邊。斜陽踏破草芊芊。

又 出郭

綠徧汀蒲淺浪交。波搖新柳散晴郊。幽人攜屐叩蓬茅。  
蛙駭早雷開蟄戶。鵲占太歲啓春巢。歸來斜日過花梢。

又 閨情

朱檻移燈拾翠鈿。碧紗窗裏篔簹紋圓。薄寒微覺枕痕邊。  
鴻鵠帳開調鳳髓。鷓鴣曲就撥鷓絃。銀箏撩我不曾眠。

又 燕邸清明

宮柳迎風翦綠齊。隗臺春壓杏花低。誰家小襪印香泥。  
玉勒連錢盤輦路。毳裘油壁駐金堤。舊陵芳草杜鵑啼。

又 感秋

雪急清砧禁樹紅。晝垂銀蒜雨濛濛。洞簫吹倚畫樓空。  
冷馬嘶風邊愁都在暮笳中。丹鳳城高烏叫月。白龍堆

又 邯鄲道中

趙國寒煙繞鹿車。曉星晴掛柳梢斜。叢臺何處問繁華。  
公子毬場爭蹴鞠。佳人繡閣鬪琵琶。祇餘秋草沒黃沙。

又 晚秋漫興

曉露生妍黑丑花。亂蟲鳴。軋木棉斜。棠梨霜葉赤如砂。真似客歸遺燕壘。儘容人占是鷗沙。柴門中有故侯家。

菩薩蠻 有贈

夜闌香汗羅衫薄。涼生枕簟人兒覺。欲去且遲遲。流連三伏時。妾家何處住。白廟西原路。鄉漫說溫柔。此鄉應可遊。

卜算子 憶夢

愁劇暫成眠。有夢輕如絮。醒後猶期會面難。何況天涯路。相見不禁歡。醒卻無尋處。但願年年在夢中。一世和郎住。

醜奴兒令 曉妝

曉風吹破流蘇暖。花滿香奩。蝶滿湘簾。拾起殘紅玉筍尖。未梳蟬鬢如雲壓。膏沐微沾。宮粉輕拈。十樣新眉懶去添。

又 閨思

遠山染黛簾初捲。新月微籠。薄霧輕籠。只許巫山入夢中。  
曉妝惆悵無人見。杏樣衫紅。茜樣鞋紅。半臂殷勤護守宮。

又 惜別

多情一向真癡絕。范蠡湖邊。西子湖邊。兩地相逢再世緣。  
別時杯酒澆何處。夜合花前。芍藥花前。獨自悲歡若箇憐。  
芍藥花一名將離

減字木蘭花 夏日雜詠

幽蘭欲吐。移進闌干看愈嫵。散髮當風。上有千尋綠蔭濃。  
納涼池閣。林影波中魚戲樂。芳餌剛垂。一尺黃魚上釣絲。

又 初夏放舟郭外

垂垂紫棟。四月江心頻點燕。亭館誰家。天棘抽條出屋斜。  
輕舸不穩。移向伍塘風力緊。晴日將西。黃犢江村水一犁。

又 春暮

晚飄紅雨。吹亂薔薇啼杜宇。綠樹新陰。中有青樓惜別心。  
湘簾半落。細聽呢喃催繡箔。心事誰傳。傳語鸚哥當錦箋。

又 清和晝涼釀陰不雨小詞志憶二調

籀龍抽綠。兩部笙簧池上續。猩染薔薇。雪壓醅醑蝶亂飛。  
半牀絃管。櫻筍風光過小滿。最憶清娛。釣具茶槍寄五湖。  
陰晴堪畫。修竹清風鄰可借。紅藥初開。青雀油幢載酒來。  
舊游如夢。柳絮黏泥飛不動。好語花卿。何滿休彈第一聲。

謁金門 寫別

多情種。別後淚痕潮湧。綺戶海棠春雨重。芳心愁自捧。  
花也和人爭寵。腸斷錦衾孤擁。小字紅箋誰與送。相思看筆冢。

好事近 送客北遊

斯世少英雄。應笑成名豎子。衰草夕陽彌望。弔金元遺壘。  
霜橋孤月照空囊。枯樹

亂鴉起。旅館蕪菁低照。讀數行殘史。

又 夷門書屋

在虎邱鐵花菴

舴艋泛溪花。流水一灣堪泊。古木撐雲溜雨。似垂髯猿獍。山中日盡已忘年。展卷代行樂。短簿祠前歸去。見紫薇花落。

憶秦娥 戲和

垂珠幕。羅裙怕引狂風惡。狂風惡。畫樓深處。是誰輕薄。帳兒偎倚星兒落。莫驚犬吠金鈴索。金鈴索。饒他夜靜。有人知覺。

又 冬感

殘霞沒。險糜凍黑西風突。西風突。怪鴟悲嘯。一天霜月。啣杯慷慨冠衝髮。古今人物都消歇。都消歇。陰房鬼火。戰場枯骨。

又 傷逝

東君惡。好花未足風先落。風先落。啼猿兩岸。峽雲飄泊。問天搔首天疑錯。無端玉

樹塵埋卻。塵埋卻。諸公皆在。斯人不作。

清平樂 閨詞

眉痕頻皺。不似東風舊。欺盡孤眠寒更透。生得腰肢元瘦。梨花靜掩長門。尋常過幾黃昏。魂向當初銷盡。如何又說銷魂。

又 隔船卻寄爲澹心賦和韻

輕衫雪皎。穩稱身材小。隔水秋波頻送巧。勾引相思難了。柳枝插入楊枝。故人青眼修眉。對面盈盈不語。渾疑暗憶當時。

又 答澹心

故人何處。居傍要離墓。滕六翦花濃似絮。練鵲巧穿林去。翩翩鶴氅羊裘。羨伊才子風流。試種疏梅繞屋。暮年端傲封侯。

甘草子 春情

春暮。曉霧空濛。認作絲絲雨。侍女醒扶頭。釵墜驚鸚鵡。百尺遊絲輕舉。空冒住、梨



花難吐。喚起朝朝枕邊語。恨多情如許。

阮郎歸 寒村漫興

澗流傳響聚沙紅。海雲城角濃。征途肅肅繞寒風。霜花催曉鴻。

枌樹底。荻花東。遠

村詩畫中。虎頭老手輞川翁。知他同不同。

錦堂春 清涼寺掃葉上人山樓

如練澄江東瀉。春鋤舞雪蒙茸。倚樓遙見迎潮燕。飛趁片帆風。

楚蜀烟波不斷。齊

梁佳麗都空。山僧不識興亡感。閒數落花紅。

朝中措 龍潭驛懷舊

驚濤吹簸老龍愁。暮雨且停驂。紅樹斜分建業。青山多在江南。

遠檣排漢。亂帆擊

汰。百尺空潭。一曲涓城歌罷。酒樓誰是何戡。

又 東于小憩

平沙水漫暮潮通。亞竹野桃紅。燕子國中佳日。白鷗社裏東風。

干將故里。避喧剗

跡。斗酒過從。錯字休教鐵鑄。來尋三泖漁翁。

山花子 秋晚

黃蝶尋花褪薄衣。槐陰吹老漏斜暉。紅棗掛枝秋已熟。打應稀。不斷雁聲和月叫。重驚鴉宿帶霜飛。田有香秔園有菊。幾時歸。

柳梢青 春閨

昨日清明。桃花紅浪。做出多情。帶恨黏愁。無端惹住。一點春鶯。東風難雨難晴。看又過。殘花亂鶯。酒伴關心。燈前偷淚。撩亂銀箏。

西江月 題玄真子浮家泛宅圖和韻

有客漁焉終老。惟君賜者爲家。釣竿茶竈隔船紗。攜去隨潮上下。水口紅桃流散。山前白鷺飛斜。風波惡處舞神鴉。笑捲青蓑歸罷。

又 歸真

一枕微侵雲鬢。三更方卸鞋弓。解衣瞥見舞裙紅。何事挑燈相送。會逐曉雲俱散。

魂隨春絮常通。鴛鴦睡醒畫樓空。枉做人間癡夢。

又 和壁間韻

白日難教東下。清淮肯使西流。春風吹罷又驚秋。早嘆朱顏非舊。  
烏巷家家王謝。黃初字字徐劉。荒榛鬼火北邙頭。誰是諸公之後。

又 景陽樓

絲管競調玉樹。麝酥暗墜金鈿。酒酣狎客劈紅箋。受用佳人捧硯。  
盡道無愁天子。還疑有劫神仙。景陽鐘罷最堪憐。井上胭脂零亂。

又 隋苑

別殿珠簾夜月。長堤御柳春風。繁華三十六離宮。鈿合同心誰送。  
龍舸方遊汴水。狼煙旋報京東。錦衾纔與夢兒同。轉眼迷樓是夢。

又 詠懷

麈筆久陪南苑。含香近侍西清。春風淡沲夢江城。賀監湖光似鏡。  
白髮衰年易過。

黃金大藥難成。病坊早已屬先生。誰道文園渴更。

少年遊 東友

故園春到弄芳菲。人靜落紅稀。柳岸漁汀。風來水面。鷓鴣一雙飛。  
柳東丙舍宵聞  
鶴瀟灑。芰荷衣。鱸膾烘鹽。蓴羹雜鼓。何負季鷹歸。

醉花陰 春景

烘桃熨柳春方縱。紅雨花梢重。風日近清明。幾片榆錢。都算鶯兒俸。  
冷煙堆徑和  
誰共。苔補閒階空。杜宇莫頻啼。不喚人歸。只喚三更夢。

南歌子 西湖夜汎

鏡展嬌如雪。衫輕怯受風。薄陰偏覺鬢絲濃。獨喜清秋無暑。畫船空。  
頻勸杯中綠。  
微添酒後紅。銀箏一曲手玲瓏。見有檀痕低招。印酥胸。

雙調望江南 秋暮

秋欲暮。江水盡生涼。鷗浴似添濤外雪。林疏微映菊前黃。材屋日恆長。  
初刈穫。杭

糝半登場。斲起肥螯宜買醉。甕傾新酒遠聞香。一笑舉杯觴。

浪淘沙

戊寅十二月二日過智月禪院時冬燠紅梅盛開

喚渡近衡門。信步南村。薄綿今日覺微溫。梅染胭脂先破臘。伴佛黃昏。冷淡許誰論。菜甲篁孫。逢僧閒話半無根。斜日一簾當戶捲。曝取朝暾。

又 上巳

送暖曉來風。春信微通。滿城芳草暮愁中。寒食纔過宮柳暗。烟樹朦朧。杜曲踏芳叢。有箇人同。盤龍繡領御溝東。日落河橋歸路晚。嘶斷花驄。

又 甲辰寒夜遇同館周文夏侍御於虎邱步月

松影繞迴塘。小閣焚香。可中亭外月如霜。劍氣渾疑衝靜夜。一片寒光。落葉打虛廊。僧夢方長。排空叫雁也成行。容我五湖隨范蠡。烟雨鳴榔。

鷓鴣天 送客之金陵

羅綺香殘舊院空。石城橋畔掛晴虹。柔情常在琴心裏。別意難消燭淚中。江水白。

落花紅。小樓山色六朝同。莫愁家近頻來往。蘭槳輕隨燕子風。

又 野塘卽事

蟹舍雞棲共一椽。千竿修竹弄晴煙。鳥聲都在征顰外。兵氣猶纏大角邊。書案淨。雜花妍。種魚栽藕野塘偏。木香吹雪人間坐。讀罷莊生駢拇篇。

又 新秋

蟾影新鉤破碧天。嫩涼池館日如年。三分鶯舌紅蕉上。萬顆鮫珠白藕邊。愁夢斷。薄情牽。鴛鴦債已了前緣。一聲蟋蟀梧桐雨。冰簟風清穩晝眠。

又 午日京邸感懷

太液菖蒲汎酒時。賜衣唯有近臣知。銀盤郁李登公讌。丹砌戎葵映屈卮。傾鑿落。和參差。楚江風咽大招辭。攀髯未解烏號痛。續命虛傳五色絲。

又 秋邸二調

草綠閒庭曉露清。棗紅簷角媚秋晴。鸚哥簾底頻頻喚。鴉舅階前細細生。銅箭靜。

石牀平。游仙不與換公卿。櫻鞋筩笠蛇條杖。好向緱山頂上行。  
牆缺城西望翠微。東鄰槐柳是耶非。簷條新接龍鬚老。園甲纔抽馬齒肥。  
露方晞。揉藍按紫劇芳菲。秋蟲巧變黃蝴蝶。也學鷓鴣一樣飛。  
花正好。

又 雪意

漠漠重雲足四垂。紙窗風靜覺輕吹。水仙怕凍先遮箔。田芋思煨待舉卮。  
前有句。好吟詩。安排險韻寫瓊枝。呼童急往前村去。趁此泥乾認酒旗。

又 冬日小集

赤葉樓頭好醉看。高歌一曲笑彈冠。剖香橘柚吳姬手。撮細蒲萄燕市盤。  
紅袖側。易爲歡。多情莫厭酒杯殘。惟耽杜牧風流句。不點明犀也辟寒。

又 重陽

節屆重陽覺薄涼。閉門消得一杯漿。繞籬菊賤先開紫。食稻螯肥漸有黃。  
城角下。小亭荒。芟夷秋草受秋陽。登高不用茱萸袋。自有奚奴舊錦囊。

虞美人 村居

綠楊青草春生處。疑有高人住。芒鞋不惜破蒼苔。爲看彈棋日日倩筇來。依稀避世桃源僻。城市何曾識。茅廬也有客爲鄰。剛是半移耕叟半漁人。

又 新秋風仙一名女兒花

粉牆雨溼生青草。乳燕秋重老。鴨爐灰冷篆煙微。愁見碧紗如水亂螢飛。暮蟬不住吟疏柳。閒放彈箏手。空階風裊一枝斜。偏是女兒花對斷腸花。

又 有贈

輕衫窄袖身材小。影向銀燈好。珠歌勸飲度清圓。無奈尊前侍立暗生憐。牡丹亭榭花如繡。巧對紅兒瘦。初開豆蔻尙含春。轉是五更風雨會愁人。

又 歸興寄郁光伯廷尉周質菴侍御

草堂修竹猶無恙。綠淨溪痕漲。春來小雨課耰鋤。閒向梅花香裏讀殘書。鄰家芳榭餘烟草。紅葉階如掃。君恩肯許逐臣歸。昨夜夢中先到舊漁磯。



又 酬澹心見贈

紙窗毳衲烏皮几。石氣涼於水。牆東避世慣尋僧。攜得一枝邛杖過金陵。江潭衰柳黏霜薄。遙歎宮槐落。風波惡處度年華。憑著鐵船湖海作生涯。

木蘭花令 秋憶

木瓜香遍鍾山道。桂子倩人斜插帽。歌搖朱雀桁前花。酒濺烏衣堂下草。十年浪跡浮雲杏。畫檻生煙無客到。沙家零落寇家貧。若箇琵琶傳賀老。

又 送客南還

輕裝破浪衝天塹。醉裏吳鉤看不厭。催人兩鬢是雙丸。伴汝孤帆惟一劍。五湖煙景從今占。欸乃蓮歌游女豔。縱令珠履曳侯門。只抵黃梁眠客店。

又 己亥中秋京邸懷舊 戊戌中秋客維揚次六一居士韻

平山堂外青螺闊。廿四橋邊流水咽。無端擊筑動悲歌。俠骨難教脂粉抹。啣杯仰視浮雲滑。搖筆堪追秋興八。蕪城煙景不勝愁。舞帳牽蘿空夜月。

又 秋暮旅懷再用前韻

馬蹄踏遍平沙闊。別院時聞笙管咽。霜前白雁已南飛。潑墨愁看鴉陣抹。紅槽滴酒真珠滑。炊熟黃粱尋衛八。風吹殘柳碧星稀。門外轆轤鳴曉月。

又 金魚池 三用前韻

虬松碧瓦雲邊闊。堤上鳴泉流且咽。胭脂兩鬢鬪新妝。纈髓尤憐眉際抹。臨池綺席壺觴滑。公子遨遊溝丈八。琵琶少婦鬧紅樓。箇箇酥胸斜抱月。

又 寄松之 四用前韻

回頭吳楚風煙闊。離思渾如枯澗咽。東華撲面軟塵多。慚愧何郎連汗抹。萼羹羨爾沾唇滑。作者七人今有八。垂虹秋色最關情。知向長橋看串月。吳下風俗月夕遙看長橋月影其形如串故名

步蟾宮 秋意

木犀香吐金英細。碧水畔、金風如洗。高樓一夜對嬋娟。髣髴在、廣寒宮裏。疏風淡

漢無纖膩。坐漸覺露華微泚。蘋桐葉底鬪鷓鴣。空攪亂、花陰滿地。

南鄉子 初夏

浴水燕飛忙。門外長溪碧繞塘。柳暗柴門遮屋角。鄰牆。又見梧陰過草堂。風動落花涼。樹樹新濃罩曲房。中有鳥巢渾不見。鶯藏。爲乳雙雛覺晝長。

又 冬曉

鸚鵡懶梳翎。巧學人間喚小名。昨夜臘梅花凍了。零星。纖手敲冰出膽瓶。初旭暖芳屏。卷幔重重酒半醒。枕上高吟詩句好。消停。惹得鴉鬟閣繡聽。

又 春情

酒病中春朝。頰暈檳榔醉未消。手簡龍團吹活火。頻燒。茶竈輕翻蟹眼潮。多事在今宵。淡寫青山半幅綃。付與紅兒收貯了。偏嬌。銀甲調成和紫簫。

又 贈紅兒 河陽妓

停酒按紅牙。蘇合香濃掠鬢鴉。秋水模糊偏可惜。天斜。十五娉婷早破瓜。愁恨偏

天涯飛絮啼鶯是妾家。莫道胭脂開未足。驚誇卻占河陽一縣花。

又 送客還閩

閩海國南鄉。萬里歸程嶺樹荒。日落行人愁虎豹。蒼涼。惱殺杉雞報夕陽。結客賸詩囊。古劍芒鞋鐵襠。如火炎風蒸荔熟。甘香飽噉晶盤十八孃。

醉落魄 春暮村居

鼠姑纔落。香浮小徑抽紅藥。時過穀雨春陰薄。紫棟翻風。一燕池邊掠。孤村莫怪門羅雀。掀髯長嘯甘藜藿。來牟豌豆供杯勺。托興羲皇。爲我辭蝸角。

踏莎行 惜別

一夜如年。兩眉空嫵。臨妝怕見愁痕鎖。東流還有再回時。忍教永別歸黃土。彩鳳難飛。靈犀自吐。鴛鴦瓦缺漳臺古。夢中紅淚萬千行。醒來都是桃花雨。

又 春景

翠染晴嵐。藍拖曲水。雕鞍日傍垂楊繫。金魚池上賣花天。探春如雪丁香紫。別院

搗箏小亭浮蠟。畫樓歌管雲中起。錦繩高掛粉牆低。落紅都在鞦韆裏。

又 長安秋思三調

碣石岩曉。崆峒突兀。龍蟠鳳翥圍宮闕。毗盧閣上望神州。人煙九點青如髮。北海

壺觴。西城鞋襪。薊門斗酒狂歌發。金元戰壘草黏天。黃沙萬里懸秋月。報國寺毗盧

閣最高

舟比黃龍。船名青雀。相傳萬曆年間作。水嬉一試起狂風。牙檣錦纜今零落。菡萏

秋殘。菱蒲雨弱。橋邊玉板猶如昨。釵釧繡蝕舊妝臺。行人錯擬臨春閣。有遼后梳妝

臺遺址

漢時松青。秦關月白。居庸山翠浮千尺。皂鵬風勁起摩雲。寒霜欲變秋林赤。不律  
吟孤。叵羅愁釋。酣眠且看長安弈。城頭一夜動悲笳。離腸早斷江南客。

小重山 寄訊戲和友沂

並翅文鴛疊錦茵。倚闌聞一嘆。爲何人。眉痕愁鎖遠山顰。春風悄。無緒喚眞眞。綺

陌漾芳塵。步搖欹綠鬢。舞衫新。穿花癡蝶露全身。羅裙褪。自有暗香親。

臨江仙 有贈

可怪儂家香不散。吳衫到處提攜。我方擬似恐難齊。自然真味在。芳麝正填臍。又  
是碧雲纔一挽。鵝鬢壓耳猶低。遙知年可及垂筇。春宵經夜雨。未解作悲啼。

又 劉墨仙移榻梅花菴用錢爾斐韻簡寄

君在梅花和尙墓。想應讓與君龕。梅花栽在墓之南。老僧消受得。日日誦華嚴。快  
聚夜深愁客散。惟留月影空潭。曉來臥看壁頭山。惜花乎病酒。乃似再眠蠶。

又 初夏清溪閒泛

十畝之間新霽色。愛看桑者閑閑。扁舟歇處野蒿繁。小橋蝌蚪黑。急水隊魚斑。我  
羨村家風味美。翛然茅屋三間。柳陰泥溼麥泥乾。曉鶯新識路。飛去又飛還。

又 湖上遇游客漫賦

問是誰家游冶子。風流真箇無雙。兩行紅袖對銀釭。千金全不惜。春色果難降。慢

卷湖船憐小鳳。山眉引入高窗。偷攜鸚鵡浴平江。玉鉤藏細柳。記奏隴西腔。

又 寄西湖友人

萬疊玻璃開曉鏡。畫橈隨處堪停。杏花村渚倚紅亭。遠山平仲綠。幽徑寄奴青。學士橋邊晞髮嘯。扶筇應到南屏。鶯啼深柳待同聽。仙人吹鐵笛。小妓索銀餅。

又 金灘寒夕

疏柳寒村聞暮角。牙檣不駭閒鷗。雁聲低度水邊樓。冰紋烘雀瓦。雪片壓羊裘。畫省爐烟猶在眼。故人詩酒綢繆。檀槽玉軫劇風流。周郎能顧曲。平子也銷愁。

又 贈僧

曾向山中消日月。飽看竹翠楓丹。馴猿守洞虎登壇。地爐燒鴨脚。晴葉焙龍團。偶到人間持鉢坐。粥魚聲繞空灘。浮生彈指悟邯鄲。孤筇衝積雪。百衲護春寒。

蝶戀花 題茜溪齋壁

小小荒廬圍綠水。門外清陰。近水栽桃李。古道不須留姓氏。負薪識是鄰家子。笑

問鄰童曾識汝。屈指東邊著。第三家。是一擔束芻挑乍起。晚炊煙出茅簷裏。

又 秋暮

一把黃茅新蓋屋。簷角低低。爲避西風肅。欲向東籬重繫菊。荒園斫得湘君竹。蟋蟀寒吟聲不足。楓樹垂丹。還有些兒綠。九月霜痕融似玉。空階迸下紅榴肉。

又 夜憶

紙帳高懸燈影細。人遠如天。欲會愁無計。煩惱何心溫繡被。今宵好夢偏迴避。瑞腦生香留半臂。別恨年年。悔解愁滋味。多是生前相絆繫。絞綃不盡相思淚。

又 阜城驛

曲岸迴波迷白草。皂帽青驪。躑躅燕南道。茆店重來人已老。滿庭榭葉隨風掃。淡日寒雲投宿早。鄰院清砧。幾處心如擣。簪筆鳴珂春夢杳。悲笳古堠霜天曉。

又 臨洛關夜宿

破壁匡牀眠自妥。濁酒頻沾。頰卵堆霜果。屈戍青苔門不鎖。棧邊分照蕪菁火。應



有征人嘲飯顆。憔悴中年。生計渾相左。弔灑哀沙多坎坷。訴天寒月休欺我。

又 將發廣陵留別穆倩于皇無言

驪唱催人秋未暮。兩鬢霜華。祇爲浮名誤。三五嬋娟垂白露。一鞭竟別揚州去。尊  
酒猶思良夜聚。小店晨雞。月落餘煙樹。回指紅橋堤畔路。油幢烏榜年年度。

唐多令 夏夜客齋

紈扇動微吟。湘簾草色深。苧衫涼、鉤月初臨。撲起流螢過別院。曾照見、女兒心。風  
壁響清琴。銀蟬送晚林。算青樓、露氣蕭森。白面誰家年少客。些箇事、會相尋。

一翦梅 理繡

篋開五色上衣裳。抽引針長。抽引絲長。養娘新配淺深妝。紅處思量。白處思量。多  
情已戒繡鴛鴦。蜂又雙雙。蝶又雙雙。誰描花樣使人傷。並蒂蘭房。並葍蓮房。

又 風情

春濃畫閣下簾鉤。人在青樓。書在紅樓。誰將芳草字忘憂。花已含愁。酒更添愁。淒

涼無絡擘篁篔。病似殘秋。夢斷長秋。蕭郎離恨托詞頭。寫怨梁州。入破甘州。

漁家傲

秋日過村家小集子舊鄰也

紅蓼灘邊頻弄槳。農家舴艋如錢盎。郭外清溪流更廣。時蕩漾。船輕不怕黏天浪。欸乃一聲何處唱。我來茅屋開新釀。柴關烏柏遙相向。雞黍餉。月明已掛霜篷上。

又

秋日遣懷

八月秋晴剛過半。欲招桂馥因牽幔。晴日不寒還不暖。鴻新見。爲尋舊渚頻頻喚。近繞低垣遮客館。輕黃蝴蝶隨人散。飄墜梧桐花砌亂。閒尋看。菊英欲吐東籬畔。

蘇幕遮

詠香

蕪芳臍。烹瑞腦。染著衫襟。緊伴人昏曉。一點檀心難索討。夢醒更深。越覺添煩惱。潤能薰。潮頓燥。著定宮闈。蘭麝宜頻擣。縷縷微煙纏不了。透盡孤眠。誰更知他好。

又

嘯臺懷古

百泉清。叢檜碧。風卷虬枝。箕踞依頑石。迤邐太行疏乳液。中有高人。俯仰尋遺跡。

晉公和曾卜宅。明哲全生。寒暑陶然適。半嶺嘯聲驚木客。阮屐嵇琴。此輩無容責。

又 全椒道中

冷風尖。殘月小。野徑高低。刺眼橫蒼篠。茆店孤村偏起早。偷與閒鷗。靜立寒汀皎。策輕車。攜布帽。客路年年。短鬢霜深了。江滸青山屏障繞。煙柳無情。斷送人昏曉。

風中柳 用劉靜修韻寄友

欲問高人久矣。寄情巖谷。問饕飧。閉門常足。呼童洗竹。艤船尋菊。有餘錢。買花葺屋。古樹當廬。常照襟裾生綠。慣棲禽。日來尤熟。歌聲類曲。缶聲類筑。算詩才。是今名宿。

行香子 構屋水濱喜而賦此

小小疏椽。碧水經前。每臨溪。匹練紅牽。蒹葭十畝。儘受荒煙。有采菱橈。沽酒渡。釣魚船。野漲無邊。樹影森然。數游鱗。傍岸流連。更誰貌得。晉唐宋間。請顧長康。吳道子。李龍眠。

青玉案 冬暮曉發

霜餘淨碾遙天碧。聽落葉、鳴虛磧。疏樹倦鴉寒影隻。今朝纔見，瘦筠斜處，露出梅花白。敝裘補綻年年客。駿馬春衫復何益。五柳淒清陶令宅。黃河風雪，滎陽戰壘，驢背思疇昔。

又 訪蔣存魯南湖園居

寒汀細雨鶉鷓喚。維小艇、蘆花畔。堂下殘荷香已斷。竹都消粉，梅纔破蠟，紙帳垂銀蒜。幽人詩興偏淩亂。清絕林塘寄柔翰。秋水南華供把翫。公和解笑，步兵解哭，懶解嵇生鍛。

江城子 偶憶

狹邪深處暗香浮。暫淹留。典鷄裘。歌板輕圓，攜上木蘭舟。樺燭紅衫私語密，花底屐，柳邊樓。一天征雁喚離愁。淚應流。爲傷秋。梧葉銀牀，霜氣入簾鉤。偏惱麗譙銅箭急。殘夢醒，在心頭。

又 東友近況

御溝流碧水初融。鳳城東。海棠紅。韋相祠前。曲檻繫花驄。星散昔年童冠侶。時追憶。舞雩風。半生都在別離中。綠尊空。臙衰翁。槐里知交。無字與歸鴻。笠澤春波寬似海。明月底。下魚筒。

千秋歲 夏日題壁

池塘清思。菡萏紅生膩。涼正嫩。人初起。榴殘猶灼火。竹穉齊搖翠。聞巧哢。畫眉能攪。西堂睡。柏子抽煙細。蟹眼潮剛沸。時坐臥。濃陰底。屐黏苔蘚暈。衣惹醪醲刺。還生受。桃笙簟滑涼於水。

又 題袁重其侍母弄孫圖

硯田堪飽。卻比菑畬好。滌滌具。斑衣遶。海中仙果熟。雪裏青山老。娛白髮。麻姑麟脯。安期棗。堂上孫常抱。反哺同烏鳥。貧亦樂。仁爲寶。弄壘休寫錯。懷橘應歸早。請所與。洗兒錢付西鄰媪。

離亭燕 詠燕

記得杏園新放。社日近時來訪。尋着舊巢思度歲。早已香泥零蕩。芹渚柳花村。獨自飛飛凝望。繫足紅綃無恙。驀有離情別狀。王謝人家剛廢盡。欲入烏衣惆悵。失路巧呢喃。唯有落花依傍。

隔浦蓮 藻玉軒晚集 戊戌六月初六日同韻初有芮較書度曲

疏楊低映池小。故折迴廊巧。木榻當蕉扇。矮石畔閒花草。荷葉抽清沼。香風到。竹裏閒雲遶。清尊倒。松醪餽飪。桓公寒具不少。主人絃管。歌板十分清妙。斜抱琵琶拍掌笑。排調。遠山螺黛誰掃。

河滿子 春思

新柳輕翻淺浪。春波易皺微風。池閣薄陰融曉景。晴霞已射簾櫳。小徑愁聞夜雨。拾來數點殘紅。又被幽禽低喚。鴨爐香篆濛濛。斜倚繡牀眉未畫。十分針指玲瓏。愁入芭蕉心裏。情通荳蔻函中。

風入松 春日虎邱書所見

東風不吝冶遊天。滿路擲榆錢。春衫一隊尋花去。是誰人、撇下釵鈿。獨有紫衣年少，畫圖無此神仙。侍兒垂手復齊肩。真個欲魂牽。珠簾半面驚微露，爲嬌羞、越覺纏綿。恨殺輕羅勝我，時時貼細腰邊。

又 寄侯官許有介

風波無恙且歸耕。閩嶠正秋清。徑邊松菊纏芳草，春常在、南國霜輕。荔子紅垂古驛，榕陰綠滿重城。閑尊烏石聽啼鶯。瀚海暮潮平。丹青已擅雞林價，鍾王法、當代知名。高興西園公子，安貧東郭先生。烏石山名

又 吳彥高詞云玉堂金馬竹籬茅舍總是無心處感其言有作

朝曦初上綺疏紅。搖竹一簾風。草堂詞好丹黃竟，添幽思、簷馬丁東。解語人如鸚鵡，驚秋客似梧桐。半生春夢此山翁。無悶度窮通。浮名真個波中絮，隨流水、轉眼成空。金馬玉堂以後，竹籬茅舍之中。

又 大輿上人四十有贈

天寧寺裏老藤枝。雲板放參遲。南湖煙水浮千頃，疏楞畔、梧篠參差。塵尾能談五覺，擲頭同訪三支。身輕唯許瘦筇知。僧臘正強時。閒燒柏子香成篆，迦文外、儒墨兼師。自愧石渠枯管，來賡松閣新詩。

御街行 春遊

牆邊桃靨晴微逗。楊柳弱枝垂瘦。平郊花草逐人香，都是黃蔬青豆。誰家少婦，踏青歸去，不省釵鈿溜。無情嫩綠江邊鬪。喚起迭翻新奏。暖風引出汗微香，沾上遊春衫袖。怪他江水，晴波有暈，似學眉兒皺。

金人捧露盤 黃金臺懷古

薊門旁。風雪暮。掠烏鳶。莽平皋。衰柳凝煙。千金市駿，烏騅紫燕，鐵連錢。功名汗馬，騁騏驥，萬里揚鞭。緬遺蹤，如奔電。撫易水，弔幽燕。但鴉栖，鹿走狐穿。望諸已矣，昭王舊跡夕陽邊。興亡何限，荒臺畔，春草年年。



驀山溪 歌席

朱唇檀板。宛轉歌微度。四座靜無聲。聽一線、清音獨譜。羊羔美酒。自分不如他。銀箏小。玉簫低。生受紅燈暮。細評音字。無有遺腔句。緩急手能調。按新詞、微收雁柱。內家妝束。不用隔簾櫳。瓠犀白。筍痕纖。值得周郎顧。

又 述懷用宋謙父原韻

八甌移日。人道先生懶。載筆立螭坳。曾叨賜、上方杯椀。昨非今是。松菊待歸輪。辭虎觀。問魚舠。歇浦煙波滿。東臬藝黍。棘匕胡麻飯。二仲徑初開。棹角里、舊鄰傳盞。老農老圃。對酒偶成詩。衝口出。話家常。奚取乎斑管。

千秋歲引 警悟

囊底枯螢。簷頭乾鵲。辛苦功名亦何樂。饒他虎氣。今爲鼠。儘教龍蟄。猶如蠖。賣漿家。販繒市。多寥落。私羨尙平登五嶽。何用季心矜一諾。今古英豪。總蕭索。東華軟塵。劇奔走。北邙枯冢。終栖託。猛回頭。上蔡犬。華亭鶴。

洞仙歌 豔集戊戌六月初二日集孫頴初年兄園亭聽諸女郎度曲

雨黏莎徑。做新涼池館。低唱頻斟莫辭滿。擁紅衫烏鬢。倚暖偎香。稱長短。各許玉環飛燕。燈前留意處。隊隊繁箏。急管輕圓絡珠串。燭影動荷風。繞樹流螢。纔數點。偏照鈿蟬金雁。但雕闌畫閣醉相尋。爲粉黛消磨。壯心都減。

又 曉過鶯脰湖

悲涼屈宋。重過吳江道。小市魚蝦鬧清曉。想蛟龍睡穩。千頃晴瀾。風色好。霜後白蘋花老。角巾還故土。煙月誰爭。一葦淩波勝蓬島。茶竈筆牀。隨意具呼取樵青。芼蓴絲。濁醪須倒。看雙丸寒暑織如梭。羨湖笛漁榔。白頭翁媪。

華胥引 蝶夢

婆娑金馬。轉盼虛空。夢中蝴蝶。燕趙佳人。良宵綺席。假粉靨。書生潦倒。名場薄命。元同妾。還我漁磯去。題江上紅葉。細雨青蓑。狎波濤。鷺交鷗接。舒卷閒雲。生疏五陵豪俠。東觀殘書猶在。偶翻行篋。魴鯉家鄉。歸來無用彈鋏。

滿江紅 江村

柳浪方高。桃花雨、一村都漲。應自慰、春風未老，故園無恙。籬筍新抽江燕出，蘆芽半捲河豚上。豆畦邊、薺美采盈筐。東鄰餉。柴門外、微波漾。芳樹杪、時禽唱。好邀來春社。細斟家釀。歡喜兒童鴨脚果。逍遙父老蛇條杖。恕余頑、醉後越癡狂。真無狀。

又 王西樵考功見和江村詞用前韻示孫無言

新綠江村。陰陰與、溪流爭漲。煩寄訊、竹平安否。至今無恙。初見栗留穿柳去，忽驚松鼠緣藤上。正春深、穀雨焙槍旗。山僧餉。難消遣、情搖漾。蠻姬舞。秦青唱。正蒲萄濃潑。春波如釀。試向花前移玉案。休思閣裏燃藜杖。念平生、一枕夢悲歡。他年狀。

又 湖上書懷再東西樵考功阮亭祠部

飛絮漫天。平隄外、亂萍初漲。人似燕、重來湖海。畫梁無恙。風雅競推東閣妙。文章每說西京上。細論詩、若箇過牆頭。松醪餉。曾踏險、瞿唐漾。纔會意、滄浪唱。但銀瓶索飲。醪醑佳釀。五岳未周名士屐。百錢常掛山人杖。奈此君、不惠不夷間。難於狀。

又 酬西樵再和

萬馬齊奔。親曾見。廣陵濤漲。攄幽憤。有書自白。文通無恙。鳩鵲觀前垂翅去。茱萸灣口乘潮上。問東吳。一飯與王孫。何人餉。看遊戲。羣鷗漾。聽欸乃。漁舟唱。儘鞭霆掣電。憑天醞釀。丹竈前生應煉藥。青山今日同攜杖。醉來扶。畫手倩誰能。僧繇狀。

又 湖上卽景同王西樵賦柬宋荔裳

六一祠邊。槐火熱。石泉微漲。衣短後。來看西子。鏡奩無恙。簷瓦聲中山雨到。牆桑影底溪雲上。望湘湖。三月熟櫻桃。先貽餉。蘋浪蹙。蟲絲漾。薄薄酒。紅紅唱。說泥封柳貫。黃魚白釀。擬種綠蕉聊代楮。偶尋方竹裁成杖。憶此時。海市在登州。紛千狀。

又 同荔裳觀察西樵考功湖樓小坐困憶阮亭祠部

漂泊東南。空回首。鳳池春漲。家已破。逢人羞語。菊松無恙。餘齒偕歸江海畔。浮生幸脫刀礮上。君還有。請室斷葱來。高堂餉。天怒解。精魂漾。且嘯傲。閒賡唱。爲周郎而醉。不須傾釀。從此休焉蝸作舍。吾其衰矣鳩爲杖。見卯君。備說老夫窮。無佳狀。予與

荔裳西樵皆被奇禍得免

又湖上坐雨同西樵賦

藕葉鋪池。蒲如鏃。小橋青漲。孤山靜。詩人蛻後。猿饑鶴恙。鴨綠波浮楊柳外。猩紅暈染薔薇上。趁湖心。蓴菜滑凝脂。頻教餉。船載酒。亭邊漾。歌按拍。壚頭唱。愛梅花橫笛。梨花初釀。本色英雄能舞槩。支離遷客須扶杖。雨餘山也似美人愁。顰眉狀。

又東王西樵考功兼懷陳學山胡又弓王北山館丈

曉霧空濛。兩峯暗。灌叢煙漲。傷暮景。我心惓惓。癩憂以恙。老淚偷彈紅袖側。故人自在青霄上。記當年。殘臘一杯羹。殷勤餉。慈仁寺。輕衫漾。興誠院。瑤華唱。有灤州肥鯽。易州清釀。門對西山教拄笏。人辭東觀惟留杖。愧孤臣。編撰本無長。恭陳狀。

又乙巳午日宋旣庭見招汎蒲同陸處實姜西溟

佳節吳閩。渾不減。汨羅愁漲。爭弔屈。龍舟簫鼓。錦帆無恙。公子畫船官驛口。名倡羅綺江樓上。擁殘書。自有故交同。清尊餉。榴花影。杯中漾。競渡曲。筵前唱。正梅黃時。

節陰晴迭釀。山鬼漫矜明月珮。健人也曳菖蒲杖。祇浮生、憔悴泣枯魚。湘纍狀。

又 沈繹堂陸處實宋旣庭御之同集尤悔庵看雲草堂元韻次答 乙巳五月

初十日

雨壓戎葵。搖菡萏、曲橋波漲。東城僻、松聲竹籟。小亭無恙。虹影倒懸虛檻外。游蜂偶綴朱簾上。喜澄湖、網取白魚鮮。花前餉。二十載、空飄漾。離騷譜、聞新唱。且開襟送抱。醉君醇釀。愁見督郵寧束帶。共祈大耋爭攜杖。酒懷寬、矍鑠若翁哉。將軍狀。

又 卽席酬贈悔庵司李

長嘯登樓。望塞外、草枯沙漲。峯一柱、庾公高興。風霜無恙。綵筆雕龍官閣裏。短衣射虎邊亭上。鹿肩肥、匹馬入幽燕。承郵餉。山海抱、風塵漾。鶯粟奏、蠻童唱。在故鄉猶憶銀魚黍釀。肘後黃金元不換。斑衣跼進高堂杖。待畫師、頰上寫閒情。看雲狀。

又 酬贈旣庭兼示吳敬生兄弟

小宋才華。過八斗、墨池春漲。棕鞋健、來尋幽徑。草堂無恙。花影靜移清簾外。燕雛欲

出空梁上。況脯修、教授滿河汾。諸生餉。日氣薄。雲光漾。自疇昔。同酬唱。上禹陵梅市。繁箏妙釀。行止於今猶可共。烏皮几。與青藤杖。待微涼。攜手訪延陵。詎新狀。

又 卽席送同年沈繹堂入都兼懷汪千頃楊地一同展成旣庭賦

良夜傳觴。梅雨急。畫船衝漲。人南北。舊時金馬。蘭筋無恙。飲社向同枌梓畔。校書陪在鑿坡上。自休閒。吾土飽蓴鱸。遲相餉。看大纛。堤邊漾。聽邪許。河濱唱。更夷猶吳榜。甘醲淮釀。老伴玉堂今有幾。敢忘太乙當時杖。向知交。爲我道江潭。行吟狀。

又 同悔庵旣庭賦柬荔裳觀察

枕畔邯鄲。銅箭水。乍消隨漲。茫茫道。升沈倚伏。盧生無恙。歌舞終歸松柏下。釣竿好拂珊瑚上。去山中。服朮餌松花。羣仙餉。蓬島路。春潮漾。華胥國。鈞天唱。但蠶窩自蔽。蜜脾休釀。漢苑已分方朔酒。葛陂快擲壺公杖。想此生。夢覺總成空。無殊狀。

又 憶西樵湖上兼寄阮亭同展成旣庭賦

託契湖山。撐釣艇。鯉魚風漲。吾與汝。尉羅纜出。角巾無恙。半臂不須遺客坐。鷗夷每

恨浮江上。在詞場、少日早分鑣。牛心餉。見三竺、煙霞漾。聞二謝、壘篴唱。鬧竹西歌吹。名香異釀。且醉河東白。墮酒去扶槐。里轅公杖。古來稱名士。濟南多。崢嶸狀。

又 展成既庭雨中見示新詞用原韻奉答

五月園林。枇杷熟。雨肥雲漲。莽迴顧。闔廬千載。山川無恙。我自江湖慊以慨。君方顏謝。凌而上。好詞頭。百琲夜珠圓。爭來餉。風片細。飛花漾。蝶閒過。鶯孤唱。借一觴。一詠。侑之名釀。嬾似嵇生林下鍛。老思靈壽山中杖。賸驚魂。前路有誰憐。髡鉗狀。

又 春景

欲問春情。嫌太薄。真如一紙。妝點出。飛花亂墜。遊絲頻徙。江燕不嗔園舍小。雛鶯亦愛池亭美。草堂前。聊可貯閒情。裁蘅芷。江梅蒂。將殘矣。紅杏萼。方開耳。有香能飼蝶。瓣堪供蟻。聽鳥林間杯在手。踏青郭外。錫膠齒。有時豪。置酒擁紅妝。忙珠履。

又 穀日放舟入南湖

春水平添。放遠碧。捲簾高坐。南湖畔。夜深燈火。打魚相課。塔望真如惟一點。樓名煙



雨微留個。正晴明、穀日應祈年。人人賀。鴉似墨。林間簸。柳似醉。堤邊臥。漸春融氣。靄日高雲破。果是畫船如屋裏。江南風浪何曾大。倒醇醪。徹底發甘香。前年做。

又 冬日書懷

水面歸鴉。斜陽掛。遠村高木。嚴霜降。小園柑橘。鬱然浮綠。一匕青精朝作飯。百年烏柏寒依屋。竹添孫。箇箇拂雲梢。森如玉。林下步。溪頭宿。呼稚子。驅黃犢。把儲王幾首。田家詩讀。隱矣焉。文捐筆硯。嗒然喪我忘歌哭。撥孤燈。薄酒正相宜。新筍熟。

又 長安秋思

苑柳蕭疏。寒信早。清霜欲落。看塞北。飛鴻嗷嗷。亂雲漠漠。黑闥壘前鸞兔走。黃金臺畔蒼鷹掠。酒壚旁。擊筑者何人。悲風作。驅不散。簷間雀。招不下。天邊鶴。嘆江南秋色。芙蓉池閣。陶寫縱憑絲竹妙。公卿可比山林樂。鬢添星。空說玉階高。吟紅葉。

又 題梅庵小影和元韻二調

才子風流。聞乙夜。重瞳曾許。桃林塞。射生擊鹿。爲東道主。油幕憶觴孤竹月。紫騮厭

踏盧龍雨。且歸休。花徑更三三。堪遊處。雞豚社。吾能與。應劉讌。人延佇。羨歌場新拍。騷壇雄踞。裂石穿雲吹鐵笛。陳詩說禮。鼉鳴鼓。啜其醑。車畔有三騶。呼之語。老友相於。傷往事。江潭楊柳。同屈指。垂垂半百。昔童今叟。剪韭烹葵。諧夙約。嘲風弄月。誰稱首。五湖船。恰受兩三人。能攜否。莫閒卻。彈箏手。好絨着。懸河口。對門前。亭榭。梅妻鳩婦。生食何須求五鼎。雄心只合澆醇酒。笑封侯。絳灌巧乘時。元屠狗。

又 既庭見示小影用悔庵迴韻贈之

偶賦梅花。心似鐵。何妨綺語。生徒盛。參同考異。軒乎其鼓。芳草閒門通小徑。桐陰木榻容箕踞。詠停雲。無語送歸鴻。時凝佇。嵇阮約。曩曾與。用舍義。聊中處。歎餘生重見。屐拖殘雨。麴道人來稱上客。楮先生亦爲賓主。但劇腸。搜腎是文章。凌燕許。吳苑繁華。看年少。鬪雞走狗。君只辦。一編周易。三升清酒。重席早推名下士。色絲解識碑中婦。試尋春。花信趁鶯啼。橫塘口。伯樂相。由基手。問老宿。能兼否。更美人託興。蛾眉螭首。燕市唾壺招俠客。龍威探冊逢淵叟。好相期。歲歲繫蘭橈。胥江柳。

又 贈余澹心五十

詞賦翩翩全盛日。忝稱同調。留題徧、謝公別墅。蔣侯遺廟。風月遨遊。閒是主。文章支派。工於肖。倚紅衫。潑墨寫烏絲。聞狂叫。好去聽蘇門嘯。豈肯待金門詔。數少年儔侶。半登華要。早溺儒冠。棲笠澤。休尋丹藥。思壺嶠。爇爐煙。老更讀黃庭。觀其妙。槩兒湘簾。脩竹畔。雨絲煙瀟。平分卻。百年是醉。尙堪蠡飲。吳苑笙歌春未散。冶城禾黍秋還稔。羨冥鴻。高詠卜居篇。能詳審。江上汎花前寢。門可鍵。茶閒品。命樵青捧硯。含任吐沈。畫檝每停桃葉渡。彩毫也賦柗榴枕。待明年。乞爾蔡侯牋。江郎錦。澹心長余一歲

又 思隱和梅庵二調

我有荒廬。纔半畝。傍池漁舍。門插柳。擬陶自命也。稱林下。夏日籬邊開木槿。蠶時鄰圃分桑柘。到荷汀。六月曉風涼。來虛榭。鰲已釣。鵬曾射。東觀史。凌煙畫。纔勾消一筆。來投村社。故里春秋期共醉。戲場袍笏終須罷。試從今。踏破鏡湖天。官家借。

志在桑榆。靈雨後，星言夙駕。休更說、洛陽紙貴。文章膾炙。舊友應劉俱宿草。避人沮溺。惟耕稼。茂林邊、鶯語劇輕圓。如同話。松似冪藤爲架。蝸殼屋。魚鱗汶。覺此中全勝。玉堂休暇。偃蹇青衫空有淚。清狂白眼時遭罵。且都忘、獨酌看庭前。花開謝。

水調歌頭 野園卽景

簡僻辭城市。努力到東臬。塵喧不敢入耳。風日靜衡茅。傍屋新蒸紅柿。貼岸交垂青棟。暖旭上林梢。拄杖聲微響。有客到門敲。棘爲牆。書作枕。頗清高。隨心自有樂事。恩怨等鴻毛。高大王家臺榭。婉轉謝公絲竹。今日盡蓬蒿。飲酒栽花外。何物使神勞。

又 鶴湖書院懷舊 用東坡元韻

伍子塘如練。帆影沒晴空。使君舊築高閣。上接落霞紅。闌寂柳洲亭子。時聽漁舟欸。乃月出叫征鴻。煙起垂楊外。秋入碧梧中。更東望。雲間矗。九點峯。以文會友於此。荏苒各成翁。斗酒百篇揮灑。年少呼臬浮白。意氣儘豪雄。陵谷一朝改。鬱邑庶人風。

又 贈歌者

五月黃梅雨。鶯囀苧衫天。西園恰有新曲。雁柱瀉珠圓。初似奔泉決溜。又似小窗兒女。銀甲蹙鴟絃。紅粉圍香陣。花顫舞筵前。涼州調。渭城唱。劇堪憐。憐伊入破餘響。鐵馬鬪風煙。星散何戡歌板。灰冷寧王玉笛。腸斷舊姻緣。流落賀懷智。老大李延年。

又懷舊

螺黛凝煙髻。鴨綠膩春塘。相逢恰是麗景。橫笛嘹清商。素質休教粉污。自有天然標格。淡掃壽陽妝。醋醋猩裙豔。盼盼燕泥香。芹芽白。蘭芽紫。艤歸航。舊時舞榭。何處畫壁女蘿荒。草沒銀箏院落。苔長鳳鞋花徑。佳節倍思量。一百五寒食。七十二鴛鴦。

又別同館張爾成副使已八年癸卯冬訪之金灘署中留憩匝月長調志慨

杏苑驕珠勒。仙露賜金莖。紫駟並轡來往。意氣壓西京。朝罷委蛇退食。擬獻上林詞賦。深宵玉堂清。絳雪韋祠裏。樹底喚流鶯。十年事。晨星亂。怒潮生。君能憐我失路。永夜醉秦箏。屈指石渠儔侶。一霎升沈如夢。對酒獨盱衡。回望柯亭月。仍照綠槐明。

又題翁子霞梅花書屋圖

風日江村好。繞屋有梅花。閒來倚閣高望。山盡吐平沙。千尺喬松盤屈。三徑柴門靜掩。人道是仙家。幽澗歷冰雪。偏照影橫斜。紅藥院。紫薇省。漫矜誇。黃梁喚起癡夢。領受此煙霞。且辦隱囊沙帽。健在棕鞋。篋笠閒試六班茶。坐臥暗香裏。一笑讀南華。

滿庭芳 山憐

壁印狐蹤。林開鹿徑。山家真箇蕭條。樵歸一束。時帶蝟中毛。竈下莫愁薪爨。方纔拾。老柏枯蕉。常扃戶。晚間兔盡。饑虎正悲號。良宵。偏不出。倦支石枕。醉臥松梢。說好山無數。豈解尋敲。猶記十年前事。承平久。官稅都饒。妻孥食。有時無米。橡栗也常燒。

又 釣樂

釣墜蟾蜍。餌懸蜥蜴。佳詞構自奚囊。修綸一尺。獨繭下菱塘。借問魚蝦幾許。揚筐去。到處徜徉。生來性。直鉤可使。不上亦何妨。何妨。終日坐。紫藤花落。白荇花香。有船名舴艋。歌擬滄浪。八十礮溪野叟。名心在。出佐周皇。羊裘子。高山長水。江瀨有嚴光。

又 春日園亭賞花

碧砌樓高。綠垂簾短。薔薇一架紅遮。林間繁縟。蜂與蝶交譁。中有幾間精舍。園丁課。洗竹澆花。須防者。風欺雨侮。移就碧籠紗。鄰家宜好護。不勞纖手。折取萌芽。得紫絲步障。掩映名葩。喜與封姨無礙。將新句。細按紅牙。朱欄內。畫屏小影。春氣爛晴霞。

又 丁丑初冬過智月禪院

過盡千帆。行舟無數。水流城下溶溶。寒坡拖影。荒荻引淒鴻。喚渡小船如葉。長年者。朴古之農。閒時去。尋僧出郭。踏過小橋東。輕風吹袖滿。垂楊結帶。瘁草成叢。聽老漁昏唱。古寺晨鐘。傳客到門相訪。堂前有。開士仙翁。須臾列。美蔬椒餅。話及夕陽紅。

又 重九

飄館秋濃。東籬煙暮。昨夜霜信微催。故人餉酒。盤裏繡餽堆。須耐黃花佳種。遲遲放。無計教開。先來雁。遠山飛葉。同與晚風回。徘徊三徑裏。賦心騷骨。何限悲哀。嘆淒涼南浦。戲馬空臺。千古場中傀儡。重瞳去。劉寄奴來。英雄淚。樽前休滴。且覆淺深杯。

又 無聲還鄴城賦別

霜鶴盤青。暮鴉翻黑。策馬遙送斜陽。人間似鶴。孤影出迴塘。應念夜來高會。分題處、樺燭更長。難消遣。臺邊暮雨。銅雀賸淒涼。蒼茫。雲霧外。旁沿滏水。徑渡清漳。檢客裝。何有權。可詩囊。識得此心無着。隨緣過。去住都忘。山房暖。康王祠下。蒼荀透寒香。

又 題夏邑谿南草堂陳簡庵別墅

榴火紅燒。荷風白顫。塘柳入夏浮煙。近郊茆屋。南郭與堂連。城外周遭綠水。鷓鴣睡。沙鷺聯拳。攜觴去。酒生茗止。永日且流連。昔年曾有贈。主人珍重。墨跡猶鮮。道淚勻竹塢。瘦剖楓天。到此解衣角飲。渾忘倦。說鬼談禪。三更月。危橋路迳。堤外喚漁船。

燭影搖紅 閨情

杏苑春嬌。薄寒猶禁梨花信。踏青時節。做輕陰。芳徑苔生暈。輕曳弓鞋未穩。帶游心。芹泥微潤。鴛鴦成對。遊戲波心。雙雙相近。閒悶侵尋。淚痕猶帶紅潮印。生憎燕子入空梁。似說離人恨。金鴨篆煙方燼。晦流黃。晚風成陣。十三樓畔。廿四橋邊。歸期偷問。



又 歌席志感

宿世良緣蓬萊弱水。看清淺。神仙會裏捧瑤漿。碧藕排高宴。今夜流蘇半捲。到壁阮、吹簫庭院。綏掛低唱。銀箭頻催。翻嫌夜短。紅袖多情。挑燈一送秋波轉。回頭慘澹。動離愁。萬里關河遠。嘈雜華堂絃管。恍疑是、夢中來見。傷心何處。塞上悲笳。驚飛孤雁。

漢宮春 己卯冬日同魏子一子存蔣亭彥兄弟家子閒舟宿吳門用辛韻

一葉孤舟。憶昨宵帆緩。纔到桐廬。今朝浮白相賞。不與家殊。呼盧豪快。嚴觴政、杯罍難疏。船篷外。陰雲作雪。燈前寒夜偏無。歲歲吳閭風景。但檣停蟻似。妓少花如。惟是酣餘筆墨。爲爾爲余。清樽欲散。盡分頒。濁酒殘鱸。紅箋有。畫師巨董。字臨王右軍書。

八聲甘州 題贈盛筠齋僉憲書屋

記燕山策馬上金階。綵筆映芙蓉。見美而鬢也。天顏有喜。握管躊躇。幾度宮門楊柳。

春暖曉風梳。客館濃花靚。退直停車。江上波搖畫纛。正南樓載酒。緩帶軒渠。想故園三徑。歸興菊松餘。好嬉遊。武塘梅圃。又何勞。去食武昌魚。留雙眼。冷看臺省。袞袞新除。

應天長 春懷用周美成元韻

池塘皺綠。帶柳縈花。緋桃方露酣色。萬戶禁煙。蕭索冷淘和寒食。江南遠。愁作客。誰見慰。旅懷孤寂。甚無緒。尊前自許。誕康狂籍。繫馬問當壚。醉墨淋漓。題溼酒家壁。尤愛裁雲鏤月。清幽莫愁宅。深深處。過綺陌。灑掃後。落紅無迹。莫推阻。歌扇相偎。舊時曾識。

玉蝴蝶 冬日有寄

寒入江南猶淺。翳雲初日。釀雪輕陰。幽寺無人。來去水靜花深。獸爐溫。無須炙硯。禽語寂。似解聽琴。獨行吟。湘君或降。漁父相尋。知音。滄浪孺子。投懷煙水。托契山林。舊約春賒。西陵松柏結同心。鳳池融。波添綠暈。龍樓曉。柳弄黃金。淚盈襟。故人天上。

雁杳魚沈。

念奴嬌 題葉攸仙明府翠交閣二調

孤亭新就。稱葛巾瀟灑。曲闌頻倚。堪羨風流如昨日。不減元龍豪氣。北海開樽。東山著屐。有數神仙吏。烏紗卓蓋。曉來都染山翠。身在百尺樓頭。臨空一嘯。萬木無聲墜。難燭修書寒夜。永後閣爭遺半臂。桃葉喉輕。柘枝腰轉。白傅方微醉。胡牀塵柄。自然江左風致。

百城民社。卻等閒拋去。故園歸早。舊識黃鶯雙白鷺。重赴主人林鳥。活水拖藍。修林染碧。托出銀蟾皎。蠻姬捧硯。兩彎眉黛如掃。頻向檻外澄觀。伍塘帆遠。只比寒鴉小。麥浪交風聞雉雊。北郭青青未了。十萬兵藏。五千輕授。丙夜憑搜討。漁歌唱和。一場春夢方曉。

又 送幼光還白門同仲馭二調

孤舟初發。正嚴霜似雪。布帆如紙。一派殘雲縈別恨。愁向青山隱几。晚圃黃花。小槽

紅酒客路誰同醉。蒹葭黯淡。自將管樂爲比。遙念旅宿方寒。丹陽古道。老樹酣青。紫戍鼓沈沈。天未曉。殘月模糊映水。白紵譚兵。青燈讀易。漫灑英雄淚。啼鳥成陣。石頭城外潮起。

南飛烏鵲繞疏林。三匝無枝可寄。聊借遠遊抒骭。莫似相如憔悴。山峙金焦。江來楚蜀。帆繫斜陽裏。中流擊楫。氣吞湖海。萬里。雙眼一望蒼茫。寒濤如箭。箇箇牙檣起。舊日精靈都已盡。何況堂前燕子。晉宋衣冠。陳隋宮寢。社鼓神鴉耳。佛狸祠下。怒潮空打遺壘。

又 湖上夏景同澹心賦

西湖千頃。儘消殘紅粉。又傾金穴。柳帶畫樓珠箔靜。恰是曉妝時節。小扇風迴。曲欄人悄。獸炭初烹雪。泉聲斷續。倍添今夜嗚咽。還訝蘇小當年。停歌不語。輕與多情別。離恨如天愁似海。軟怯肝腸似鐵。三竺雲浮。六橋煙漲。總化鶻啼血。桃笙角枕。誰憐香汗微熱。

又 寄懷魏子時官成都司李

錦官自昔稱都會。佳麗已消兵劫。望帝魂歸城郭壞。月黑悲啼古堞。劍閣哀猿。刀州嘯虎。蜀棧行人怯。草堂無跡。橙林猶戰風葉。聞說萬里橋西。子雲宅畔。豐草長林接。爲問薛濤箋在否。幾樹露桃紅靨。諸葛名垂。文翁教遠。賦緬相如獵。好尋雙鯉。嘉陵江上行鱗。

又 冬日虎邱遺興

屐痕帶雪。看千人坐上。苔紋似繡。茶竈楓林隨意歇。徙倚好娛清晝。主簿祠荒。生公石老。崩壑疏寒竇。銷沈霸業。尙傳神虎悲吼。麋鹿羣走蘇臺。闔閭葬處。宿莽濃煙湊。誰劃劍池通海眼。鐵壁千尋決溜。晉代風流。吳宮花草。塔影斜陽後。短簫橫笛。墓前明月依舊。

又 贈孫無言還黃山

袖中攜贈。乃松滋侯也。詩尤清絕。五十餘年詞客老。孤枕寒衾如鐵。白露朝零。青氈

夜冷。捫口猶存舌。繩樞蓬戶。時來長者車轍。忽念故里名山。願言歸隱。長與紅塵別。三月烟花全不識。歌吹竹西空熱。翠篠蒼杉。家緣易就。莫道斑鳩拙。荷衣藤杖。飽看峯頂晴雪。

水龍吟 湖舫泛雨呈座客

柳堤一帶疏烟。輕雲潤壓。漫天絮。清陰不斷。橫遮湖水。遠籠高樹。莫近城闌。喧聲難謝。急移幽渚。看青萍風發。碧油波漲。輕舟穩。無驚懼。白浪豈能相阻。泛春泉。滿傾杯罈。嘯呼煙雨。我身欲做。雪蓑披鷺。懶學英雄。論兵捫虱。遇雷失箸。擬贈人長劍。焚予枯管。作漁樵去。

齊天樂 感舊

南樓逸興今安在。英雄固稱一世。日月九飛。星霜駒逝。頓減數年豪氣。尋花買醉。似夢裏追歡。邈然難繼。贈客貽姬。紅箋剩有舊名字。佳話空搜篋底。見墨兵酬唱。青樓緘寄。燈翦春前。歌傳花下。舊約依稀誰記。莫思往事。恐今日窮愁。欲彈清淚。回首

當壚玉釵垂翡翠。

瀟湘逢故人慢。重過虎邱竹亭用王和甫元韻

清陰如幄。修篁拖冷翠。猶昔行窩。漫說雀堪羅。喜桂叢梅榭。坐遠風波。霜侵鴨脚。墜深黃。槭槭庭柯。舉頭望。五湖伊邇。好攜白恰青蓑。浮漁艇。衣短後。有誰知。謫星載酒來過。煙水慣婆娑。擬回塘插柳。曲港分荷。已公茆屋。賦新詩。不礙行歌。還消受。粥魚齋磬。新添一箇禪和。

沁園春 己卯冬日寒齋感興

時值嚴寒。木葉無多。爭隕飄風。看百顆榴實。霜邊墜紫。一棚枸杞。雪裏垂紅。妝點淒晨。留連卒歲。多少窮愁閉戶中。寒蠶飯。但前村覓火。荒圃挑菘。平生淡泊爲功。愧無策。殊謀生還未工。且西園灑墨。研經讀史。東郊習射。挾矢彎弓。麟閣標名。燕頷封爵。只索殊恩屬乃公。偏多事。爲傷時感遇。咄咄山翁。

又 懷州王明府園亭

懷慶城東竹樹清陰。亭館初開。見醪醑架壓叢花鋪雪。湘筠角小。新筇驚雷。三里平蕪。千章夏木。雲氣堆濃。王屋隈尋幽徑。似南京犀浦。如豆青梅。使君卻費尊壘。歎解組盤桓。真快哉。喜林泉位置。手芟楊柳。賓朋嘯詠。雜坐莓苔。屐齒泥深。帽簷紅落。還與殷勤勸酒杯。銀蹄滑笑。諸公高興。冒雨歸來。

又 贈周逸僧納姬同程穆倩賦

有美一人。特地鍾情。愁城病魔。向迷樓芳草。閒尋墮珥。竹西明月。緩度輕歌。若個能憐。從前是恨。半掩殘缸。卸綺羅。支餘夢。悵洗脂抹黛。密約蹉跎。欣逢才子來過。正三五清光分外多。喜同心鈿合。黃金可鑄。並頭銀蒜。錦幔成窩。教鵲爲橋。呼鴛作枕。今夜雙成喚奈何。眉痕細。倩詞場綵筆。畫遠山螺。

又 殘臘里居寫懷用爾斐韻柬孝峙

數點孤梅。伴我餘生。斜倚西風。喜主人歸里。花如倩盼。羣烏啼樹。雨卻微濛。春夢婆愁。祝雞翁返。似勝東坡瘴海。東方鼾睡。耐半天霹靂。飛墜空中。蓬山橐筆相從。今



已作人間亡是公。任嶢嶢後輩。文章班馬。清閒老友。丘壑夔龍。錦字填詞。素箏濁酒。廿載升沈了不同。他年約。擬共尋五嶽。雪笠霜筇。

又 爾斐見和用韻再酬

瓶凍知寒。擁褐挑燈。夜吼狂風。嘆曰爲改歲。三星在罫。我來自北。零雨其濛。白蛤逃名。綠蓑垂釣。伍子塘南。角里東。雄心在。記射鵬沒羽。上谷雲中。十年漆沮之從。牛馬走羞稱太史公。想蘇卿窖底。往還惟雁。管寧陌上。腹尾皆龍。遷謫驚魂。揩磨老眼。別墅尋花尙可同。消殘曆。看故園報賽。暫閣遊筇。

又 答贈孝峙爾玉爾斐兼悼天鹿三用前韻

疇昔盛年。四五詞家。諠月嘲風。自烽煙灑洞。故人凋謝。白楊蕭颯。離黍迷濛。天壤之間。猶存吾輩。坐看川流折瀉。東全無緒。只矮簷曝背。寒日方中。雪吟花醉。能從披蝨。簡吾師河上公。更彭城三老。聲華是鳳。柳洲八及。少長爲龍。縱感存亡。還娛健在。行見兒孫小字同。陶暮景。向蒲汀繫纜。薜磴支筇。

又 自嘲和孝峙爾斐四用前韻

客老薊門。筆築城頭。頓起悲風。但曉餐入直。沙飛浩浩。暮還休沐。靈暗濛濛。虎觀寒  
飄。鳳城華鬢。空說扶桑日正東。隨清蹕。獻饒歌朱鷺。天樂回中。鼎湖攀鬣難從。偕  
痛哭褒公與鄂公。竟一朝放廢。塞翁失馬。百年瞬息。山穴尋龍。舂鍤須埋。形骸可略。  
阮籍劉伶酒社同。真險絕。幾飄零異域。萬里扶筇。

賀新郎 題汪爾張畫

遠嶂雲千疊。望層巒、空煙半捲。似明還滅。上有清泉飛一道。最可解人炎熱。石鎖處、  
谿流如咽。下有杉松迷小徑。掛潺湲、樹頂懸晴雪。鴻濛後、氣猶結。誰人識得逃名  
訣。向深山、結茅種竹。人蹤俱絕。惡木叢中行已慣。不怕門前虎穴。閒處聽、杜鵑啼血。  
若向畫圖呼欲出。想斯人、肌骨真清徹。長往者、是豪傑。

又 秋夜

烏鵲剛棲了。坐新秋、月痕如線。漢光如曉。水上涼風吹不止。又有高梧夾道。問更漏、

已敲多少。階下新開花似雪。細端相、抹麗花還小。何今夕、香猶早。輕風一陣雲如掃。晚波涼、青菱正綻。紅蓮欲老。整理吟懷待黃菊。擬向東籬傾倒。那更有多愁懷抱。紫蓼白蘋無限景。向清江、一笛驚鷗鳥。人何在、在天表。

又 代寄

怪殺東風薄。入春來、吹殘柳絮。海棠都落。一片落花拈不起。和雨和煙相躩。誰可解、愁懷漠漠。刺繡無心分五色。歎無聲、祇見針兒閣。翻欲惱、養娘惡。鴛鴦一對溪邊掠。怕情牽、只言風悄。半遮簾幕。生得腰肢原自瘦。近覺宵來更弱。梳短鬢、嬾隨時作。心字香燒心已碎。算同心、還是心心各。記郎語、善諧謔。

又 村居

古樹陰相屬。步長坡、百勞初語。白鷗新浴。早稻初堅香似蜜。無價可方新穀。休更說、人間梁肉。黃雀飛飛猶未老。待秋深、蒸取脂如玉。芙蓉下、倒醞醪。空江採得蓴成束。櫂輕舸、中流嘯詠。放歌林曲。漁老綸竿垂不止。忘卻塵區榮辱。我亦覆、一枰棋局。荷鍤躬耕風味苦。做隆中、頗有良苗綠。梁甫句、問誰續。

百  
末  
詞

運  
彰



尤 侗（萬曆四六——康熙四三）

字展成。一字悔菴。號良齋。晚號西堂老人。江南長洲人。順治戊子拔貢生。直隸永平府推官。以事降調。康熙己未應博學鴻詞試。授檢討。早年所作樂府。流播禁中。帝以真才子老名士呼之。天下羨其榮遇。所著西堂全集。凡十餘種。

序

余以放廢餘生。停驂吳市。悔菴握手勞苦如平生。各有近詞一帙。擬授無言校梓者。迭爲序之。追惟三十年以來。世事滄桑。功名榮落。不可勝計。獨筆墨之緣。少年積習。老而不輟。自髻鬢至今。追隨唱和者。同里尙木質生爾斐寅仲諸君子。引爲同調。而扁舟過從。商摧花間草堂之勝事者。吳門獨吾悔菴耳。悔菴古文詞。下筆妙天下。西堂雜俎。已登虎觀。走雞林。其所爲詞。供奉于內庭。流傳于酒樓郵壁。天然綺豔。粉黛生妍。未許元微杜牧。獨擅風流也。余與悔菴齒旣肩隨。息機近亦相似。年且半百。意氣漸平。回憶畫舫尋春。山房聽雨。如夢如幻。請從此斗笠枯筇。婆婆于支硎鄧尉之間。嚙冰雪。嚼梅花。槁木形骸。懔然悟道。則青箱紅豆之纏綿。檀板金尊之婉孌。皆可一齊放下。翻讀平日所作小詞。疑是古人。疑是前身。不復記憶。則吾兩人當有嗒然而自得者。况臨去秋波。悔菴早從此證入。又何俟余之饒舌耶。康熙乙巳夏日。嘉善年家同學弟曹爾堪拜題。

# 百末詞

長洲尤 侗展成

漢人以百花百草末造酒。號百末酒。予所作詞。亦花間草堂之末也。故以名之。  
十六字令 夢

春夜夢。香魂花影紅。無人見。啼笑月明中。

憶王孫 懷卿謀

秋風嫋嫋洞庭波。暮雨湛湛落敗荷。數遍相思今夜多。夜如何。獨倚南樓一雁過。

又 閨怨

春愁脈脈損鉛華。獨自妝成坐碧紗。蕩子經年不到家。隔天涯。一夜相思楊白花。

又 閨情

一春心事付眉尖。小院無人風雨纖。落盡桃花倚繡奩。思淹淹。燕子歸家不捲簾。

轉應曲 春雨

春雨春雨。花上淚痕幾許。東風吹到紗窗。日日愁來斷腸。腸斷腸斷。又續新愁一半。

又 中秋雨

秋雨秋雨。滴碎瓊宮霓羽。清歌妙舞闌珊。陣陣霜風夜寒。寒夜寒夜。寄語嫦娥睡罷。

後庭花 閨怨

綠階花影翻。紅欄燕語喧。明鏡嫌眉瘦。空牀厭夢煩。倚黃昏。東風無賴。又來吹斷魂。

如夢令 柳絮

一捻宮腰削素。獨舞朱樓深處。有意送春歸。也向天涯飛去。且住。且住。爲道章臺日暮。

又 病嘆

半似醉鄉情趣。半似睡鄉心緒。怯怯病中身。則待放他何處。無據。無據。一任西風吹去。

又 戲贈小伶



六幅裙兒半掛。八字眉兒半畫。笑問若耶人。何事西施未嫁。長夜。長夜。爲語新妝休卸。

又 春夢

春夢偶然失曉。催起數聲嬌鳥。軟立倚郎肩。宿黛無心重掃。罷了。罷了。粗服亂頭都好。

又 題王阮亭雨花圖

晏坐袈裟垂地。玉蕊從空飛墜。摩詰轉王維。天女自然遊戲。如是。如是。應證雨花三昧。

長相思 捲簾

朝捲簾。暮捲簾。簾捲西風風捲煙。煙寒風雨寒。倚欄杆。淚闌干。聽盡哀鴻聽怨蟬。愁魂飛暮天。

又 春閨

花飛飛。絮飛飛。綠上眉山紅上衣。妝樓日又西。  
蝶飛飛。燕飛飛。飛向雕簷等伴棲。  
吹簫人不歸。

歸自謠 春思

春命短。寒食雨來芳草滿。梨花夢去東風懶。  
惜春人倚雕欄畔。腰肢翦。流鶯又把  
閒愁管。

醉太平 山中

山中小園。園中小山。閒閒十畝之間。與白鷗往還。  
竹枝一竿。柳枝一彎。新來添設  
花欄。喚麈駝種蘭。

醉公子 本意

何處貪杯酒。愁殺閨中婦。尙喜晚還家。剛留一盞茶。  
扶得和衣睡。冷卻鴛鴦被。不  
敢罵檀郎。喃喃呖杜康。

昭君怨 弔臘梅

昨夜風鞭雨打。金屋曉來飄瓦。尺土葬鵝衣。哭江妃。正是天寒日暮。空谷佳人何處。雲鬢惜餘香。試啼妝。

又 春盡

不見落花飛絮。滿目土風沙雨。漂泊可憐人。奈何春。地下杳無消息。盼斷畫衣香鳥。白日掩青簾。夢江南。

醉花間 春閨

蘭湯沐。湘裙束。懶把鞦韆蹴。儂自理秦箏。郎自歌吳曲。花冠一笑偏。翠袖三薰足。芙蓉帳底眠。春夢同郎續。

酒泉子 離情

月白風清。今夜誰家住去。過長亭。接短渡。傍孤城。知君馬上聽雞鳴。妾也朝朝早起。剔殘燈。空庭裏。拜三星。

點絳脣 綠陰

夢破簾開。隔牆謾謾風聲亂。徘徊池畔。綠影浮波面。閉鳥藏花。收拾春光暗。遮不遍。新愁一段。繚繞天涯散。

又 楊花

新綠排衙。問伊何事輕妝卸。天斜頑耍。惹得黃鸝罵。無主東風。來去隨他罷。憐今夜。落紅偷嫁。同宿雕欄下。

又 秋海棠

空谷佳人。淡紅衫子天然豔。風清露淺。脈脈凝啼眼。恰似傷秋。倚徙湖山遍。憐誰伴。重簾不捲。有個人腸斷。

又 玉簪花

夢草淒涼。漢宮遺下搔頭玉。淡妝素束。一顧傾紅綠。清露晨流。髣髴香盈掬。娛幽獨。廣寒留宿。疑舞霓裳曲。

春光好 春閨

掩繡閣。鏡臺封。鬢雲鬆。聊聊私語小窗中。罵春風。整日懨懨沈睡。侍兒問怎朦朧。卻是背人偷搵淚。枕痕紅。

女冠子 美人走馬

青樓年少。走馬章臺馳道。倚逍遙。急雨桃花滾。輕風燕子驕。春芽擁翠髻。香汗發紅潮。轡兒跑不住。抱鞍橋。

浣溪紗 春閨

日影籠煙小閣明。侍兒初掠曉妝成。畫樓何處又歌聲。故掩珠簾驚燕燕。戲拋紅豆打鶯鶯。晚來獨傍落花行。

又 美人醉

小盞低斟不當差。粉腮紅暈早堆霞。春風帶雨顫桃花。強對檀郎妝掙挫。慢扶小玉露天斜。和衣睡倒太嬌些。

又 馬上見

勝袴新裁蟬翼紗。錦鞦自織鳳頭鞞。春風不耐碧油車。金步搖飛金勒動。玉跳脫  
裊玉鞭斜。滿堤青草襯紅霞。

又 有客爲王校書案贈漫題二闕其字浣若爲調浣溪紗其名西也以西字  
爲韻

聞道王孃舊姓西。採蓮重出若耶溪。淡妝羞學捧心啼。春水錦帆嬌白紵。秋風香  
徑印紅泥。呢郎子夜醉烏棲。

家住閭門西復西。鳳凰橋上夜烏啼。綠楊巷曲畫簾低。宛轉腰身飛乳燕。聰明性  
格點靈犀。粉牆拂袖待留題。

又 清明悼亡二首

陌上家家挂紙錢。東風客舍淚潸然。難攜盃酒滴重泉。朱戶幾人同插柳。青山何  
事尙含煙。江南夢繞斷腸天。

少女長安歌踏春。鸞靴翠襪已成塵。棠梨時候獨沾巾。宮草幾年堆燕冢。土花終

夜照魚燈。君王猶自望昭陵。

又 題陳其年小影

側帽輕衫古意多。烏絲欄寫懊儂歌。紅兒解唱定風波。翠管吟殘澆一斗。玉簫吹破斂雙蛾。酒闌曲罷奈髯何。

伊川令 和范夫人韻

空房夜夜垂羅幕。雁柱拋絃索。又報海棠零落。香徑欲行還卻。紅腮枕上羞託。知郎春夢繞天涯。不肯到鞦韆院落。

菩薩蠻 春愁二首

鸚哥啄碎花鬚落。曉風低弄秋千索。剛上一重樓。青山又送愁。幾番寒食雨。柳絮依人舞。春夢晚歸家。小池聞暮蛙。

春風婀娜飄簾幙。玉鉤踏破花陰薄。綠柳舊長堤。王孫驕馬嘶。誤聽新燕語。倚遍欄杆午。權把淚痕收。東君不解愁。

又聽雨

雨聲碎。滴琅玕竹。風聲輕。戛珊瑚玉。月影又模糊。和煙上鷓鴣。屏名溼螢游古屋。蟋蟀悲秋菊。羅帳蕙香殘。幽人曉夢寒。

又無題八首

畫簾捲斷珊瑚索。繡牀小夢隨風落。殘月杏花堤。曉鶯恰恰啼。美人和笑立。露葉牽衣溼。待得侍兒來。妝奩一半開。

烏衣雙燕穿簾舞。銜花故墜金釵股。陌上柳絲飛。錦屏人未歸。小窗沈晝閉。山枕留香睡。春夢杳如煙。知他向那邊。

竹鳩喚起斜陽夢。楊花倒挂金泥鳳。獨自摘青梅。鞋弓印翠苔。羅衫薄不綰。襯得東風軟。一捻小香脂。無端蜂蝶知。

花臺日暮鶯辭去。暖風吹散胭脂雨。春困晚梳頭。珠簾不上鉤。亂紅隨地掃。又見宜男草。半醉倚殘妝。花間待阮郎。



梨花帶雨飄香雪。亂蛙啼出西窗月。庭砌綠陰濃。羅衣惹暮風。畫梁新燕乳。宿夢  
呢喃語。喚我掩湘簾。夜深清露寒。香蘭笑向銀屏吐。小蠻起作迴風舞。日靜綠紗空。美人春夢中。簫聲吹月白。柳帶  
籠烟碧。芳草滿江南。相思一夜添。疏風細雨和春語。扁舟欲載花魂去。燕子不歸家。盼他午日斜。落紅一晌顫。界破  
殘妝面。收拾護花鈴。鸚哥報壓驚。馬蹄踏遍天涯草。杜鵑啼破東風小。花落碧欄橋。翠樓紅袖招。斷香隨路宿。懊惱  
枝頭綠。春去不須留。擔他一段愁。

又 午日

綵絲斜裊金跳脫。篆符戲綰同心結。酌酒勸檀郎。蒲花襯口香。蘭湯初罷浴。窗外  
調雛雉。剛抹守宮斑。明朝點點殘。

又 夏閏二首

一階芳草茸茸綠。亂飛蛺蝶無人撲。欲摘小薔薇。嫌他棘刺衣。  
雙鬢語。心怯越梅酸。只將纖手搏。書長停繡譜。私共

錦葵花底彈棋坐。一簾明月留人臥。粉汗溼紅欄。倩郎搖素紈。  
雲鬢胡亂挽。羅帳金鈎捲。笑擲竹夫人。無端一面嗔。

又 月夜

遠山新吐蛾眉月。半鈎飛入梧桐葉。剛得照妝臺。昵人脫燕釵。  
風吹裙帶急。花下凭肩立。細數舊時歡。低頭屈指尖。

又 冬閨

翠鈿盡卸香雲綠。紅衫鬆扣纖纖玉。旖旎揭羅帷。移燈匿笑時。  
閉門霜月去。不減春宵味。爐火釀餘煙。氤氳初睡還。

又 丁巳九月病中有感 八首

曲江芳草年年碧。郎君騎馬臙脂色。白首苦低垂。花間扶杖歸。  
逢場曾作戲。喬扮

參軍勢。濃笑寫官銜。排行無二三。

六宮鬧掃芙蓉鏡。君王偶愛飛蓬鬢。殿脚惜空同。昭陽天幾重。江南春雨晚。紅豆

新歌滿。流落杜秋娘。琵琶憶上皇。

少年悔讀高唐賦。片雲片雨無尋處。欲買美人圖。吳宮香粉無。三山青鳥斷。萼綠

何時見。夜夢是耶非。玉釵金縷衣。

平生脫手千金劍。衣鶉馬狗今誰盼。負負復何言。饑來難叩門。白衣應送酒。凝望

終無有。不見夜飛蟬。山妻劇可憐。

關山戎馬驚鼙鼓。軍書百道征徭苦。風急雁哀呼。荒田寸草無。千家聞野哭。鬼火

逃亡屋。歎息返柴廬。當門立吏胥。

短衣匹馬盧龍道。冰霜千里催人老。白髮影婆娑。秋風鬼病多。苦寒還苦熱。飛夢

驚明滅。何物返魂丹。空囊無一錢。

白雲冉冉蒼梧下。曉猿夜鶴依茅舍。此地豈蓬壺。夢遊疑有無。一生幾兩屐。願作

山中客。只乏買山錢。桃源不在天。  
著書自苦徒爲爾。千秋萬歲誰傳此。前後兩茫茫。三生人斷腸。黃金空鑄錯。彩線難縫絡。何處度餘年。除非離恨天。

阮生失路。澆淚無端。屈子問天。寄愁何處。水以不平而激。木因有鬱而奇。情有所以理固然矣。吾友悔菴文高於命。宦薄於名。豔曲三章。欲醉沈香之酒。奇才兩字。不分歸院之燈。孤竹崖前。空隨射虎。百花洲上。徒共眠鷗。劉公幹高臥清漳。王仲宣哀吟荆楚。爰以沈鬱之意。寫爲穠麗之音。此病中八首所由作也。夫生而識字。卽種愁根。長解言文。原非善氣。惺惺自合人奴。咄咄何堪令僕。吾儕若此。復何怪耶。子善吹簫。請命小紅而按節。我爲拔劍。聊浮太白以倚聲。豐南吳綺跋。

又 揚州懷古二首

阿麼曾夢江都好。迷樓一炬空荒草。何處教吹簫。淒涼廿四橋。西風吹客舍。落葉隋堤下。誰唱望江南。惟聞昔昔鹽。謂鹽商也

青樓小杜揚州夢。紗燈萬點觥船弄。書記縱才高。憐才思太牢。途窮悲逆旅。一飯  
今誰主。翠袖薄寒時。卻吟老杜詩。

又 佳人集曲名

步搖顆顆珠環小。裙拖滴滴金泥巧。早起傍妝臺。笑兜紅繡鞋。名香羅帶染。碧玉  
鉤簾捲。度曲喜雙聲。呼郎並合笙。

又 秋思迴文二首

冷霜凝月搖空影。影空搖月凝霜冷。花落晚窗紗。紗窗晚落花。斷腸人字雁。雁字  
人腸斷。啼夢曉風西。西風曉夢啼。  
一聲啼雁鋪沙白。白沙鋪雁啼聲一。孤枕夜涼初。初涼夜枕孤。搗砧和夢悄。悄夢  
和砧搗。愁客望高樓。樓高望客愁。

巫山一段雲 賀侯大年新婚

鳳塔名蕭史。珠娘號麗華。春風初長合昏花。門駐碧鈿車。佳話玉如意。新妝香辟

邪紅窗蠟燭小侯家。臂繫漢宮紗。

又 集美人名

紫玉雕歌扇。紅綃織舞裙。年華小小貌真真。錦字寫雙文。聞莫愁春信夜來分。入夢有朝雲。

花蕊富窗見。蘭香隔座

卜算子 夜憶

秋雨急如箏。彈破江南夢。野外西風葉葉吹。撼起棲鴉動。重飛盡征鴻。莫寄書。曲冷文君弄。

夜永惜燈殘。衾薄知寒

又 閨思

整日數歸期。數了回頭數。不信朝朝暮暮思。曆本看掀破。臥多分宵來夢不應。今夜拚重做。

特地倚門妝。依舊空牀

又 憶別

憶別燕雙雙。新燕添三五。教妾空房羞獨眠。打碎巢邊土。

莫更摘花來。且自銜書

去。喚得蕭郎早歸。與汝重修補。

減字木蘭花 送春

重門深掩。不道背人歸去遠。倦燕嬌鶯。啼出陽關第四聲。含愁相問。飄泊天涯何處定。夢斷羅帷。今夜明朝睡起遲。

又 春去

春乎欲去。何以贈之雙淚雨。回首東風。一縷飄魂趕落紅。綠兮滿樹。花影半窗秋色暮。人倚欄杆。愁聽空梁燕語寒。

又 新竹

此君一个。與我周旋林下坐。新出三竿。官樣青袍玉筍班。蕭蕭風動。驚破西堂春草夢。舊籜還裁。好放些兒月影來。

醜奴兒令 偶感

春來秋去何時了。昨日陰山。今日陽關。白髮黃雞彈指間。只求夢裏流年好。今夜

邯鄲。明夜巫山。睡過三生亦喜歡。

柳含煙 楊柳

青青柳。正藏鴉。借問風吹多少。霓裳一舞自堪誇。舊楊家。可恨銷魂橋畔路。送去  
征人無數。卻教閨夢變飛花。向天涯。

謁金門 愁

奈何許。欲說近來愁緒。愁到依然無一語。羅衫幾點雨。舊事子規催去。新恨鷓鴣  
留住。夢逐東風無歇處。飄零隨柳絮。

又 寒夜

人寂寂。一派暮愁天色。風剪輕寒落漸側。紙窗吹半黑。正對孤燈蕭瑟。又聽孤鴻  
嘹唳。庭外黃花清露滴。淚痕依樣溼。

又 代和韋莊有序

雜紀云。韋莊有寵人。資質豔麗。兼善詞翰。蜀王建聞之。託以教內人爲辭。奪去。莊



追念悒快。作謁金門詞云。空相憶。無計得傳消息。天上姮娥人不識。寄書何處覓。新睡覺來無力。不忍把伊書跡。滿院落花春寂寂。斷腸芳草碧。姬聞此詞。遂不食而卒。予惜其未有和篇。因擬爲之。

休相憶。紅葉不傳消息。燕鎖雕梁路未識。舊巢難再覓。風捲楊花無力。浪打萍花無跡。永巷夜臺同寂寂。土花凝血碧。

又 題龔靜照鵲紅稿

鵲紅稿。靜照恰同清照。最是銷魂新句好。迴身將夢抱。叵耐氤氳顛倒。彩鳳教隨鳥鳥。曉鏡畫眉添懊惱。紅顏祈速老。

憶秦娥 感春

春來矣。春風細翦春林綺。春林綺。夢隨春住。情隨春使。春妝含笑春衫淚。春光活潑春心死。春心死。一番春恨。一番春喜。

更漏子 獨夜

五更風。三點雨。并作零鐘斷鼓。殘葉影。落花魂。淒淒來叩門。天涯雁。飛聲亂。叫出傷心一片。倚半枕。擁孤衾。相思睡不成。

又 有懷

春風香。秋月弄。斷送十年殘夢。如意曲。定情詩。相思不自持。巫山高。湘水遠。惆悵彩鸞緣淺。霍小玉。董雙成。他生定遇卿。

清平樂 梅蕊

煙姿玉骨。淡淡東風色。勾引春光一半出。猶帶幾分羞澀。隴頭倚雪眠霜。寒肌密抱疏香。待得羅浮夢破。美人打點新妝。

又 蘆花

秋風澤畔。小草霜華染。比似楊花吹不斷。卻被雁銜天半。月明野渡蒼茫。伴他楓葉吳江。堪笑白頭老子。夜寒尙倚紅妝。

又 春閨

懶妝草草。怕說春光好。幾日傷春吟未了。一幅烏絲殘稿。晝長午夢初醒。碧桃花下微行。閒喚侍兒消遣。小樓偷放風箏。

阮郎歸 旅思

他鄉無處不淒其。晚春人易悲。楊花飄泊水蛄啼。高樓憶別離。宿酒醒。篆煙微。愁來眉漸低。滿簾風雨斷腸時。一聲玉笛吹。

喜遷鶯令 賀李丹壑秋捷時年十六歲

唐學士李青蓮。公子更翩翩。荷衣總角賦高軒。名字報紅箋。曲江宴。櫻桃畔。爭看紫駟白面。嫦娥應遣小嬋娟。花插帽簷邊。

海棠春 晚妝和阮亭韻

更衣斗帳流蘇響。拂舞鏡、垂垂絲網。一片美人雲。弄影秋波漾。小鬟幫襯新興樣。梳掠罷、口脂相賞。飛鬢惱春風。莫放罌罍敞。

又 午睡和韻

氤氳繡幙香生足。欹山枕、弓腰低曲。一搦藕肢柔。剛貼芙蓉褥。夢中輔體靡紅肉。驀驚起、墜釵寒玉。笑看抱誰眠。卻是夫人竹。

又 晚浴和韻

畫簾雙燕爭花影。睡未足、海棠驚醒。玉骨六銖輕。心怯溫泉冷。起來弄色芙蓉鏡。分外好、髻鬆鬢整。無力倚薰籠。呼點龍團餅。

又 夜坐和韻

井梧葉落聲如雨。又風送、小樓砧杵。淡月隱屏山。花底聞私語。空牀好夢拋人去。嘶守盡、更更更鼓。不見謝郎歸。燭影搖松塵。

又 爲吳蘭次壽馬少君

長沙星畔扶風馬。姬長沙人看綠鬢。白眉相亞。月裏嫁吳剛。桂殿鴛鴦瓦。嬌兒玉雪妝臺下。自句讀、焉哉乎也。生日在爾風。君子歌需雅。七月誕辰

攤破浣溪紗 春閨

愁倚東風唱踏莎。畫屏十二自騰那。央及班鳩天外去。喚哥哥。無限翠顰低遠岫。幾番紅淚上橫波。卻與落花千萬點。一般多。

又 卽事

燕子樓中燕子飛。鷓鴣屏外鷓鴣啼。笑看蕭郎盤紉馬。畫橋西。鵝管笙囊調豔曲。鳳花簫局試香衣。怪底游人爭指道。使君妻。

眼兒媚 畫眉

水晶簾下看梳頭。宛轉小眉修。自然宮樣。遠山欲笑。新月如鉤。絳仙何用供螺黛。淡掃恰風流。張郎多事。橫添一筆。帶出閒愁。

三字令 雁字

紫塞雁。望南飛。寫烏絲。一畫破。八分齊。鶴銜書。鵝換帖。不如伊。征戍客。寄相思。卻無題。蕩子婦。夜眠遲。驚回頭。髣髴見。那人兒。雁字爲人

少年遊 離情

長亭回首暮雲遮。今夜宿誰家。馬上曉風，渡頭殘月，催送到天涯。  
小眉不畫鬢兒斜。鎮日背菱花。記得當時，手斟盃酒，閣淚撥琵琶。

西江月 桂花

金母團成金粟。天妃散亂天花。王孫山裏大排衙。不許蘭稱王者。  
分付吳剛休斫。偷香有個蝦蟆。此身已坐廣寒家。仰叫素娥飛下。

又 新嫁娘

月下雲翹卸早燈。前羅帳眠遲。今宵猶是女孩兒。明日居然娘子。  
小婢偷翻翠被。新郎初試蛾眉。最憐妝罷見人時。盡道一聲恭喜。

又 春恨

燕子不歸繡戶。畫簾空鎖斜陽。春風吹夢到池塘。芳草對人惆悵。  
楊柳挂愁百尺。杜鵑啼淚千行。晚來特地倚紗窗。爲問落花無恙。

又 自警

意氣紛紛鬪蟻。功名戀戀游蜂。道人打徹五更鐘。驚醒十年噩夢。心事半銷秋雨。鬢絲難繫春風。今來古往夕陽紅。牛背笛聲三弄。

又 梅村作物幻入詩頗極巧妙予謂其題近於詞爲小調足之 繭虎

五道鴛叢初闢。三盆虎圈俄修。采桑秦女自風流。翻學下車馮婦。浴罷恰如得子。纒成便可封侯。綵絲束縛挂釵頭。傍向盤龍欲鬪。

又 茄牛

小菜放於牧野。太牢起自田家。樊遲老圃大開衙。演出伯牛司馬。入甕莫愁穀觶。着鞭卻喜丫叉。兒童牽線笑喧譁。唱道夕陽來下。

又 鯨鶴

聞說枯魚欲泣。何爲化鶴來歸。霓裳玉佩自清輝。入肆終慚形穢。北海已成速朽。南山幾見高飛。鯨鵬變化是耶非。小作逍遙遊戲。

又 蟬猴

齊女一朝怨死。王孫再世嬉游。三聲哀叫斷腸秋。卻恨當年無口。跳擲不憂螳臂。沸羹早兆羊頭。從來蟬冕拜通侯。問是沐猴冠否。

又 蘆筆

書帶草生筆冢。墨池人在蘆中。白頭翁變黑頭公。夜夜飛花入夢。畫荻教成孺子。編蒲學近儒宗。雁行銜去向江東。寫出錦書珍重。

又 橘燈

金顆千頭火樹。玉荷四照霜花。書生懷袖向窗紗。長伴紅衣不夜。心事任教分割。風光尙費周遮。美人對影暗嗟呀。決意爲郎吹罷。

又 桃核船

種自玄都道士。載從渡口漁翁。小兒偷出碧雲宮。頃刻帆檣飛動。蘆葦似來江上。竹枝疑汎圖中。桃根桃葉棹歌同。兩槳春風吹送。

又 蓮蓬人



妾比芙蓉解語。郎如碧藕多思。個人憔悴倒懸時。知道無心憐子。空洞此中無物。崛強猶昔孤支。亂頭粗服貌如斯。未必六郎相似。

南柯子 懶懶和卿謀韻

侍女休催繡。才郎莫畫眉。春來常倩夢追隨。只爲羅衣、不耐曉風吹。垂手嫌紅袖。凭肩戀錦帷。生憎花影學人窺。央得鸚哥、傳語卻忘誰。

又 旅中苦雨

土雨埋荒草。金風翦敗荷。行人滑滑奈泥何。不道夢魂、夜夜渡滹沱。遣興搜書裏。關愁伴枕窩。孤衾早怯曉寒多。試問江南、小閣尙輕羅。

醉花陰 閨病

海棠夜向西風哭。瘦損枝頭玉。秋雨冷啼妝。半枕紅痕。淚染羅裙綠。藥煙細裊湘簾曲。鏡掩芙蓉褥。閒煞畫眉人。懊惱文君。倒犯相如獄。

又 寒食

春光百五渾依舊。細雨宵來湊。未到落紅時。默默東風已向桃花呢。江城客舍孤單候。白日清寒透。天意也銷魂。捲盡疏煙。禁得垂楊瘦。

雙調望江南 西山燒香曲二首

清早起。天色趁新晴。飛鬢斜拖雙燕翠。畫衣薄襯小鴉青。素裹玉丁丁。迴鏡照時樣。稱人情。多分拚教游子看。私先央及侍兒評。公論是輕盈。呼女伴。好趁一春閒。紅板浪船行緩緩。白藤山轎坐端端。低扇避人看。拜佛罷。本意不相關。戲買粉孩敲木棒。強分葉子賭金環。圖得大家頑。

杏花天 旅思

消磨白日渾無計。算只有短眠長睡。歸夢做來千萬次。紙上重重牢記。相思樣子都相類。換不出思鄉新意。懸知閨夢多佳事。得個書兒題寄。

浪淘沙 樓上愁和卿謀韻二首

贏得許多愁。歲月悠悠。秋風秋雨冷雙眸。欲贈湘君搴杜若。難問芳洲。長嘯倚南

樓。霜鬢颺颺。欄杆拍遍。把吳鉤。惆悵歸來無個事。又上燈篝。  
回首仲宣樓。浩浩江流。楚雲湘雨幾家收。畫角西風聲一片。烽火神州。  
愁。一葉扁舟。珠簾捲盡雁行秋。無賴夢魂飛不定。何處相留。  
准擬汎新

又 詠昭君套

一握小丁貂。豔色茸毛。金璫滿座總粗豪。妝向美人頭上去。別樣妖嬈。  
雙尾鬢雲  
交。秀映眉梢。若教上馬更多嬌。從此香閨添小字。喚作昭昭。

又 感舊

故舊半凋殘。滿目青山。姓名恍惚古人看。追憶平生都似夢。今日魂還。  
老去鬢毛  
斑。努力加餐。百年應作六如觀。世事浮雲君莫管。還我漁竿。

又 題劉六皆桃源圖

紅樹滿青山。澗水潺潺。煙霞無恙洞門關。前度劉郎今又至。綠鬢微斑。  
花下倚雙  
鬢。一笑追歡。胡麻屑飯勸加餐。莫學淮南天上去。雞犬雲間。

鷓鴣天 和葉小鸞夢中作

口詠金經手採香。自言自笑自相忘。雲游瑤碧三山遠。舟戲珊瑚一水長。花築榭。樹迴廊。閒持藜杖逐流光。何人松下敲棋坐。子落丁丁猶費忙。

又 題吳冰仙畫

拂水佳人墮馬妝。春來響屐滿橫塘。繡襦甲帳無消息。暮雨瀟瀟空斷腸。筆翡翠。硯鴛鴦。吳綾三尺寫紅窗。青山碧水無人處。亂點桃花賺阮郎。

河傳 戲擬閨中十二月樂詞 正月第一體

新年吉利。華勝妝斂。宜春貼字。檀郎把酒屠蘇索醉。道兒家得歲。鬧蛾滿路。鰲山會。猜燈謎。輸了鴛鴦翠。卻拉鄰家姊妹。紫姑相伴戲。

又 二月第二體

春半社來飛燕麗。日花朝。茜裙撲蝶過紅橋。垂腰折柳條。漢宮寒食新傳火。貽雕卯。耍笑郎家果。牆頭馬上看秋千。喧闐爭分白打錢。

又 三月 第三體

春午紅雨。湔裙曲水。采蘭江渚。萬花輿。百子襦。伴侶踏青芳草舞。拾來鬪合鴛鴦譜。瑤環賭。贏取同心縷。晚還家。倚碧紗。周遮金鈴偷護花。

又 四月 第四體

紅英已謝。綠枝方亞。拂拂薰風。一番穀雨。曉來香透簾櫳。鼠姑紅。羅敷日日條桑下。繖絲罷。梅潤羅裙袂。小窗閒處。提壺自試新茶。換輕紗。

又 五月 第五體

佳辰重午。釵懸艾虎。臂纏綵縷。龍舟兩兩競渡。畫鼓。雕弓射角黍。蘭湯浴罷蒲觴汎。紅生面。窈窕搖葵扇。凭欄杆。彈髻鬢。闌珊乞郎半夏丸。

又 六月 第六體

玉骨冰肌。天然無汗。紈素風來。鬢華香散。小池邊。櫂船歌採蓮。晝長獨抱青奴臥。桐陰破。枕畔金釵墮。起看明月上紗窗。蕭郎桃笙今夜涼。

又 七月第七體

高樓乞巧。綵花飛起。雲霞繚繞。金鈿七孔。試穿針。裊裊。穿出雙頭巧。戲呼烏鵲填河去。淩波步。便喚郎來渡。渡來時。赴佳期。水嬉。銀盆弄化兒。

又 八月第八體

瓊樓玉宇。紫雲霓羽。廣寒何處。有人間月府。白衣歌舞。是嫦娥小女。月圓正值人圓夜。簫樓下。彩鳳應同跨。汎金卮。彈錦絲。紅兒。爲郎折桂枝。

又 九月第九體

重九酌酒。茱萸遍插。頻開笑口。小樓簾捲也。登高相邀。同餐小鹿糕。自憐人比黃花瘦。垂羅袖。瑞腦薰金獸。背罨罨。步庭墀。秋思。題詩梧葉兒。

又 十月第十體

春小暖早。鸚哥報道。海棠開了。妝臺乍曉。雲髻新添。通草畫衣飛翠鳥。瑣窗容易斜陽下。香奩卸。無計消長夜。翦金龜。倒玉壺。胡盧。偷窺祕戲圖。

又 十一月第十一體

冬至。亞歲。日初長。八尺花間細量。新添宮線繡鴛鴦。尊章。槃將履襪雙。六出花飛  
風絮起。氈爐底。瑞炭煎沈水。飲羊羔。彈鳳槽。蠻腰。何妨夜夜嬌。

又 十二月第十二體

歲暮。臘鼓。懸螺畫虎。爆竹爭喧。藏鉤戲賭。女伴餽節如何。口脂翠管多。黃金瀉水  
成雙鳳。梅妃弄。擬獻椒花頌。向圍爐勸酒。妾意與郎同。火兒紅。

又 旅思 第十體

川犬。民眼。淒淒孤館。悠悠日晚。醒來誰伴。祇剩殘書敗卷。晝長嫌夢短。天涯悵望  
雲中樹。江南路。點點疏星吐。何不歸。何日歸。相催。春風叫子規。

鵲橋仙 七夕

玉鉤畫燭。金風簫鼓。迎送鵲橋雲雨。鴛鴦債欠許多時。着意在、今宵賠補。才郎乞  
巧。佳人穿縷。癡絕不知甘苦。夜深宛頸睡雙濃。那聽得、人間私語。

又 佳人

月眉星眼。煙鬢霧髻。渾是一天妝束。尤雲殢雨。更風流。甘折卻。人間庸福。鶯鶯燕燕。紅紅翠翠。刪盡侍兒名錄。鴛鴦譜樣。總平常。新翻出。憐歡題目。

又 落花

乍晴乍雨。乍寒乍暖。做作幾般天氣。個人猶自不禁持。何計教。花魂迴避。正青芳草未衰。楊柳只短天桃年紀。落紅萬點。總無情。賺多少。香閨清淚。

南鄉子 春愁

紅雨曉闌珊。寂莫梨花淚未乾。飛絮滿庭人倦起。偷憐。盡日鸚哥話夜寒。巫峽夢雲單。懊惱春光一半殘。索性閉門推卻去。孤眠。獨讓東風自倚欄。

又 病集藥名

弱骨怯天冬。滿地黃花憔悴同。雲母屏邊休佇立。防風。烏頭卻似白頭翁。自笑寄生窮。愁脈難將草木通。泉石膏肱甘遂老。從容。領取雲山藥餌功。



又 閨中除夕

榴櫚暖爐煙。笑勸屠蘇稱合歡。自蒸沈檀供繡佛。低言。願妾紅顏勝舊年。  
隔夜整  
釵鈿。守着梅花不去眠。更有一椿郎識取。團圓。預乞明朝拜節錢。

又 閨中元旦

燈下了妝奩。玳瑁堂前春色添。萬福歸來無一事。憨憨。自揭薰籠換繡衫。  
迎喜出  
門檐。笑看家家下竹簾。瓜子滿階人莫掃。纖纖。曾帶脂香唾舌尖。

又 弔鄒氏廢園

華屋委荒丘。蕭瑟西風十二樓。留下空梁巢燕子。啾啾。夢憶珠簾碧玉鉤。  
歌舞彩  
雲流。野草斜陽伴客愁。惟有青山依舊在。悠悠。看盡紅顏又白頭。  
園有十二樓舊貯  
姬妾處也

又 席上戲贈女伶文玉

珠箔舞蠻靴。淺立氍毹宛轉歌。忽換猩袍紅燭豔。瞧科。錦繖將軍小黛蛾。  
鬢髮尙

盤螺。一瓣絲鞭燕尾拖。爲待情人親解取。誰何。春草江南細馬馱。  
晉女未字者鬢後垂瓣解瓣則破瓜矣

虞美人 憐病

病魔纔別書帷去。又借香奩伴。懨懨瘦骨怯春紗。猶向藥煙影裏問殘花。  
曉來強起妝臺立。攬鏡愁眉窄。侍兒且罷掠雲鬢。恐怕春風多厲不勝寒。

又 虞美人花

重華昔向蒼梧死。羽亦重瞳子。至今舞草號虞兮。可似黃陵斑竹泣湘妃。  
君王莫恨江東小。暖日花光好。開時常對杜鵑紅。一樣暗傷亡國月明中。

又 石榴花

李家妹子陶家姊。甘逐封姨死。石家房老剩鸚風。好把小名醋醋換紅紅。  
豔妝底事心如火。生日逢重午。蕭郎笑插玉人頭。問道留儂儂去若爲留。

又 思歸

官街聽徹三更鼓。縮脚寒衾苦。無眠終夜眼常開。那得巫山湘水夢魂來。隔江望斷家鄉路。小雪冬垂暮。扁舟歸去未嫌遲。正是紙窗爐火芋香時。

玉樓春 爲黃大宗悼亡郭少君二首

柔腸最怕傷心賦。聽說埋香淚便墮。紅顏慣是誤青春。斷送桃花一夜雨。飛瓊攜手瑤臺路。應駕鈿車游戲去。可堪拋向玉鉤斜。夢散彩雲無覓處。

落花急似三更漏。弱質盈盈纔十九。杜鵑哭殺少年墳。小字彤碑碧血繡。蕭郎夢斷蘼蕪後。寶鏡鴛鴦難再偶。可憐薄命玉容人。值得輓歌三十首。大宗有悼亡三十首

梅花引 曉行

曉星稀。曉風低。曉月如霜冷射衣。曉雞啼。曉雞啼。啼上征鞍。朦朧古道西。水聲鳴咽行人淚。雁聲嘹唳歸人字。影淒其。影淒其。班馬頻嘶。前村望酒旗。

踏莎行 閨怨

獨上妝樓。青山如昨。畫眉彩筆春來閣。休彈紅雨溼花梢。淚珠自向心頭落。可恨東風。年年輕薄。天涯不管人飄泊。漫將薄倖比楊花。楊花猶解穿羅幕。

又 題周寶鎧坐月浣花圖二首

坐月青蓮。浣花工部。閨房之秀兼佳趣。燃脂寫出麗人行。風鬟雨髻姍姍步。碧杜紅蘭明珠翠羽。藥房移傍湘君住。可憐蕩子不歸家。長吟蕩婦秋思賦。藥房夫人齋名李雲田自號老蕩子

放誕文君。風流樊素。殢人更在倉庚妒。武昌新柳自青青。生憎隔岸晴川樹。夫人在武昌大婦在漢陽。歡暈紅凝。愁眉綠聚。幽情難向狂夫訴。莫攜此卷渡江來。津頭有個興風雨。

又 客店

殘月在林。晨鐘動野。行人慣聽烏啼夜。一鞭古道又斜陽。村田看盡羊牛下。草席泥牀。瓦盆茅舍。東餐西宿何時罷。孤燈半枕夢江南。隔簾驚起蕭蕭馬。

小重山 金陵懷古

依舊青山繞建康。南朝佳麗地。草茫茫。景陽脂井冷銀牀。秦淮月。猶照故宮牆。 弔  
古石頭岡。大江流日夜。幾興亡。雞籠鼠雀滿祠堂。君莫問。策蹇下斜陽。

又 維揚旅思

錦纜牙檣金犢車。竹西歌吹地。鬪繁華。閒來獨弔玉鉤斜。隋宮女。爲我訴琵琶。 客  
夢繞天涯。江山雖窈窕。不如家。二分明月廣陵花。一分月。還照小窗紗。

臨江仙 迎春

昨夜餞冬三寸雪。曉光俄報春回。綠楊青草媵紅梅。東風齊着力。送入我門來。 簫  
鼓綵毬迎去也。遊人蟻走長街。珠簾影裏笑金釵。老姬馱瘦馬。兒戲唱低牌。

又 遣興二首

搔首問天天不語。光陰無計消磨。挑燈看劍自摩挲。澆胸冷熱酒。拍手短長歌。 遮  
莫英雄老去也。山林經濟如何。平章重事到煙波。鐃吹傳玉鴨。水戰教金鵝。

少日驅車兼躍馬。錦裘風雪行邊。十年回首鬢蕭然。蹇驢花下路。短笠渡頭船。憑寄壯心歌舞地。綠樽翠袖紅絃。不然散髮事金仙。蒲團香影裏。橫槩自參禪。

又 舊內

六代青山依舊在。霸圖吹斷西風。行人駐馬問離宮。遊船建業水。蕭寺景陽鐘。百戰精靈應未散。周郎獨步江東。旌旗夜擁紫髯翁。漫追亡國恨。又見孝陵松。

又 舊院

十四樓前歌舞地。珠簾畫障神仙。月明花底弄紅絃。無雙桃葉曲。最小莫愁年。戰鼓催殘金粉盡。空尋墜鳥遺鈿。香銷南國憶嬋娟。東風芳草綠。裙帶我猶憐。

又 題汪蛟門錦瑟圖

二十四橋佳麗地。硯齋十二平分。汪有十二硯齋以夢中所得名之。江郎夢筆助奇文。情深聊爾爾。才妙漫云云。二十五絃彈夜月。花間錦瑟橫陳。春風鬢影看文君。一窗三婦豔。誰雨復誰雲。

又 壽查伊璜又一體

絲竹東山自有煙花南部偏多。紅兒起舞雪兒歌。人生行樂耳。但日飲亡何。事業  
暗鳴叱咤。文章者也之乎。不如老子與婆娑。珠簾披毳衲。玉笛臥漁蓑。

蝶戀花 悲秋

秋氣悲哉秋景肅。引出秋聲。夜到西窗哭。聚族新憂無計逐。躊躇獨去逃深屋。楓  
自飄紅榆自綠。蟋蟀莎雞。爭唱涼風曲。雁陣驚寒音斷續。披衣起寫相思牘。

又 書悶

雨雨風風飄曲院。點點丁丁。滴碎柔腸斷。聽說闌珊春又半。無端惹起傷春怨。料  
峭輕寒猶拂面。況是啼鳩。日向愁人喚。司馬青衫紅淚濺。倚闌惆悵綦巾伴。

又 弔返生香

彤管不隨春夢度。留與人間。啼哭相思句。一本青編紅淚註。離魂縮入香奩住。髣髴  
鬢真真紙上語。爲雨爲雲。飄渺無憑據。行到吳江楓落處。自攜一葉歸家去。

又 寒夜

鐵作衾。裯冰作枕。天意蕭條也。學人情冷。薄酒三盃容易醒。轆轤萬事心頭滾。數  
盡銅壺玉漏永。茅舍荒雞啼斷。陽關引。淚點雙眸。開炯炯。紙窗浸破霜花影。

一 剪梅 夜落金錢花

曉風殘月過三生。風裏呈身。月下歸魂。自憐薄命六銖輕。憔悴黃裙。冷落紅塵。一  
家姊妹兩般分。夜合隨君。夜落隨君。春光真不值分文。雖有錢神。難買花神。

又 花燭詞

何物風流白面郎。粉捏何郎。香和韓郎。天教撮合紫雲娘。玉琢蕭娘。錦製蘇娘。翠  
管催成宮樣妝。山畫眉妝。雲想衣妝。銀燈低照合歡牀。絃配琴牀。蒂並花牀。

又 王氏孿生子同夜成婚用前韻

五綵雙纏午未郎。伯稽王郎。仲稽王郎。七香並駕杜韋娘。大婦珠娘。小婦瓊娘。一  
夜春風兩面妝。雪點梅妝。月照梨妝。鼓琴鼓瑟喜連牀。坦腹東牀。交臂西牀。



好女兒 佳人

一捻脂紅。百和香濃。半醉嬌聲半醒態。在坐彈鬟雲。步搖佩玉。臥曲鞋弓。斜睇檀郎不語。誰慣汝。漫留儂。問此處、不留何處去。道朝上秦樓。晚游洛浦。暮宿巫峯。

又 泥美人

彼美人兮。半而風姿。誰向妝臺描五色。有顧愷傳神。何郎傅粉。張敞修眉。可惜紅顏黃土。立而望。是耶非。問若個、小名君識否。是罷舞西施。停歌子夜。不笑褒姬。

漁家傲 漁父

天下滔滔皆是也。風波滿地江河假。鼓枻行歌君莫訝。誰知者。離騷莊子吾其亞。二書皆有漁父一篇。一尺篷舟雙槳打。綠蓑青笠人如畫。潑刺黃魚穿柳掛。收綸罷。提壺閒共樵夫話。

又 春閨

夢鎖重樓春信杳。綵絲偷把花魂釣。籠內鸚哥沒緊要。頻嘶叫。牆角海棠誰折了。

左右懶妝和悶倒。上裙蟾子驚人跳。作怪鴉頭扯謊報。才郎到。愁眉錯對菱花笑。

又 題沈關關繡顧茂倫濯足圖

我夢吳江煙水皺。綸竿擬挂垂虹口。不道逋翁濯足久。枕且漱。滄浪一曲天如斗。深院玉人間譜繡。粉香妙寫溪山友。宛轉綵絲盤素手。林下秀。小名獨占毛詩首。

定風波 納涼

不着衣衫不掃妝。天邊趙盾逼人忙。安得芳姿乞作婢。喚至。手將團扇扇王郎。卻羨摩訶池上路。行去。花梢口吸露珠涼。攜手歸來竹簟睡。枕臂。玉魚吐出口脂香。

蘇幕遮 塞上二首

朔雲寒。邊月苦。霽栗西風。吹亂黃沙舞。夜半雪深三尺許。氈帳駝峯。倒載琵琶女。打圍來。圈地去。銀管炊煙。茶煮烏羊乳。蠻府參軍窮塞主。匹馬隨他。看射南山虎。塞垣長。寒信早。畫角鳴鳴。吹破霜天曉。一陣哀鴻殘月小。夢繞南雲。淚溼征衫老。拄青山。吟白草。燕雀排衙。公事彈琴了。又報黃旗前隊到。手板匆匆。走馬遼西道。

又 行旅用范希文韻

雪花天泥滑地。漠漠同雲壓破山頭翠。山接平蕪田接水。望斷村煙。只在青天外。五更愁。千里思。茅舍孤燈。草草留人睡。放着枕頭沒處倚。角角雞聲。啼出思鄉淚。

又 徐石兄卜居徐莊

鄭公鄉。梅尉市。安石墩頭。王謝爭端起。誰似南州徐孺子。天付吾廬。預注高人里。十三經。廿一史。架屋堆牀。嘯詠烏皮几。竹舍茅廬何陋爾。君子居之。卽是名山水。

怨東風 客思

蒲葉端陽寓。又看銀河渡。江山何事苦留人。住住。住。破屋頽垣。古槐荒草。滿庭秋雨。泥滑長安路。馬首無停處。一鞭落日又西風。去去。去。茅店孤燈。故鄉回首。夢中雲樹。

又 旅悶

秋暑蠅成陣。西日長如閤。無聊所事不宜人。悶悶。薄酒初醒。孤燈半滅。殘書獨枕。

信。愁縷縈方寸。華髮添雙鬢。無端讀史更悲歌。恨。恨。劍廢荆軻。騅亡項羽。弓藏韓

風中柳 和孫夫人韻

郎上長安。怎好說些煩惱。但叮嚀馬蹄芳草。自來月下。把淚痕偷告。夢兒中教郎知道。一紙家書。不覺低鬟微笑。報平安歸期尙杳。金釵翠鳳。送香車須早。怕春去燕殘鶯老。

又 題沈耕道東軒又一體

楓落吳江。一望煙波凝綠。問東軒誰家茅屋。南窗叢菊。北窗修竹。倚胡牀酒香茶熟。漁父相逢。應許菰蘆借宿。扣舷歌離騷一曲。烽煙滿目。荆榛滿足。任瀾翻長安棋局。

行香子 春暮

紫陌金車。綠浦蘭橈。共追尋大地芳華。三分春色。分與誰家。有一分山。一分水。一分

花。雨打簷牙。月落窗紗。恨韶光、轉盼天涯。小庭寂寞，底事爭譁。是一聲鶯，一聲燕，一聲鴉。

又 小園漫興

一个敦丘。一个泥溝。小經營、水尾山頭。煙霞舊管，草木新收。有杏花春，荷花夏，菊花秋。萬里封侯。四海登樓。問何如、樵斧漁鉤。主人高臥，有客來遊。是酒劉伶，詩李白，夢莊周。

青玉案 無聊

江城蕭索愁如此。門無客、牀無史。歌舞無人能作伎。無花無酒，無山無水，大抵皆無耳。旅人卻喜閒無事。只有夢來長伴爾。夢醒空題詩一紙。不如歸去，縱然寂寞，萬事看家裏。

江城子 清明旅思

江城佳節也清明。喜新晴。午風輕。寡柳孤桃，妝點可憐生。羅襪繡鞋人不見，空辜負，

滿堤青。客游隨分踏莎行。冷旗亭。隔花屏。無限家山綠水畫船橫。寶馬雲塵香過處。看玉手。撥銀箏。吳門是日虎丘看會士女駢集

千秋歲 感舊用少游韻

落花簾外。點點殘紅退。雲穗亂。風箏碎。愁拈翡翠管。恨拆鴛鴦帶。薄倖煞。燕兒難捉。鸚哥對。夢想瑤臺會。繡被同舟蓋。錦字杳。遺香在。星移銀漢斷。雨散巫峯改。魂去也。化成精衛填青海。

又 午日祝江明府

交通能賦。夢筆如風雨。采杜若。瀟湘浦。驅車越嶠遠。岸幘吳山暮。衙放了。錦帆花月迎明府。佳節逢端午。勝事傳三楚。繫綵線。穿菰黍。壽盃菖葉酒。樂語離騷句。謳歌者。芙蓉江上喧龍鼓。

又 壽何湘來

深衣革履。道貌如秋水。揮玉塵。依香几。心空四句偈。目擊三爻理。蒲團上。臥遊五岳

華胥睡。今日長筵會。戲彩高堂喜。葦綠舞。飛瓊吹。洪崖酌鶴頂。黃石羞麟髓。謹謝客。先生笑飲茶而已。

又 壽徐太夫人

人間天上。富貴真無量。三鼎甲。同臚唱。五花封邑誥。九節延年杖。稱萬壽。鸞臺鳳閣。新官樣。滿屋黃金榜。滿座青綾障。藻綬舞。暈衣颺。兒觴浮玉酒。婦饋連珠醬。福備矣。蓬萊王母猶謙讓。

風入松 寒鴉

呀呀掠盡碧天寒。墨影滿青山。太和門外常相見。烏衣隊爭點朝班。應笑西風哀雁。銜蘆辛苦榆關。槎枒枯樹倦飛還。一幅畫圖間。誰憐羈旅金閨客。烏啼夜。歸思闌珊。借問幾時頭白。早看改了朱顏。

祝英臺近 憶別用稼軒晚春韻

玉爐殘。銀燭暗。畫幟維南浦。黯淡東風。早灑淚痕雨。惱他順水船兒。幾株楊柳。甚力

把、征帆拴住。空相覷。欲將心事叮嚀。題多總難數。獨夜思量。記起枕邊語。算來萬種春愁。妾擔不起。分一半、與郎隨去。

一叢花 游朱氏園亭

江村踏踏半平沙。木槿縛籬笆。誰引劉郎來洞口。隔牆見、人面桃花。數曲欄杆。幾條書畫。也算小山家。  
花名人面桃 主人白髮話煙霞。虛閣倚風斜。池邊指點平安竹。穀雨近、芍藥抽芽。新出笏尖。舊藏桂子。撮合點新茶。

金人捧露盤 盧龍懷古

出神京。臨絕塞。是盧龍。想榆關。血戰英雄。南山射虎。將軍霹靂吼雕弓。大旗落日。鳴笳起。萬馬秋風。問當年。人安在。流水咽。古城空。看雨拋。金鎖苔紅。健兒白髮。閒驅黃雀野田中。參軍岸幘。戍樓上。獨數飛鴻。

最高樓 漫興

拋官去。乞得小山居。假仰此生餘。何用食爲十斛麥。未之學也。五車書。時還讀。亦已



種則何如。待討个漁童名便了。再配个樵青名大好。賽赤脚。勝長鬚。奴更養奴千樹橘。婢還釣婢百頭魚。挈山妻。同稚子。且相於。

慕山溪 夏興

登樓極目。又見斜陽下。遠近兩三峯。一點點。翠眉如畫。鶯簧蟬鼓。楊柳舞輕風。人閒暇。天瀟灑。惆悵如何夜。白衣蒼狗。閱盡雲真假。今古總悠悠。歎舉世。塵埃野馬。青天難問。搔首且歸來。沈醉也。高眠罷。月上葡萄架。

意難忘 元宵蘇城初撤防兵張燈甚盛

春色佳哉。報吳宮花柳。羯鼓方催。羽林千騎去。華屋萬家回。羅帳地。錦衣街。燈火上樓臺。看滿城。星橋高揭。火樹叢開。月明車馬如雷。有舞旋鮑老。歌打洪崖。香塵移畫鳥。玉燭裊金釵。簾幌下。影徘徊。聽笑語。談諧。百忙裏。鬪成燈謎。擲與郎猜。

滿江紅 偶覽稗史載王文成夢郭景純極言王導之奸敦之反導陰主之也

因爲賦此

好个夷吾。渡江後、久窺神器。誰更念、神州未復。江河頓異。堪笑一生蘇武節。曾無半點新亭淚。問亂臣、賊子出臣家。誰之罪。王與馬久分據。敦與導還同計。算敗終爲相。成當爲帝。漫惜伯仁由我死。太真拔舌斯何意。歎誰將、趙盾弑君看。書其事。

又 感遇

我醉欲眠。且收了、眼光青白。分付與、死便埋我。陶家之側。天下山川吞八九。腹中人物容千百。任諸君、拍手笑狂生。乾坤窄。破面鬼。焦頭客。烏帽吏。黃巾賊。問何人請劍。何人投筆。我夢化爲蝴蝶舞。醒來敲碎珊瑚缺。歎一腔、熱血灑何時。青衫溼。

又 生日自題小影二首

鑄錯難成。空贏得、頭顱如許。君不見、此中有鬼。英雄無主。世事夢迴關塞月。文章淚盡瀟湘雨。歎茫茫、宇宙此身多。無歸處。山嶽裏。聊容與。竹林下方延佇。但看他白眼。科頭箕踞。背後好遮王導扇。手中只少漁陽鼓。攜一盃、自祝畫圖前。魂相語。小像科頭跣足坐竹林下童子執扇于後

甚矣吾衰。誰畫出、秋風蒲柳。須信道、相君之面。不過村叟。車蓋鼓吹。今夢覺。空山晏坐。搔童首。問何人、不着鸚鵡冠。惟君否。且避暑。頻揮手。謹謝客。休開口。祇先生生日。歸而謀婦。半臂纔更一斗麵。百錢恰買三升酒。對此君。爛醉仰天眠。看蒼狗。

又 思隱二首

寄語青山。爲我築、數椽茅舍。更計較、鑿斯池也。衡門之下。屋後十弓放筍竹。牆邊五畝栽桑柘。還留些、隙地種梅花。依臺榭。北海釣。南山射。東墅弈。西園畫。有鄰翁來往。雞豚春社。笑問老妻能去否。蒿簪藜杖歸休罷。但囊中、尙乏買山錢。從天借。袞袞諸公。看朱紫。白頭隨駕。儘讓與、蠅頭蝸角。冷盃殘炙。夫子漫勞冉有僕。小人請學樊遲稼。向深山、好作古田家。羲皇話。松菊徑。瓜藤架。麋鹿柴。魚蝦汊。且醉吟高臥。及時閒暇。稚子浪尋青草鬪。老夫合受黃鸝罵。倘城中、有客訪吾來。關門謝。

又 上巳旅思

天朗風和。是昔日、蘭亭春社。恨不見、一時名士。烏衣王謝。光祿文章曲水讌。子山馬

稍華林射。到吾徒、意氣向誰人。都休罷。四海事歸耕稼。五嶽志銷婚嫁。但短衣長  
鋏。棲遲傳舍。醉去行歌城闕上。醒來坐嘯牆籬下。聽大江、滾滾客心悲。流日夜。

又 余淡心初度和梅村韻

對酒當歌。君休說、麒麟圖畫。行樂耳。柳枝竹葉。風亭月榭。滿目山川汾水雁。半頭霜  
雪。燕臺馬。問何如。變姓隱吳門。吹簫者。蘭亭禊。香山社。桐江釣。華林射。更平章花  
案。秤量詩價。作史漫嗤牛馬走。詠懷卻喜漁樵話。看孟光、把盞與眉齊。皋橋下。

又 倦游初歸顧菴繹堂處實既庭枉集草堂用顧菴原韻

梅雨廉纖。問昨夜、小池微漲。漫一笑。征衫乍脫。故園無恙。翠籜移來石徑側。黃鸝啼  
到桐陰上。更村村、煙火起農歌。田家餉。報有客。扁舟漾。看滿座。蘭亭唱。喜酒徒相  
對。欲傾家釀。卻暑但揮蟬雀扇。登高請進蒲桃杖。向西山、指點夏雲生。多奇狀。

又 卽席贈顧菴學士

二十年來。歎世事、塵霾波漲。喜老友、跳歸燕市。鬚眉無恙。皂帽幸辭遼海外。青衫還

泣溽江上。問榜門。誰是脫驂人。千金餉。且上下。隨流漾。予解和。公能唱。須澆開硯壘。洞庭春釀。屈指明年將半百。看雲取次從藜杖。又何勞。呵壁續離騷。箋天狀。顧菴長予一歲。明年五十矣。予堂名看雲。故用杜句。

又 卽席送繹堂憲副北上并寓都中同好

才子仙舟坐春水。溯湖新漲。從此去。黃河千里。布帆無恙。玉殿傳臚原日下。金門待詔還天上。料至尊。早辦大官廚。爲卿餉。斜日下。雕旗漾。芳草路。驪歌唱。送關山。牙檠一樽清釀。使客自騎沙苑馬。野人獨倚柴門杖。倘諸公。問訊僕何如。窮愁狀。

又 飛濤祠部辭疾不至柬以訊之

太息丁生。出塞去。雪堆沙漲。謝弋者。遼東歸鶴。令威無恙。浪跡偶來皋廡下。端憂卻據胡牀上。正提壺。盧橘滿林黃。堪分餉。端午後。蒲葵漾。麥秋至。螻蛄唱。君奚爲高臥。欲逃村釀。游子渡江不用楫。健兒躍馬寧須杖。劇何堪。新婦閉帷中。婆婆狀。

又 憶別阮亭儀部兼懷西樵考功湖上

我發蕪城趁競渡。一江風漲。爲寄語。池塘春草。阿連無恙。白舫已乘東冶下。青驄尙躍西冷上。問錢塘。可接廣陵潮。雙魚餉。採蓮棹。湖心漾。折柳曲。橋頭唱。辦十千兌酒。餘杭新釀。王子正招緜嶺鶴。孫登也策蘇門杖。待歸來。贈我兩峯圖。空濛狀。時阮亭有秦淮之役。西樵與孫無言俱。

又 寄呈荔裳觀察 西樵荔裳先有和詞故及之

北望盧龍痛精衛。魂填溟漲。何幸得。南樓老子。下官無恙。千里相思風雨夕。十年重過江湖上。笑故人。祇有一盃萼。爲君餉。飛蝶夢。游絲漾。騎馬地。朝雞唱。算半生白髮。星星愁釀。笠澤煙波宜載酒。泰山日觀聊攜杖。再休提。宋玉賦。秋風悲哉狀。

又 苦雨書悶

積雨東籬。雷隱隱。水雲時漲。休夏好。繩牀藥臼。消磨微恙。讀史喜觀秦楚際。詠懷高話羲皇上。笑飢來。驅我走天涯。無人餉。愁何許。懸旌漾。悲未已。吹篴唱。怪衆人皆醉。覆盃沈釀。勘破黃梁道士枕。打開白業瞿曇杖。咄何來。修竹彈甘蕉。紛投狀。

又 顧菴復和八首見示賦此答之并貽既庭

何物文心筆陣老。墨池飛漲。賈餘勇。吟成八詠。撚髭無恙。公子七哀傳鄴下。大夫九辨賡江上。驚從而和者。曲彌高三縑餉。倒詞峽。真潢漾。短歌闕。長歌唱。只江郎才盡。渴求盃釀。我倦欲投斑竹管。公豪任奪青藜杖。問紅箋。填得許多愁。難於狀。

又 春夜集淡心齋和韻

乘興而來。冒雨過。徵君之宅。相對者。詩家三老。酒徒八伯。秉燭夜游行樂耳。一生能着千雙屐。看勝爲可喜。敗欣然。如子弈。痛飲也。腸千石。劇談也。脣三尺。算樽前只少紅兒催拍。便唱鷓鴣休聽好。坐中半老江南客。問阮公。醉後眼如何。全飛白。

又 壽黃處安中書

問客何來自閩海。薄游吳苑。忽舉目。天涯烽火。故鄉中斷。澤國江山驚戰鼓。秋風零雨飛賓雁。正登樓。作賦楚天高。愁王粲。十月節。寒花綻。千人石。清樽讌。喜今朝。初度。親朋相見。回首紫薇舊夢杳。放懷白髮餘生健。但摩挲。毛穎老中書。加餐飯。

又夢

日日愁生。賴有此枕中之夜。我夢見大千境界。無非假者。花月春江。堪舞蝶。煙波瀚海。能騎馬。儘神遊。萬里恣逍遙。闌風野。邯鄲道。何瀟灑。陽臺下。何妖冶。但逢場作戲。機心都化。烏有先生相對好。亡何鄉裏歸休罷。奈一聲雞唱。又天明。愁來也。

淒涼犯 寒更

愁人影共。殘燈語。夜寒何處尋夢。淡月微籠。酸風乍咽。嚴更徐動。孤衾自擁。聽聲聲。如迎似送。想依稀。長歌短泣。數闋譙樓弄。多少朱門客。錦瑟彈蛟。玉簫吹鳳。淒涼伴我。吉丁當。打入心孔。斷續隨風。又接着。曉鐘鳴空。問雞人。銅壺漏水幾點凍。

水調歌頭 贈隱者

左手招明月。右手引清流。遂棄人間俗事。長伴赤松遊。春與猿兮吟嘯。秋與鶴兮飛舞。八百歲春秋。夜授南柯守。朝拜酒泉侯。攜玉杖。吹鐵笛。酌金甌。醉鄉高臥。掉頭那問帝王州。自謂羲皇以上。無論晉魏之事。涓子不能儔。我亦問津者。願汎武陵舟。



又 解嘲

卿自用卿法。吾亦愛吾廬。一生着幾兩屐。安用美哉車種得東籬五柳。飲得東皋五斗。此外又何須。已夢我爲蝶。誰識子非魚。書咄咄。稱好好。解如如。不如說鬼。妄言妄聽。莫辭無人貴及時行樂。我也逢場作戲。軟飽黑甜餘。莫問九州事。且臥一牀書。

又 中秋

秋月忽然好。游屐滿山前。遠觀燈火樓閣。萬點小星懸。逐隊王孫公子。繞坐歌兒舞女。人壓看場圓。獨有悲秋客。白眼對青天。千古事。一場夢。總堪憐。吳宮明月在否。興廢幾何年。無限朱門綺戶。也有竹籬茆舍。皓魄一般全。休待玉簫徹。我欲臥漁船。

又 醉歌

左手把盃酒。右手握刀鐔。快哉吾欲浮白。醉卽舞雙丸。讀罷一編遺史。斷盡千秋公案。怒髮每衝冠。椎鐵擊秦政。搗鼓罵曹瞞。而今事。增一笑。總般般。人情大抵難測。翻覆似波瀾。休問英雄豎子。富貴合輸公等。已矣復何言。仰視四天白。長嘯倚欄杆。

又 平遠堂雨中送春

山上雲爲雨。山下雨爲煙。不分煙與雲處。祇聽雨潺湲。舊雨送春歸去。今雨倩人留住。住去住總堪憐。春入遠天外。人立晚風前。試煎茶。宜折柳。共題箋。干戈未定。樂酒今夕惜流年。爲問千人石上。妙舞嬌歌何處。空谷一詩筵。日暮下山去。騎馬似乘船。  
途中大水

又 送陳次山

三月鶯花節。送子出青門。我向離亭貰酒。彈汁染衫痕。河畔萋萋芳草。陌上依依楊柳。極目總銷魂。往問廣川子。幾筴玉盃存。主人董氏。鬻鬚筆。攜榼具。貯壘樽。但讀離騷痛飲。醉卽舞青萍。試渡滹沱河北。還過邯鄲城下。慷慨滿乾坤。去矣陳驚坐。舌在不須捫。

滿庭芳 風雨夜懷卿謀

折絮天風。凍花側雨。薄寒新上羅衣。可憐人意。恰對可憐時。幾度思量往事。回首處。

風景淒其。難生受。黃昏院落。獨自怎支持。想伊人此際。籠香弄筆。翦燭吟詩。待扁舟相訪。夢到還迷。只聽數聲征雁。斷雲裏。叫過樓西。呼來問。又推深夜。不肯寄書飛。

又 游婁東張氏園

山出籬前。水周堂下。高軒插架朱藤。亭臺新綠。曲徑隱斜曛。正好清和天氣。黃鸝喚。遊女如雲。羈棲客。苦無柑酒。獨坐弔殘春。當年行樂地。青簾白舫。夜醉紅裙。聽鈿箏瑤管。歌舞芳塵。不見富平公子。樓中燕。空怨黃昏。湖山畔。蕭蕭松柏。明月照孤墳。

園有主人墓

又 偶語

甕裏醢雞。禪中蟻蝨。人生大抵皆然。蠻爭觸鬪。割據幾山川。多少移山填海。憑意氣。不肯由天。下場頭。總堪一笑。鼓罷戲文完。算浮生如夢。轉關得失。彈指悲歡。且不如高臥圖取奇緣。只恐夢中占夢。夢醒後。又費流連。都輸與。希夷老子。一覺便千年。

又 王煙客太常八十

七葉門風。三槐世德。先生作述無憂。筆精墨妙。名下更空儔。富貴公家自有。但稱壽、八十平頭。等而上、老彭八百。大樹八千秋。優游興不淺。西田倚杖。風月嘲謳。看兒孫戲綵。白馬青裘。笑問香山洛社。齊年者。犬斗同浮。吾家老與君成二。來往亦風流。家君同庚。故引杜句足之。

鳳凰臺上憶吹簫 夢亡友卿謀

玉樹生埋。香鉤殉葬。人間無限傷心。聽山陽鄰笛。淚破衣襟。長憶連牀對酒。燈影裏、淺笑微吟。斯人死。坐看卿輩。誰是知音。追尋。天邊去也。盼十二樓中。雁斷魚沈。甚風吹環珮。夢倚瑤琴。依舊壁人一對。攜手處、翠袖花簪。應歎我。關山搖落。鬢髮蕭森。

天香 詠龍涎香

雲氣盤山。雨痕黏草。海天遙識龍睡。細剪香涎。平分瑞腦。汎水滲沙同膩。煙鬢霧髻。髣髴見、織綃娘子。檀口唾花幾點。絲絲篆成心字。猶憶瑣窗半閉。裊金鳧、共消殘醉。惆悵遺芳夢杳。蘅蕪誰寄。聚窟返魂何處。空留下、餘薰舊鴛被。羸取鮫人玉盤珠。

淚。

漢宮春 觀演邯鄲夢

咄咄臨川。能現夢中身。而爲說法。邯鄲道上。一枕悲歡離合。青驢黃犬。好妝成。紅妻綠妾。等閒看。鬼門關外。何殊洛陽宮闕。休笑盧生癡絕。算一場春夢。大家收煞。黃梁半甌。炊過幾朝年月。曲終人醒。玳筵前。酒盃猶熱。又歸來。獨眠孤館。今夜應添白髮。

燭影搖紅 壽吳冰仙夫人

甲帳瓊臺。彩鸞初嫁。年華妙。紅窗窈窕。日無愁。但見嫣然笑。笑盡珠圍翠繞。誰解受、筆封墨誥。畫簾乍捲。香篆微聞。湘紈淡掃。金石摩挲。青編粉印看新稿。酒闌燈炮。憶當年。夢破巫山曉。應是胡麻飯飽。映桃花。風姿不老。拚試輕鞭。幾時搔背。麻姑烏爪。

又 題女士張采于衡棲集和來韻

地老天荒。悲歌不獨江淹恨。小庭風絮也關愁。林下重題韞。應付鶯花管領。好看承、  
車香障錦。胡然空谷。翠袖天寒。衡門棲隱。繡戶燃脂。彤奩占盡妝臺韻。斷腸哀怨  
爲誰吟。宛轉縈方寸。欲倩蕭郎寄問。早消除、風淒月悶。試拈湘管。愛劈鸞箋。疊成方  
勝。

聲聲慢 旅思用易安韻

花開柳閉。燕去鶯來。東君干甚休戚。一樣春風。二十四番消息。朝來又添細雨。大江  
頭。落潮偏急。春莫去。縱他鄉暫遇。故人曾識。休笑春光已老。看鏡裏、白髮數莖堪  
摘。苦把春風留住。怎能吹黑。空着枕頭一半。聽銅壺、淚點同滴。這時節、便夢中、人到  
也得。

夢揚州 客廣陵用少游韻

晚潮收。歎隋宮、花月都休。寒雨蕪城。綠楊三月如秋。市門十里黃埃滿。但往來、車馬  
星稠。紅橋畔。青樓底。誰人勾當春愁。追想樊川狎遊。報書記平安。廿四橋頭笑我

多情鬢絲禪榻空留。紗燈萬點歸何處。枉斷腸、錦瑟簾鉤。平白地、揚州夢醒。惱亂蘇州。

夢芙蓉 寒月

一般明月夜。最春園花裏。秋山林下。玉階如水。枕簟也消夏。三冬都告罷。殿額廣寒高掛。顧影無人。只天邊青女。相伴素娥寡。我獨徘徊旅舍。夢想遊仙。飄渺閬風野。冰丸一顆。晶色冷相射。御風疑羽化。何須歌舞臺榭。但買春醪。呼酒徒痛飲。編作客窗話。

玉蝴蝶 雪窗憶卿謀

浙浙蕭蕭瑟瑟。疏疏密密。整整斜斜。算有三分牆角。數點窗紗。響茅檐、風敲斷竹。迷野渡、月上平沙。浪相誇。瑤林瓊樹。種玉人家。嗟嗟。閉門高臥。羔兒無分。且喫團茶。翹首天涯。空吟冰柱憶劉叉。盼書郵、浮沈征雁。尋驛使、冷落梅花。問君家。剡溪不遠。可汎星槎。

又 賀高二亮納姬湖州

應是三生杜牧。深紅淺綠。再接花枝。正好珠璫珮解。金雀鬢垂。定情詩。早憐碧玉。小名錄。恰比紅兒。儘綢繆。描殘翠管。寫盡烏絲。相宜。綠衣方小。青衫未老。絳縷初飛。顧曲郎君。記歌娘子。按新詞。學秦箏。爭傳妾解。偷吳語。未許歡知。畫中人。五湖一葉。載到西施。

念奴嬌 午日旅思

葵花艾葉。依然是、前度端陽家數。菰米蘭橈。問甚處。弔望楚天雲樹。乳燕初飛。流鶯三弄。幾陣黃梅雨。飄零湖海。何堪蕭寺孤注。遙念寂寞紗窗。菖蒲翦了。黯停盃無語。別恨離愁添幾許。鬼病懨懨情緒。整日沈眠。夢魂無賴。不到長洲路。除非借取。畫船競渡歸去。

又 贈吳梅村先輩用東坡赤壁韻

江山如夢。歎眼前、誰是舊京人物。走馬蘭臺。行樂處。尙記紗籠題壁。椽燭衣香。少年



情事頭白今成雪。杜陵野老風流獨數詩傑。更聽法曲淒涼。四絃彈斷。清淚如鉛發。莫問開元天寶事。一半曉星明滅。我亦飄零。十年湖海。看雨絲風髮。何時把酒。浩歌同送明月。

又 和羨門韻二首

百年彈指。奈頭顱漸禿。肝腸如碎。飛將高皇時不遇。卻遇灞陵亭尉。感慨何爲。不如歸去。也學糊塗醉。文章九命。此生萬事難遂。眼看世態悠悠。西江有水。不到枯魚肆。脫了青衫披綠箬。且飽銀絲鮮膾。棄蟻亡羊。於魚得計。吾讀徐無鬼。人間不樂。相忘惟一回睡。

先生休矣。歎元龍豪氣。俯同羣碎。借問史公牛馬走。豈苦爛羊都尉。滿座貂蟬。狗偷鼠竊。偶爾乘天醉。何如尋取。當年初服堪遂。君見入市者乎。朝來駢足。日暮成空肆。損益盈虛都似此。所以步兵思鱸。紫綬耶叉。緋衣羅刹。羣小皆名鬼。署門謝客。主人今日鼾睡。

又 送孫無言歸黃山和顧菴韻

忽聞長嘯。是蘇門鸞鶴。遺音清絕。彈鋏歸來。樞具劍。更鑄山田耕鐵。手拍浮丘。吾廬偕隱。漫卷君卿舌。署門謝客。白雲無處停轍。回首花月揚州。幾年夢醒。暫賦蕪城別。騎鶴吹簫人在否。笑看迷樓煙熱。垂老生涯。首陽柳下。計較誰工拙。遲君贈我。三十二峯寒雪。

又 飛濤其年雲客既庭御之枉敍草堂和飛濤韻

古人安在。總上場優孟。下場翁仲。天壤之間。存我輩。聊爾一觴一詠。僮父左思。老兵阮籍。歌辨衙官宋。當盃行令。戲猜三兩橫縱。酒後耳熱狂呼。濡毫呵壁。欲把天公控。趁取吳宮春未老。甘與梨花同夢。銀燭方長。銅壺初滴。路近東西弄。諸君且住。牀頭尙滿青瓮。

又 飲梁宗伯蕉林書屋賦贈

疏簾清簟。正高臥。南面百城書屋。丘壑夔龍。權寄傲。勾當午橋松菊。白袷論兵。深衣

習禮總付漁樵曲。東山未起。中年聊寫絲竹。今夜河朔開樽。止談風月。醉掃愁千斛。咫尺長安君不見。頃刻浮雲翻覆。紫禁宣麻。黃扉視草。早叶金甌卜。江南野老。夢留東閣樺燭。

又 歸興

迴車哭罷。忽仰天大笑。冠纓索絕。大抵長安局似弈。正打轆轤雙劫。東閣除書。西臺彈事。早暮分涼熱。一言以蔽。無財不可爲悅。君看游客紛紛。吹竽鼓瑟。槐柳森齊列。何異乞兒爭向火。轉眼灰飛煙滅。或問先生。何爲至此。僕亦無言答。掉頭歸去。閉門獨臥寒雪。

又 題席次文出獵圖和梅村韻

是何年少。向長城飲馬。沙場結客。臺上呼鷹壚下醉。尙弄數行題墨。投筆歸來。東山射虎。大羽猶能沒。畫圖留取。黃雲萬里秋色。我亦蠻府參軍。短衣長劍。喜逐將軍獵。回首盧龍成舊夢。變作陽關三疊。仰屋看書。叩門乞食。恨少朱家俠。相逢痛飲。頭

顛如許堪惜。

又 詠米家燈和其年韻

尙書堂上。忽鸞飛鳳舞。花枝分亞。起剔銀燈相視笑。認得米家書畫。木偶兒郎。弓腰仕女。游戲無真假。針神妙手。恰從阿堵傳寫。正是月滿千街。星移萬點。天放元宵夜。遙想漢宮傳蠟燭。光照綵樓縹瓦。玉漏停催。瓊簫慢弄。暫醉珠簾下。燕臺勝景。翦燈重譜新話。

又 羨門五十一歲夫人四十九歲十月得子名曰百齡是可賀也調百字令  
世間奇事。看木公金母。合成百歲。夫婦平分大衍數。陽進因而陰退。進若有餘。退非不足。損益剛相配。乃生男子。美哉則百之瑞。以是名曰百齡。在百家姓上。百官圖內。好似百花蘭桂發。百鳥鸞鳳出類。書讀百篇。財盈百寶。百祿天生備。賀君百喜。百壺索取同醉。

桂枝香 月下

晚風搖曳。漸吹落殘鳥。素娥睡起。驚看鏡殿堆玉。晶宮映水。井梧颯颯。敲窗紙。怨鴻啼蘆花岸裏。黃昏院落。畫欄獨倚。寸心如死。秋色三分將盡矣。更寒煙滿目。疏鐘第幾。四壁蟲聲助子。歎息而已。南飛烏鵲無枝止。笑歸來。昨非今是。今夕何夕。舉盃邀月。陶然醉耳。

又 詠蟹

漫尋爾雅。見介士橫行。郭索盈野。最愛紺甲青匡。金膏雪炙。吳江公子腸。應斷甚西風。酒旗瀟灑。相逢何處。沙汀漁火。村莊茅舍。記卓女。長卿初嫁。爲彭越。低眉停箸不下。我亦螭蟬。暗想妝臺愁把。香橙手劈。吳鹽細。欲持螯。誰傳盃罍。霜華滿地。黃花已老。玉人去也。時予悼亡

齊天樂 詠蟬

小園疏柳斜陽晚。淒然數聲低喚。吸露頻啼。迎風乍咽。迸出悲絲急管。宮商偷換。和五夜寒螿。一天哀雁。恨殺螳螂。驚回焦尾。鴟絃斷。當年齊女曾變。故宮衰草外。何

限秋怨。羅袂無聲。玉墀塵滿。落葉幾番零亂。餘音宛轉。想動影低鬟。妝殘簾捲。杜甫  
山妻。夜飛人不見。予去歲九月病中詞。有不見夜飛蟬。山妻劇可憐之句。今年九月婦  
亡。亦詞識也。

水龍吟 楊花和東坡韻二首

美人滿院紅妝。綠珠忽向高樓墜。非雲非雨。非朝非暮。一天春思。繡閣嬌慵。厭他輕  
薄。重門深閉。奈偷從牆角。窅來窗畔。人前故眼羞起。可惜風流掃地。賴多情。青苔  
牽綴。生成薄命。飛來又被。鸚哥啄碎。一縷殘魂。浮萍再世。去隨流水。想深宮拾得。踏  
歌連臂。有人垂淚。

捲簾但見飛花。何時開起。何時墜。玉人如夢。隨風遊戲。幾多愁思。爲問章臺。青青在  
否。宮眉應閉。剩蠻腰解舞。飄颻上下。還學三眠三起。分付雕梁燕子。好銜將。小巢  
縈綴。謝娘纖手。搓來捏去。團成復碎。忽地傷心。人間天上。落花流水。倩軟綿堪拭。此  
中洗面。只餘清淚。

又 詠白蓮

誰家淥水銀塘。淩波扶出霓裳女。天然素面。冰肌玉骨。暗香銷暑。採向吳宮。畫船相傍。盈盈解語。看碧天涼夜。風清月曉。長依白鷗爲侶。幾處紅衣亂舞。翻嫌他脂勻粉澹。蓬茅綦綺。鉛華洗盡。淡妝偏嫵。最恨西風。斷魂憔悴。幾番秋雨。歎隨波敗葉。飄零祇滴淚珠如許。

瑞鶴仙 慈仁寺松

歲寒尋老友。祇蕭寺喬松。交情耐久。吾衰甚矣。憊故人喜相見。支離羣叟。春風桃柳。滿長安。紅爭綠鬪。讓髯公。沐雨梳霜。到底青青依舊。安否。九達闕處。五市開時。貨財輻湊。衣冠奔走。灑斯辱。澆盃酒。勸怒濤休吼。晨鐘暮鼓。且共佛燈。斷守。更呼來。鶴唳長空。一天星斗。

石州慢 和高季迪韻

花信頻催。二十四番。雨飄風灑。多情最是風流。楊柳瘦腰一把。樹猶如此。何況人倚

闌干游絲和夢愁牽惹。淚斷錦迴文。借烏絲重寫。姚冶。玉人應在燕子樓中。湘簾垂下。記得青鬢微笑。紅牙輕打。而今寂寞。空想院落秋千幾時再駐。牆頭馬。驀聽杜鵑啼。道東君歸也。

拜星月慢 惜別

香霧雲鬢。清輝玉臂。雙照淚痕猶在。忍令分攜。怯空房難耐。無人處。生怕落花風起。輕把檀痕吹壞。惜惜情懷。料身中不快。問何曾。走馬章臺內。又非因帶甲榆關外。何苦東去西飛。判相思分界。看彈琴。誰寫芙蓉黛。伴薰香。莫綰鴛鴦帶。只好教。籠裏鸚哥。呪那人無賴。

花犯 西山晴雪

遍皇州玉龍紛舞。千門六花繞。燕臺高眺。見一點西山。裝作瓊島。翠微低處斜陽照。朔風飄不了。掩映着。瑤林琪樹。煙中飛白鳥。我來薊丘。笑行囊空餘幾兩屐。臥遊難到。瀟橋畔。趁不上。剡溪一棹。翻追憶。故園雪夜。萬峯裏。梅花消息早。只好倩。小樓



鐵笛吹霜天角曉。

喜遷鶯 立冬

朝看月令。是律中應鐘。神司元冥。寒日模糊。陰風凜冽。一掃秋光無剩。誰遣倪迂妙手。寫出灰堆冬景。茅簷下。聽數聲鐵馬。冬冬相應。長安多肉陣。鳳炭檀爐。低唱羊羔飲。閉戶先生。擁書枯坐。只好敲冰煮茗。莫怪天公作惡。雅稱玉堂官冷。青鏡裏。驚漫空霜雪。又添雙鬢。

綺羅香 詠香

鬢髻初梳。誦襟乍脫。文几鵲爐先置。銀葉如錢。半晌篆煙纔度。繞紗幮。爲雨爲雲。罩繡閣。非花非霧。更憐他。入袖穿裳。徐徐引到銷魂處。玉人體。自生香。借三分迷迭。助成佳趣。心字裝成。還向月中微步。識好事。喜結雙絲。訴幽情。私添一炷。付鈿盒。小玉珍藏。莫放郎偷去。

二郎神慢 李笠翁招飲觀家姬新劇

百花巷。笠翁寓所。乍小隊。花神來降。看面似芙蓉。眉似柳。點素額。簷梅初放。蓮襪榴裙。花下舞。桃葉渡。采菱新唱。湘簾捲。蘭香暗度。風動羅衣微颺。惆悵。分明仙樂。大羅天上。聽趙瑟秦箏。吳苑曲。諸姬皆產燕趙。妒殺粉君脂相。自笑周郎愁眇眇。好央及。燈花剔亮。予短視。故云。怕飛逐彩雲。牢繫鸞凰。重重綃帳。

歸朝歡 澄海樓

家在芙蓉江畔住。兩槳沙棠。桃葉渡。天風吹我北溟來。芒羊一望無窮處。漫將秋水註。此時好讀玄虛賦。倚危樓。不聞呼嘯。滿耳驚雷雨。卻怪馮夷緣底怒。白馬乘潮鳴急鼓。鮫人又喜起樓臺。璇宮出市珊瑚樹。風鬢霧髻女。戲彈寶瑟來迎汝。趁漁舟。一聲欸乃。送我蓬壺去。

望海潮 觀獵

遼西重地。東臨碣石。朔風塞馬蕭蕭。臺上呼鷹。磧中走狗。千人弓箭橫腰。牙纛抗招搖。看雕翎落處。雨血風毛。日暮山空。寒烏飢兔正悲號。將軍坐地分曹。有健兒行

炙。美女彈槽。再打一圍。揚鞭歸去。戍樓畫角聲高。何似霍嫖姚。笑當年猿臂。射石空勞。顧語參軍。醉中磨盾好揮毫。

望湘人 閨信

自君之出矣。獨宿空房。繡衾慵爇龍腦。背着燈兒。側身帳底。多半和衣睡倒。簾幙花香。欄杆燕語。月明如曉。好良宵。滿院春風。不見斷腸人到。乍夢被郎呼去。向畫屏深處。輕憐低笑。正勾當相思。一响銷魂未了。無端撼起。流蘇微動。驀地把人驚覺。閒滋味。費盡思量。私下報郎知道。

風流子 醉中作

吾生祈一夢。將進酒。結客少年場。願貴比五官。芙蓉車蓋。豔齊三婦。玳瑁釵梁。封侯事。建牙刑白馬。挽箭射黃鷹。鼓吹歸來。角巾辭去。拍肩秦華。濯足滄浪。醒來都不。是看衣鶉馬狗。兩鬢秋霜。贏得一官孤竹。三徑柴桑。只宋玉招魂。偶逢神女。相如草賦。曾視君王。且向樽前醉也。長短歌行。

疏影 黃梅花

花神戲法。向園林翦綵。點綴殘臘。磬口玲瓏。荷蓋團圓。髻髻香生金鴨。前身本是江妃種。催妝早。先來一霎。恰阿嬌。初染鵝黃。纖指欄邊偷捻。耐盡霜侵雪壓。愛自然幽雅。不近蜂蝶。我夢羅浮。錯認佳人。賺得翠禽嘈雜。當年倚袖天寒日。插蟬鬢。夜藏犀合。到而今。攜向紗窗。空有淚花凝蠟。

霜葉飛 黃芽菜

吾家老圃東籬下。曾將野菜修譜。但知春韭與秋菘。食薺腸還苦。今領略。長安雜俎。黃芽一把和鹽煮。覺入口甘香。似燕趙。佳人風致。冷淡如許。君看輦上華筵。金轡玉膾。誰向此君下箸。偏生我輩一條冰。堪作冰壺侶。任嚼出。宮商徵羽。只愁面色平分取。卻回思。故鄉味。千里萹羹。惟吾與汝。

宣清 玉河冰

黑帝乘權。爰命波臣。晶宮大開冰屋。砌黃河。粉壁萬層。掩青江。銀練千幅。曉入金門。

環橋一望果然如玉。正平鋪鳳樓前。寒光直射朝旭。天子詔凌人。宜藏北陸。百官賜飲足。縱鏤樹成花。凝簷作筍。天畫文章。未必重瞳娛目。念鄉村、荒田野哭。問邊庭、鐵衣起粟。何時泮澌。借太液恩波。布春風、暖生寒谷。

沁園春 送窮

咄咄窮來。冰氏主人。勸汝千盃。怪子雲高閣。一麾不去。昌黎上座。三揖仍回。餓倒鬻桑。凍穿東郭。拊手擲揄笑我該。何相厄。出門如有礙。閉戶如呆。特憑毛穎符牌。擇吉日車馬走天涯。向箆瓢巷裏。生前可住。首陽山下。死後堪埋。耕硯爲田。積書作庫。今後休將壁立猜。窮唯唯。吾從此逝矣。贈子多財。

又 釋愁

試望愁城。天地無光。壯士吞聲。奈悲秋宋玉。不堪長恨。傷春杜牧。未免多情。萬斛紛來。百端交集。方寸之心難與爭。歎人世、黯然銷魂者。惟此爲深。僕今奉教先生。毋勞爾神兮。搖爾精。使王喬與我。遨遊而逝。黃公與我。歌詠而行。寂莫爲牀。玄虛爲宇。

叱咤驅愁服上刑。愁休矣。逝將適樂土。實獲吾心。

又 遣病

若有人兮。蒲柳風姿。憔悴支離。恨雍容司馬。拋殘賦草。風流沈約。瘦損腰肢。扁鵲低頭。巫咸束手。丈室維摩亦皺眉。數其罪。合先誅二豎。後斬三尸。飄然與彼長辭。況苦口良方。我有之。倩冀州坐客。揮毫草檄。少陵野老。信口吟詩。左援桐君。右攜歡伯。楚客高談七發詞。渙乎一。泯然其汗出。是乃良醫。

又 反止酒有序

辛稼軒有止酒詞。然吾輩酒狂也。又當此時。此中雅宜此君。豈忍囚酒星於天獄。焚醉月於秦坑哉。

陸醕前來。枚卜功臣。衆口交推。彼從事齊州。清爲聖德。督郵鬲縣。濁亦賢才。堯舜千鍾。仲尼百斛。子路寧辭十榼陪。髡一石。更先生五斗。學士三盃。嘗聞上頓長齋。卽乘馬騎驢事盡佳。况卓家少婦。爲君滌器。楊家妃子。爲我持壘。山帶蘭陵。水連桑落。

麴部分茅議允諧。咨汝醕。俾侯醴泉郡。曰往欽哉。

又 罪酒有序

余既反止酒。數與醕往來。稱肝膈友。已而病憊。嘔出心血。醫者曰。是酒之罪也。天有酒星。故傾於西北。地有酒泉。故缺於東南。人有酒腸。故傷於中心。若婉彼狂藥。亦如劉將軍負鍤從之耳。予惕然。吾待醕不薄。奈何負我。請絕交。於是復召陸生而告之。

醕若毋聲。以酒爲名。乃罪之魁。算持蟹螯者。甕中就縛。吹龍笛者。水底長埋。金盞纔擎。玉山便倒。玩我真如兒戲哉。腐腸藥甚良。醪可戀。心腹當災。今朝焚了糟臺。又何問蓮花白玉盃。倘君將伐狄。臣當執御人。能擊杜。我願持鎚。草奪黃封。驅除綠蟻。主爵壺商賜自裁。醕不道。削汝懿侯職。以警將來。

又 夢卿謀有序

小春月夜。夢與卿謀作一夕話。有客二人。有酒一壺。酒後耳熱。卿謀賦如夢令二

闕示予。予讀竟。欣然和之。相視一笑。二客方苦吟。予已瞿然覺矣。初醒。盡能記憶。及東方既白。遂成恍惚。惜哉。數日後念此。反爲傷神。因紀此相寄。嗟乎。豈非所云如夢者耶。

有美人兮。攜手同行。其樂只且。喜化爲蝴蝶。中宵起舞。喚他啼鳥。野店提壺。一唱高山。再歌流水。聽者鍾期鼓者俞。長太息。曲高而和寡。其信然歟。顧君與我何如。彼天下紛紛。安足拘。歎故人千里。遠遺端綺。主人倉卒。遽贈文無。薰帶荷衣。倏來忽逝。烏有先生對子虛。開戶視。不見其處矣。搔首踟蹰。

又 題李鏡月廬游日記次西樵韻

奇絕青蓮。幾輛芒鞋。直踏匡江。向香爐峯下。呼來慧遠。珠簾谷口。吸出康王。五老婆娑。九雲縹緲。三疊流泉噴石岡。還識否。是廬山面目。仔細端相。小奚亟解詩囊。看搖筆高吟。字萬行。笑近騎白鹿。踢翻星渚。遠攜黃鶴。飛過潯陽。君已逍遙。僕猶惆悵。畫壁鳴琴寄興長。問何日。把驚人謝朓。搔首青蒼。



又 和阮亭偶興二首

無可奈何。舊事南柯。新恨東流。歎易變人情。幻如演戲。難猜世法。悶似藏鉤。閉戶無容。出門有礙。何況崎嶇歷九州。不堪者。看宮中狗監。關內羊侯。頭顱如許誰酬。但醉裏乾坤。恣拍浮。算冥冥高飛。于人無怨。悠悠行邁。謂我何求。蝴蝶前身。杜鵑今日。伯仲之間海上鷗。乃所願。學丈人荷蓑。男子披裘。

我所思兮。濯足清流。晞髮高岡。奈舉國侏儒。臣飢欲死。滿堂酒漢。公醒而狂。學劍不成。賣漿未售。肘後難傳。療恨方。除非是。學中山千日。夢到羲皇。覺來起舞淋浪。且讀破離騷。續九章。喜莊子逍遙。人呼以馬。左慈狡獪。或化爲羊。手弄雙丸。目空九點。竿木隨身。作戲場。今而後。從子虛隱矣。何有之鄉。

又 戒遊二首

子好遊乎。遊必有方。吾語子遊。惟輦上貴人。峨冠博帶。堂中公子。肥馬輕裘。十日交驩。千金解贈。主旣逢迎。客亦留。非然者。恐閉門不納。懷刺誰投。况君白髮盈頭。便

鼓瑟吹簫枉自羞。奈彈缺而歌。食終不飽。執鞭以御。富也難求。蓴鱸秋風。一官久棄。肯向侯門走馬牛。君休矣。聽數聲欸乃。雪夜歸舟。

我學淵明歸去來兮。請絕交遊。有草閣三間。久盟息壤。秫田十畝。將老菟裘。山水鄉鄰。梅花妻妾。小部聲音黃栗留。出門去。怕青天劍嘯。滄海珠投。而今金盡牀頭。縱舌在何辭。仰面羞。歎富貴才高。驕人易取。文章命薄。知己難求。乘興而來。塗窮則返。笑傲隨他呼馬牛。從今後。把世情看破。飄瓦虛舟。

又 題蛟門三好圖

咄咄汪生。少年行樂。三好兼全。只飲酒離騷。便稱名士。吹簫弄玉。定作神仙。椽燭陰麋。遠山麗豎。小宋風流劇可憐。誰消受。疑夢游蓬島。醉享鈞天。畫圖到處流傳。得飽看紅妝也有緣。但酒癖書淫。恐妨萬事。歌殘舞散。難駐千年。僕病停沽。吾衰畏解。文籍先生高枕眠。君休笑。是有雖可喜。無亦欣然。

又 題五苗圖 有序

梁玉立大司農夢仙人送五苗圖。既得一子，遂以五苗名之。令方邵村補畫焉。而徵予詞。

望氣佳哉。蕉林書屋。得寶隋和。看皋廡家聲。天邊台斗。彩鸞國色。地上姮娥。母吳氏  
玉燕投懷。石麟露角。更勝珠哥與戶哥。司農二子小名徵蘭夢。記五苗絲繡。玉葉金柯。不惟孔釋摩挲。有后稷攜來瓜瓞歌。算學士文章。原名陶穀。將軍勳業。也號田禾。左握干戈。右持俎豆。何似堂封萬石多。詢占者。是翁官農父。兒取高科。

又 司農招飲攜五苗出揖客復次前調奉贈

今日華筵。珠簾深處。喚出苗哥。看頭角礉礉。宛然玉粒。雙眸炯炯。秀似瓊禾。花帽荷衣。深躬淺喏。年少偏生禮數多。問其歲。是卯君誕降。月窟婆娑。豈惟字識之無。便好應朝廷童子科。算唐室校書。八齡劉晏。秦家相國。十二甘羅。第五之名。何如第九。笑問先生喜若何。先生笑。謂諸君醉矣。爲我高歌。司農行九苗哥五也

又 題孫赤厓攜孫小像

萬里歸來。管寧無恙。吾谷閒行。但覓取虎頭。傳神阿堵。攜將鱗角。繞膝如馨。君善秦聲。婦能鼓瑟。畫裏家山。聊遣情。相爾汝。惟日沽一斗。笑看三星。三孫小名。德星福星。景星。十年遼海飄零。曾短布驅車。鐵嶺城。記漢殿凌雲。馬卿獻賦。梁園雨雪。枚叟談經。閭闔大高。巫陽夢遠。僕亦悲歌。淚滿纓。空凝望。歎王孫桂樹。芳草青青。大駕東巡。孫子獻詩。稱善。今在鎮國公幕。嘗詢鄙人。猥蒙獎歎。故感及之。

又 贈董舜民

誰踞詞壇。天下健者。獨有董公。曾北上燕臺。東游越嶠。南尋隋苑。西問秦宮。慷慨悲歌。滑稽笑罵。左把刀鉤。右酒鍾。揮毫罷。令雪兒起舞。唱徹迴風。君才十倍吳蒙。更林下夫人。興致同。看綠綺低彈。風吹鬢影。青蛾淡掃。月上眉峯。放棹探梅。擁爐煨芋。樂事相於。閨閣中。還索取。將紅橋錦字。好配林鴻。

又 李渭清贈龍鬚一莖賦此酬之

爲問何年。龍戰山東。墮此長鬚。曾階於尺木。能興雲雨。貯之勺水。便化江湖。今也卷

然手攜在篋。猶覓虬髯氣色殊。還恨未向九仙館裏。擗取羊珠。顧君贈我何如。好  
准備尊前牙杖需。算鰕鬚雖細。可編簾箔。魚鬚甚壯。亦樹旌旛。差勝衰翁。白鬣似戟。  
不中盧仝喚作奴。卻自笑看吟成五字。剩數莖無。

摸魚兒 春怨

問東君、賺春何意。春來還見春去。滿園花事剛三五。都付斷腸風雨。花尙爾。又況是  
紅顏、薄命愁眉嫵。美人日暮。使紅豆歌成。翠盤舞罷。難買君王顧。看千古、總是風  
流易誤。姊歸空築青墓。梅妃休怨樓東賦。弔取馬嵬黃土。君莫訴。君不見英雄失路  
還悲苦。楚歌楚舞。試去聽琵琶。青衫紅袖。雙淚幾行數。

又 詠蓴

問江姝、寶釵半股。又繞青絲一縷。洞庭漁父扁舟遠。摘盡吳頭楚尾。誰得似。似放誕  
文君、柔滑如脂體。佳人水泚。算不比浮萍。波漂露宿。何事名千里。東曹掾。爲爾挂  
冠歸去。西風昨夜還起。愁予老繫京華夢。正恐欲歸無計。歸也未。便一棹家鄉。借隱

無人矣。春前尙記。想素手調羹。和鹽伴豉。飽識廚娘味。

又 詠窩絲糖和其年韻。糖出大內遺製。今西山一老中監尙能爲之。

問誰家。吹簫深處。錦絲裊就連理。十分崖蜜三分脆。更勝棗兒堪嗜。長安市。喜今夕同探。官繭燈檠底。君須嘗此。是元日膏錫。都城風俗。賣取膠牙齒。還停箸。忽憶西京雜記。姪娥別樣新製。白頭宮監傳遺樣。曾識開元妃子。形雖似。空夜雨。昭陽不見紅塵荔。關卿何事。但腸斷東風。灞橋楊柳。愁看游絲細。

賀新郎 塞上

天末盧龍道。看數分、山崖聳峙。河流低遶。極望長城煙一抹。但見黃榆白草。又添得、孤鴻縹緲。寒月如霜沙似雪。想當年、有客傷心早。重畫出、邊愁稿。短衣自倚高樓嘯。弔西風、一盃殘酒。淚痕多少。漫說明妃出塞苦。不見玉關人老。更減盡、英雄懷抱。剩有琵琶渾不似。倩廬兒、彈出涼州調。公莫舞。烏啼了。

又 賀荔裳納姬舉子

宋玉高唐賦。更相逢。洛川繡枕。袁家新婦。姬姓碧杜。紅蘭香不已。間以明珠翠羽。正解珮。吳宮春暮。蝶粉蜂黃都褪了。看雕梁。燕燕交交乳。衣帶緩。低眉嫵。夢中神女親攜付。寧馨兒。天上石麟。人間繡虎。纔聽啼聲知大物。豪氣略如其父。請脫帽。爲公狂舞。玉果金錢湯餅會。愧無功。厚賚吾能與。只愁寫。弄璋句。

又 旅思

歲月能如許。問愁人。更經消得。幾番羈旅。白髮悲秋。燈下詠。生受紙窗風雨。更添得。數聲砧杵。敲破客心千寸碎。枉教人。夢斷江南浦。雁叫也。又平楚。澆愁惟酒差堪語。忽傷心。此身飲罷。茫無歸處。空自珠簾難畫燭。看盡清歌妙舞。但贏取。青衫淚苦。紅袖殷勤休勸醉。奈鬢絲。禪榻閒眉嫵。老去也。訴漁鼓。

又 端午和劉潛甫韻

小滿吳蠶吐。乍陰晴。春紅消歇。黃梅迎暑。刮眼風塵紛未了。遍地蒲人艾虎。何處覓。龍舟競渡。橫笛短簫江上遠。但關山。烽火傳鼙鼓。請拔劍。爲君舞。花花世界遽如

許。算英雄、百年成敗。一盃殘醕。金紫貂蟬長在否。不抵枕中炊黍。又看盡、蠻爭觸怒。讀破離騷還痛飲。歎吳儂、更比湘纍苦。只一醉。忘今古。

又 九日感舊

偶過慈仁寺。看門前五株松樹。婆娑盡矣。二十年來風景異。不謂樹猶如此。感舊事、攀條流涕。白髮青衫驅款段。笑無端、貫酒荆高市。聽擊筑、悲風起。又逢佳節黃花裏。悵登高、西山殘照。暮雲千里。極望齊州煙九點。家在吳頭楚尾。添幾幅、荒丘廢壘。漢寢唐宮何處問。祇滔滔、不斷渾河水。買一棹、吾歸耳。

又 立秋夜雨

又是秋來矣。乍回頭、悠悠長日。去如流水。不覺西風吹老至。華髮星星添幾。思往事、潸然出涕。我自多愁淚洗面。問天公、何苦愁如此。下一夜、霖鈴雨。聲聲滴碎驚秋耳。助淒涼、三年客舍。故鄉千里。白首馮郎休說恨。尙對孺人稚子。恨莫恨、別離生死。不信愁人愁不寐。但愁魂、繚繞殘燈裏。聽漏點、三更起。



又 七夕和韻

七七佳期矣。看迢迢、明河清淺。盈盈一水。別去一年來一度。畢竟歡娛能幾。想牛女、相逢流涕。天上人間都不異。但有情、未免誰遣此。灑淚也。今宵雨。如儂只是鰥夫耳。望家鄉、邈如天漢。暮雲千里。三載斷腸闌夢杳。添得玉樓思子。哭長史、終當情死。苦憶少年瓜果會。向涼階、私語星光裏。喚不醒、姮娥起。

又 中元再和

問夜如何矣。早雞鳴、長安門外。車如流水。爭羨朝班仙仗好。老我悶懷有幾。端不爲、洛陽流涕。聞道地官初放赦。想魂兮、遊戲應來此。又遇着、廉纖雨。歸來惟有高眠耳。君莫問、吹笙擊磬。南鄰北里。欲向蘭盆禮古佛。借我消憂幢子。更解脫、無常生死。同病最憐陽羨客。和哀絃、彈淚烏絲裏。歌一曲、秋風起。其年三和原韻故及之。

又 中秋再和

作客三年矣。到中秋、天門街上。月明如水。爲問古時月尙在。照過今人有幾。幾歡笑、

幾人泣涕。明月原無圓缺恨。只人間、離合悲如此。一霎變風和雨。我今爲月徘徊耳。念家山、亂雲遮斷。美人千里。待挹酒漿傾北斗。吞盡兔兒桂子。更莫管、明生魄死。但得嫦娥相顧盼。放白頭、醉舞霓裳裏。聽水調、歌頭起。

又 九日再和

四見重陽矣。悵悲秋、他鄉何處。登山臨水。爲問諸公高宴會。遍插茱萸有幾。何必學、牛山掩涕。我憶楞伽湖畔路。是少年、行樂嘗過此。吟一句、滿城雨。追尋昨夢依然耳。驚回頭、歌臺舞榭。半成蒿里。戲馬龍山今在否。爭甚英雄豎子。誰保得、古而無死。但趁清秋風日美。酌黃花、側帽斜陽裏。怕轉盼、寒沙起。

十二時 觀獵

望平原、連天野燒。獵獵風吹千騎。縛袴褶、雕弓講臂。盤盡山頭谷尾。犬走鷹飛。猿啼雁叫。灑血成紅雨。到日暮、疊鼓鳴笳。酌酒烹鮮。再殺一回足矣。記少日、盧龍塞上。蠻府參軍無事。戲逐孤兒。短衣匹馬。射虎南山裏。載黃獐滿車。歸從妻子誇示。歎

殘年撫髀生肉。鬱鬱誰能堪此。索米金門。攤書玉局。見獵空歡喜。問先生誰伴。嗟乎子虛亡是。

蘭陵王 傷春

江南陌。裊裊東風弄色。垂楊畔。寶馬香車。芳草王孫自相索。美人雲鬢側。夢破殘紅。半碧。尋春去。鶯送燕迎。十二欄杆夜猶立。繁華等陳迹。但雨澀莓苔。風動葵麥。游絲漠漠和愁織。試目極千里。斷煙寒食。鄰雞野哭如昨日。落花淚盈尺。追憶。恨何及。問老去東君。爭似書客。天荒地遠無人識。算往事祇付。數聲漁笛。今宵沈醉舞短劍。歌昔昔。

多麗 夏景

畫梁間。日長午夢初殘。倚薰風。暈紅如醉。無言情思闌珊。捲桃笙。自尋墜珥。掩金詞。斜撲輕紈。茉莉茶甘。鷓鴣香細。儘堪消暑小屏山。無心理。鈿箏瑤管。棋局也慵彈。閒排遣。白敲冰脆。紅點梅酸。侍兒報。花梢月上。清光怯射。越羅單。浴蘭湯。微揩粉汗。

插犀梳。亂挽雲鬢。院落沈沈。夜涼似水。簫郎頻喚。展琅玕。還一笑。背人行去。等待向  
更闌。卻尋到。薔薇架下。獨凭欄杆。

六州歌頭 有客勸予出山者書此答之

客何爲者。勸我曳長裾。人所愛。熱官耳。顧愁予。不相如。君見居官者。苦思慮。勞筋骨。  
工笑語。勤奔走。乃多譽。我則異於是矣。體多病。藥物長須。慣科頭晏起。懶向府中  
趨。禮法全疏。古之愚。兼長捫蝨。喜曝背。時強項。或撚鬚。諸若此。皆不可。一朝居。愛吾  
廬。種豆南山下。幾個竹。映芙蕖。驅山犢。彈野雀。釣江魚。況有老妻釀酒。任醉後。拊  
缶歌呼。有山公啓事。報以絕交書。客且歸歟。

藝云香  
詞

運彰



吳綺（萬曆四七——康熙三三）

字蘭次。號聽翁。江南江都人。貢生。薦授中書舍人。奉詔譜楊椒山傳奇稱旨。卽以椒山之官官之。出守湖州。多惠政。人稱三風太守。謂多風力尙風節饒風雅也。罷官居揚。凡索詩文者。以花木潤筆。不數月而成林。因名種字林。尤工駢文詩餘。有林蕙堂集。

# 藝香詞

延陵吳綺菡次

明月斜 春情

月華春風光夜。乳燕尋花不肯歸。玉奴背面珠簾下。

憶王孫 寒夜

昨宵凍合水晶宮。鸚鵡嫌寒罵玉籠。鴛錦衾窩曉起慵。小窗封雪在山茶樹上紅。

又 白蘋香

白蘋香裏鷺鷥飛。一片青帘挂夕暉。江上西風客未歸。小蛾眉倚徧闌干紫袖垂。

桂殿秋 秋宵

梧葉冷柳陰斜。新月橫拖一縷霞。青天亦有霜娥怨。獨恨狂夫不憶家。

又 花院月

花院月柳橋風。春來飄泊笑吳儂。情人偏向歡時去。怨句徒憐別後工。

轉應曲 蟋蟀

蟋蟀蟋蟀。啼向蘭閨聲急。秦娘初解離情。悄擁衾夢驚。驚夢。驚夢。斜月壓簾霜重。

又 鸚鵡

鸚鵡鸚鵡。花底時梳翠羽。見人學道相思。卻憶關山別離。離別。離別。萬里秦天隴雪。

搗練子 離緒

秋漸晚。不歸家。又見青天月一芽。愁煞銀箏無意緒。有人和淚翦燈花。

如夢令 金陵感舊

楊柳白門春樹。燕子滿城風絮。看盡六朝花。人在畫樓深處。煙雨。煙雨。蕭瑟江關如許。

又 憶舊

猶記秦娘初見。匿笑佯迴金鈿。飄泊損紅顏。痛煞巫山影現。誰怨。誰怨。淚灑犀簾一片。



望江南 揚州

揚州路。人醉竹西亭。畫槳船頭荷葉大。玉簫橋上柳花輕。山送過江青。

又

揚州夜。花月擁邗關。錦瑟兩行傾玉盃。紅燈千影照珠鬢。春漏不曾寒。

又 溪南雜詠 高雨閣

溪南好。水閣對斜曛。灘響聲流三伏雪。畫欄閒倚一秋雲。客到可論文。

又 十二樓

溪南好。十二有高樓。碧檻暗隨朱閣轉。紅燈遙映綠窗幽。花底夜藏鉤。

又 曲水園

溪南好。曲水舊名園。老樹陰連看弈館。藕花香繞讀書軒。元龍榻自眠。

又 松雲館

溪南好。松雲帶翠微。百尺簾櫳紅日早。四窗屏障碧山圍。遍倚欲忘歸。

又 新橋

溪南好。新橋一道通。雁齒溪邊飛宿鷺。魚鱗花下偃垂虹。畫檻正當中。

又 仁義寺

溪南好。薔薇欲成林。磚上金留奇樹影。壁間波動海潮音。松古一亭深。

又 桂園

溪南好。桂樹一廳多。天上夜寒生玉兔。人間秋老發金鵝。仙斧莫輕磨。

江南春 春情

情脈脈。恨依依。煙歸花影直。風到柳條知。紅閨春盡無人覺。鸚鵡籠香睡欲癡。

摘得新 月漸殘

月漸殘。花陰壓玉欄。燈前金屈戌。小屏山。山外有人頻入夢。未曾還。

一葉落 秋閨

一葉落。黏珠箔。青蛾夜半傷離索。葉離春更生。人離盡虛約。盡虛約。前事思量錯。

鴛鴦綺 早春

小欄干倚近百花寒。只被東風覺。吹人衣袖單。

梧桐影 人未歸

人未歸。春將半。小玉嬌憨妒燕兒。押簾早放黃金蒜。

西樓夢 妝懶

妝懶妝懶。攏髻慵開鏡。樓前花發雙枕閒。玉兒只爲春寒病。

又 明月

明月明月。直入秦樓裏。蛾眉夜半不能眠。開窗坐把銀箏倚。

又 斜照

斜照斜照。一半紅珠幌。歸來雙燕語黃昏。離愁又在江樓上。

又 明月

明月明月。一片多情影。常樓照入碧紗廚。美人微醉纔微醒。

凭欄人 陌上

陌上花開煙景稠。折得花枝紅在手。將花卻自羞。惹東風吹不休。

又 本意

何處江帆載夕陽。十幅蒲帆一半黃。高樓倚暮妝。望天涯。雲水長。

碧窗夢 楊柳

楊柳將煙細。梨花着月明。玉人忍淚按銀箏。低語沒人聽。

十六字令 春

春。纔到深閨便泥人。花知道。一點要溫存。

又 情

情。不識他從何處生。相逢處。但覺惹人疼。

花非花 離情

月方沈。天將曙。夢不成。留莫住。樓中無數可憐人。江南盡種相思樹。

解紅兒 憶別

白項鴉。花冠雞。未明都向枕邊啼。爲報東風太狠籍。花落盡。玉窗西。

喜春來 有見

一灣綠水花遮路。朱欄人倚樓。嬌憨不肯下簾鉤。莫轉頭。新月半天愁。

歸自謠 閨憶

深院靜。風颭落花紅不定。牆東月下鞦韆映。玉驄一去成孤另。愁誰證。說來但與鸚哥聽。

又 寒食

一百五。多少龍蛇原上土。棠梨風急紅無主。朝來寂寞輕煙縷。垂楊舞。鞦韆挂在鶯啼處。

相見歡 春閨

垂楊綠到闌干。又春殘。看盡一庭花雨小紅慳。凭畫檻。拋繡帖。夢無閒。檢取近來

雙袖淚痕班。

又 吳興感事

西風落日登臺。眼重開。無數繞城山色送青來。  
古今事。吳越地。幾雄才。一片項王馬埒亂雲堆。

又 去來

去來來去匆匆。可憐儂。惆悵謝家明月小亭中。  
何處見。誰爲辨。夢無蹤。那得燕兒銜出一春紅。

又 別夢

半窗殘月朦朧。畫橋東。夢裏那人愁坐小屏風。  
空惹恨。難覓信。恨匆匆。待把別情珍重託歸鴻。

長相思 夜坐

花一窗。月一窗。酒醒西齋聞暗香。黃梅初破霜。  
琴聲長。漏聲長。綠淺庭莎鶴夢涼。

懷人字半囊。

又 舟夜

盼行程。數行程。秋滿江湖客自驚。灘聲雜雨聲。話難憑。夢難憑。水驛人稀錯報更。荒雞不肯鳴。

醉太平 悠然閣偶題

波光半城。花陰一庭。秋山萬朵青青。作南窗畫屏。顛狂酒兵。蕭疏墨卿。吾師只愛淵明。採東籬菊英。

又 吳興

空亭鶴雛空牀。蠹魚詩瓢酒盞茶爐。是湖中簿書。郎真漫乎。翁真醉歟。樊川逸少眉蘇。結煙波釣徒。

又 題醉仙圖爲念因壽

顛耶其仙。聖耶其賢。人間齷齪堪憐。向醉鄉且眠。歌乎有絃。吟乎有箋。糟邱長據。

千年其誰曰不然。

又 放歌

燈前翠蛾。花前綠螺。人間明月無多。任先生去波。  
翟家雀羅。張家鳳窠。生平得失如何。和香山放歌。

又 偶作

相思可憐。離情漫傳。斷腸准擬今年。在雲邊水邊。  
青簾畫船。紅燈翠絃。半生潦倒依然。爲花顛酒顛。

又 題抱膝看雲圖

河山眼前。雲霞足邊。故鄉一望依然。彼黃冠者仙。  
匆匆兩丸。蒼蒼九煙。白衣變幻堪憐。向南陽且眠。

感恩多 看美人臥

霞斂紅窗曉。屈戌黃金小。鸚鵡莫驚猜。報人來。  
偷覲屏山深處。有人眠有人眠。倦



眼惺忪。壓衾花半邊。

春光好 茗川偶題

隨柳絮。拂榆錢。冶遊天。欲問水嬉何處。五湖邊。  
醉裏題將羅扇。歸來恰得金鈿。走馬碧雞人莫笑。海棠顛。

又 迎春

春來也。是何時。沒人知。先到玉兒頭上。裊花枝。  
十二畫樓簾捲。紅妝笑語參差。爭向綵幡應隊處。看朱衣。

又 立春

朱閣賈。綵幡輕。好風生。萬樹梅花一夜明。曉來晴。  
錦爆拋殘寒色。瑤笙吹出新聲。畫屢印。碧瓊屑。滿江城。

生查子 同顧庵次淡心韻

森森白蘋洲。認得吳興路。不見水嬉人。密葉青如雨。  
行春復幾時。紫馬尋花去。誰

有惜春心。寒食隨儂住。

一痕沙 元宵感事

記得去年時節。爛醉紅燈白雪。今日又離家。見梅花。無限西州舊事。獨剩江山如是。老卻眼中人。奈何春。

又 記事

記得鵲橋時候。小飲綠窗紅瘦。舊約忽蹉跎。淚痕多。三十六陂秋色。何處問他消息。兩地好相思。沒人知。

又 廣陵懷古

滿地西風黃葉。冷卻二分明月。可惜好雷塘。任牛羊。飛盡隋堤柳絮。歌吹不知何處。閒煞古揚州。夢青樓。

又 惠山有見

可是天台伴侶。家住碧雲深處。一笑出鸞紗。認桃花。怕被罡風吹着。仙帔香籠紅。

藥。郎是幾時來。繡簾開。

太平時 無題

羅衾橫裏一牀癡。枕痕知。些些情事費尋思。暖香時。  
五鼓衣裳三鼓月。去來遲。傷心休唱竹枝詞。比紅兒。

又 題前山欲雨圖

春到江南柳花多。麴塵波。劉郎浦口唱漁歌。好婆婆。  
一片前山剛潑墨。晚雲拖。呼兒料理舊青箋。看如何。

點絳脣 春情

幾度鶯啼。垂楊綠了千千縷。玉驄人去。滴盡西窗雨。  
撲損菱花。金粉都無緒。相思處。無情山色。遮卻多情路。

又 煙雨樓次史邦卿過西泠橋韻

煙水無情。當年曾照朱樓影。鴛鴦飛盡。有夢如天迴。  
紅藕花殘。桃葉歌聲冷。萍無

定。蕭蕭短鬢。白髮羞明鏡。

又 詠蝶次宏載韻

柳雨桃煙。萸臺尙記生前景。去來相並。豔殺羅裙影。  
絮粉茸金。眉眼從來靚。紅珠冷。花房睡醒。相逐過金井。

又 詠蟬

素綏高嘶。半生贏得風和露。槐朝柳暮。占斷青青樹。  
抱葉吟條。似向行人訴。愁無數。不堪聽處。六代斜陽路。

又 詠蟋蟀

秋到庭除。不知何事須頻說。做成悲切。訴向淒涼月。  
斷礎頽垣。似爲愁鋪設。聲無歇。苔花如雪。點點秋棠血。

又 南昌寓樓見周岷公題壁依韻和之

一派波聲。片帆吹過鄱陽雨。晚霞收暑。是我登樓處。  
浪跡天涯。事事渾無緒。何時

去。往。年。西。浦。酌。酒。同。懷。古。

又 老梅根

詰。屈。虬。根。暗。香。疎。影。何。年。得。廣。平。鐵。石。先。有。春。消。息。幾。點。寒。英。用。盡。東。風。力。誰。曾  
識。冶。傳。南。國。雪。老。莓。苔。碧。

又 詠素馨花燈

春。散。蠻。天。珠。江。處。處。都。如。雪。綵。絲。誰。纈。砌。作。團。圓。月。鳳。蠟。高。懸。熏。得。濃。香。徹。羅。幃  
揭。芳。心。猶。熱。情。在。香。難。歇。

醉花間 春閨

思。時。候。憶。時。候。時。與。春。相。湊。把。酒。囑。東。風。種。出。雙。紅。豆。鴉。啼。門。外。柳。逐。漸。教。人。瘦。  
花。影。暗。窗。紗。最。怕。黃。昏。又。

又 望家信不至

揚。州。水。贛。州。水。雪。浪。千。千。里。魚。不。解。銜。書。空。躍。黃。金。尾。靈。氛。虛。報。喜。許。我。平。安。紙。

寒燈亦見欺。花鷓鸕哥嘴。

浣溪沙 有感

吳苑青苔銷畫廊。漢宮垂柳映紅牆。教人愁殺是斜陽。  
天上無端催曉暮。人間何事有興亡。可憐燕子只尋常。

又 春情

南浦輕煙蘸碧波。西泠油壁少經過。鎖窗獨自畫青蛾。  
淚點漸同花片落。情絲長似柳條多。鏡中金翠奈春何。

又 客懷

搖落關河懶問津。扁舟萬里送孤身。亂山秋色又斜曛。  
江上怕逢吹笛客。月中難作倚樓人。可憐愁殺鮑參軍。

又 無題次友人韻

欲起偏生恰墜釵。臨行那得更兜鞋。教人憐處且徘徊。  
江水無情桃葉去。春風有

約柳枝來。漫拋紅淚被人猜。

霜天曉角 雪後夜登愛山臺

孤臺雪霽。雪月光相泥。把似大羅天闕。天上全無地。此時雙鶴淚。弄花梅吐氣。明日頭銜須換。直寫水晶宮吏。

酒泉子 春夜

花影天邪。晴月照人今夜。羅窗半展淚痕斜。有些些。巫山欲夢楚雲遮。繡被香寒。宮麝隔牆聞響。七香車。是誰耶。

減字木蘭花 憶遠

天涯何處。芳草砌成腸斷路。欲寄離愁。怕聽征鴻不倚樓。琴慵酒懶。柳絮榆錢春漸晚。拚是淒涼。夜夜燈花瘦影長。

又 湖光

湖光夜徹。飛上小樓都化月。人似梅花。爛醉孤山處士家。夢雲縹緲。起傍玉闌花。

影悄。燕子多情。偷得紗廚細語聲。

又 飲家伯成署中

官齋清暇。容我疎狂。傾翠罍。晴月如霜。曬破檀梅一萼黃。

燒殘畫燭。把酒清談人

似玉。來日揚舲。回首龍山眼共青。

又 贈鼓爰琴

燕山疋馬。攜手河梁人去也。此地相逢。隋苑秋聲百尺桐。

綠么紅豆。一曲新詞花

影瘦。自是彭宣。曾向扶風聽管絃。

又 題何奕美小照

傳神阿堵。此是何郎須認取。莫浣征衫。稽紹當年血尙斑。

樹猶如此。百尺亭亭誰

可擬。賦就新詩。東閣梅花又一枝。

又 題尤悔庵清平調雜劇

仙才供奉。豈藉尋常科第重。失卻珊瑚。只笑唐家結網疎。

知君寄託。掃盡里兒容



做作爛醉沈香。此後誰堪七寶牀。

又 鳳條清露

鳳條清露滿地綠雲蒼蘚護。若有人兮。冰雪文章手自攜。玉山如照。此日洛陽人正少。夜夢淩風好入天門第八重。

又 樹蘭

家原幽谷。自別湘沅非舊族。葉葉枝枝。婀娜江城玉露時。靈均漫採。根蒂雖殊香未改。金粟前身。那用朝衣侍女薰。

又 鷓鴣

元黃繡羽未到炎荒先見汝。與汝何干。聞道飛時盡向南。輜軸不息。人自欲行空費力。叫斷江風細雨寒煙苦竹叢。

添字昭君怨 感事

聞道青溪歌院。只剩兔葵一片。五更還響落花風。景陽鐘。寂寞白門楊柳。春思渾

如中酒。鴛鴦飛盡。莫愁湖。可憐無。

又 春寒

落盡梨花時候。寒到將殘更陡。添衣偏覺畫羅單。是今番。幾夜睡來難穩。卻恨東皇心狠。明欺繡被半牀空。是東風。

菩薩蠻 離心

離心夜共燈花碎。羅衾倒蓋何曾睡。不肯過西窗。空樓月影黃。分明曾夢見。猶是相隈戀。猛地被風驚。吹來雁一聲。

又 和悔庵

江都不似開皇好。牛羊橫臥雷塘草。伍員但吹簫。霜痕斷板橋。田家無幸舍。躑躅秋蓬下。服食學淮南。水精何用鹽。

又

西風吹醒春婆夢。無端又作參軍弄。朱戶倚雲高。藜羹似七牢。占著同得履。北道

誰爲主。買駿用金時。寧須謝朓詩。

巫山一段雲 憶舊次宏載韻

密意珊瑚帶。深情翡翠卮。人前隱笑動娥眉。嬌多語故遲。爲有愁中態。都成夢裏思。當初錯處也相宜。何況總宜時。

又 大孤山

萬頃明波碧。千尋夕照紅。靈旗隱約在雲中。凌波翠一弓。莫把彭郎倚。誰將宓女通。大喬何事不從容。容易嫁江東。

採桑子 秋閨

西風不管梧桐葉。亂落秋光。跌碎斜陽。猶剩紗窗一半黃。新寒陡入羅衣薄。睡盡殘缸。銷卻餘香。昨夜南來雁帶霜。

又 題悔庵讀離騷雜劇

瀟湘千古傷心地。歌也誰聞。怨也誰聞。我亦江邊憔悴人。青山翦紙歸來晚。幾度

招魂。幾度銷魂。不及高唐一片雲。

玉樹後庭花 畫寄亭作

槐根幻出南柯郡。夢憑誰問。蜂巢燕壘。勞安頓。暫排春悶。  
幽欄曲徑。花傳信。柳疎  
梧嫩。仙鶴一雙苔跡印。落些風韻。

好事近 戲答

把酒問東風。何事便都春去。莫遣鸚哥知道。勸桃花且住。  
年年強半爲花疼。花有  
疼人處。難道東風不曉。把啼鶯分付。

又 閨情和正持松濤詞韻

金斗爇沈香。難熨離腸愁結。強向人前歡喜。恨眉痕暗洩。  
今年心事更重重。較與  
去年別。昨夜空牀孤影。蟾光清徹。

又 歸思

一片故鄉心。猛被角聲吹破。酒薄不如愁釀。怕今宵難過。  
謾將離恨訴青天。天有

許多大。淚溼枕痕難熱。共梅花清坐。

柳含煙 詠柳

江南路。柳絲垂。都少齊梁舊事。玉蛾金繭只霏霏。掛斜暉。眼眼眉眉都是恨。人去靈和莫問。誰堪眠起對紅閨。晚風吹。

漁父家風 過西塞山訪張志和舊隱不得

鱖魚春水舊迢迢。有客泛蘭舸。而今事往無人問。花落大夫橋。新月小。暮山高。風遙。樵青何處。欵乃聲聲。如意頻敲。

謁金門 雨後

朝雨沐。小閣翠陰如幄。閣外白雲飛去速。亂峯添意綠。靈鷲喜聲相續。新筍看看成竹。滿逕落紅無管束。燕兒銜補屋。

又 秋夜

真堪憶。江上亂峯堆碧。高處乘風橫鐵笛。笑人間不直。千古鬥奇角力。不了砌蛩

啾啾。天上神仙何寂寂。桂花聞歎息。

又 春情

春欲老。雨雨風風昏曉。枝上殘紅階下草。掃應還更掃。何事最傷懷抱。芍藥開遲。謝早。獨倚闌干添懊惱。釵鸞欹鬢小。

又 留春

春將去。燕子留春不住。分付落花飛滿路。隔將春去處。畢竟春光難訴。轉怨亂紅。催取。我問落花誰誤汝。莫嗔風共雨。

又 送春

春歸決。半夜起和春別。窗外落花堆似雪。送春惟有月。怪煞杜鵑啼徹。月也和春。休歇。竊藥嫦娥空有訣。春魂難再接。

更漏子 和阮亭與友人話秦淮舊事

柳遮樓。花拂地。金粉六朝爭麗。歌檻裏。舞闌中。鸞笙醉軟紅。燕飛忙。鶯語咽。天寶

何堪再說。愁黯黯。淚瀟瀟。孤燈白下橋。

又 夜情

被慵薰。釵懶卸。愁到天涯今夜。欵繡枕。對銀缸。相思月半牀。有誰知。無處問。燕子不傳芳信。花點點。柳絲絲。無聊是此時。

又 離情

嶺頭花。橋上月。記得箇時離別。孺子楊。仲宣樓。無端又一秋。五更心。千里夢。只把鬢絲搬弄。空寂寞。好思量。籬邊菊蕊黃。

又

夢揚州。題雪館。杜牧尋春較晚。憂莫解。病誰知。愁多變作癡。一江波。千里路。只辨夢兒來去。憐薄倖。恨多情。斜陽隔岸箏。

憶秦娥 客中生日戲示陶姬

今何夕。年年苦被霜華逼。十三樓上。幾番吹笛。山河滿目斜陽急。闌干醉倚蛾眉

碧蛾眉碧。英雄老矣。壯心猶昔。

玉聯環 夏景

梧桐密處清陰重。碧紗風弄。落花簾外舞輕紅。又與蒼苔補空。雪藕調冰。佳興有誰堪共。日長縱得繡工夫。不穀將愁將夢。

畫堂春 西湖偶作次辰六韻

小樓一望暮山橫。山光飛上層城。西湖深夏綠波平。荷葉風清。芳渚半生花氣。畫船時送歌聲。鄂王祠樹白公亭。今古關情。

眉峯碧 立春

鏡裏韶光早。彩勝斂梁裊。捲簾都是惜春人。爭道是來年好。生怕東風小。央及庭前草。玉階先自送青來。莫教惹得芳心惱。

又 旅夜次上若韻

燭地啼無歇。漏斷聲還咽。一縷春蠶絲不了。都打做心頭結。淚點紅冰疊。羅袖熏



難熱。仙鸞雖自有靈膠。離腸已斷何堪接。

又 有憶

一點燈花靜。歸夢渾難定。一夜相思一夜愁。更忍說黃花病。酒薄孤衾冷。其奈雙眸醒。央及寒雞不肯啼。分明要把愁支領。

又 旅思

霜皎銀蟾爛。風急燈花顫。夜夜寒更獨自聽。怎奈得人長歎。憶了千千萬。苦把梅花絆。試驗青衫盡淚痕。也應不是歸心慢。

海棠春 曉妝

賣花聲入紅樓響。看檐角、霞銷珠網。扶倦啓香奩。一鏡柔情漾。鬱金梳掠同心樣。拚一隻、金鸞給賞。好極轉生疑。更把簾旌敞。

訴衷情 用劉隨州句

菊花能醉去官人。出岫笑閒雲。從來世上豪傑。顛倒信乾坤。成往事。付前因。總休

論。五湖蝦菜。三泖蓴鱸。隨地君恩。

又 寒夜

無端剡雪阻回舟。香夢隔秦篝。今宵玉樓寒重。鸚鵡可知愁。思作客。話封侯。總須休。鴛鴦度曲。鷓鴣買酒。且種忘憂。

秋波媚 雨中新柳

搓就鵝兒綠。尙遲。都未使鶯知。東風無賴。教他細雨。一樣絲絲。和煙搭在闌干上。約略淺黃時。斷人腸處。纔成眉眼。淚軟腰肢。

又 旅懷

南浦輕風落藕花。秋色老京華。一窗涼月。三更細雨。倦客思家。陡來心事香殘後。清淚滴琵琶。憑誰問取。秦樓過雁。漢闕歸鴉。

又 秋夜

閣外啼烏月曉天。人上鴨頭船。幾番回顧。一聲珍重。楊柳門前。繡牀安在東風裏。

離別自年年。今春何事。嵌將心事。陡地情牽。

陽臺夢 春曉

綠鬢風動煙絲裊。碧紗如霧窗開早。楊花驀地撲人來。舞東風不了。傷心無限事。漸覺蛾眉翠少。十分消瘦百分慵。只鏡中人老。

太常引 春半

小樓絲雨碧桃鬆。黃入柳條風。拾得半春慵。生小慣、紗窗個儂。羞彈綠綺。懶裁白紵。無奈是惺忪。拚不畫眉峯。便有恨、能藏幾重。

又 霜溪鶴問汲山過集寓樓

隱囊閒側帽簷紗。春色徧天涯。小閣夕陽斜。夢只在、臨邛酒家。當年嵇阮。依然重聚。顛倒醉流霞。寄語報鶯花。肯說道、潘郎鬢華。

又 曾波閣玩月同雁水諸君用稼軒韻

桂華清影漾曾波。月借水光磨。孤宿笑孀娥。算耐得、長宵幾何。今年作客。中秋人

過。不見舊銀河。金梳共摩娑。三百盞、傾將未多。

又 隋宮弔古

鬪雞臺下草如絲。吹斷玉參差。春到野田遲。有大業、垂楊幾枝。同來載酒、傷情詞客、惆悵落花時。苔蘚綠遺碑。訪徧了、雷塘未知。

惜分飛 寒夜

昨晚西窗風料峭。又把黃梅瘦了。人被花香惱。起看天共青山老。鶴叫空庭霜月小。夜來凍雲如曉。誰信多情道。相思漸覺詩狂少。

又 望夫磯

歲歲江干愁竚立。看遍古今秋色。多少歸帆疾。如何不見當年客。莓苔改盡羅衫碧。莫道重逢不識。但說歸來得。石頭曾有能言日。

又 寒夜聞雁

霜逼寒衾孤夢斷。夢裏歸期難算。夜夜無人管。醒來只有燈相伴。山枕斜欹渾欲

倦。何處飛來隻雁。叫得霜雲亂。聲聲多是江南怨。

又 意中

酒散西園臥翠茵。燈已昏昏。一輪晴月破涼雲。窗眼裏照愁身。雙眸欲睡翻成醒。無奈得自家嗔。十年衣惹洛陽塵。空負了意中人。

朝中措 北園偶作

小園一雨便成幽。獨自倚西樓。六六陂邊水滿，三三徑裏花稠。清狂似舊，春來放眼，盡日閒遊。白袷長因酒染，畫船偏爲詩留。

又 用劉隨州句

菊花能醉去官人。金粟記前身。半世難忘酒德，一年長祭詩神。奚爲惆悵，聊將曠達，且養嶙峋。穩住半峯山茨，飽餐千里湖蕓。

又 平山堂和歐陽公

畫樓秋色映遙空。人在白雲中。一片青山斜日，幾株黃葉西風。生平得意，耳因酒

熱情爲詩鍾。試問看花帝子。何如種柳仙翁。

西江月 詠別次梅村

桃葉流將舊怨。柳絲不綰閒愁。無端春水泛螺舟。記得畫簾招手。  
帳裏綃封紅淚。燈前扇掩青眸。一帆別恨倩誰收。心事渾如中酒。

又 廣陵記憶同芝麓先生

醉後猶翻棋局。醒來鵲語檐牙。盈盈十五掩團紗。最憶鸞釵初下。  
幾日離情離恨。一江春水春花。芙蓉欲採夢無涯。怨煞鴛鴦今夜。

又有見

小玉梳成鬪掃。善師教就琵琶。惱人春着杏兒紗。繡帶臨風一把。  
紅閣畫將萱草。青牆映出梨花。門雞坊下認兒家。揀取垂楊繫馬。

月中行 用劉隨州句

菊花能醉去官人。魚鳥足情親。吳江烟雨綠生鱗。風起暫收綸。  
聞雞夜舞非吾事。

心長在、古柏寒筠。劉伶山簡共朝昏。休更誦移文。

少年遊 丁未三月茗中送春

草香葉嫩乍晴天。簫鼓放歸船。翠眉山黛，綠羅波縠，春去不留連。情多欲勸春還住。春也道、閨今年。人散旗亭，嫩紅無恙，猶是待樊川。

又 醉後贈歌者

春來燕市解金貂。取酒聽紅簫。銀燭殘時，玉山頽也，一曲轉無聊。剛到銷魂魂已斷。人似柳條條。鮫袖裁香，鸞鏡臥月，休說鄭櫻桃。

金鳳鉤 獨見鞋

真堪在掌兒上。又只合玉肩斜傍。這般些小，怎將偷換，猶自暗垂繡帳。行行惟恐纖塵漾。長只向枕邊安放。笑他鄰女，藕花池畔，先已巧偷新樣。

南歌子 閨情

銀甲調新火。珠簾捲曉霞。辟寒初着杏兒紗。正是惱人時節，不歸家。鴛坐渾身柳。

蜂歸兩股花。一絃春怨語琵琶。昨夜鴛鴦買卦，又須差。

又 別怨

欲笑寧能笑，相看懶更看。背人哀怨有般般。不道大家，一樣枕兒寒。花底情無限，燈前影乍單。休言別後淚長彈。何似當初未別，儘儂歡。

又 最憶

最憶愁時面，難爲別後心。夢牽紅袖玉樓陰。卻是醒來，原自挽羅衿。香冷鴛鴦帶，寒輕翡翠衾。一生難負是知音。何況蛾眉，相望到而今。

又 初秋閨怨

鳧藻纒宜火，桃笙不耐香。朝來無語暗思量。只恐蓮壺銀箭，夜須長。夢斷惟含笑，啼殘懶更妝。顰鬢六尺錦匡牀。怎奈好天，辜負是新涼。

醉紅妝 詠螢次轅文

個儂何事學疎星。向紗窗，暗處生。玉兒相見眼偏明。花影下，扇羅衾。避人還故傍。



人行。一些子。最關情。飛繞銀牀。休更撲。殘月白。露華清。

又 勸酒

繡簾初下。曲廊西。照垂楊。月影齊。有人年少。好蛾眉。歌金縷。勸玻璃。就中擲眼。怕人疑。佯低面。整紅衣。悄語玉郎。須盡醉。郎不飲。又花飛。

又 用劉隨州句

菊花能醉去官人。對鴻妻。引鶴孫。顛狂不怕大官嗔。吾眠矣。任諸君。前山過雨。黛初勻。晚猶帶。斷霞痕。金管玉簫。堪載酒。明日訪。莫愁村。

又 涼月

一天涼。月弄晴暉。帶清霜。白雁飛。故人養酒。送將歸。紅燭下。有蛾眉。白梅花底。雪垂垂。歌金縷。勸醪醑。笑問青樓。曾薄倖。如杜牧。是爲誰。

醉花陰 與詩堂納涼次宏載

月照紅牆銀漢皎。雲去青山小。別院晚追涼。弄徹瑤笙。越覺花陰悄。瓊漿滿酌開。

懷抱。醉裏乾坤好。暗麝夜香清。寶髻逢迎。暑向冰紈少。

又 初夏集程山尊寓齋

楊柳花殘隋苑樹。明月無尋處。此夜集幽人。煮酒西園。酒送江聲去。平生意氣渾難據。踏碎邯鄲路。拔劍且高歌。醉語諸君。莫似狂夫誤。

又 答人

客裏風光難到夜。夜更如何也。難道不相思。酒熟香溫。一個燈花下。秋棠紅點蒼苔罅。惹得寒蛩罵。莫說少年狂。老去休文。較爲情多怕。

又 虎邱看梅

千里鶯花山壓翠。容易留人醉。今古不多時。幾度笙歌。浪把東風費。畫船載酒文童會。替卻繁華累。一樹一傾杯。花落杯中。細嚼春冰味。

又 書雲招飲石花時庭前芍藥罌粟茶蘼爭豔卽席漫賦

萬朵千陰同一豔。色色層層見。白首入名園。霧裏看花。霧裏紅成片。枝枝欲把瓊

漿勸醉也應難辨。花欲實人嬌。三種名葩。三個蛾眉伴。

又 璧園分賦

章貢江邊舟一葉。怒浪噴銀雪。留客有平原。入座清風解盡人間熱。移牀共就南樓月。談笑都全別。莫道是尋常。艸苑才華寥落誰重接。

又 詠翡翠

細羽翩翩生嶺外。珠樹巢南海。來去自雙雙。紺袂青裳總把輕盈賽。奇毛一片多情在。慣得紅兒愛。何處惹相思。釵股衾窩點點留光彩。

江月晃重山 平望舟中次宏載

森森玻璃千頃。天教吳越黏連。三秋風露好山川。今宵也。沾酒白雲邊。何處支機可問。直須秉燭無眠。醉中狂嘯欲驂鸞。新詩就。吟向玉嬋娟。

又 秋思

蟋蟀聲中微歎。芙蓉花下無眠。泥金簾幕雨殘天。多生受。鸚鵡解周旋。夢記君恩

似月。離來客思如煙。燈花笑處轉悽然。無聊賴。故故撥紅絃。

又 臥霞閣對月

畫閣正當江口。朱欄斜向山腰。三更醉舞露華高。青天上。吹碎玉人簫。直把蘭觴倒盡。不須樺燭頻。蕊珠宮裏夜蟾嬌。回頭處。銀漢接紅橋。

浪淘沙 吳女採菱

三十六鴛鴦。睡損秋光。個儂貪耍未成妝。借得鄰家新艇子。蕩槳橫塘。蓮子怕空房。綠扇凋傷。纖纖偏愛小紅香。說道菱花能向日。且弄斜陽。

虞美人 春雨次李舒章

紅絨冷落秋千架。人約西陵罷。梨花和淚閉重門。卻似玉兒憔悴憶東昏。孟婆苦把東君妬。做作催春暮。愁春人正在朱樓。聽盡絲絲點點倚香篝。

又 離情

無情最是樓頭鼓。不信離人苦。聲聲敲得夢雲開。又把湘愁峽恨送將來。屏山畫

出還家路。其奈歸期暮。大江風雪棹歌遲。正是銀箏小婦、倚闌時。

明月棹孤舟 江上

黃葉幾枝橫灑舍。擺西風、酒旗低亞。醉不成歡。心難與問。誰是蘆中人也。萬里江聲潮欲瀉。似當年、雷轟萬馬。兩眼秋雲。一身斜日。長嘯佛狸祠下。

一斛珠 踏青

啼鶯不斷。垂楊叫得青撩亂。雲烘曉色陰晴半。正好閒遊。油壁西陵畔。園亭鬥草閒招伴。藕絲斜露黃金蒜。踏青鞋子遮人換。猛避兒郎。錯教桃花絆。

踏莎行 次韻答杜茶村杜適行二

雁送霜愁。蛩添雨思。苔生臥閣渾無事。柴桑處士正饑驅。白衣慚愧江州刺。句冷吳楓。韻殘永柿。杜家又讓君行二。買山自是故人心。何須咄咄頻書字。

又 湖上

鏡影平湖。裙腰芳草。一般春樹西陵好。今年更自覺撩人。畫船繫處垂楊裊。那得

身閒空憐鬢老。沈郎清瘦誰知道。擬將愁緒訴東風。東風又怕花枝惱。

又 登章貢臺題七姑祠下

二水交環一亭孤峙。飛鴻數盡斜陽裏。蛾眉何處問殘碑。金爐篆冷飄香地。豆架藤荒瓜棚竹倚。閒行暫遣羈情耳。無端高處轉生愁。歸帆不把鄉心寄。

小重山 遊壑庵

蘇小堤邊東復東。啼鶯聲不住。百花中。斷橋無路倩雲通。人過處。又被碧雲封。鷺鷥莫迴蹤。胡牀清興劇。與君同。接羅顛倒玉鉗空。人醉也。臥占翠芙蓉。

又 憶昔次臥子

十里珠簾金鳳鉤。大堤堤上路。舊時遊。枇杷花下不知愁。青溪月。夜夜照風流。往事但悠悠。鴛鴦飛盡處。白蘋洲。蘭成蕭瑟倚江樓。傷情也。一曲舊伊州。

又 旅思

誤訪西陵油壁車。飄零隨落絮。幾年華。歸來垂柳帶霜斜。青衫溼。何處問琵琶。別

恨正無涯。無端歸夢裏。又離家。五更不睡。共梅花。殘燈影。一點映紅紗。

惜分釵 閨憶

春初到。寒猶峭。碧窗人向東風笑。花千枝。柳千絲。燕子鶯兒。相見何時。遲遲。料情空抱。愁來玉鏡先知道。話長疑。夢長啼。月照紅廊。獨坐顰眉。癡癡。人難

又 憶別

橫塘路。西陵渡。柳絲遮斷憑樓處。曉風清。早潮平。一幅輕帆。十里長亭。行行。留難住。愁無數。劉郎自爲桃花誤。炙銀笙。弄瑤箏。三生舊約。半晌離情。停停。

又 離緒

星初渡。月乍吐。悶酒斟殘留不住。語聲低。淚痕齊。幾回欲別。此際難離。依依。行不免。情何遣。衣帶長江天樣遠。百般憂。兩邊愁。無聊夜月。有恨清秋。休休。行不

七娘子 有憶

絲絲小雨。桃花病。鸚哥說道清明近。醉也成慵。吟還添悶。檀香羅薄。春寒剩。倚樓

望斷飛奴信。東風影裏文君鬢。淚溼琴絲。枕寒香印。歸時留作相思證。

又 七夕

年年客裏今年遠。紅牆坐見銀灣淺。兩水家遙。雙星夜短。人天總爲情難免。蕊珠深處新涼滿。梟花懶醉黃金碗。雨作啼痕。雲遮夢眼。神仙轉被人道遣。

昭君怨 疎竹

疎竹誰教繞舍。敲亂鄉心中夜。偏是客中寒。不還山。一片癡情未了。斷送愁人昏曉。霜重冷無聲。可憐生。

探春令 次上若紅橋春泛

年年芳草似裙腰。見興亡無數。倩垂楊、留得黃鶯住。正歌吹、揚州路。蘭舟醉讀參軍賦。向蕪城東去。看雁齒橋邊。倚欄人在。莫認紅樓誤。

迎春樂 燈夜

東風着意催絃管。先送與、梅花暖。參軍歲歲逢春懶。怎耐得、看燈眼。無賴是、玉輪



高輓都照向紅樓人面。一個揚州杜牧。早爲迷香軟。

孤館深沈 贈錢青瑟較書

尋常梳掠雙紅暈。午起心情猶困。生怕有人來。分付鸚哥口兒穩。攤書小閣閒相並。笑把紫微低問。聞道也遭嗔。何事依舊耽花恁。

茅山逢故人 醉題

滿目亂山無數。一片寒潮來去。故業何存。故人何在。故鄉何處。離騷一卷長懷。莫向西風空訴。才子無時。美人無對。英雄無路。

憶漢月 登樓

最是闌干高處。望見斜陽煙樹。青山圍繞似相留。又倩江聲攔住。也知秋正好。只恐被、黃花催去。醉橫老眼對西風。曾見興亡無數。

武陵春 江月

月照大江流不斷。一片好清秋。搖落江關是處愁。與客且登樓。側帽參軍今已老。

那得更風流。玉簫憔悴畫橋頭。莫問舊揚州。

應天長 春思

楊花一片飛如雪。鸚鵡睡殘花底月。夢還驚。心轉怯。鼠弄金荷燈穗折。意中愁眉上結。瘦比前春較別。記取繡羅裙褶。又寬雙蛺蝶。

憶蘿月 秋閨聽雨

拂罷紅珠斗帳。兩葉宮眉相向。寶奩頻展不成妝。懶照秋來模樣。更頭孤雁到。拖帶過。雨聲一晌。淒淒戚戚是儂心。冤煞敗荷殘響。

鏡中人 夢難成

夢難成。聲轉急。一夜燈花紅溼。添得春潮幾尺。盡是啼痕滴。處處江山還作客。冷落西泠油壁。一片癡情消不得。誰使秋娘識。

又 別緒

綠楊花。烏柏樹。日日門前來去。別後浮蹤無據。夢繞西陵渡。是處亂山啼杜宇。黃

藥難言心苦。疑煞楚雲和楚雨。悔被詩情誤。

又 本意

鳳銜花。鸞舞月。誰使烏菱瑩徹。才到曉霞時節。裏面藏嬌怯。頰暈霜花眉兩葉。恰與箇儂無別。儂只讓他他讓妾。他卻無言說。

木蘭花令 詠六月玉蘭 有序

槐雲垂蔭。愛夏木之初森。榴火舒炎。悵春華於已謝。忽看瑤圃。茁鄭宮夢裏之靈姿。爰有琪葩。是楚澤賦中之異種。玉林擎露。在此日而偏奇。寶蕊凝霜。以非時而獨豔。面原無汗。拭則愈鮮。肌欲生涼。蒸而不熱。豈云操成幽谷。方同王者之香。實則歌叶皇都。良應大人之瑞。適逢對酒。敢爲抽毫。賦得木蘭花一闋。

菱翻風。梅送雨。幾朵瓊花驚帶暑。沾晏粉。借荀香。汗落九英原是露。夏將徂。春向住。玉杯擎向瑤臺處。雲母幃。雪兒歌。不數王家珠幾樹。

山花子 靈山池上聽雨用李後主韻

厭聽江聲客興殘。西風催送白雲間。高臥小窗閒。對雨鏡休看。錦石池塘秋潏潏。蕊珠宮殿夜清寒。夢起偶思前歲事。似長干。

羅敷媚 樹蘭盛開同韜汝花下小飲

疏簾冰簟溪堂靜。客到羊求。閒共沙鷗。坐看香蘭笑素秋。雞蟲得失何堪問。倚檻凝眸。碧樹煙收。一片斜陽隔水樓。

又 春日苦雨

東皇故把春狼藉。做盡無聊。鎮日連朝。不讓黃鸝上柳條。香泥阻斷王孫路。莫問吹簫。一夜春潮。已過紅樓第二橋。

臨江仙 贈扶風

歌舞筵前曾一笑。當年錯認紅紅。畫眉今讓白眉工。暮行巫峽雨。雌拂楚臺風。自愛釵痕濟楚。偏憐裙褶惺忪。幾回鸚鵡罵雕籠。星噴人喚小。月怕夢疑空。

又 秋岳招同山隱夜集聞雨

一夜天涯燈影下。幾人同聽秋聲。玉缸新釀瀉銀餅。黃花如有約。紅豆不勝情。明  
日江邊還折柳。五更離緒縱橫。鷗波麟閣總平生。爲君重起舞。似我不須醒。

蝶戀花 春情

昨夜杏烟嬌暮雨。一帶垂楊。綠到春申浦。翠袖倚欄凝不語。啼鶯勸得東風住。簾  
外賣花聲欲度。畫槳雙雙。燕尾分波去。載酒前溪人按舞。鴛鴦飛上相思樹。

後庭宴 同閨人登愛山臺

春到庭閒。臺高徑曲。新橙嫩破。纖纖玉。攜將彩袖一凭欄。南山雪淨青初足。樓開  
罨畫。風吹巧笑。酒爐才熟。杯香琴靜。小鬪蛾眉綠。語細怕鶯知。腸斷憑花續。

唐多令 曾波閣玩月同雁冰諸君用稼軒韻

雙鶴下緜山。青天月未殘。對澄波、共倚朱闌。秋氣着人羅袂爽。清露冷。不知寒。作  
客幾時還。相逢且盡歡。況芙蓉、正耐人看。起舞花前仍大笑。誰似我、與君閒。

又 將歸感舊

水閣帶春城。桃花罵小鶯。二十年、重到紅亭。多少烟雲都過眼。山只對、故人青。往事漫傷情。揚州舊月明。算吾儕、酒戀詩縈。今夜不將鸚鵡醉。明日裏、片帆輕。往

又 猶記

猶記別離時。梳頭病起遲。向西窗、細問歸期。彈指黃花都過了。春又上、蠟梅枝。一雁寄相思。紅箋小字詩。料匆忙、倒寫烏絲。滿紙春愁誰可數。算只有、杜鵑知。

又 寒夜

斜月射回廊。無憑更漏長。笑歸來、反是他鄉。昨夜繡衾渾似水。應不爲、五更霜。一事恁淒涼。朝來斷客腸。待相逢、說向蕭娘。蠟燭成灰猶不了。原化作、淚千行。

鬢雲鬆 春雨

燭花殘。香篆細。一陣輕寒送入鴛鴦被。滴盡紅簷聲欲碎。點點絲絲。學做離人淚。草邊浮。枝上綴。不放青苔鬆泛東風地。何處玉驄垂柳繫。重門不爲梨花閉。

又 過汲山寓感舊

采蓮陂。垂柳院。舊夢重尋。不是閉鶯燕。華髮滿頭將已倦。劉阮風流。記得桃花見。酒千觴。珠一串。翦燭西窗。細語紅燈顫。謝傅不歸棋局換。只愛青山。不改當時面。

又 次上若美人折秋海棠

洛川波。巫峽岫。種得情根。腸斷還依舊。淚灑西牆苔似繡。幾點疏紅。較比春來瘦。粉沾衣。香惹袖。移向窗紗。不怕寒蛩咒。霜落玉階寒未透。伴取花枝。今夜燈兒後。

一 翦梅 理繡

碧煙窗下繡牀支。情也絲絲。線也絲絲。最難勻染在春時。紅是花枝。白有花枝。沈吟幾度費嗟咨。鶯一雙兒。燕一雙兒。吐絨溼卻淡胭脂。誰待相思。誰解相思。

又 春情

紅樓十五沈眞眞。昏也含顰。曉也含顰。無端彈淚坐芳茵。乾了羅巾。溼了羅巾。最無聊賴是初春。花弄尖新。草弄尖新。箇中垂柳更傷神。腰也如人。眉也如人。

漁家傲 鶯脰湖次子壽

金羽何時飛去早。平波臺上秋烟渺。野水傍天天傍草。青不了。越山斷處吳山好。探菱舟並漁郎棹。漁郎卻顧吳姬笑。翻網得魚多白小。詩句巧。浣花溪上人將老。

醉春風 春情

春到誰寧耐。羞結泥金帶。香篝倚處獨含顰。嚶嚶。嚶嚶。滿院苔圓。半檐榆小。有愁難賣。密約勞擔待。鸚鵡多無賴。隔簾小玉悄聲傳。咳。咳。花影頻搖。月紋如動。那人簾外。

行香子 自題小象

烏帽華顛。酒眼詩肩。這形容、不稱貂蟬。何須計較。且自隨緣。去登弁嶺。過雪水。汎茗川。平生放宕。都無繫戀。只難忘、紅袖風前。春來結伴。誰與流連。且同俠少。尋醉叟。學頑仙。

又 茗中新歲



水上山前。柳底梅邊。啓衙齋、只似荒園。問君行部。管領誰偏。有一湖月。千嶺雪。萬家煙。客堂人散。胡牀獨自看春風。又入新年。都來幾夕。甚事堪傳。只連宵詠。前日醉。昨朝眠。

又 西禪寺分韻

鶴市南頭。鷺嶺清幽。有貞觀、蘭若重脩。初春乘興。蠟屐同遊。是晉陶令。唐賀監。釋湯休。高樓曲檻。偏宜結夏。問閒雲、可肯相留。支郎如許。來伴羊求。辦棋一局。書幾卷。茗千甌。

又 題讀易圖

西府中樞。剖竹分符。春夢後、一事都無。傳神阿堵。似者誰與。是少狂客。中傲吏。老潛夫。一曲紅么。三生翠袖。天知道。詩酒吾徒。晚年學易。懺悔消除。有遯之六。漸之二。履之初。

鳳凰閣 春晴

聽朝來窗下。幾聲靈鷲。曉霞影透真珠幕。最喜梅花臺榭。暖生紅萼。把燕子、芹泥乾卻。佳人呵手。鏡裏盡情梳掠。還教安頓秋千索。思昨日雨和風。何等輕薄。怎忍將春閒着。

青玉案

紫雲洞次辰六韻

遙看鳥道渾無路。但一澗、沿花去。澗盡忽逢雲宿處。藤蘿日月。莓苔今古。撐得媧天住。陰陰石磴鳴仙鼠。百狀虬龍向人舞。足下分明聞密語。沾衣空翠。濛濛烟霧。忽作山中雨。

兩同心

新燕次宗梅岑

舞煞東風。一春無盡。恨芹泥、未穩雲廊。見柳絮、才經露井。怎不記、王謝堂前。夕陽紅冷。小院窗紗綠靜。翩翩自引。喜雙雙、翦股花分。憶兩兩、釵梁玉並。更誰知、漢殿留仙。那人孤影。

又 和梅岑鴛鴦原韻

襞翠裁朱。梳襟弄羽。纔經過、謝客池塘。又垂足、湘娥激浦。儘教他、紅藕香中。一雙飛舞。別有繡牀妖女。挑殘金縷。描難就、頸上纏綿。忘不了、夢邊嬌嫵。剛刺到、綠葉田田。停針無語。

嬋人嬌 無題

花壓紅檐。縹緲梨雲千縷。睡不盡、畫樓春雨。翠鬢安妥。怕鸚哥傳語。誰解道、情在暖香深處。巫峽朝行。洛波曉渡。算難得、柔懷如許。桃慵柳困。細把眉峯數。人待起、又被眼波留住。

柳腰輕 嘉樹堂席上贈劉姬

梅紅簾箔霜風軟。開樽鶴搖釵燕。甚時曾遇。此宵同宴。第一鏡湖春選。大垂手、繡襪蓮移。小回頭、玉梁花顫。況有清歌哨遍。向歡場、翠簫金板。嬌鶯低語。長鯨輕吸。潮頰芙蓉三變。笑分司、剛得眸回。問蘇州、可曾腸斷。

愁春未醒 春夜聞鄰家度曲次文友贈青兒韻

梨雲猶凍。鶴夢難成。是東風無賴。隔牆吹送六么聲。管急絃繁。子夜情教蠟炬生。僕原多恨。奈何頻喚。不醉如醒。莫問嬌嬈。料他扇低。自是盈盈。想渡江當年桃葉。囀比鶯輕。此際淒涼。謝家月色滿空庭。堪憐杜牧。青樓何處。薄倖留名。

鵲踏花翻 離緒

剩雪妨花。零煙着草。春寒尙把遊心怯。新來少喜多嗔。憔悴荀香。天涯是處多離別。閣邊應已誤梅花。江頭莫更歌桃葉。打疊拚取羅衣寬褶。無端似打相思結。分得兩處淒涼。中間一箇湊合。成悲咽。平生不肯負蛾眉。請君試看西陵月。

蘇幙遮 次上若韻

繡簾閒。金鎖澀。一片青苔。只許離人立。何處紫駟歸未得。數盡東風。三月將三十。沒商量。無信息。恨煞雙蛾。不放春愁出。樓下落花紅更急。鸚鵡欺人。錯報門前客。小桃慵。垂柳細。檢點斜陽。正在鎖魂際。比翼在天花並蒂。謊現天台。誤中劉郎計。日空長。春忒易。小玉無愁。不解將人替。裙褶無多還更繫。錦帶鬆時。認得相思意。

百媚娘 本意

十里春風樓閣。一樣曉雲梳掠。爲甚相逢難放卻。兜的心兒嵌着。八斗才華空付洛。笑煞陳王錯。多少柳穠花弱。只恨雲耽雨閣。儘意風流無做作。真色果然難學。風雪漫山梅破萼。何處容輕薄。

連理枝

恨煞蘭舟蕩。輕許羅衫放。膽怯空房。愁添滿鏡。是何離況。看牀兒猶是向時鋪。怎今宵難上。猶記臨行樣。難把遊蹤望。落葉輕狂。殘花冷淡。總成拋漾。只階前蟋蟀。多情到更深相傍。

又 同丁韜汝飲花下憶令兄雁水先生不至

客裏西風早。檻外煙波繞。好句頻傳。美人何處。碧雲秋杳。聽花間屐齒破莓苔。是謝池春草。莫把桐陰掃。共取金蕉盃。朗月華燈。南皮人散。幾時重到。望東來飛蓋過。紅橋待芙蓉開了。

風入松 丁韜汝雨中過訪曾波閣

寥陽仙院瀉紅泉。偶住畫橋偏。衝泥忽有元珍到，揮松塵、溜折波圓。小子凡應題鳳，先生高比栖蟬。遶池芳樹似斜川。秋色老湘煙。相留且共奇文賞，怕歸驄、錦溼連錢。舊雨何如今雨，餘年幸值忘年。

滿江紅 岳墳次武穆原韻

南渡楊劉。到此日、功名銷歇。只今有、西陵華表，標題忠烈。三字冤沈狂室土，兩宮淚灑龍城月。笑玉環、腦後是何人，情非切。一湖水，千峯雪。身縱死，名難滅。把椒漿澆奠，唾壺堪缺。道上金牌人有口，階前鐵像心無血。只荒祠、猶自對遺宮，神依闕。

又 次楚畹韻贈元玉

李下無蹊。問當代、誰爲逋峭。最愛是、文章高處，儘君嘻笑。世事漫須真實相，家傳自擅清平調。使扣門、報有俗人來，唯長嘯。林下酌，溪邊釣。約羊求，偕德耀。把頑仙駭叟，任他猜料。公瑾當筵曾顧誤，小紅倚笛偏能妙。看浮雲、富貴只尋常，頭寧掉。

又 金山

一點青青是媧后。補殘餘石。向此處、洪流獨砥。崑然千尺。縱步欲凌鷹隼背。蟠根直下蛟龍宅。問當年、留帶舊風流。空陳迹。山兩岸、分南北。水一派、流今昔。把天風海月。儘教收拾。孤磬聲搖殘照紫。亂帆影挂秋雲碧。上危樓、極目送歸鴻。吹橫笛。

又 鍾偉弢邀泛畫溪賦贈

丁鶴重遊。恰正遇、水曹詩客。更相攜、斜陽溪上。鷺鷗分席。十里輕煙桃葉舫。一橋涼雨。梅花笛。只錢郎、宅畔數江峯。依然碧。庾公扇。謝公屐。追勝賞。俱陳跡。念金門待漏。不堪重憶。春樹暮雲還惜別。高山流水誰相識。倘長安、親舊問狂夫。添吟癖。

又 送曹秋岳司農赴西川軍府

四海傳烽。問時事、何堪太息。公此去、偏能慷慨、氣凌邊隘。吾急而求應恨晚。天方待治。何憂敵。想鳴鞭、萬里過蠶叢。旌旗易。景略坐。常捫虱。安石墅。曾同弈。但河梁攬袂。黯然送客。八陣河山斜日影。兩川旗鼓清秋色。願詩篇、頻與捷書來。長相憶。

又 偕余澹心過飲陳集生齋中喜周子俶秦留仙顧梁汾繼集

多少朱門都不見。開樽筵客。陳孺子。貧居委巷。偏爲設食。婁護已無鯖。可飽。季鷹只  
有鱸堪憶。便盤飧。眞足勝華筵。歡相得。橙已熟。香同擘。梅漸放。花還摘。更南皮飛  
蓋。不期而集。醉我傾將瓶。幾個泥誰典。卻釵雙隻。想明朝。佳事好喧傳。今何夕。

又 次其年韻

四海論交。問當代。誰爲鑿齒。喜今日。倡子和汝。入林伊始。老子直須牀上臥。先生且  
向山中起。儘人間。下士笑如雷。蒼蠅耳。嗟肉食。原堪鄙。便蓬華。寧不喜。但酒酣擊  
缶。壯心難已。坐井笑他蛙。自大讀書乾得螢。將死待縱橫。羽獵向長楊。從吾子。

又 醉吟

海上閒雲。緣低事。誤來京洛。向金門索米。玉階持橐。髀肉晚銷燕市馬。鄉心秋冷揚  
州鶴。問英雄。廣武近何如。渾閒卻。雞一肋。蝸雙角。空競逐。終消索。儘浮沈。詩酒任  
天安着。海上文章蘇玉局。人間遊戲東方朔。看兒曹。得意不尋常。非吾樂。



水調歌頭 聽丁翁彈南曲舊事

天寶當全盛。猶記舊宜春。繁華最稱南國。花柳鬪尖新。歌舞六朝門巷。金粉千家煙雨。楚潤好精神。我始欲愁矣。何事近黃昏。秋風起。人世改。換朱門。後庭一曲。不應恰向我時聞。重見白頭遺老。細數新亭舊事。此際黯銷魂。僕本恨人耳。掩淚對青樽。

又 與詩堂偶賦

問此傳舍耳。寧用壘鳩巢。一時尙須灑掃。何況寄鷓鴣。裝砌疏欄曲檻。點綴高梧修竹。結夏小團瓢。恰似槐安國。龜嶺賦岩嶢。詩成也。酒熟矣。共逍遙。儻來富貴。憑教造物付兒曹。且顧吾生行樂。任取後人笑拙。難辨鹿和蕉。起舞向明月。一笛碧雲高。

又 別其年次澹心韻

如爾才華好。天意豈徒然。如何湖海漂泊。無處問蒼天。十載武昌寒月。一夜文園秋雨。燈下舞龍泉。言別河梁上。淚落酒尊前。貧孺子。寒范叔。漫求憐。丈夫豪氣。自應舉步有雲煙。誰似長卿詞賦。領取鄴侯宰相。好向古今傳。君去莫復問。吾道定逢年。

又 題汪蛟門舍人少壯三好圖

事勢偶然耳。鬱鬱亦奚爲。只須如此行樂。美酒與蛾眉。更有奇書千卷。自譜新詞一曲。寧問古人誰。吾願聊爾爾。君且待遲遲。槐堂上。薇省裏。暇應稀。平生嗜好。安得終日不相違。事業已輸公等。詩酒應還我輩。此論未全非。請併拋緹帙。醉擁雪兒歸。

滿庭芳 六客堂

綺閣東偏。紅亭中峙。重經六客停驂。庭前松柏。曾聽主賓談。南極光芒不見。重逢處。綠鬢毵毵。今朝也。茗溪月滿。此會已成三。坐中詞客在。張華冀北。庾信江南。把玉壺再酌。錦字還探。獨有枯槎入畫。星纏裏。醉倒雙柑。東風起。簷花落井。紅影笑春酣。

又 題卓火傳傳經堂

跨虎英風。雕龍華胄。西河代有雄才。楊烏奇字。得自蕊淵來。多少經綸心事。向寒塘。暫葺茅齋。梅花裏。牙籤萬軸。長嘯獨登臺。舒懷今古際。誰爲管樂。誰是鄒枚。只孔家殘壁。不受秦灰。但得一編牛角。朗吟處。奔走風雷。功名事。青箱滿貯。玉樹況盈階。

又 壽姚東只

馬去金臺。鴻飛玉塞。昔曾燕市經過。青樓醉臥。滿眼酒人多。忽地星分湖海。殘夢醒、蟻散槐柯。歸來後、相逢漸老。華髮對山河。婆娑當此際。謾言學易。且自高歌。況杯浮藥玉。箏倚裙羅。笑問神仙富貴。吾儕事、肯自蹉跎。君知否。當年陶侃。壁有化龍梭。

鳳凰臺上憶吹簫 和漱玉詞

鏡翠封奩。爐香滅篆。晚山青嵌眉頭。記燈邊題扇。花底藏鉤。寂寞蕭關人遠。千萬事、總合長休。無聊是。早春天氣。心緒如秋。羞羞玉臺孤影。便夢入巫陽。好更難留。想紫簫吹共。袖倚紅樓。當日畫闌楊柳。曾親見、兩地情眸。而今也。閒亭萱草。不解銷愁。

燭影搖紅 墨妙亭懷古

曲徑斜通。逍遙堂外多春樹。小亭深翠挂簷花。舊是藏書處。莘老昔年來住。向公餘、搜奇好古。龜趺螭壁。燕瘦環肥。大蘇曾許。歲月遷流。溪藤也有屯陽數。蛟龍奔走赴秦灰。那論魚和蠹。到此不堪延佇。笑眉山、空題好句。美人名士。奇字雄文。彼蒼應

妒。

月下笛 遊圓證歸夜飲青塘橋看月次燕孫

謝氏諸昆。梁園勝侶。鶯時俱集。花輿錦轡。踢遍春山晴碧。問湖邊、煙雨樓臺。亂峯猶認南朝跡。正尋芳未倦。綠楊橋畔。寶蟾初覲。鵲爐擁道。看清光如水。水光還射。坐列甃。共把瑤觥歡吸。笑庾公、樓上橫牀。愛子野風前弄笛。待歸來、還怕杏園客散。花歎息。

八節長歡 戊申元旦

荔粉桃符。餞將殘臘。催送新年。晴霞千嶺。樹藻日五湖。煙蘋洲何在。登臺遠眺。一城畫鼓紅絃。喚起汀花陌柳。盡要爭先。尋春猶記樊川。當時有水嬉勝事。堪傳。雪館更題箋。行樂處。黃雲曾滿秋田。喜今日。恰又逢。霽景暄妍。也應是。太平有象。溪山莫負樽前。

金菊對芙蓉 初冬集愛山臺聽雨和澹心尖韻

雁背雲低。鷺肩風冷。新寒初壓晶簾。正花殘短徑。葉打空簷。登高已在重陽後。況瀟瀟暮雨愁添。憑欄處。峯迷螺影。月暗犀尖。客有魯直文潛。向芭蕉聲裏。撚斷吟髭。念小山人散。桂老淮南。水嬉舊事渾難問。笑韓郎。句剩香奩。今宵醉把彩箋同擘。金梳頻拈。

新雁過妝樓 西湖見倚樓者

水蘸鵝黃。蘇堤畔。垂楊盡染波光。畫簾青粉。剛靠宋玉東牆。小閣亭亭人獨立。碧闌紅袖倚斜陽。無言處。低眸掠鬢。似有思量。知他因何獨自。向杏花影裏。儘意淒涼。不疑客在。蘭葉艇上。端詳。晴湖巧開一鏡。便照出。青蛾雙黛長。尋春去。怕綠陰成幄。難比伊行。

高陽臺 愛山臺看月 宋郡丞汪泰亨因東坡詩句建在吳興署中

坡老歸歟。汪丞去矣。湖中我又重來。明月今宵。多情飛上層臺。碧雲萬里無些翳。把亂峯。青送衙齋。看千家。積水空明。人在崔巍。畫欄與客徘徊。愛竹陰樹色。影落莓

苔。荇藻交橫。魚龍奮甲。龜。水晶宮殿三更後。笑庾郎逸興難裁。問黃樓。誰是閒人。且醉金壘。

又 丁雁水招同觀莊緯雲目天衛公韜汝及仲兒集八境臺分賦

霜袖垂金。煙葭泛碧。人間又滿清秋。懷古登高。一時身在他州。逋臣望闕腸應斷。嘆眉山。老淚難收。向西風搔首。而今白髮盈頭。何當飛蓋偕遊。有建安才子。正始英流。欲採芙蓉。徒憐渺渺芳洲。江關嶺海皆陳迹。算還輸。沙際雙鷗。且同教倚醉憑欄。長嘯登樓。

五福降中天 丁未除夕示內

牛衣夜半啼寒雪。猶記霸陵憔悴。司馬鷄裘。少君鹿轂。豈意行歌黻珮。年華欲換。笑五十明朝。買臣非貴。夫婿東方莫羨。此際且相慰。綠水青山作吏。一家圖畫裏。歡成隊。蠟鳳宵嬉。青箱付與天意。憑教兒輩。杯從幼起。暖向春歸。況當良會。放卻眉稍。陶然須共醉。

春夏兩相期。將往西溪看梅夜。聞風雨。

問西陵有誰來往。南枝約略初放。懊恨封姨。拋下一天惆悵。鏤金不作護花鈴。翦繡難成留春障。整整斜斜。聲聲點點。冷來心上。銜泥燕子誰傍。料玉奴今夜。楊閒衾浪。兩葉眉痕相向。碧愁紅快。羅浮夢爲曉雲驚。苧蘿人被東風葬。翠幙燈昏。紫陌杯寒。個儂同況。

換巢鸞鳳。有遺予詩者不敢答。且不忍答。用史邦卿韻。

天妒人嬌。正鸞羞覓渡。鵲懶填橋。忽來燈下句。如聽雨中簫。遙知堪瘦倚闌腰。病因影起。香隨夢銷。孤眠起。想只有玉樓花照。清悄。鴻縹緲。門掩苧蘿。空把靈犀抱。揀盡寒枝。壓殘金線。幽怨寄懷香草。頻展烏絲。斷離腸。奈何欲喚青天老。而今情緒。憑誰問取分曉。

念奴嬌 送孫無言歸黃山次曹顧庵

蘇門鸞嘯儘東華塵坳。離魂淒絕。把手瓊簫。明月下一笛又吹橫鐵。練水魚肥。黃山

鶴瘦溪樹饒鶯舌。北窗高臥。長卿已倦遊轍。試看眼底紛紜。幾年人事。花樣都全別。何似釣臺煙水上。不問螭蠅喧熱。隴首長鑣。牀頭濁酒。誰巧誰爲拙。送君歸矣。柳花正似飛雪。

又 社集吳山望西子湖

西子嬌憨。把兩峯山色。偷將眉嫵。做雨弄晴猶未了。又被白蘇收取。桂子多情。荷香無賴。分付閒鷗鷺。蘭亭今日。愴然俯仰千古。況是如雲勝友。超然臺上。立馬圖中處。慷慨乾坤無限事。腸斷畫船歌舞。葛嶺烟霞。段橋花柳。依舊西陵樹。笑傾綠醕。錢郎今在何許。

又 西湖坐雨和韻

皋亭雲靄似愁癡。一段忽添嬌嫵。鏡裏明眸。渾似睡。又是煙迷南浦。柳剩慵腰。桃含淚靨。紅困蜻蜓舞。金烏不見。無端卻恨夸父。人在庾亮樓頭。閒吟倚檻。空把寒鷗數。密約西陵應誤了。擬待來朝晴補。影斷香車。泥封蠟屐。其奈而今苦。兩山鐘打。方



知日影分午。

又 初晴湖上卽事

曉霞紅徹，倩羲和持取，彤輪初沐。林外鳴鳩催婦急，不顧鸚哥睡熟。暖入棠梨，輕鬆柳絮，漸看花魂續。倚闌一睇，南屏青翠遙矗。別有寶馬鞭柔，鈿車路軟，芳草裾腰蹙。粉色衣香春不管，儘占明湖幾曲。擲眼兜鞋，凭肩穩髻，處處穿花竹。天應不負，韶光一百零六。

又 四十九自壽次澹心

次公狂甚，只終朝獨坐，愛山臺上。魚鳥江湖聊自得，怕學市兒官樣。衙散栽花，公餘放鶴，忘卻稱州將。開樓一嘯，此身如在圖障。遙想張趙當年，埋輪破柱，意氣真何壯。欲效前人猶未可，空憶牛衣相向。塞馬功名，海鷗時世，寧必分欣悵。月明高興，笑予何遽非亮。

桂枝香 四十九自壽次澹心

青眸如舊。把世路羊腸。等閒參透。可笑小兒造物。種禾生豆。知非不覺年華驟。只消磨沈郎腰瘦。金門方朔。玉階顏駟。幾番生受。向此地、一麾還又。嘆湖海淒涼。雨雲翻覆。震澤西風。吹滿浮邱雙袖。書館秋登。堪琢句。是銜觴。去年時候。新醅出甕。好山當坐。且娛清晝。

又 飲李書雲黃門齋中觀劇

重歸丁鶴。正雪霽蓬壺。臘舒梅萼。人向西園對酒。酒酣歌作。山香初試花奴舞。更催齊念奴絃索。玉簫吹鳳。瑤箏排雁。串珠搖落。羨顧曲、周郎如昨。料記拍紅紅。應自非錯。響徹涼州。一夜飛雲停閣。英雄兒女俱陳迹。算人生、惟須行樂。此時耳熱。烏烏擊缶。古今誰若。

喜遷鶯 次原韻送閔文歸里

池塘句得。正謝客相思。月梁顏色。剡木拏舟。苕溪載酒。纔喜癡人相惜。一曲驪歌夜唱。又作雪鴻殘跡。回首處。是金門索米。鳳池聯翼。嘆息。當日裏。楚尾吳頭。卯酉難

相值馬上談兵。燈前草制。十載只如朝夕。冷落延津雙劍。心事不堪重憶。君歸也。且爲余料理。故園松石。

永遇樂 和澹心

韻海書成。亭皋詠罷。有人於此。公事湖中。胡牀月下。兼署鶯花使。白頭有分。青編無據。中夜壯心頻起。賴相看。風塵慰藉。尙有鴻妻霸子。鄆山喬木。隋堤芳草。何處燕巢鳩壘。半百將過。五十徒讀。莫辨臧三耳。謝公功業。杜郎詞賦。付與春婆夢裏。念衡山。懶殘煨芋。急流將已。

花發沁園春

豔極生愁。嬌深成歎。恨人恨事長有。雲英未嫁。道韜無聊。豈料一時都近。柔腸點點。怎奈取。多般禁受。把幾許。劍嘯書慵。平分花憔悴。況復才華輻輳。更箋裁濤樣。字臨漪手。封綃托雁。製錦憑魚。總是痛花傷柳。三生石老。何處可。種蓮成藕。只應也。影裏人兒。夢中相見巫岫。

望湘人 贈杜茶邨次鄧孝威韻

憶曹劉並駕。吳楚連橫。狎盟曾推時語。鄧尉淒涼。杜陵飄泊。中道離羣誰與。十載分襟。一朝連袂。依然爾汝。念綈袍。范叔生平。攬贈翻成疑佇。此地顏蘇舊處。有文章。賓客留歡林澱。肯勝跡而今。車笠頓忘縞紵。好將煙水。收成佳句。題向城南棋墅。且莫令。千古湖山。輕笑詞人歸去。

五綵結同心 賀鶴問次韻

髯蘇較懶。小杜憐癡。盈盈入畫枯槎。誰訪山陰雪。如卿者。才調濁世稱佳。水嬉湖畔。尋芳去。清狂甚。碧縷紅牙。誰知道瓊霜夜杵。裁成並蒂蘭葩。淺笑九枝燈下。看神仙伴侶。扇掩鸞紗。賭茗書多。典裘杯熱。管領一代風華。遙憐丹就玄霜日。寧數勾漏雲砂。且受用。青山罨畫。洞中萬樹桃花。

又 五日集張帶三紫蓋山房

葵英鋪錦。蒲節浮瓊。光陰又到天中。槐砌初過雨。占農事。今歲料得年豐。但看時事。

惟宜醉而今也。醒問誰容。堪憐有人來河朔。一時盡是英雄。況逢赤松儔侶。自婆娑起舞。老子猶龍。人號三珠地。稱羣玉揮屏。氣吐青虹。離騷不必將天問。天原是、依舊鴻濛。且自向、芙蕖多處。陶然共吸荷筒。

又 過惠山蔣氏酒樓和其年感舊韻

幾年湖海飄零都慣。猶然百尺高眠。傅粉何年客。會同聽、中夜急雨鳴泉。三生石上精靈在。空遺恨、雪雁風蟬。腸斷處、櫻桃舊夢。一時重記難全。堪憐多愁多恨。歎樊川杜牧。曾斷哀絃。回首青樓。玉簫月冷。血書午夜殘鶻。傷心忽聽離鸞曲。盼不到、春草芊綿。憔悴煞、一窗燈暗。三更酒凍銀船。

風流子 西湖

西湖兒女地。長堤畔、銷盡古今魂。看兩嶺送青。雲偷眉色。重波皺碧。水學羅紋。更誰處。鶯調曲玉管。蝶舞鬱金裙。蘭葉舫頭。翠觴涼月。柳絲樓上。紅袖斜曛。忽風吹塵世。再來處。已是路阻漁人。空記尋香梅市。索笑桃門。歎霜高水瘦。鄂王祠廟。渚寒花

謝蘇小鄉鄰。幾度斷橋佇立。惆悵黃昏。

又 送辰六歸廣陵

春隨人共到。春光好。人又去匆匆。正水漲蒲桃。香溪畫鷁。隄垂楊柳。茂苑青驄。送君去。棹歌回晚雪。帆影挂輕虹。六代舊愁。難留叔寶。一篇新賦。送別文通。登高還攜手。繁華地。斜陽老盡英雄。多少鷗夷留恨。杜宇啼紅。問玉簫斷後。誰家夜月。烏衣歸去。何處春風。無限淒涼心事。唱徹江東。

沁園春 述懷

落拓黃衫。一帽東風。星星鬢鬚。只候羸關畔。題詩借筆。漂母祠前。買酒騎驢。躍馬平生。當年兒戲。爲甚關門獨較書。花前醉笑。古人欺我。擊缶烏烏。江山何處歸歟。算且去江邊學釣魚。看馬卿才調。何年北闕。孫郎意氣。幾日東吳。三尺玉龍。一牀狂夢。會到大槐宮裏無。呼天語。問天生如此。肯老菰蘆。

又 想想園爲坦夫題

樂安廷尉新齋先生志託煙霞有懷未遂圖爲想園聊以寄意也坦夫復作  
想想園蓋於縹緲之間存堂構之思其爲想也益悲而遠矣夜雨當杯漫成

一闋

金谷樓空玉津園廢恨滿銅駝記據梧南郭賦成烏有種花西圃鄉號無何自謂羲  
皇不知魏晉此事憑教春夢婆蘇門路歎迴車腹痛吾又經過翟家雀散空羅生  
子誰如仲也多向堂中聽雨徒憐載酒湖邊對月還憶聞歌舊業都非故書猶在若  
有人兮帶女蘿仍長嘅慨當年結想未遂巖阿

又 題友人照

夫子爲誰曰鄭當時抑鄭康成向梅花閣上詩同水部菊英籬畔酒似淵明三徑長  
開百城獨擁笑倚南軒七尺屏天然處有點蒼翠色月白霞青葛陂偶爾閒行問  
醉踞平泉復幾曾愛獅蹲虎伏羣峯聳秀龍銜螭繞九節能輕天與宮商地資邱壑  
耐久交情畫未能吾還羨羨歐公白傅曾主斯盟

賀新郎 江學在清瑤嶼中和陳其年韻

屨齒穿苔罅。愛君家、魚絲竹膾，雀綿披鮓。坐上鬚眉人影綠，一片空潭微射。有數點、海鷗常下。儘日狂談揮玉麈。笑人間、世路羊腸怕。吾醉矣，心無掛。閒來潑墨珠泉瀉。記當年、湖邊杜牧，置身圖畫。今日飄零江海上，遊倦臨邛司馬。夢醒後、鄰鐘初打。華屋山邱休更嘆。看烏衣、燕子重來者。今古事，難憑藉。

春風嫋娜 邱路看桃花

問桃源何處。曾賺漁郎。沿嶺路。汎湖光。扣蘭舷。又見苧蘿煙雨。忽成霞彩。飛入蓬窗。但有天紅都無溼翠。不辨胭脂深淺妝。十里籠將畫溪水。一身疑上紫雲鄉。生恐封姨巧妒。絲絲點點。到明日、步障難藏。傾椒醕。祝東皇。尊前惜取。嬌靨紅裳。莫待重尋。元都仙苑。且教沈醉。濯錦春江。塵緣休戀。怕雙扉人去。題門詩在。前度茫茫。

玉女搖仙珮

蓬山萬里。瞥遇仙姿。不是飄風班綴。向月傳神。將花點靨。總有自然佳麗。眉黛誰堪



比。怕遙峯碧嫩。似人非易。想應是、鴛鴦命合。便不相逢。料也難已。最愛下重簾。燭底杯前。雨嫣雲媚。何況深憐淺惜。嵌骨相思。忍令白眉拋棄。薦枕楚臺。吹簫秦苑。未似而今稱美。紫袖肩同倚。雕闌畔。還把紅蘭香藝。願莫忘、長生夜語。西陵松柏。久長情意。如辜誓。他年試檢雙鴛被。

多麗 贈內

夢兒中、猛喚一聲堪惜。幾年來、狂多醉少。不逢些好消息。又長安、杏花紅處。看他人上馬顏色。青草衣袍。黃花顏面。一牀寒雨。愁空滴。牛衣冷。籠頭布帽。燈影弄餘碧。三更後、封侯枕上。醒來無跡。笑人裏、平原絕少。那有黃金迎客。爲伊行、冷心溫藝。又重把瑤壺共擊。碧碗澆愁。紅衫搵淚。鸚裘沾酒。陶家壁。更憐取、歌成五噫。同讀還同譯。臨邛去。秋雨茂陵。忍添鸞隻。

法曲獻仙音 虎邱懷古和韻

海湧峯頭。舞殘歌散。猶認舊家南國。金虎蒼茫。玉魚零落。短簿何堪收拾。只留取、荒

臺下點剩生公石。今何日。歎時時。醉紅低翠。儘意把、劍鐵花磨蝕。搔首我重遊。問何處、水犀遺跡。霸業銷沈。又寧論、樓臺金碧。但畫船歸後。淒然雨鐘煙笛。

鶴冲天 題錢葆飜舍人小像

採花陸渚。客夢來尋處。春晚得吟箋。相思句。山陰挈一葉。別館臨秋留。住。畫裏人堪侶。烟波點染。宛在綠蘋蒼苧。金華早暮。起草催君去。肯任把白石、谿中煮。且鸞臺鳳蠟。細數盡、銅龍雨。鑑湖他日。許長條繫艇。着我共傾幽緒。

乳燕飛 五月八日諸子過集聽松書屋和東坡韻

老樹陰連屋。映朱欄、碧池新漲。燕教雛浴。柳外屐聲來勝侶。善賦都如宋玉。試荀香、漫煎黃熟。席上簷花清影亂。看銀蟾、正照屏山曲。可此際、聲無竹。畫羅衫子黃金簇。向樽前、回眸一笑。頓忘羈獨。自分樊川甘薄倖。禮豈能爲我束。正恨是、春陰成綠。況有何堪。今白髮、把當年、公瑾離愁觸。歌罷也、梁塵簌。

百字令 登鬱孤臺和丁雁冰觀察韻

頽然高阜。獨青青攬盡。兩江江色。浪跡偶來頻弔古。臺榭已憐非昔。竹樹遺墟。藤蘿夕照。不見當時客。淒涼惟有暮雲千里凝白。聞說叔子公餘。季方才妙。曾着臨川屐。我似東坡還過海。空愛韓陵孤石。望闕神遙。登樓夢杳。往事懷邀笛。何時歸隱草堂。山北之北。

南浦 鮑子韶邀集蓮社菴卽送家觀莊入粵

參軍鮑照。愛攜蠻榼趁秋光。來值芙蓉城主。逸興滿瀟湘。走馬大堤沙軟。到雞園。竹下擁胡牀。把兩江煙水。盡收金罍。點染付奚囊。叵耐荻花楓葉。正颼颼。淒絕似潯陽。腸斷河梁分手。更臥病清漳。自是旅遊無好況。人留人別。總堪傷。賴庾公還把一天風月好平章。

金明池 集曾波閣

白鶴珠宮。蒼龍玉沼。司馬浮蹤暫息。砧杵動。離心欲冷。有今雨舊雨上客。過虹橋。皂蓋飛來。總踏亂。幾畝寒山秋碧。向竹裏行盤。花間弄罽。共道西園重集。可怪雙江

帆影急。把好夢吹殘。勝遊空憶。風中曲、瓊簫競響。波上月、錦燈同色。況芙蓉、地主情多。便柳折旗亭。怎生消得。且儘量銜杯。擘箋分韻。莫負清宵瑤瑟。

三 坦  
種 菴  
軍 詞



徐石麒（明——康熙）

字又陵。號坦庵。其先爲鄞人。後徙居揚州。少承父學。精研名理。不應有司試。而好著書。其雜著及詩詞多至二百餘卷。皆失傳。尤精度曲。入白仁甫關漢卿之室。一家老幼。盡擅倚聲。有徐氏一家詞之刻。

序

長夏二客話齋中。或發問曰。世有情與性異者乎。客曰。無有。有行清正而言綺靡者乎。亦曰。無有。余聞之。啞然于旁曰。是殆未交吾坦菴者也。坦菴之爲人。沈靜寡言。門無雜賓。四壁圖書。終日危坐。則其性之介然正冽然清。可知矣。乃讀其詩騷詞劇者。每每擬爲風流倜儻。或一覲其容止。則使人疑而不知信。然則性與情豈盡同乎。言與行豈盡一乎。客曰。否否。吾聞言清而行濁者矣。不聞反是。余曰。抑有說。坦菴靜研經史。博獵典籍。多所論著。而以其感憤滑稽之致。寄之詩騷。乃世之見我坦翁者。特其寄耳。客曰。然則盍以研經史而獵典籍者傳乎。余曰。楊子之書。每欲俟之後世。班氏之學。不能喻諸俗人。殆以其可知者示人。而餘則有待。是以遠有唾珠癖。佳二集。近有甕吟忝香數種。茲復有且謠之役。大抵先後一意也。客唯唯而退。余因歸白坦菴。坦菴手一編。拂其髯而笑。拊余臂而微言曰。子知我哉。吾將飲狂泉以避鍼艾。哺糟醜而辭清醒。今當謂我性與情同行與言一也。無不可。姪元美敬識。

坦菴詞

江都徐石麒又陵

甕吟

十六字令 別意

將進酒。長歌駐短亭。閒停拍。雙淚落新聲。

夢遊仙 湖干新詠十首

湖居好。地僻可逃名。岸上桃花迷釣叟。門前柳樹隱先生。相識亦何曾。  
湖居好。閉戶少人知。杜甫工詩吟戀苦。揚雄作賦字貪奇。樂此不知疲。  
湖居好。學圃不爲迂。一笠自承窗外雨。幾鉏親墾屋邊蕪。清供有園蔬。  
湖居好。鳥語亦清奇。喜報客來鸚鵡喚。苦留人住鷓鴣啼。憨態頗相宜。  
湖居好。種秫有陂田。五斗不煩腰更折。一車何用口頻涎。常此醉中天。  
湖居好。滿目是春妍。蝴蝶拍翻花一夢。鷓鴣啼徹柳三眠。此景正悠然。



湖居好。客至一茶葫。梅雨爲添牀下甕。松風知沸牖邊鑪。何必入郇厨。  
湖居好。得意儘風流。喜逐漁郎歌欸乃。閒調烏子學鞦韆。殊勝石城謳。  
湖居好。別是瓠中天。麥秀桐華花甲子。鴻賓燕乳鳥寒暄。無術也知年。  
湖居好。安土便爲家。一棹楊舟輕似蜃。數椽茅屋小於蝸。端不羨豪華。

豆葉黃 閨思

珍珠簾外草萋萋。手撚青梅憶舊期。聽徹黃鸝枝上啼。黛眉低。魂落江南淚落衣。

生查子 題雨先詞

夢來何處雲。染就盈盈質。瘦影奪梅魂。寒韻驚筠骨。清謳浥露香。冷句凝秋溼。我願作珊瑚。架上擎君筆。

浣溪沙 湖中述懷呈蘭次

杖履逍遙懶出山。怕他風雨做驕寒。半生經畫爲投閒。按候自澆花九九。迎春先掃徑三三。此時應不在人閒。

又 與友人約爲方外遊

高枕雲根夢不飛。烟霞繚繞鶴身肥。薄情名譽免追隨。小草肖人慳遠志。文無贈我解當歸。故園松菊正芳菲。

又 詠蘭

鬧綠酣紅強赴時。春工着意在芳姿。東風開送一枝枝。幽不乞憐君子傲。淡能存好美人癡。影宜圖書韻宜詩。

又 春閨

春到花閒燕子知。舊巢新葺傍人時。傍人人自不禁持。欲把青棠蠲舊忿。又拈紅豆說相思。喃喃只是怨歸遲。

卜算子 春怨

也賦戀花才。剩有擔花譽。百拜枝頭杜宇兒。留得春兒住。嚼盡斷腸詩。嚼破傷心句。蚤識春愁慣著人。撚取春歸去。

攤破浣溪沙 夏夜卽事

月到簷梅女字枝。幽人貪夜未眠時。自捲湘簾驚燕子。坐庭墀。露滑琴弦尋調亂。風欺鑪火得香遲。花影滿身寒不起。少人知。

又 題秋櫺詞

自是詩腸別有腸。冰壺濯魄冷而香。二十四風徵好句。滿奚囊。錦字簇成花伎倆。新聲押就鳥宮商。誰按錦箏歌此曲。杜韋娘。

南歌子 湖中自適

茶竈烟初篆。詩瓢夢已華。門前鸚鵡向人譁。定是青溪老衲。訪山家。點易新研露。談經巧笑花。脫巾高唱白雲斜。不信壺天。更有泛仙查。

又 戲作女兒詞

十樣耽眉癖。三年學步癡。新來樣子脫西施。便教名花自對。也相思。鬢髻堪釵玉。衣裳足繡絲。未窺簾幕少人知。可奈年年不嫁。損春時。

又 病中作

璧月時侵榻。簷風自掩門。無聊枕上耐呻吟。羞說烟花三月、舊時春。病裏研詩細。愁中得句真。青山管取臥遊人。領得離騷滋味、兩三分。

浪淘沙 難後留別

城潰後。偕汪起霖狄性之羅然倩任渭叟同避吾師寧濬冲家。日商遠舉。不得會。便歸湖。賦此言別。

相與說乘槎。無計留他。春花夜月盡鳴笳。只有青青雙眼在。曾見繁華。飄泊向天涯。何處吾家。浮萍知否是楊花。自恨不如枝上鳥。猶自啞啞。

鷓鴣天 喜郭亦五劉元凱過訪

一到湖干履齒稀。吟鞭若個指荆扉。百錢正此留燕市。三笑於今過虎溪。傷久別。怕輕離。奚童閒策蹇驢歸。谿橋十里同攜手。何處寒鴉噪晚暉。

南鄉子 與然倩雨先飲村酌

春去幾何程。剩有湖山一帶青。尋向綠楊橋上去。多情鶯老猶能作慢聲。有  
提瓶。莫向青天話不平。萬事不求求一醉。無情薄酒臨風忒易醒。

又 金陵道中

霜葉冷江湄。何處秋山嵌落暉。行遍雨花臺下路。追隨我馬玄黃喚不肥。借問酒  
家誰。十五當鑪解畫眉。買得松醪休浪醉。葳蕤聽唱金釵兩臂垂。

玉樓春 答友人

避地後初入城市。遇吳蘭次宗鶴問於途。問近日何以寄情賦。此言答。  
問余寥落情何寄。曾向蝸廬尋活計。品題清濁酒升書。點次丹黃花及第。江潭憔悴  
長沙涕。不到江陵歌舞地。楮生硯史禿頭公。揀徧人間真得意。

唐多令 重陽感舊

甲申九日。與羅然倩劉子祉陳聖茹貫酒賞花。盡歡而罷。今佳節再逢。而子  
祉聖茹兩兄皆兵解去。我偶與然倩把酒話舊。淒然淚生。感而賦此。

曾憶是重陽。鑪頭新酒香。戴黃花、攜手同行。去日而今能幾許。追往事、費徬徨。若個在吾旁。重經舊酒場。怕傷懷、按住柔腸。歌伎但歌行樂事。莫爲我、變新腔。

臨江仙 寄懷特社諸子

謾道入山深處好。山深人跡荒涼。回頭萬種淚滄茫。故人天外眼。熟事酒邊腸。把筆欲傾千幅紙。清詞多爲君商。扁舟擬附打漁郎。江湖纔咫尺。風雨不尋常。

漁家傲 寄衣

河畔青青無限草。雁聲一度經秋老。兀坐高樓雲樹渺。寒料悄。那堪北地嚴霜早。新紵初成裁作襖。停針費盡心多少。又恐秋風吹瘦了。腰胯小。只須改換當時稿。

行香子 歌自製曲

韻譜新修。樂府精搜。舞陽春、高調誰儔。詳推字眼。穩拍歌頭。蚤冷吳歎。分楚豔。擅齊謳。不唱甘州。不和伊州。最宜傳、二八歌喉。酒酣翠幄。花近紅樓。正響琵琶。清羯鼓。潤笙篴。

又 自題讀書處

老樹丫叉瘦竹籬笆。徑支離處士人家。犬無驚吠。鶯有清譁。但蓆爲簾。茆作瓦。紙當紗。爐內烹茶。餅內簪花。客來時。園有壺瓜。紅塵不到。白髮休嗟。且讀離騷。點周易。講南華。

祝英臺近 難後懷蕙菴

雨中山。山下渡。猶是舊時路。指盡征帆。都向日邊去。蕭蕭紅蓼。西風白蘋。秋水望嶺表。蘇郎何處。莫回顧。只有烟雨鳴鳩。驚飛夕陽塢。斷刹荒坵。再誦鮑昭賦。歸來又恐傷心。人非物換。空一座。錦城如故。

六么令 秋興

毳花茸草。滿地無情綠。西風急吹雁影。不願歸南國。江上蘆花夜冷。誰伴鴛鴦宿。玉樓金谷。歌聲乍起。幾處征夫夢初熟。繁華好是迷目。嘗着須云足。君不見塞上翁。得馬應非福。爭放梟鷹黠犬。知是誰家鹿。陰晴難卜。不如杯酒。醉後高歌幾聲曲。

八聲甘州 乞癡

子厚乞巧。余獨乞癡。辭異而意實同。然余以爲巧有盡。而癡無盡也。

笑英雄。無計撥閒愁。安得謂雄哉。儘糊猴戲弄。山魃伎倆。觸目傷懷。只爲聰明些子。瞞不過靈臺。故把眉峯上。疊起愁堆。不恨人情嶮巖。恨天公生我。不作癡呆。謹陳蔬獻酒。稽首向天街。願從今。不聞不見。與海鷗。相狎莫相猜。人生事。清風一枕。濁酒千杯。

風流子 秦淮歌館

青樓誰窈窕。拋紅豆。新唱夢揚州。聽宮字欲流。嬌能掩誤。徵音初變。弱不禁愁。一聲繞錦投三萬軸。洒下十千籌。落日正低。西風初度。當杯入手。肯教淹留。今朝相逢好。私心計。拚取醉臥壙頭。但使碧紗穩護。莫放吟眸。恐二陵風雨。寒驚客夢。三山草木。影落歌樓。老子壯心未已。還賦悲秋。

又 感懷



踏歌歸去也。綸竿上、高挂黑羊裘。喜有意近人，猶存幽竹，忘機似我，惟有浮鷗。不須問、兩丸新日月，幾箭舊春秋。若說買名，徒低酒價，但言畧利，恐浣漁舟。興亡誰家事，高粱上、怕聽燕子啾啾。且向松關喂鶴，柳道騎牛。有奇書下酒，燈前破甕，好風吹韻。花下拈鬪。如此一生足矣，何必封侯。

沁園春 村居

此地吾廬。坐對青山，朝雲暮霞。更紆迴流水，隨緣種竹，高低磬石，任意栽花。紺菊宜籬，碧梧須井，自是山人布置佳。還堪喜，有東鄰酒旆，西舍漁槎。春來純是豪華。但醉舞狂歌，忘日斜。笑花巢杜宇，何須懷土，草堂飛燕，不用思家。世事琴聲，人情酒味，眼孔而今看破些。南窗臥，甚秋風鬢栗，暮雨琵琶。

又 自況

薜荔青青，芳杜招人，吾歸北山。喜玄談驚座，碧雞堪語，縹緗插架，白鶴能啣。一棗春風，滿懷秋月，收拾都來十畝閒。蓬門外，種幾株高柳，不繫征鞍。先生杖履閒閒，問

何事春來更解顏。有司茶童子。探梅消息。校書女伴。報竹平安。騷不足歌。酒何庸惜。一夢華胥。任往還。人間事。付花鶯。睨睨。社燕呢喃。

且謠

滴滴金 梅花

色侵簾幌香侵屋。又交著。幾竿竹。借得瀟湘月影來。伴南枝春宿。玉簫聲老朱絃促。中有佳人嘆幽獨。只恐風吹海棠天。有孤芳誰續。

南唐浣溪沙 述懷

莫把身名叩懶殘。半生意在有無間。拾得新詩渾未省。幾人看。雲徑竹搖山翠薄。玉壺齋嚼水晶寒。船上月明簑上雨。老湖干。

錦纏道 幽棲

萬頃波涵一段好山如畫。種烟霞。稱人瀟灑。是誰獨占東風下。翦竹編籬。不放閒車馬。向疏林影外。一尊常把。步道遙。共漁樵閒話。行人似解幽情道。畫中人是五柳。

先生也。

醉春風 贈隱士

冠也無心戴。帶也無心珮。問翁何物最關情。愛。愛。綠水重迴。白雲千點。青山一塊。掃葉挑崧菜。煮酒烹螃蟹。醉來若更覓翁時。在。在。在。紅樹香中。黃花影裏。碧梧聲外。

眼兒媚 贈野雲道人

翛然四海任雲浮。五月尙披裘。中山學醉。華山學睡。幾日蓬頭。兩眉閒似巖山鶴。又解替人愁。咸陽古道。一腔漁鼓。只唱歸休。

柳梢青 眞州道中用秦少游韻

風起晴沙。馬蹄不諳。岐路交斜。荒市無人。斷垣高樹。猶着春花。征衫搵淚無涯。聽不盡。西風晚鴉。隔岸青燐。望如烟火。疑是人家。

戀繡衾 隱居

芳杜洲前薜荔村。徧人間、尋一段春。又傍疏籬種柳。要門前、添一塊雲。鶴飛不去。猿啼在。怕山靈、移一道文。白眼科頭箕踞。向林間、留一個人。

踏莎行 龍潭道中

雁影驚時。山痕斷處。白雲一段迷紅樹。馬蹄踏盡坂頭霜。沿蹊覓向孤村駐。濁酒新篘。寒烟未煮。一杯持共西風語。滿山落葉做秋聲。一天涼月無砧杵。

又 望湖

遠樹堆山。流雲捧水。漁舟疑去天無幾。波涵初月淨無光。晚霞散作千端綺。蘆荻洲前。菱蒲頃裏。棹歌聲逐西風起。野禽飛去不知名。烟波豈獨元真子。

臨江仙 次陳簡齋韻

正是看花花好處。重來落盡殘英。一尊聊與聽波聲。半江秋雨歇。十里晚霞明。往事在心徒記省。渾如好夢初驚。鶉鴣猶說舊陰晴。酒清人去後。山寂夜無更。往

欽頭鳳 途中覓酒

春無價。寒無藉。一肩風雨難銷假。搖鞭手。吟詩口。江山指顧。舊時楊柳。否。否。否。青  
山下。泉聲瀉。梨花共我籌今夜。沈思久。愁難帶。雞聲茅店。問他村酒。有。有。有。

定風波 泛湖卽事

秋水清於不夜天。乘風盪槳綠濺濺。白鷺沙頭漁吹起。來矣。未曾相識也相憐。話  
裏欲將詩換蟹。不解。卻攜小扈叩余舷。爲問瓦盆何所有。沽酒。持螯共醉不須錢。

千秋歲 漁舟

湖光如鏡。綠褪浮雲影。天上下。琉璃整。蒼鷗流苐遠。白鷺行沙靜。船起處。夕陽猶在  
簑衣領。說着烟波景。幾個扁舟興。歸去也。秋風冷。放歌欹竹枕。買酒尋花徑。人不  
道。漁翁醉也漁翁醒。

山亭柳 詠隋堤柳和鄒程村韻

遙想風流。僅見此溫柔。曾試與。拂迷樓。眉黛何人重掃。舞腰還爲誰留。風裏不知人  
意。只自輕浮。烟花三月當年夢。青青依舊遶邗溝。何許事。使人愁。正是藏鴉穩處。

夜深猶見燈籌。多少行人醉也。常繫歸舟。

拂霓裳

邀袁籀菴看演珊瑚鞭傳奇

儘商量。人生萬事熟黃梁。收拾在春風錦繡一奚囊。英雄啼有淚。兒女笑生香。杜韋娘。趁當筵、歌舞拂霓裳。風流況是客座上有周郎。摧拍了不教絃管誤宮商。調高人語靜。燭短酒盃長。謾端相。繡簾開、明月遶歌梁。

滿庭芳

登燕子磯

翠倚菱天。白防雲路。斷磯一掌孤擎。周遮人面。風破晚霞明。攜酒自尋幽徑。渾道是、未有人經。欹巖畔、一樽對月。歇語聽江聲。多情相戀久。花閒著句。石上留名。更憑高悵望。烟水冥冥。指點六朝舊事。猶疑在、月觀風亭。長淮影。寒鷗暖鶩。千古泛金陵。

雙飛燕

秋興

知他甚日。被風雨催將。雁兒來了。霜籬冷落。困煞黃花多少。持酒又翻新調。留不住、斜陽樹杪。眼前無數關情。十里野田秋燒。可是英雄易老。但水渺山濛。不堪登眺。

勸人歸去。只有子規聲好。做得烟波舊稿。穩睡足。漁翁一覺。都來不管離憂。一任楚天芳草。

念奴嬌 擬桃源

白雲生處。水濛濛。疑去人間非遠。四望不知烟火岸。夜寂微聞雞犬。松子崖前。梅花谷裏。一徑青疇展。科頭箕踞。此中人似嵇阮。不比舊日桃源。花開花謝。猶有漁郎見。拳土不曾經禹甸。自有芝田蘭畹。鶴拂天秋。樹迷烟暝。鷺宿沙痕淺。天然圖畫。乍開卻又還捲。

賀新涼 隱居

恐是愁來路。借緱山、白雲一塊。補聯秋樹。六折山橋三面水。遠卻桃花幾步。穩著得、閒鷗無數。烟火不留林外照。但蒼霞、白石都堪煮。歸去也。豈無故。門前只有浮查渡。問年來、山中甲子。未曾重數。車馬欲通芳草信。訪徧終南舊主。敢正被、猿驚鶴誤。不著胡麻流水遠。更一竿、垂向無名處。誰信道。有人住。

水龍吟 詠楊花和蘇公韻

因何不見花開。紛紛只見花飛墜。臨桃色減。擬梅香遜。頗無佳思。羅幃黏時。瓊樓着處。幾人深閉。想東君不爲繁華妝點。多只爲愁人起。遙憶灞橋上。折長條。繡鞍難綴。都來幾日。韶光催送。共人心碎。更學遊人。隨風化作。斷萍流水。看一年一度春殘。敢則是天揮淚。

美人詞

浣溪沙 美人

酒漬胭脂共染脣。盈盈一笑遞香溫。綠篝光裏揀情人。胸帛交成花玉彩。腕闌簡得柳金紋。向來心事爲誰春。

又 郊遊美人

得意春來分外姿。玉蟬嬌趁海棠絲。翠勾紅引步遲遲。好語暗猜風軟款。韶顏爭認柳參差。養花天裏試相思。



又 送酒美人

錦瑟紅牙玉柱箏。抱瓶花近美人行。一杯春酒送娉婷。笑指粉腮辭薄醉。暗挑絲鬢轉柔情。怨紅愁綠一聲聲。

又 美人送酒

酒在尊中澱豔波。泥人好句近人歌。且推檀板捧金羅。玉手斟時休道滿。金蓮約處不曾多。此宵無醉奈情何。

鷓鴣天 美人寫書

坐拂雲牋寶翰香。鏡臺彈指熟思量。草書珍重頻千萬。花字連環押一雙。書釋手。淚盈眶。慇懃小語寄書郎。薄情若問閒梳洗。不是當年墮馬妝。

秦樓月 美人足

誰雕琢。纖纖玉筍含香籜。含香籜。陌頭輕步。似愁風惡。軟紅巧樣真難學。阿郎寸指閒相謔。閒相謔。銷魂被底。一鉤盈握。

又 美人影

愁無那。燈前似有人同坐。人同坐。新拈詩句，有誰曾和。阿誰暗閃金屏過。含羞吹卻燈花墮。燈花墮。莫教好事，被他瞧破。

又 美人魂

垂簾幙。重重不鎖春飄泊。春飄泊。柳絲花朵，幾時牽著。睡鄉寫勾相思約。黃鸝窗外休輕薄。休輕薄。巫山正穩，不須驚覺。

又 美人膽

空房怯。徘徊顧影羞明月。羞明月。有懷不寐，又愁燈滅。見郎猶自聲嗚咽。繡衾幾度嗔郎劣。嗔郎劣。恹恹不語，指頭空嚙。

解佩令 醉美人

晚妝添染，不消粉漬。正天然、一行霞起。微笑生渦，漸有依回人意。彈金釵、向郎肩倚。朦騰送眼，嬌訛道字。吐不真、喁喁情事。正好欺他，做一段、風流佳致。擁行雲、翠紅

鄉裏。

南鄉子 美人浴

晚鬢卸驚鴉。促辦溫泉屑木瓜。俛向燈前開繡帊。羞他。一手斜牽小婢遮。春水浸梨花。香霧侵人勝館娃。自是深閨人不見。樺紗。更有春光漏一些。

意難忘 美人舞

長袖翩躚。慣迷雲弄月。輕似鞦韆。花光爭蠟燭。香氣雜鑪煙。金釧響。玉釵偏。恁加意娟娟。小凌波。折腰新步。消得人憐。幾多佳客華筵。儘摩娑醉眼。酒政停喧。鴉雲鬆寶髻。粉汗溼香肩。歌玉樹。落金蓮。恍身是飛仙。只愁伊。乘風歸去。想勾經年。

沁園春 美人髮

螭首堆春。鬢鬢天然。巫雲一縷。似烏絲未綜。支機方理。元蠶出浴。分繭初縑。鬢不容膏。滑難留櫛。豈待桃花插後嬌。新妝巧。任驚鴉墮馬。伎盡終朝。盈盈不受雲翹。但愛煞葳蕤小步搖。怕婆娑舞罷。假人再整。鬢鬆睡起。攬鏡重挑。花下徐行。風前背立。

惜別踟躇手一搔。難忘底。是鴛鴦枕上。香霧飄飄。

又 美人腮

滿面嬌憨。惟有香頰。含情最多。看春風暗度。燕支不染。曉霞天韻。越粉慵和。不語藏愁。無人托悶。枕上交痕。手自搓。嗔人覷。把紅衫掩醉。小扇障歌。嫣然親近如何。殆軟玉酥香未足過。見桃花潑灑。含羞添暈。梨雲浮動。微笑生渦。夜色偏宜。春心不掩。玳瑁牀前爭認他。偎人久。有融融粉汗。偷拭香羅。

又 美人腰

嬈嬈婷婷。弱不勝衣。冷然半仙。想荆卿解舞。弓時呈伎。孫娘學步。折處爭妍。翠帶圍鬆。珠鞵樣小。穩趁香裾。並蒂蓮。行來處。似受風輕燕。率地蹁躚。湘裙一捻。堪憐。更著得春愁幾度牽。但踏青情懶。微伸花下。繡紅心倦。斜欠燈前。醉倚人嬌。笑凭人軟。須覓交紅被底眠。偎郎語。道花枝欲鞦韆。莫浪風顛。

又 美人心

一點靈犀。無有人知。熒熒到今。在若耶溪畔。浣紗曾捧。上陽宮內。欲鎖難禁。纔寄雙眉。又拈三指。好向風流譜上尋。黃昏後。看篆香成字。吹玉傳音。花間重掩羅襟。恐未許遊蜂試淺深。怕長卿膝上。瑤琴巧撥。虎頭畫裏。棘刺輕針。笑靨將來。眼波遞出。珍重相思一寸金。分明處。在丁香舌上。細語微吟。

漢宮春 樓上美人

何處驚人。猛擡頭。正是玉手推窗。盈盈半身欲度。雲裏衣裳。粉垣高峙。礙東風。撲落餘香。看只有。無情楊柳。時時披拂明妝。分付花驄解意。到留連人處。莫謾嘶忙。知他恁情指點。意在誰行。徐聽小語。又風箏。撥響簷廊。安得似。歸飛燕子。隨風挨入雕梁。

又 馬上美人

剗地香塵。趁東風。馳驟紅袖蹁躑。和裙自穿玉鞵。忙似鞦韆。畫橋高處。約金鞍。遞出香肩。輕笑語。風流欲逞。窺人伴墜絲鞭。透額羅鬆寶髻。似明妃畫裏。卸卻貂蟬。追

隨暖香暗度。一縷輕烟。朱門日暮。料葳蕤、重鎖嬋娟。且共向、春光駘宕。揮繩莫惜遺鈿。

又 船上美人

水滑春融。見笙歌過處。一點嬌紅。驚傳木蘭身上。擎出芙蓉。嫣然半面。甚波光、搖蕩簾櫳。惟屬取、知情晚炤。穿窗常近芳容。自喜淩波未動。趁牙檣宛轉。已渡橋東。應憐冶遊醉客。踏破芳茸。彩雲漸遠。望歸帆、怨極西風。都道是、甄妃出浴。不知此賦誰工。

又 枕上美人

遲日函窗。是誰將白玉。斜倚珊瑚。多應踏青倦也。醉軟流蘇。胭霞黛月。儘教人、擬盡名姝。但擬到、含情盼處。慳人兩點明珠。此際芳魂有夢。縱不迷楚岫。應在蓬壺。貪他海棠未醒。莫倩人扶。清泉香燼。怕衾寒、輕覆羅襦。空自有、鴛鴦繡譜。卻教半冷紅麩。

木蘭花慢 月下美人

慣嬌憐軟惜。常欲自擬嫦娥。向雲母窗前。琉璃階下。小步輕那。徘徊幾回顧影。更嗚咽。私語意如何。戀此清光不寐。孤幃想也。情多。乘槎隱隱隔明河。奈樹影婆娑。看臉暈霞時。眼橫波際。好景偏訛。欲憑廣寒高處。問霓裳。一曲待誰歌。今夜炤人兩地。炤人還炤心麼。

又 簾下美人

問湘妃何事。提掇盡古今情。把綠玉千條。紅珠萬顆。織作愁城。無端障風掩月。向青閨。終日鎖娉婷。最是玲瓏色笑。耐人影響推評。琅璫疑聽玉鉤聲。幸一見分明。想得意看花。留心放燕。纖手曾擎。東風只須半晌。謾安排。銀蒜押雙絳。掃卻滿街明月。放他一點燈青。

又 花下美人

是天公分付。教紫翠伴芳姿。每採馥臨風。怡寒吸露。引步遲遲。殷然探梅消息。傍南

檐、揀徧兩三枝。賺得金蜂玉蝶。聯翩追趁多時。可憐芳徑獨尋詩。豈料有人知。但繁綠侵眉。斜紅繞臉。望裏參差。遣鶯問他心事。到春風、鬧處怎生支。拾取夢魂歸去。飛紅散作相思。

又 燈下美人

有誰家榆火。分得到小窗間。敢銀燭華筵。紅篝鴛帳。曾炤新歡。無情此時獨坐。教熒熒、一點慰春寒。幾度爆花眼困。再令挑草心慳。有心人共此更闌。常爲惜韶顏。怕露溼光微。風搖燄閃。倦眼難看。雲屏向人有意。知今宵、瘦影爲誰單。只待蘭膏盡也。將人催上巫山。

鳳皇臺上憶吹簫 鏡中美人

白玉臺前。珊瑚枝上。風流誰道無雙。任偏髻倒暈。一樣新妝。恰似嫦娥十五。月殿裏、滿面端相。嬌無語。爲顰爲笑。猜斷人腸。行行比肩雖好。卻不是蘇娘。並炤鸞皇。但回眸內顧。不漏紗窗。應是多情珍重。未肯教、輕盼才郎。梳妝了。羅巾乍掩。莫倩蜂狂。



又 夢中美人

燈落花時。枕橫山處。驀然有徑尋春。見妖姿恰可。好語宜人。自念佳緣如此。不負我、半世情真。輕挑逗。羞還掩笑。嬌不生嗔。殷勤。此時意好。第一個知心。更復誰論。正消磨舊恨。款曲新恩。可奈靈心如刺。收拾了。一段行雲。朦騰裏。莫教眼醒。猶抱衾溫。

又 畫中美人

招取芳魂。約來新樣。一時扶上輕綃。似紗櫺隔影。羅帳藏嬌。也自輕胭嫩粉。揉攪得、不避人嘲。凝神久。眼波欲動。臉暈疑潮。朝朝。閒相望也。不信道人間。有此丰標。將蓮腮暖熨。蘭氣微調。待把真娘舊事。重說與。今日兒曹。還須怕。蛾眉生妒。未許人瞧。

又 意中美人

一點常凝。頻年不遇。依稀有個卿卿。要兼花比色。選玉評聲。那更溫柔心性。挑剔盡、詞賦丹青。堪憐是。高懷獨絕。於我多情。盈盈。時來醉眼。自不屑凡媛。舞榭歌亭。有風流萬種。擬向他傾。待闕鴛鴦社裏。消受我、霧帳雲屏。何時幸。銷魂真個。笑眼雙青。

棠村詞

運乾



梁清標（泰昌一——康熙三〇）

字玉立。一字蒼巖。號棠村。直隸真定人。明崇禎癸未進士。官庶吉士。入清。以原官授編修。累遷至兵刑戶各部尚書。晉保和殿大學士。卒。著有蕉林詩文集棠村詞。

序

詞莫盛于南北宋。人各一集。集有耑名。如毛氏所梓百名家。其最著者。元明以後。作者多有。而傳者少。遜矣。本朝詞學。近復益勝。實始于武進鄒進士程村。倚聲集一選。同時休寧孫子無言。復有三家詩餘之選。由是廣爲六家。又十家。今且十六家。勢不百家不已。豈不與毛氏爭雄長乎。十六家最後出者。爲吳祭酒之梅村詞。龔尙書之香嚴齋詞。與梁大司農之棠村詞。司農公以勳業名天下。譽望端凝。不矜不伐。所爲古今詩數十卷。以及門屢請。始付梓于吳浙之間。常以小詞。不以示賓客。初懋麟侍左右。與公從子承篤。從几案間抄積。授徐子電發。梓於錢唐。遂流播遠近。家有是書。乃無言取冠諸集。予復以公奉使東粵。山川道路之作。益於後。較錢唐本加多矣。而實未足盡公之作也。頃予來自京。見公所作詞。復纍纍。惜未及盡抄而南。無言懸板。莫能待。予知他日視此本。殆復如錢唐矣。公詞雅麗渾成。不事雕飾。不摭拾隱僻。得北宋諸賢之遺意焉。予嘗論宋詞有三派。歐晏正其始。秦黃周柳姜史李清照之徒。

備其盛。東坡稼軒。放乎其言之矣。其餘子。非無單詞隻句。可喜可誦。苟求其繼。難矣哉。若今之專事故實。盡竊幽險。神韻索然。予莫知其派之所由矣。願亟藥以棠村之詞。時康熙丁巳仲夏。江都汪懋麟蛟門撰。

# 棠村詞

真定梁清標蒼巖

## 望江南 鄉思

清明候。細雨曉風和。樹裏青帘春醞美。水邊紅袖麗人多。處處醉顏酡。  
家山好。春色滿平蕪。花片參差裘馬客。柳絲搖曳水雲圖。遠浦立鶉鷓。  
東郊外。暖日水粼粼。一路杏花尋幕燕。幾行楊柳渡溪人。沙細碾車輪。  
踏青去。遙指綠陰村。斜裊金鞭晴試馬。高燒銀燭夜開樽。芳草滯王孫。  
西村裏。淼淼水拖藍。一縷墟煙青似織。數峯嵐色碧於簪。可喚小江南。  
尤堪憶。歌舞向朱樓。小玉多情金縷曲。雪兒帶笑錦纏頭。長使彩雲留。  
清懽夜。偷眼認檀郎。錦瑟假燈腸斷句。青絲墮馬內家妝。私語口脂香。  
休虛度。寒食草青青。荇葉橋邊沽酒路。秋千影裏賣花聲。金彈打流鶯。  
桃花水。相約放船來。菱葉田田鮮鯉出。槐風翦翦小舟開。送酒百壺催。

燈花翦。雜坐漏偏遲。欲寫烏絲噴燕子。將輸楸局倩鴉兒。癯澤乍聞時。

憶王孫 春雨

寒煙暝色亂清樽。噤噤虛窗旅雁聞。暮角聲催斷客魂。一燈昏。細雨孤城盡閉門。

調笑令第一體 閨情

簷鵲。簷鵲。朝來並飛妝閣。鏡臺螺黛生塵。夢裏相逢遠人。人遠。人遠。試報歸期早晚。朝起朝起。侍兒催人梳洗。夢回臉暈紅潮。對鏡雙眉嬾描。描嬾。描嬾。留待檀郎湘管。銀箭。銀箭。暗牽春愁如線。倦來繡幄寒輕。雙下金鉤響聲。聲響。聲響。背褪鞋兒一綉。紗幔。紗幔。輕綃半沾香汗。下簾荳蔻湯溫。拭粉紅綃舊痕。痕舊。痕舊。驗取腰肢肥瘦。春困。春困。鷓鴣香斑燒燼。一團花倦窗西。好夢閒階影移。移影。移影。惱被鸚哥喚醒。新月。新月。漏深畫簾輕揭。鴛鴦繡罷釵偏。伴冷蘭缸碧煙。煙碧。煙碧。樓上誰家玉笛。

如夢令 秋夜

露下秋宵方永。睡起殘妝猶靚。攜手步虛檐。人面月華相映。絕勝。絕勝。小立滿身花

影。

又 題畫扇

一夜西風輕翦。小院幽花初綻。芳沼立蜻蜓。掠水飛來庭畔。閒盼。閒盼。秋到江南深淺。

又 朝回

翡翠衾寒拖逗。惱煞雞聲偏驟。帶得御香歸。猶喜曉妝纔就。生受。生受。正是畫眉時候。

歸自謠 惜春

春夢詫。零落亂紅花賣罷。遊絲飛絮春歸乍。欲留無計眉慵畫。簾鉤亞。鶯兒苦把東風罵。

連理枝 閨情

暮靄生虛幌。雪片飄如掌。蟬鬢微鬆。水沈香冷。簾旌休敞。望遠遊孤客。蠟煤消盡金



釵墜響。

生查子 春閨

河梁別妾時。落葉紛庭榭。春草已芊芊。不見嘶驄馬。  
步怨東風掩。淚鞦韆下。

鸚鵡未知愁。絮語將人罵。小

又 夏夜

蘭湯浴罷時。簫局沈煙縷。偷取遠山青。描作眉兒譜。  
汗等閒消。一陣黃昏雨。

茉莉幾枝開。小摘還頻數。香

點絳脣 偶贈

歌按涼州燈前喜識春風面。傍誰庭院。碧玉閨中怨。  
徧。幽情一線。付與閒花片。

淡服新妝。無語頻凝盼。思量

又 初秋

急雨空階。西風乍入簾櫳曉。秋葵開了。掩映疏籬小。

夢醒黃梁。萬斛愁如掃。長安

道。驅馳人老。都付閒花草。

又 春霽

昨夜冥冥。開窗霽色。簾櫳曉。海棠綻了。過雨紅偏好。橫笛高樓。幾許人。嘖笑。鶯聲老。落英多少。何處尋芳草。

又 憶舊

簾押風柔。傷心往事。斜陽裏。當年花底。芍藥欄同倚。依舊芳菲。歲月看流水。春殘矣。亂紅如綺。草綠人千里。

又 閨情

春困懨懨。斜風細雨。寒吹閣。銀屏珠箔。苦把花枝縛。虛倚薰籠。舊事思量著。情差錯。海棠零落。對下秋千索。

浣溪沙 春閨

深院鞦韆繡帶輕。衣沾香汗玉釵橫。最憐節氣近清明。怕見落英春欲暮。倦開翠

幌夢頻驚。碧桃花下戲調鶯。

又 春懷

郊外提壺藉草茵。桃花春漲水粼粼。暖風吹散隔溪雲。柳色暗催羈客淚。鶯聲愁煞畫樓人。兩般心事總沾巾。

菩薩蠻 花間雙蝶

人間清晝拋書立。綠陰深處蟬聲急。一樹紫薇開。翩翩引蝶來。籬邊相逐舞。幕作滕王譜。槐老入新秋。西風蝶也愁。

又 悼亡

玳梁當日棲雙燕。碧桃花下看人面。往事耐思量。銀燈照晚妝。寶鈿空瑟瑟。愁煞西堂客。腸斷只三聲。長更與短更。

又 春閨

亂鴉啼處春風曉。流蘇香暖金鈎小。晴影入窗紗。街頭賣杏花。鴛鴦初睡足。偏墮

雲鬢綠。拂鏡試新妝。低回問粉郎。

又 題畫扇

板橋流水湖山靚。桃花人面紅相映。喚婢採芳蘭。妝成小步看。苔侵羅襪溼。愛向春風立。莫問落花香。當年誤阮郎。

又 春雨

家山漠漠思千縷。杏花零落廉纖雨。燕語恨春歸。河橋柳絮飛。遊驄何處駐。野水棠梨路。泥滑阻郊行。芳堤誤早鶯。

又 暮春雨中十五弟歸里

可憐九十春光盡。南窗疏竹生新筍。榆莢雨瀟瀟。花寒夜寂寥。河橋垂柳折。柳絮飛如雪。茅店閉黃昏。孤燈何處村。

訴衷情 憶家

綠楊影裏子規啼。催得鬢絲絲。撩人暮春天氣。畫閣晚妝時。新柳困。遠山低。思依

依。五更細雨。半夜歸鴻。一片花飛。

又 詠蓮

猩紅弓樣試風流。貼地軟香浮。凌波巧籠纖筍。錦幄倍清幽。  
蓮折瓣。月微鉤。玉溫柔。苔痕池上。泥印花間。塵跡樓頭。

卜算子 閨曉

寶鴨被重薰。茉莉香先透。兩兩鴛鴦宿碧紗。私語人知否。  
夜雨裊殘燈。朝露沾羅袖。怪煞開奩促曉妝。好夢濃如酒。

又 喜雨

晨起火雲生。棋罷珠簾午。暗送牆頭夜合香。粉蝶雙飛去。  
汗滴透羅衣。手倦揮紈素。乍喜風來似故人。幾點榴花雨。

巫山一段雲 春宵

簫局微溫候。燈篝乍翦時。端相帶笑又佯推。欲睡故遲遲。  
銀蒜垂簾悄。金釵落枕

歛。淡紅袖。袂映脣脂。低問小名兒。

減字木蘭花 齋中微雨

綠窗纔啓。雨過苔青階似洗。咫尺煙霞。風動朱闌芍藥花。  
鵲睡。三徑誰開。籬外多應二仲來。夢回如醉。人語驚殘鸚

又 馮莊看海棠

垂楊別館。蠹蟲高樓當翠巘。草綠閒階。蛺蝶尋芳自往來。  
主人何處。客醉金卮愁日暮。燕入誰家。落盡東風第一花。

又 立秋

西風暗換。秋到碧梧金井畔。人立斜曛。望見家山一片雲。  
香閨病後。小檻疏闌花影瘦。蟋蟀聲催。似爲多情宋玉來。

又 偶憶

疏煙暮靄。人在斜陽秋草外。夢遶天涯。知是當壚第幾家。  
舞裙歌扇。猶憶遏雲花

底讌。楚客愁多。欲採芙蓉奈遠何。

又 雨後

秋葵帶露。紅滿窗紗。蟬滿樹。不管閒愁。倚杖浮雲度畫樓。雨絲風片。消受新涼深。

小院。蝶過誰家。閒煞牆頭夜合花。

又 夕陽

風吹禾黍。幾陣瀟瀟。山市雨。秋色三分。讓與漁家水竹村。蘚階獨立。萬戶聲催雙。

杵急。柳外寒塘。牛背歸來正夕陽。

好事近 歸途

草短馬蹄輕。亂踏落紅歸去。遙指杏花村裏。問酒家何處。一溪春水浸春雲。猶是。

來時路。閨月東風未老。天亦憐遲暮。

繡帶子 閒意

春色耐繁華。車幃碾晴沙。吹皺小橋池面。楊柳逐風斜。塵世幾回嗟。齊分付。夜雨。

梨花東家蝴蝶。卻因何事飛過西家。

謁金門 新浴

人新沐。波濺一枝寒玉。半著輕羅香馥馥。妝殘重結束。桃簟涼生繡褥。小立漏聲偏速。換綉鞋兒剛一掬。奈何郎又促。

憶秦娥 上谷懷古

濤聲咽。蕭蕭亭照金臺月。金臺月。千年易水。爲誰寒熱。狗屠燕市風流絕。荒田督亢飛殘雪。飛殘雪。悲風落日。今古銷歇。

又 茉莉

香風颺。黃昏院落花初放。花初放。銀燈試照。別來無恙。美人奩鏡偏宜傍。珠簪金絡增新樣。增新樣。珊瑚枕畔。綠雲鬢上。

清平樂 西邨

場空禾黍。終歲田家苦。脫卻朝衣耕瘠土。閒逐樵歌漁鼓。溪翁提挈兒孫。騎驢買



醉前村。野外人家如畫。柴扉燈火黃昏。

洛陽春 元宵後雪

纔過傳柑佳夕。曉窗飛雪。重重簾幙落梨花。總不礙、燈和月。  
瀟灑柴門塵絕。又添春色。踏歌聲罷灞橋詩。天未許、風光歇。

眉峯碧 春日

深院鞦韆罷。細雨梨花夜。曉起閒庭一片飛。忍又見、山桃謝。  
蛺蝶枝頭掛。苦憶前春話。門外東風鏡裏顏。背人無語斜陽下。

錦堂春 閨情

遠砌試探芳信。捲簾放出香煙。小樓幾陣廉纖雨。寒食杏花天。  
鸞鏡羞窺瘦影。鴛衾愁裏春眠。呢喃喚醒深閨夢。雙燕到堂前。

海棠春 夜雨

寂寥春院思千縷。陌上柳、新黃纔吐。暝色入西樓。鴈影沈南浦。  
黃昏燈火無情緒。

遣夢到家山猶阻。惆悵打梨花。點點飛窗雨。

山花子 春愁

謾道春風不世情。愁中吹上鬢邊星。歸鴈帶來雲外恨。斷腸聲。  
日暖平蕪晴牧馬。月明綺閣夜調笙。無限韶光多少淚。共誰評。

眼兒媚 春晝

日射晴窗靜無譁。風裊柳枝斜。有人深院。凝妝獨坐。門掩桃花。  
追思往日重回首。心事付啼鴉。隔牆笑語。卻疑春色。只在鄰家。

柳梢青 春日

小雨纔收。平沙細草。綠滿西疇。柳眼青歸。桃腮紅暈。人倚高樓。  
家家繡幕簾鉤。春不管。斜陽旅愁。羅綺風前。鞦韆影裏。馬上牆頭。

陽臺夢 悼亡

深秋院落房櫺暮。倚闌細數。經行處。濃香畫幔掛珊瑚。鎖疏煙薄霧。  
空階風颯颯。

吹散芳魂幾縷。一簾燈火又昏鐘。疼煞黃花雨。

少年遊 春愁

啼鶯恰恰到窗紗。幾縷曉煙斜。此日春城。漢宮傳蠟。散入五侯家。三分春色愁中度。一半在梨花。腸斷黃昏。酒醒殘月。門外卽天涯。

醉花陰 臨濟村賞薔薇

臨水柴門槐影護。只合幽人住。籬落帶斜陽。一架薔薇。習習香風度。綠陰碧蘚開樽處。客醉忘歸去。遠樹杜鵑啼。溪靜林深。疑是江南路。

杏花天 花朝過金魚池

鶯聲曲岸輕陰乍。春水漲城南臺榭。誰家高結秋千架。人在賣花簾下。踏青鞋、舊遊重話。記挾彈、芳原試馬。杏花小雨西村社。放了東風寬假。

雙調望江南 秋夜小飲

秋色好。檐外晚涼天。弈罷一樽攜翠袖。綠窗纖手弄冰絃。二八正韶年。秋色好。莫

問夜何其。風月蹉跎人老大。十年心事鷺鷗知。燈炮酒闌時。

浪淘沙 閨詞

日影舊窗紗。晝靜藏鴉。東風謹護牡丹芽。珠箔深深垂綺戶。便是兒家。嬌小鬢雲斜。暗度韶華。春愁不減臉邊霞。繡得雙鴛新畫譜。並蒂荷花。

鷓鴣天 春雨

滿載離愁聽曉雞。一天風雨晝淒淒。朝來畫艇春波滑。雲暗遙峯黛色低。魂欲斷。路還迷。山深惱煞鷓鴣啼。鏡中珍重朱顏好。指日帆懸楚水西。

金鳳鉤 燕來

忽聞燕來何處。向樹底、雙雙小語。一春消息。故人情重。不爽佳期唯汝。自憐每被多情誤。頻勸取、不須飛去。絮泥啣得。爲誰辛苦。空傍人家門戶。

玉樓春 送春

花飛南陌東風暮。腸斷王孫芳草路。綠槐影裏雨初晴。黃鳥聲中春暗去。亂山疊

疊看無數。故國遙遮雲外樹。一年佳景等閒拋。好夢欲尋無覓處。

南鄉子 柳村小憩

近郭遍青疇。深柳孤村杜若洲。菡萏自開還自落。悠悠。野水閒雲泛白鷗。  
斜臥綠陰稠。瓜種東陵覓故侯。小阮柴扃留夕照。颼颼。蟬咽西風滿地愁。

又 春暮

深院雨廉纖。燕子飛來傍故檐。清晝困人無氣力。酣酣。淺暈腮痕印枕函。  
新樣翦輕衫。獨坐凝妝倚鏡奩。聞道春風將暮也。厭厭。開盡桃花不捲簾。

雨中花第四體 聽雨

百尺樓中香一縷。夢乍醒。莊生栩栩。棲半畝煙雲。幾竿修竹。咫尺瀟湘浦。  
跌坐垂簾。渾不語。聽淅瀝。落英無數。怪風裊孤燈。涼生衫袖。多是芭蕉雨。

踏莎行 西郊觀荷

高柳蟬聲。遠山霽色。田田菱葉呈秋碧。陂塘咫尺隔紅塵。荷香不傍紅塵客。  
露綴

蒲桃。風行几席。稻花開處黃雲結。漁村荻浦是吾家。十年噩夢同君說。

又 暮春

鶯囀林梢。蝶沾粉絮。押簾銀蒜牽蛛縷。鴛鴦幔揭鬱金寒。秋千索挂東風暮。  
綠暗  
西園雁沈南浦。檀郎驕馬知何處。章臺街裏片花飛。紅粉樓中三月雨。

小重山 寒食

春水溶溶寒食天。王孫芳草綠。上風鳶。深閨簾暮玉鉤閒。人何在。一半傍鞦韆。  
堤  
外打榆錢。酒旗頻駐馬。杏花煙。鶯聲囀出畫樓前。牢記取。年少有金丸。

臨江仙 初春

花市歌樓簾半捲。六街酒碧燈紅。家家行樂醉春風。五陵年少。何處繫遊驄。  
小婦  
新妝蟬翼巧。那知愁上眉峯。垂垂柳色夕陽中。陌頭驚見。悔卻覓侯封。

蝶戀花 秋夜

御袂涼生衣袂早。雁宿沙洲。處處開紅蓼。月滿關河凋塞草。一聲玉笛征人老。  
促

織催寒秋思好。翦燭西窗。嘆息知音少。倚杖登樓恣遠眺。白雲片片西山小。

又 宋荔裳觀察招飲觀劇次阮亭韻

榆莢風清飄蜀纈。水漲銀塘。纔過清明節。絳蠟金樽歌未歇。柳花檻外飛如雪。  
事甘陵翻數閱。今昔關情。優孟真奇絕。絲管啁啾聲漸徹。魚龍波底搖殘月。  
舊

又 人日

紅日窺窗春意逗。翦綵爲人戴勝今朝。又睡起尙噴人語驟。曉妝無力東風透。  
暖輕寒渾似舊。笑問檀郎。驗取腰肥瘦。六博閨中誇勝手。鬢邊不覺金釵溜。  
輕

釵頭鳳 閨怨

簾櫳悄。流蘇小。薰籠斜倚香還裊。歡方嫩。愁來頓。纖腰非舊。湘裙爭寸。褪。褪。  
輕掉。梅如笑。銀缸生暈燈花爆。春將近。鴻無信。天涯人遠。金錢難問。恨。恨。恨。  
釵

一 翦梅 閨詞

宛宛冰輪上畫樓。聽罷更籌。薰罷衾裯。畫眉人是舊風流。對面溫柔。背面嬌羞。  
雙

結燈花兩意投。一晌低頭。半晌迴眸。玉貌煙冷睡還休。倚了香篝。褪了蓮勾。

又 題畫扇

翠巘遙連起白雲。嵐色當門。樹影當門。平坡如掌靜無塵。何處閒人。來訪閒人。菲  
屋匡牀幾度春。花鳥相親。風月相親。寒香一抹暗消魂。雪意三分。梅意三分。

錦帳春 春暮

柳色搖金。鶯聲如翦。誰打疊春光成片。落花風寒食雨。想海棠睡晚。重簾深院。何  
限離情。這般消遣。收拾去韶光一半。語東君留暮景。把芳菲莫捲。人歸非遠。

蘇幙遮 寒食

杏花煙榆莢雨。綠映平橋。又見春如許。油壁車輕寒食路。細草芳樽。邀取春光駐。  
嘯鶯樓歸雁浦。柳外梨梢。愁煞長亭暮。天意也知離別苦。片片輕雲。遮斷人行處。

漁家傲 雨後

小雨纔收風謾謾。脩篁交響闌干曲。澄湛一泓鵝鷓浴。酣睡足。鳥啼疑傍山家宿。



瀟灑閒階桐覆屋。花開花落無拘束。門外任他車馬簇。人新沐。鬢雲低映窗紗綠。

又 閒居

朝霽窺窗三徑曉。草堂晝靜聞啼鳥。插種編籬隨意好。雲自到。落英一任西風掃。啜茗攤書塵事少。開殘黃菊寒催早。蟻戰蜂圍何日了。青門道。回頭不滿山人笑。

醉春風 除夕

春色渾如昨。燒燭聞宵柝。追思往事總成塵。錯。錯。錯。出岫閒雲。忘機鷗鳥。那堪就閣。三載甘蕭索。又被浮名縛。重來人事一翻新。薄。薄。薄。爆竹聲中。屠蘇杯底。且同斟酌。

行香子 登齋中小樓

霧斂高旻。樓敞無塵。捲殘霞、恰受斜曛。俯凭飛檻。遠眺城闌。看花如繡。山如沐。草如茵。綠窗窈窕。碧樹繽紛。傍朱欄、怪石嶙峋。奇書堪把。濁酒重斟。喜冬宜雪。秋宜月。夏宜雲。

又 春日過中山雪海留宿唐城

古道斜曛。野水孤村。暫停驂、頻叩柴門。故人相勞，握手開樽。看三眠柳，千畝稻，一川雲。抵掌高論，酒罷燈昏。問乾坤、得失誰分。塵纓堪濯，三徑猶存。是柴桑里，隆中宅，武陵津。

錦纏道 初度

冰雪柴門。寂寞歲寒時候。跳雙丸、懸弧今又。風塵瀕洞人非舊。剩得閒身，浪逐煙波叟。嘆種種顛毛，不堪回首。春釀熟，好烹羔翦韭。佳人翠袖殷勤，且主盟花月，漫說經綸手。

江城子 書屋新成

蕉林新館舊槐風。日初紅。上簾櫳。棐几藜牀，窈窕綠窗中。曲曲闌干花徑小，誰是主，有盧鴻。樓頭虛敞月溶溶。淡煙籠。遠山峯。客至開樽，隨分兩三鍾。恩賜閒居容懶慢，身外事，任天公。

千秋歲 長至泊廬山下

遙青縹緲。彭蠡湖天曉。葭管動。陽回早。香閨添綵線。畫閣薰龍腦。人何處。樓船官燭寒相照。星渚環山堞。戰壘埋荒草。傷往蹟。渾如掃。爐峯煙未改。鹿洞雲還繞。濤萬疊。月明一點匡廬小。

柳初新 冬詞

晴簷飛雪。簾櫳護翠被。篆添香縷。海棠睡足。臉潮微暈。釵落鬢橫斜。霧紅上瑣窗如許。惱侍兒。催人匆遽。纖手牽郎且住。怯朝寒。枕傍低語。眉心頻蹙。楚腰半禫。不盡怨雲愁雨。欲起又同偎倚。最難聽。鸚哥聲絮。

千秋歲引 除夕

客舍東風。高城夜角。燈火千家閉樓閣。誰將物華妝點就。偏遣旅況寒如昨。頌椒篇。屠蘇酒。成差錯。聞說笙歌歸院落。聞說畫堂垂繡幕。爆竹聲聲總蕭索。浮蹤滯留殘臘後。音書悔訂春前約。夢兒中。枕兒上。休忘卻。

瓜茉莉 末麗

正苦薰風早清芬細裊。黃昏後、覓枝尋葉。翩翩萼影引惹動、閒庭蛺蝶。摘來綴、寶髻瑤釵。盈盈暗添笑靨。花神有意巧批了風流牒。新浴罷、晚妝寧帖。斜簪綠鬢恰宜襯。芙蓉頰。伴鷓鴣枕上粉脂融浹。衆香國。魂夢貼。

魚遊春水 上谷立春

東風開曉市。晴照金臺雲氣紫。春來天上。巷陌漸薰羅綺。玉燭長調禁苑中。錦鞦爭試。香塵裏。吹笛一聲。畫樓獨倚。三輔名城高起。又見鬢邊新燕子。青幡兼遇燈宵。韶光信美。閨人劃損釵頭鳳。羈客愁傾樽內蟻。歸夢如醒。流年似水。

東風齊着力 立春

郊外青幡盤中生菜。人樂時康。惠風布滿。春水瀉橫塘。競戲魚龍角觝。朱樓上、小婦笙簧。映釵色。翦花綵燕。香裊羅裳。莫問鬢邊霜。百年內、誰存舊日清揚。黛眉巧畫。半醉倚銀缸。肯負籤聲燭影。酬良夜、細語平章。喜公道、不分冷暖。惟有東皇。

滿江紅 柏棠村賞牡丹

春草孤村。茅亭立、老槐如昨。香滿院、名花傾國。臨風綽約。三徑纔開佳客至。一樽細雨同斟酌。嘆十年、宦海歷風塵。空耽閣。鐘鼎業。波濤惡。林壑裏。無拘縛。趁日長體健。留連芳萼。屋角遠山青欲滴。溪邊釣艇魚新躍。看眼前、世事謾關情。秋雲薄。

又 題柳村漁樂圖用呂居仁韻

萬柳藏村。人家住、白鷗溪曲。但編籬插槿。結茅爲屋。門外淺汀清似練。窗前抱膝人如玉。雨纔收、蕩漾兩三舟。衝波綠。堪對酒。陶潛菊。宜嘯詠。王猷竹。羨漁翁婦子。何榮何辱。畫閣朱門彫謝了。浮家泛宅隨時足。只一竿、明月不須錢。烹魚熟。

又 夏日晉陵陸恂若過訪留飲

小隱柴荆。有嘉客、遠尋茅屋。侵屐齒、檻橫浮翠。砌添新綠。帝里舊遊蝴蝶夢。田間今和漁樵曲。幾年來、世事似浮雲。多翻覆。槐風起。涼生粟。雷雨過。花如沐。且論文。把酒更開棋局。此夕莫愁銀箭急。明朝又向紅塵逐。問東籬。菊綻可重來。村醪熟。

又 高司寇召飲園亭

司寇風流歸來築柳塘花屋。簾半捲、西山烟靄。北堂絲竹。洛下耆英年齒會。翠眉低唱。顏如玉。論人間底事最關情。芳樽綠。敦交誼。羞流俗。憐旅客。忘榮辱。醉良宵。燈火舉觴相屬。已下青衫司馬淚。寧堪重顧周郎曲。願同君。攜手混漁樵。何僕僕。

又 悼亡

造物如何遽收拾。鴛鴦牒早。把香天粉。并劫塵埋了。初擬鹿門同載去。那知更踏長安道。到如今。白首送青春。真顛倒。屨市結。風鬢裊。午夢醒。槐宮杏。想定情良夜。倚燈人小。紫蟹黃英難共醉。都堪摹作淒涼稿。對西風。獨立哭斜陽。閒花草。

又 壽敬哉宗伯

洛下樽開羨龍馬。精神奕奕。稱觴處。西山佳氣。南皮詞客。曳履容臺興禮樂。拂衣棋墅。娛泉石。傍晴窗。紈素畫滄洲。煙雲碧。斟法醞。鵝笙炙。紛舞袖。烏衣集。正小春時節。肯教虛擲。鳳羽朝回頻問寢。蠅頭花底閒濡筆。論長安。福壽更誰同。君無匹。

又 過黃梁夢有感

官柳參差。消磨盡、英雄多少。問華胥遠近。黃梁遲早。仙侶已隨雲影去。行人又上邯鄲道。怪枕中、日月一何長。河山小。村市畔。墟烟裊。亭榭外。殘荷老。任開山汗馬。閒花野草。壁上癡人爭說夢。那知醒裏多顛倒。倩西風、一夜捲空花。都堪掃。

又 舟泊滕王閣下

淼淼寒濤。看百尺、蜃樓高結。問此地、何年畫棟。幾時明月。帝子閣空雲已散。詞人賦就名還揭。下長帆、對酒數憑闌。江天雪。簾捲處。嵐光疊。霞影外。沙沈鐵。嘆樓船組甲。當年煙滅。鷓首淒清。鳧雁度。波心灩澦魚龍咽。攪笙歌、客醉舊江山。鄉心切。

玉漏遲 閨思

篆烟消錦幄。愁中又聽。漏聲催早。卸罷殘妝。繡被暗生寒峭。想像前宵好夢。剩瘦影、蘭缸相照。燈暈小。雁鴻報到。歸人猶杳。消息試探梅花。待漏洩春光。可同歡笑。欹枕釵橫。畫樓幾番慵眺。一紙音書寄語。問白髮、近添多少。奩鏡悄。眉峯爲誰頻掃。

瑤臺第一層 江亭讌集

萬里羊城今咫尺。飛帆幕府留。艤舟三水。簾開珠箔。幢擁清油。海天烟暖。瘴嶺客來。  
一洗羈愁。喜春早。正紅生亭榭。綠滿汀洲。朋儔。主人情重。鳳笙龍笛。夜啁啾。尉佗  
臺畔。田橫島外。半醉江樓。對蠻方節鉞。把手處。頭髮霜稠。轉歌喉。問誰占星使。到自  
神州。

玉燭新 乙酉元日

雪晴開曙早。看徧布王正。條風拂曉。輕烟麗日。椒觴暖。共說豐年佳兆。春衣兒女。喜  
得歲。樽前頻繞。山中臥。擊壤清時。追隨牧童村老。回思當日先皇。正頒賜天廚。雲  
和縹緲。大酺同慶。陪鴛鷺。每近龍顏歡笑。孤臣無狀。此際包容非小。今何幸。放逐滄  
浪。尙安覆幬。

水調歌頭 寄懷王敬哉宗伯

椒酒催殘臘。綵勝鬪新妍。回首青門分袂。離別再經年。遙想柳堂深處。春夕燒燈嘉



會。酬和白雲篇。記憶山中客。頻爲寄魚箋。香一縷。書數卷。只高眠。當時忝竊師門。同學又同官。君近九重天上。我在北潭池畔。相望各風烟。何日重攜手。身健且加餐。

又 春夜郝雪海侍御自都門還過邸中

把袂東風裏。斜日駐青驄。攜來天上春色。慰我客途窮。夜話舊遊燕市。惆悵河山已遠。聚散酒罇中。抵掌論今古。塵世幾英雄。剪銀燭。歌白雪。調誰同。憐君國士。十載蓑笠尙飄蓬。猶是當年河朔。慷慨風流未墜。領袖有諸公。且共樽前醉。心事托飛鴻。

滿庭芳 觀女伶演淮陰故事

絳燭清宵。彩雲華館。蠻腰細舞迴風。嬋娟忽變。繡襖染猩紅。鎖甲豔分雪色。兜鍪小。雙頰芙蓉。氍毹映。將軍紅粉。錦繖黛眉同。登壇當日事。衣冠優孟。寫出偏工。嘆英雄。佳麗。一樣飄蓬。飛絮落花舊恨。誰憐取。桃李春穠。乘月夜。衣香人面。莫放酒盃空。

又 寄酬申臬盟

河朔才名。傳家忠孝。詞場共羨陰何。故人紈扇。贈我惠風多。別後停雲一載。遙山矗

馬服嵯峨。燭花翦。西窗雞黍。悵望阻滹沱。荆扉常晝掩。老漁相逐。雨笠烟蓑。任世情翻覆。袞袞頽波。懸想沼醪已熟。高臥處。對酒當歌。擬他日。滄浪攜手。長嘯踏青蘿。

又 立秋

茅屋三間。槐庭一葉。金風乍入繩牀。年年此際。涼思滿奚囊。廿載黃梁夢境。一撒手。轉眼荒唐。間消受。幽花文蝶。秋水玉簪香。商量喜計日。東籬綻蕊。紫蟹迎霜。問誰家新釀。早熟先嘗。萬事休教掛齒。驚魂魄。利鎖名韉。登高處。遠山蕭颯。孤鴈度斜陽。

又 中秋

細雨纔收。浮雲乍斂。西風捲霧初晴。香飄桂子。秋草滿閒庭。入夜冰輪當午。小樓外。碧巘縱橫。微茫裏。萬家燈火。樹色暝烟平。氍毹紛舞袖。紅牙按拍。小婦鳴箏。任玉繩低轉。客醉沾纓。十載東華舊夢。回首處。心悸神驚。趁佳節。空明如洗。坐待月華生。

又 城南泛舟

城繞春流。堤藏蕭寺。人家半倚晴溪。輕風暖日。布穀數聲啼。一棹船如天上。關情處。

岸草萋萋。空回首。故園柳色。煙景望中迷。依稀想此日。清明近也。桃杏開時。嘆蹉跎蹤跡。物換星移。舉網鮮鱗入手。開笑口。聊醉春卮。酒闌後。斜陽駐馬。日斷畫橋西。

燭影搖紅 正月十四夜

綺戶寒輕。千門不閉樓臺晚。麗譙吹歇罷葳蕤。九陌香塵滿。何處簫聲近遠。試華燈、春風庭院。閒身天許。遊冶場中。留連歌管。暗想當年團圓兒女。清宵宴。翠眉低唱。漏聲沈。絳燭西窗翦。此夕人移物換。頻搔首。霜侵鬢短。月明依舊。火樹光搖。星橋煙暖。

帝臺春 春懷

晴日炙。雪初消。池水碧。遊鯉負冰。好鳥窺人。閒愁增劇。追憶年時香閣裏。攜手看。故山春色。奈而今。惱亂東風。偏吹孤客。春猶昔。渾暗擲。人咫尺。何從覓。嘆陌上青青。又生芳草。薄暮綠煙如織。湖海氣難一旦減。兒女淚已千行滴。漸近了花朝。怕重提寒食。

夏初臨 初夏

蔽日初槐。啼花嬌鳥。疏籬漸長新篁。永晝人間。薰爐細細焚香。謾誇世路名場。遠風波碧。簾清涼。蝶鬢墜粉。魚吹蘋末。鶯弄笙簧。好書堪把。苦茗頻斟。湘簾半捲。燕子飛忙。香閨雙陸。倦來午夢偏長。小立斜陽。映紗廚。笑看殘妝。耐平章。無邊風月。自在年光。

孤鸞 壬子除夕

禁城喧熱。正爆竹聲催。漏銅風咽。小閣孤燈。往事向誰重說。春到何家庭院。助新愁。滿門冰雪。枉有屠蘇歲酒。恨椒花頽絕。想五侯甲第。歡無歇。把龍笛。鵝笙。檀口吹徹。那管寒衾薄。有人兒。淒切。珊珊玉珂初動。又趨朝。曉雞時節。試問明鏡裏。添幾莖華髮。

雙雙燕 感懷

蕭蕭易水。問何事春來。助人悽惻。蘋香柳嫩。妍景任教拋擲。聊話郎山雨夕。又夢繞。

潭固煙色紛紜。身世多般。已見雁飛南北。誰遣頭鬢頓白。怕縱有春風也難消得。壯懷無奈。說甚肝腸鐵石。况聽高樓弄笛。盼不到、漁蓑消息。試看陌草青青。正是杜陵寒食。

玉蝴蝶 棠村看牡丹

報道西村花發。春風一夕。香滿疏欄。載酒攜笙亭畔。淡淡雲煙。弄輕陰、新篁院宇。翻翠浪、綠野平田。草芊綿。花名傾國。蛺蝶踟躕。留連。芳郊細馬。紅妝垂袖。一笑嫣然。銀甲調箏。幾多心事入眉灣。豈相逢、琵琶江上。渾不讓、棋墅東山。耐人看。斜陽松影。倦鳥知還。

絳都春 上幸真定恭賦

霓旌羽葆。看玉勒飛塵。翠華臨早。雨灑郊原。風靜天街。開馳道。紅雲晝護龍旂曉。黃衣是、聖人年少。萬家環擁。千官拜舞。共瞻奇表。非小。名城三輔。人何幸得覩。天顏微笑。獵罷長楊。月色甲光寒相照。殘星夜角營門悄。恩浩蕩、村墟無擾。雪中黃竹歌。

成爭傳容藻。

萬年歡 元夕

午夜晴煙。早六街燈火。交侵明月。春樹人家。遙傍春城雙闕。迤邐鈿車成列。鞦韆羅袖。膚光欺雪。春山澹。止水盈盈。笑看簾幙風揭。清絲淒切。樓頭少婦鳴笙坐。幽恨難說。白馬金鞭。知向誰行遊歇。舞榭酒闌燭滅。侯門閉。內筵重設。空竚望。薄倖歸來。深閨眉翠雙結。

念奴嬌 夏夜

涼侵疏簾。看星河漸轉。頻催城柝。百合香勻。新浴罷。月照殘妝綽約。紈扇初停。冰肌無汗。重試羅衫薄。花陰攜手。一枝輕。冒釵落。聞道世態浮雲。長安棋局。俯仰成今昨。人在瑤臺清露下。消受藤牀珠箔。橫笛高樓。鳴蟬滿樹。塵事渾拋卻。西風轉眼。又驚吹到簾閣。

又 送家光祿兄北上

西山薦爽。堪拄笏飄墜。井梧一葉。門外驪駒爭祖道。分序雁行南北。十載親闈。兩悲風木。種種顛毛白。老成高臥。靜看車馬心折。正逢乞巧針樓。天孫會合。惆悵人閒別。主聖時清。須一出。豈得久淹泉石。事了拂衣。功成身退。早遂漁樵業。雕邱無恙。韓溪同泛煙月。

又 遣興

十年京國空孟浪。解組一身如葉。浩蕩涼颿來木末。霜滿滹沱河北。俛首浮名。驚心世路。回想頭堪白。書生傲骨。腰圍寧使輕折。拚取潦倒詞場。醉眠錦瑟。揮手紅塵別。茅屋三間容膝了。何必平泉奇石。雨笠雲蓑。閒花野草。管領幽人業。江山無盡。莫教辜負風月。

又 家光祿西廬習靜再疊前韻

繁華著眼。看古今得失。浮雲飄葉。暑往寒來駒隙影。早見塞鴻辭北。槐國無喧。漁村高枕。忍負洲蘋白。東華翹首。羊腸空嘆千折。聞說重理蒲團。再安丹竈。不與家人

別。況有玉清堪共隱。奚用受書黃石。蕉露研朱。松風啜茗。勾當山居業。他時出訪。杖藜同踏蘿月。

又 贈同年魏蓮陸併祝初度

紙窗茅屋。有先生抱膝。小門迴折。荒徑全縈書帶草。牀上凝塵滿席。五馬歸來。三間高臥。獨耐袁安雪。蕭然環堵。豬肝肯使輕說。聞道初度佳辰。牆頭過酒。翦燭招狂客。萬事何如杯在手。莫問新來華髮。栗里琴樽。龐公夫婦。歲歲娛泉石。故人寒邸。夢留齋畔涼月。

又 悼亡

啼猿聲裏。正蕭疏一片。霜天秋色。絃續鸞膠看兩兩。比翼連枝無別。洛浦珠沈。湘靈瑟冷。剩有寒螿咽。鍾情我輩。那堪蘭蕙重折。回首燈火春宵。茗爐佳夕。鴛枕偎猶熱。留得零香餘粉在。種就柔腸千結。爲問飛瓊。還歸天上。可憶來時節。蠶絲難盡。夢回簾外殘月。



又 壽退谷先生

聖朝遺老。擁琴樽圖史。婆娑清晝。傳得關閩當日學。獨把殘編窮究。道在斯人。晴窗高臥。閒卻經綸手。一庭風雪。喜當介眉時候。繞膝綵袖重重。持觴共祝。宰相山中久。謝客著書多歲月。小閣藤深松茂。鶴髮丹顏。憑煙雲好。供養容如舊。春風盈坐。笑看車馬馳驟。

又 江行用東坡韻

吳頭楚尾。挂長帆。別是一般風物。白浪排空。天作塹。界破東南半壁。遠樹微茫。遙峯斷續。夾岸霜如雪。煙波無恙。消磨幾許人傑。坐聽鼓吹中流。候風回五兩。棹歌齊發。向晚推窗指顧中。數點漁燈明滅。牛斗浮槎。鄉關回首處。頓更毛髮。空江渺渺。憑闌涼轉新月。

又 過綠柳長廊有感

滹沱南陌。憶當年。綠柳依依堪折。夾道長條。張翠幄。清影寒生六月。汗滴征衫。塵飛

驛路到此清涼別。今來駐馬。濃陰一旦殘缺。聞道舊日隋堤。春來渭樹。空有蟬聲咽。可惜長廊煙霧冷。轉眼繁華銷歇。莫問秋風。樹猶如此。何況三千髮。長途搔首。愁聽枝上啼鴉。

又 舟發章門楊陶雲載梨園置酒敘別

江城如畫。雪初晴。渺渺長天空碧。好友輕帆攜酒到。載得滿船春色。吳下秦青。新翻樂府。橫吹寧王笛。旅懷無奈。茫茫對此交集。憐我海角浮蹤。逢君遷客。相對頭堪白。舞罷柘枝歌子夜。攪起魚龍窟宅。杜牧情多。司空見慣。懊惱紅燈夕。地鄰滙浦。青衫今日重溼。

又 寄羅弘載越中

蘭橈畫槳。嶺南舟。共泛湖天寥廓。髯客揚舲蘭渚去。折柳滕王高閣。江上登樓。樽前擊鉢。轉眼分今昨。雲山千疊。舊遊頓爾蕭索。聞道戍堞烽烟。戈船鼙鼓。宛委軍聲惡。當日應徐無恙否。八口可安林壑。阮瑀從軍。陳琳草檄。豈歎功名薄。爲詢羅隱。壯

懷肯令飄泊。

雙頭蓮 嶺南元夜

海外繁華看絳燭。圍紅星毬初放。蠻鞞錦障。月影裏忘卻。鄉愁孤況。暗想京國燈宵。阻雲山千障。春一樣。紫陌香塵。有無鈿車來往。憑仗午夜笙簫。把軍烽靜偃。消除兵象。江湖晚漲。燒火樹妝點。羊城尤壯。聽罷白苧吳歎。有周郎座上。天萬里。對酒當歌。相看愴慷。

桂枝香 中秋

西風簾幙。看花影移階。蕉陰綽約。三五良宵正永。小羅杯酌。三年幸訂漁樵侶。伴閒雲、輕鷗孤鶴。鹿門夫婦。竹溪賓友。柴桑籬落。任清露、涼侵袂薄。對扶疏叢桂。此景非惡。漸斂浮雲。夜半月臨虛閣。庾樓人坐冰壺裏。欲乘鸞、飛向寥廓。且拚盡醉。休論塵世。受他羈縛。

海天闊處 贈越中羅弘載

竭來髻客江東。樓船把袂。波如練。長篇短詠。抽毫伸紙。烏絲蠶繭。七子菁英。六朝金粉。風流非遠。任青鞋布襪。窮關塞。名山喬嶽。遊蹤徧。行笈圖書數卷。幾悲歌。黃金臺畔。探奇禹穴。臨池蘭渚。聲華早擅。雪苑開樽。旗亭觀伎。詞場消遣。問相如可有。臨邛重客。子虛誰薦。

畫錦堂 送二兄子告歸里

鴉亂斜陽。林吹寒籟。極目秋滿燕關。惆悵無端別緒。又送兄還。去逐平沙孤雁影。何堪城闕菊花天。君恩重。賜沐清時。風攜兩袖歸田。離筵樽酒外。驪唱裏。白雲遮斷。家山憶昔驚濤駭浪。共與迴旋。喜看新結漁樵侶。愧余猶滯鷺鷥班。頻回首。閒盡故園叢桂。並隱何年。

憶舊遊 雪中感懷

想秋原衰柳。細雨瀟瀟。魂斷河梁。日月曾無幾。早寒風朔雪。吹到茅堂。孤蹤久辭雙闕。誰識舊劉郎。幸同好猶存。悲歌對酒。共說先皇。草草思前事。嘆物換時移。空費

推詳。問菊松三徑。奈暮雲縹緲。難認柴桑。梅香漏洩春信。歸夢繞橫塘。聽何處高樓。一聲玉笛淚千行。

綺羅香 十六夜

曉雪纔晴。華燈再耀。妝點春城如畫。一刻千金。欲買良宵無價。曲闌倚、檀口瑤笙。六街騁、玉鞭驕馬。氣氤氳、飛霰雕簷。銀花釵色光相射。繡窗眉嫵。試看似昔年京兆。風流重話。焰吐芙蓉。處處酒旗歌榭。橋邊女笑倩人扶。笛裏梅落來堪把。拋紅豆、誰結同心。趁蟾蜍漸下。

春雲怨 閨怨

疏燈薄暮。又一聲歸雁。飛來平楚。門掩東風。塵生寶篋。流年驚暗度。綵線慵拈。燭花頻翦。舊怨新愁漫空數。卓氏孤吟。班姬團扇。無奈情耽誤。王孫玉勒。知何處。把三生誓約。翻雲覆雨。去矣朱顏漸非故。零亂飛蓬。惱煞窗前鶯啼春樹。夢罷關山酒醒。殘月極目。淒涼南浦。

春從天上來 壽蔡中丞

綺戶祥煙。正身退功成。部曲蕭閒。豫章旌節。淮海歌絃。手持半壁江天。問先生何事。人未老、偃仰平泉。樂清時。羨賓朋北海。絲竹東山。松徑藥欄。楚聽瀑布潺湲。映帶奇巒。花舞毬場。雲凝金埒。侯鯖法醞。開筵戲斑衣。進酒列檠戟。七葉貂蟬。醉醅顏餐梨舊事。辟穀當年。

喜遷鶯 夏日遣興

蕉林雨歇。正寶篆香溫。瓶荷芳徹。斐几攤書。湘簾伏枕。愁煞利名場客。消受薰籠茶椀。閒度草間飛蝶。最愛是、傍蕭蕭疏竹。林梢新月。淒切。關情處。遠樹蟬聲。又值清秋節。白墮三杯。紅綃一曲。說甚濟時豪傑。小構數椽茅屋。圖畫琴尊羅列。且白眼。任花開花落。陰晴圓缺。

又 壽芝麓宗伯

堂羅絲竹。正葭琯灰飛。春回寒谷。江左風流。東京部黨。共識當年耆宿。執法風生臺

閣借箸禁中頗牧。烽火靜向南宮曳履。望高鈞軸。蒿目憂國處。兩鬢絲絲欲救蒼生哭。對客抽毫。張燈擊鉢。不數詞場潘陸。歷盡險巇身健。嘉日莫辭醺醪。趨朝罷。領鳳城煙月。清宵顧曲。

永遇樂 九日

籬菊凝霜。井梧零露。雁飛平楚。何處秋聲。小庭浙瀝。無奈情千縷。登高送目。手把茱萸。受澹煙疏雨。嘆良時。幾年虛度。總付東華塵土。古今得失。人生聚散。渾似落英無數。戲馬臺空。龍山帽冷。風月還如許。閒拋書帙。笑引清樽。看取綠窗眉嫵。莫更使。愁蜂怨蝶。香寒別浦。

又 戲擬催妝

簾閣香溫。藍田煙暖。小春時節。河鼓初臨。天孫將渡。鵲報人間匹。鳳臺許跨。鸞膠重續。自笑溫郎非昔。對冰清。人慚叔寶。爭道門闌氣色。鴛鴦翼並。芙蓉繡隱。珍重定情佳夕。廡下齊眉。五噫成詠。舉案傳先澤。鹿車共載。丹崖偕老。歲歲歡如今日。好倩

語新妝早試。遠山黛碧。

花心動 元夜

上谷風和夜溶溶。香車六街闐咽。燈火朱樓絃管。清尊共賞。太平佳節。誰家少婦簾櫳裏。喧笑語。綺羅輕揭。客懷亂。敝裘獨擁。小門殘雪。閒把年時細說。儘玉漏聲沈。鳳簫吹歇。樺燭春闈眉嫵。紗窗蘭麝。繡幃頻爇。無端辜負鴛鴦夢。郎山畔。冷衾如鐵。酒醒處。星橋淡烟斜月。

望海潮 鎮陽懷古

雄風河朔。燕南都會。名城古說中山。帶遼滹沱。屏開恆嶽。連營劍倚青天。主父故宮閒。嘆霸圖灰劫。鹿走邯鄲。壁返相如。墳高頗牧總荒煙。軍聲成德當年。有北潭舞榭。趙苑歌絃。茵菴送香。菰菱映水。秋來依舊爭妍。衰草冷平原。信陵立功後。結客空傳。戰壘烏啼。笛吹關戍夕陽寒。

大聖樂 春閨



奩鏡初開。流蘇乍暖。啓窗猶寒。引螺黛、巧畫雙眉。寶鴨頻添。香篆裊裊輕煙。纔換春衫。慵出手。向梅萼、凝妝子細看。繡簾日永。鶯花無賴。珍重芳年。東風又到芳草。漸柳色、依依駐錦鞦。語金閨、夫婿椒酒綵勝。莫負清歡。世事何憑。韶華易去。一瓣皈依大士前。人無恙。祝天長地久。被底文鴛。

過秦樓 吳城雨中

樹隱千章。風輕五兩。堤畔人家容與。柴門照水。沙岸連檣。一片吳城煙雨。遙望曉捲疏簾。小婦凝妝。映窗眉嫵。嘆天涯客子三千餘里。雁沈江浦。空聞說、白苧江東。錦帆南國。顛倒醉鄉歌舞。寒林半落。霜葉猶紅。愁見鳧鷖孤嶼。更羨高風。此邦孺子荒亭。雲卿黃土。問江山、萬古茫茫。今夜夢回何處。

霜葉飛 冬日寄懷杜子靜

小齋寒冽。疏燈燼。故人夢牽梁月。貧交管鮑等輕塵。嘆世情非昔。極望裏、五雲清切。雙魚頻寄田間客。看今古茫茫。問誰是、市中屠狗。西州豪傑。猶憶祖帳青門。河梁

抗手不數陽關三疊。歸來松菊未荒蕪。已自合鳩拙。霸陵老豈因人熱。當年對酒燕  
山雪。悵離羣。回首處。碣石風高。滹沱冰結。

洞庭春色 次韻寄答松陵徐電發

獨步江東。羣推孝穆。志在千秋。儘詞華潘陸。恣情採擷。新聲秦柳。匠意研求。入洛才  
人。追二俊。遇傾蓋。公卿便駐驕。吾衰矣。看中原鞭弭。輸與林丘。當年陳琳阮瑀。草  
檄處。名滿諸侯。羨扁舟書劍。五湖煙月。春城絲管。六代歌樓。樽酒旗亭風雅會。料此  
際歐陽放出頭。西陵畔。聽江潮怒發。笑引吳鉤。

又 歸舟

萬里河梁。五羊歸櫂。夾路春風。看荔枝洲畔。沈香浦外。簾開樓閣。帆動艤艫。載得珠  
江花鳥去。更千步香薰兩袖濃。斜陽岸。正袍青草綠。衣染鶻紅。篋藏羅浮舊繭。早  
辦起舞蝶紗籠。問踏歌蠻樂。穿花遊女。尋芳何地。拾翠誰從。拋卻南天煙月暖。喜北  
望長安紫氣重。驪歌裏。聽蘭橈笳鼓。驚起罽宮。嶺南有千步香草。

沁園春 詠美人足

錦束溫香。羅藏暖玉。行來欲仙。偏簾櫳小步。風吹倒褪。池塘淡竚。苔點輕彈。芳徑無聲。纖塵不動。蕩漾湘裙。月一彎。鞦韆罷。將跟兒慢拽。笑倚郎肩。登樓更怕春寒。好愛惜相偎。把握間。想嬌憨欲睡。重纏繡帶。蒙騰未起。半落紅蓮。筍印留痕。凌波助態。款款低回。密意傳。描新樣。似寒梅瘦影。掩映窗前。

又 登望湖亭

澗灑湖光。黛染遙山。送目方賒。喜紅亭俯立。一天帆影。白波東去。幾縷殘霞。方寸鄉心。迢遙水驛。愁絕風濤。博望槎。徘徊處。有喧闐列肆。煙火千家。神祠擊鼓。鳴笳想吳楚。當年鬪麗華。任青帘貫酒。醉眠賈舶。牙檣吹角。驚起棲鴉。橫槩雄才。登樓客況。消盡江頭野草花。雲煙闊。正臺連蛟蜃。人侶魚蝦。

賀新郎 蛟門納姬次芝麓宗伯韻

錦幄紅霞卷。賦催妝、鵲橋已駕。青鸞先遣。才子廣陵年尚少。下直墨華猶泫。盜鏡伴、

烏絲蠶繭。攜得御爐香滿袖。正天生、初渡銀河淺。京兆筆、晴窗展。遠山肯使眉痕顯。倦支頤、流蘇低亞。筠籠微扁。吹罷鳳簫閒對弈。亂局須憑獬犬。吟蟋蟀、西堂愁免。欲博琴臺人一笑。解鷓鴣、好向壩頭典。蓮漏永、蘭缸翦。

又 元夜用顧菴學士韻贈蛟門

十里珠簾卷。徧燒燈、暗塵隨馬。鈿車齊遣。縹緲簫聲明月下。更喜露華初泫。寒猶峭、春衣重繭。花市歌樓牙拍按。正御溝、冰泮流澌淺。火樹合、星橋展。晚妝纔試芙蓉顯。倚銀屏、歸人未卜。金釵劃扁。門外錦韉何處客。頻囑繫鈴小犬。尋好夢、香衾權免。午夜大酺人競醉。罷嚴城、魚鑰金吾典。聽玉漏、東風翦。

又 九日

風雨開茅屋。報昨夜、東籬纔放。一枝黃菊。再度重陽柴桑里。過酒鄰牆非俗。好受享、燈青樽綠。身健喜逢佳客至。把茱萸、仔細看何足。貪漏永、翦樺燭。高樓已縱登臨目。最關情、遙峯疊翠。澄溪拖玉。老去悲秋蕭蕭髮。魂夢偏宜鄉曲。況幾陣、霜鴻南逐。

天上故人頻勸駕。奈山中、猿鶴憐幽獨。誰更解清閒福。

玉女搖仙珮 暮春泛舟

長堤柳影綠滿東郊。十里芳湖如鏡。舉網烹鮮。行廚載酒。重續當年佳興。風月誰偏領。況主人情重。肯虛妍景。早尋取青鞋布襪。正是姚黃魏紫相映。無奈遇知心。嬌小情癡。勾人酩酊。憑杖蘭橈。畫槳簫鼓中流。激灩素波千頃。韋曲勝遊。旗亭嘉會。今古風流堪並。城角樓煙暝。怎消得杜牧疏狂心性。趁落日。仙舟容與。佳人拾翠。春將去也。君須省。好留待夜珠光迸。

秋水詞

蓮影



嚴繩孫（天啓三——康熙四一）

字蓀友。號藕塘漁人。江南無錫人。以布衣應博學鴻  
詞試。會目疾。未能終卷。聖祖素重其名。擢置二等。授  
檢討。累官至中允。謝病歸。工詩詞書畫。高尚狷潔。世  
以倪雲林擬之。著有秋水集。

序

往余解組溪干。繫船河曲。見當壚之酒母。甕釀百花。有題壁之詞人。墨成五采。則嚴子蓀友所製望海潮一章也。旣而贊寫羊孚。楷羨鍾王之法。因之函開殷浩。書通嵇呂之交。乃嚴子謬許入林。時同籍卉。身如鴻雪。雖漂流略似西川。契比龍雲。然企慕實踰東野。顧余湖海之氣。猶未除豪。而子丘壑之姿。非關作達。波涵千頃。不濁較勝于不清。幹挺百尋。若近尤能以若遠。眼無青白。登山獨喜看雲。口絕雌黃。對客唯宜飲酒。是以靜多於動。實勝其名。王公甚重嘉賓。懶於置幕。天子將召供奉。呼不上船。良由情性使然。故非矯強所致矣。至於才清擬月。言粲成花。具庾鮑之幽思。用錢劉之妙格。因人著勝。多濠濮間情。使我猶憐。是風塵外物。無不仰追騷雅。共振藻於葩壇。并使旁及聲歌。總攬香於蘭畹。洞庭落葉。淒清葭菼之聲。湘浦層波。澹蕩芙蓉之影。此秋水一集所由名耶。嗟乎。名士無多。虛聲何益。上林三奏。惟相如能賦。大人汾水一篇。獨李嶠可稱才子。吾不能無生瑜之歎。且重有懷璧之傷也。延陵同學弟蘭



秋水詞序

次吳綺書於林蕙堂。

# 秋水詞

句吳嚴繩孫蓀友

## 浣溪紗

鏡裏花枝折未成。水中蓮子動分明。慵紅悶翠轉盈盈。  
馬苦關情。幾時懷抱屬卿卿。

多恨崔徽渾似畫。倦遊司

盡日風吹到大羅。金堂消息見橫波。暖雲香霧奈伊何。  
與畫雙蛾。一般愁緒在心窩。

猶是不曾經一笑。問誰堪

率地潛窺近畫闌。玉人心性得應難。全身今日付郎看。  
訝玉纖寒。莫教人事更摧殘。

倚處暗聽鶯語怯。攜來私

隙影餘香望未賒。爲誰惆悵似天涯。紫蘭重院謝孃家。  
格愛簪花。麝煤繭紙映輕紗。

生小暈眉臨卻月。近來書

綠擁紅遮惱暗期。慧心無處不先知。鳳屏東畔獨來時。

忍待成烟憐紫玉。敢誇能

事比紅兒等聞蹤跡易猜疑。  
瘦損腰支不奈愁。扇欹燈背晚庭幽。不如眠去夢溫柔。  
昨夜涼風生玉砌。舊時明月在蘭舟。一生真得幾回眸。

前調

膩粉無端退蝶翎。赤僧偷眼是蜻蜓。春光先過短長亭。  
安得手持修月斧。願將身作護花鈴。不堪風雨浣丹青。

望江南

江南好。蟹浦畫難如。春酒連船浮竹葉。春廚三月有鱖魚。只合浦邊居。  
江南好。一片石頭城。細雨飛來磯燕小。暖風扶上紙鳶輕。依約是清明。

虞美人

征帆只是悠悠去。去也知何處。淚痕休漬別時衣。彈與烟鴻猶得向南飛。  
月華幾夕清如洗。料得卿歸矣。暗愁如霧又黃昏。有箇盈盈相並說遊人。

臨江仙

試問吳宮人去後。綺羅多少星霜。一聲漁笛散橫塘。虎丘今夜月，猶爲照眞娘。記得霓裳花底見。春風幾度思量。生公石上舊年芳。夜寒蓮漏永，清影在迴廊。

小重山 桂花

一夜檀心怨廣寒。西風吹不盡。小窗閒。漢宮黃額畫來難。珠簾卷，惆悵夕陽山。可記曉妝殘。有人親插與，鬢雲彎。露華依舊溼闌干。何曾是，寂寞淚珠彈。

一翦梅

款抱多情訴斷腸。生向愁鄉。死向柔鄉。鴛鴦魂夢幾時雙。月滿橫塘。風滿瞿塘。紅浪翻衾絮語長。贏得商量。怕得思量。可堪銀漢是紅牆。心上檀郎。陌上蕭郎。

蝶戀花

青瑣簾前人惜別。未許牽衣，較比牽衣切。一曲陽關初唱徹。相看本是明明月。宛轉征衣金粟尺。心字香溫，纖手流蘇結。夢裏彩雲留不得。西風吹過黃花節。

前調

翠帳寒生香篆裊。斜鞦腰支。一向和衣抱。暮雨簾櫳如欲曉。羅裙半展瀟湘繞。笑吐丁香檀暈小。霧溼花房。楊柳三眠了。喚起鳳屏燈悄悄。試看鬢影鬆多少。

風入松

星移帆影月移沙。秋思誰家。別時不敢分明語。蹙春山、暗損韶華。又是中秋時候。西風幾陣歸鴉。相思難遣夢交加。水闊山斜。尊前常恨天涯遠。況如今、真箇天涯。若問重來何日。待伊歸向窗紗。

滿江紅

馬跡車塵。甚今生、還能到我。更多少、鴻離鶴怨。浪淘風簸。酒力不禁歸夢覺。鬢絲都是羈愁做。冷秋心、梁燕北來時。能傳麼。窮愁恨、眉峯鎖。風塵淚、征衫浣。儘寂寥前事。算來都可。小句成時看墨淺。新妝竟了憐花妥。只如今、和影對新蟾。人三箇。

前調

別袂偷分。盼不到、片帆香陌。正雨過、亂紅飛盡。水雲凝碧。楊柳漫牽歌意緒。苧蘿多  
少愁蹤跡。怕羈心、重對舊亭臺。傷今昔。花影晝。蟾陰夕。重執手、何時得。奈渚蒲檣  
燕。助人行色。縱是夢來應有恨。情知留得元無益。算人生、雙鬢幾時青。成拋擲。

前調 午日

生老樊川。水嬉不盡當年興。問十里、湖光何處。畫橈相並。金管風多聽。又失珠簾雨  
細看難定。算陳思、著眼不曾多。驚鴻影。凭舷意。應誰省。拋醉纈。朱榴映。儘繁華都  
付藕絲風領。一簇愁紅空極浦。半湖柔綠浮歸艇。正高樓、人在柳陰中。烟光暝。

風中柳 黃鶯

細柳拖烟。織就亂絲多少。怪擲處、金梭偏小。一枝飛繞。數聲啼了。澀新簧、薄寒猶峭。  
嬌音斷續。短夢綠窗驚曉。弄春陰、翠翻紅笑。曲池人悄。落花風裊。又銜來、一番殘  
照。

風流子

荀郎傷逝後。魂銷盡。驀地見傾城。正梅粉乍舒。舊家門巷。柳絲斜蹕。別樣才情。更幾度。玉釵寒撥火。銀甲夜調箏。斗帳珠瑩。檀心偷展。鳳燈香爇。花睡難成。無端將去也。人何處。夢裏應喚卿卿。空記鵝兒酒暖。杏子衫清。怕油壁西陵。雨霽風倦。美人南浦。綠怨紅驚。爲待蘭舟催發。重聽流鶯。

減字木蘭花

華燈影裏。纔飲香醪吾醉矣。試問梅花。春在紅橋第幾家。韶光彈指。欲說心情都不是。目斷驚鴻。暮雨蕭蕭幾陣風。

前調

春融幾日。雪盡遙峯看愈碧。細草東西。一路晴絲冒馬蹄。青青楊柳。沽酒人家猶在否。楊柳青青。依舊長亭接短亭。

如夢令

禁得幾多僂僂。春色明朝還又。待倩養花風。吹展玉人眉皺。生受。生受。管是這回清。

瘦。

前調 落花

魚浪飄香千點。燕尾分烟一翦。已自出牆來。又被輕風吹轉。吹轉。吹轉。剛逗卷簾人面。

柳梢青

曉色汀洲。洩雲微度。雨脚初收。碧簾涼生。宿醒未解。秋在蘭舟。箇人何處凝眸。記不起。春風舊游。花外迎歸。霜前教去。總是輕鷗。

滿庭芳 佛手柑

玉露凝香。金風傅彩。更誰錫與嘉名。移來鹿苑。相好自天成。見說漢宮仙掌。輕將去。鉛淚雙零。算爭似。玉毫光裏。一指證無生。兜羅垂引處。乍伸還屈。示現分明。想拈花俱笑。指月同清。應是散花人至。鄰虛界。蔦地香城。慈雲護。摻摻親供。相對展金經。

附名家詞鈔改本



露質舒金。秋肌斂雪。可宜垂手亭亭。木奴愁絕。低首拜嘉名。何事漢宮仙掌。輕移去。鉛淚雙零。渾輸與玉毫光裏。一指證無生。兜羅垂引處。春纖乍接。一樣香清。正夜深寒淺。幽夢初醒。問取散花人去。如花客。屈指誰爭。還憑藉。絃雲深護。長伴展金經。

桂枝香 胥江懷古

吳城東畔。早一抹秋容。驟雨初斂。試問忠魂何處。依稀未遠。六千君子凌波起。便江頭、水犀朝偃。傷心此際。驚濤濺血。臣言真踐。歎千古、興亡滿眼。更白馬從遊。此恨誰見。贏得神鴉社鼓。麗譙荒甸。西風誰把英雄淚。灑東流、一時吹轉。始應消得。簫聲吳市。那些幽怨。

生查子 題畫馬

春回紅埒看無價。桃花汗重連錢卸。驤首望長天。雙瞳夾鏡懸。盤渦初出浴。芳草如烟綠。莫但惜障泥。追風會有時。

醉公子

郊外青驄馬。躑躅垂楊下。悵望碧雲重。夕陽蓮葉東。最是銷魂處。禾黍離披去。遠  
客易驚秋。風多莫上樓。

踏莎行 過吳江

月魄分橋。烟鬢迷渡。分明十里長洲路。從教幽夢解相尋。亂帆影裏人何處。細蕊  
偷黃。單絹引素。去來渾是難分付。西風篷底博山香。一絲絲似秋情緒。

念奴嬌

浮生夢裏。更能得、幾度人間今夕。西子湖頭秋已半。清景似曾相識。銀渚雲開。珠胎  
月滿。一片傷心碧。姮娥知否。照人如此清切。試望蘇小西陵。如今松柏。盡難尋油  
壁。星火樓臺永夜舟。不是舊游蹤跡。病憶愁吟。有荷花笑我。百端交集。數聲何處。夜  
分猶自吹笛。

望海潮 錢塘懷古和柳屯田

吳顛越蹶。玄黃戰罷。無多錢。趙興亡。城柝宵嚴。宮鴉曉起。潮聲依舊。錢塘綺麗最難忘。有蜀船紅錦。粵囊沈香。別樣風流。翠翹金鳳。內家妝。笙歌十里湖光。更沈雲菰米。墜粉蓮房。一道愁烟。三分流水。惱人唯有斜陽。盡日繞荒岡。又秋營畫角。粉隊軍裝。指點六陵。衰草下牛羊。

意難忘

生小盈盈。是天教斷送。賦與多情。密防鸚語滑。愁壓鳳箋輕。紅淚溼。翠眉清。猶是可憐生。夢兒中。幾回來處。只憑分明。算來誰負流鶯。有花枝照妾。明月隨卿。病應前夜得。眼是幾時醒。欲畫也。恐難成。堪否與題名。道判將。綠消紅褪。分付丹青。

浣溪沙 爲漢陽李子臨姬人小影不似

一段巫雲畫不成。想中依約遠山青。不曾真似未傾城。錦水鴛鴦非舊曲。芳洲鸚鵡太無情。放郎雙槳下金陵。

瑞龍吟 李迎侍兒掃鏡於吳門

吳趨里。誰在小小門庭。溶溶烟水。柔枝乍結。春愁盈盈才道。塗妝縮髻。情難擬。不比舊家桃葉。綠陰深矣。檀郎近約相迎。雀釵新黛。玉符空翠。休問石城艇子。更堪腸斷。竹西歌吹。唯有秦娘橋邊。離夢猶繫。漢皋珮冷。別是傷心地。待攜向。蘭缸背底。菱花偷展。誰照郎心切。探春試問春來未。蜂子憐新蕊。香破也。報來幽窗病起。吟箋賦筆。待伊次第。

南鄉子 午日

日永枕空支。漫折榴花綴五絲。渡口寂寥歌鼓斷。尋思。病也何曾似舊時。懶自醉芳卮。翦取清光寫楚詞。此會明年何處所。差池。似客心情燕子知。

瑣窗寒

開到荼蘼。苔荒蘚老。紋紗嫌薄。怎禁疏雨。閒了秋千絨索。只垂楊。漸濃綠雲。重陰遮斷。紅樓角。想鏡臺妝罷。冷凝花影。羅衣微覺。簾幙。人如昨。但玉凍釵茸。粉銷梳掠。錦箏彈怨。又恨秦絲聲弱。待拈針。添繡文鴛。晚風料峭。低素萼。向薰爐。消受春寒。孤

負滄裙約。

滿江紅

一霎燈前早硬卻。心兒別了。幸道是。頻年浪迹。慣曾草草。恰喜病隨殘月減。可知夢與秋風杳。只迴廊。纔轉是天涯。漁陽道。偷彈淚。燈花小。親煮藥。爐烟繞。儘一番憔悴。又添離抱。別後屢屢炊卻盡。客中魚素愁難料。竟何如。雙影玉蘭堂。相看老。

鷓鴣天

不合尊前唱竹枝。天涯贏得夢來遲。鷓鴣絃喚起三更月。一縷花風罨斷絲。多少事。只心知。又拈紅豆記相思。而今牢落青衫淚。誰似潯陽夜泊時。

滿路花 與聽公

吳宮落日荒。燕市悲歌暮。天山三丈雪。迷行路。驀然相遇。寶筏橫津渡。支公都未許。會待安心。早教覓向何處。玄關頻叩。默語俱成誤。白頭渾未定。風前絮。一燈深照。領略元無句。從今應記取。玉河霜月。滿身多少花雨。

山花子 王西樵吏部小照

禪悅何如昔輞川。前身元住散花天。一幅繡窗金粟影。自年年。起草獨來清禁裏。題詩多在晚山邊。依舊司勳禪榻畔。落花烟。

菩薩蠻 王阮亭戶部小照

濟南名士含香客。蜀箋盈手桃花劈。天下工爲文。紅橋舊使君。鳳城春似許。梅子肥時雨。借問對題詩。東風第幾枝。

望江南

春欲盡。昨夜畫樓東。暗綠撲簾銀杏雨。昏黃扶袖玉蘭風。人在小窗中。山枕淚。只是背人紅。諱病鏡知眉戍削。關心書辨墨纖濃。歸夢鎮相逢。

臨欲別。何處見迴眸。一丈紅牆遮玉砌。十年青鳥斷銀鈎。往事總成愁。憔悴盡。花滿憶春游。褰幌月華窺擁被。隔簾風影報梳頭。終日並蘭舟。

愁絕處。偏是記從前。鸚鵡關心留眼地。薔薇垂淚送人天。腸斷竟無言。孤負了。相

見又依然。豈有計堪酬錦段。更無人與寄瑤箋。消瘦也誰憐。  
紅成陣。花落麥涼秋。那得鸚鵡供滌器。不關楊柳悔封侯。老我是窮愁。  
欵枕夜。幾  
度月當樓。賦別江淹。慚夢錦。寄愁徐淑。阻書郵。多分怨靈脩。  
清夜憶。兩兩暗銷魂。懷袖淚痕悲灼灼。畫圖身影喚眞眞。一種是雙文。  
不信是眞  
合老風塵。愁似巴山聽夜雨。懶從巫峽賦朝雲。消息奈何春。  
聽宛轉。愁到渡江多。杏子雨餘梅子雨。柳枝歌罷竹枝歌。一抹遠山螺。  
曾幾日。輕  
扇掩纖羅。白髮黃金雙計拙。綠陰青子一春過。歸去意如何。  
湖上好。谷口舊相招。青錦湍迴開畫檻。綠楊風過響檀槽。遲日醉春醪。  
簾影外。宛  
轉小紅橋。見按金釵臨水裔。又兜羅襪下山椒。催上木蘭橈。  
溪口路。歸夢繞明湖。風送落紅沾網眼。雨浮新綠上城跗。節物近鳧車。  
雪鬢畔。小  
小赤靈符。輕袖五絲憑畫鷁。暗窗九子裏青菰。人似舊時無。

虞美人 和高澹人折花圖

韶光總被風吹去。又是清明雨。雨餘騎馬覓殘春。賸折一枝紅豔襯梨雲。屏山曲  
護檀霞重。何處江南夢。起來燒燭看仍稀。翦取生綃和淚畫崔徽。

浣溪沙

梅粉園林曉夜涼。不堪終日倚樓窗。落花風外更斜陽。賸識唾花休卷袖。不成心  
字始憐香。十三絃上怨瀟湘。

七娘子 曉汲

露華桐乳垂垂滴。彈風鬢十八來晨汲。初景牆頭澹搖斂色。半牽玉虎全無力。新  
涼幾日尋刀尺。便做成出水曹衣窄。裙帶頻拈襪羅愁溼。苔邊定有驚鴻跡。

南浦 題朱孟辨蘆洲聚雁

生綃淡墨向人心。譜出許多愁。賸有垂楊金縷。幾葉下寒流。隱隱漁燈生處。鎖瀟湘、  
一派荻花秋。問賓鴻點點。稻梁何在。生占白蘋洲。回首西風故國。有芙蓉、塘外月  
如鉤。應是千帆數盡。人倚隔江樓。此際離魂歸去。正誰家、水調唱歌頭。甚無情圖畫。



烟中不著一扁舟。

燭影搖紅 上元

薄醉垂鞭。寶坊才轉疑飛墜。一年明月打頭圓。望處渾如水。便有魚龍成隊。更多少、王侯邸第。白頭猶說。天上霓裳。舊時風味。誰耐閒行。紫駟可也如人意。歸來孤館踏歌聲。遠聽心還碎。往事姮娥應記。遍燈月、闌珊影裏。而今誰問。南國春寒。箇人憔悴。

轆轤金井 風

傷心休問。只風兒也。勾吹將人老。剗地排空。總沒些分曉。城烏去了。又喚起、鈿車聲早。漢苑秦宮。千門萬戶。飄殘多少。古今去來如鳥。把狗屠駿市。往事都掃。似絮羈魂。怎禁他顛倒。江南夢杳。敢吹徧、天涯芳草。故國飄零。畫船聽雨。甚時重到。

眼兒媚 詠紅姑娘

珊枕寒生夜來霜。猶自可人妝。絳仙呵手。紅兒偷眼。斜倚紗窗。傷心合是櫻桃侶。

零落鄭家香。生生長共。故宮衰草。同對斜陽。元故宮遺錄金殿前有此果

鵲橋仙 七夕雷雨

觚稜日落。宮衣初卷。隱隱雲駟欲駕。金蛇玉虎太顛狂。誤此刻、天孫無價。故園何處。針樓明月。依舊一眉如畫。誰言客鬢久經霜。似才共、玉環盟罷。

水龍吟 京江離席

南徐自是傷心處。天水平分瓜步。風吹浪打。英雄去盡。江山千古。此際茫茫。故人揮手。一時燕楚。喜離尊重滿。彩箋同擘。邀仙令。片帆駐。多少風流雲散。更東南、斷魂金鼓。平生知己。寸心空在。算來良苦。夢裏平湖。芙蓉秋老。使君歸去。便從今擊筑聲沈。聽湘瑟。兩何許。

鷓鴣天

颯颯靈風不滿旗。濁河東下鎮如馳。荒雞啼斷還鄉夢。一葉連天獨去時。烟漠漠。雨絲絲。居人相望不相知。紫萸黃菊無情甚。腸斷年年贈別離。

蝶戀花

依舊荷香三十里。比似年時。無復殘紅矣。不恨紅芳不相俟。恨他零落秋如此。 驚  
外遙山鷗外水。水上斜陽。染出千峯紫。脈脈秋心勾引起。一行白雁天邊字。

山花子

人與青山共白頭。犯寒簾控小金鉤。一樹垂楊扶不起。壓春愁。眼底生涯都未是。  
天邊凝望幾時休。索倩玉驄馱醉去。病青樓。

減字木蘭花

廣庭人去。閣淚晴秋無一語。重認行蹤。一片薔薇繆徑紅。伴伊雙燕。分我三春花  
底雁。翻怕書來。又報愁蛾病不開。

滿江紅

世事茫茫。傷不了。中年哀樂。到而今。未應揮手。心先作惡。紫禁烏啼頻悵望。青門柳  
色同飄泊。記一燈。微雨照論心。簷花落。車與笠。平生諾。萍將梗。重來約。早魂銷何

處。孤城殘角。客路亂餘春色在。故鄉老去歡情薄。盼紫桐、花底雁書來。題紅藥。

百字令 題震修小照次韻

夢回身世待與子呼酒。細論齊物。箇是文場摧敵手。所向一時堅壁。白日難揮。黃金易散。彈指菁華歇。短衣射虎。憐渠未是侯骨。我是海鳥忘機。君休自歎。歸燕紅襟。雙飛絮亂。花渾不管。零落六朝烟月。生卽同年。居偏對宇。老覺關情切。芒鞋相待。共君踏遍冰雪。

前調 再和

早時人羨道。不是風雨。滄池中物。禿袖藤鞋。今似許。冷落少年油壁。噩夢關心。驚塵撲面。此事何當歇。貧來自喜。詩篇天付花骨。試問三匝何依。一身猶似。烏鵲南飛。雙。決眼雲烟成變幻。何況吹簫明月。唯有瞿曇。殷勤一指。校與心期切。人間萬事。北風應近飛雪。

青玉案

虎丘山下傷心路。直不放、游人去。鬢影歌聲香不度。賣花籬畔。鬪茶闌角。記得停舟處。亂紅飛過真娘墓。休覓斷碑腸斷句。愁校興亡爭幾許。一龕燈影。半天鈴語。幾陣吳宮雨。

沁園春

北征次留仙江陵見寄原韻

十載行藏。幾度相看。郵亭一燈。任迷離纈眼。非花非霧。橫斜世路。爲谷爲陵。湘珮徒捐。郢歌誰和。看到無心似未曾。歸來好。過琵琶江浦。也溼吳綾。蛾眉淡後誰憎。只倦翮追飛。感倍增。向韶年青鬢。都添縞雪。春風紫陌。幾踐玄冰。去就難同。平生可念。要路由人袞袞登。吾休矣。有茶烟禪榻。片石疏籐。

御街行 中秋

算來不似蕭蕭雨。有箇安愁處。而今把酒問姮娥。是甚廣寒心緒。隻輪飛上天街似水。不管人羈旅。霓裳罷按當時譜。一片青砧路。西風白騎幾人歸。腸斷綠窗兒女。數聲角罷。樓船月偃。雁落瀟湘去。

菩薩蠻 託興

昭陽一夜思傾國。家家鸞鏡新妝色。狼籍畫雙蛾。手繁宮樣多。不須矜豔冶。明日承恩者。淡掃便朝天。路人知可憐。

君恩自古如流水。梨園又選良家子。都作六宮愁。傳言放杜秋。傾城爭一顧。那用論縑素。幾箇定橫陳。丹青不誤人。

唾華零落昏殘繡。只將匹帛誇長袖。舞罷泣春風。歸來自洗紅。一時齊望幸。白髮偏多恨。雲雨弔荒臺。猶將夢裏來。

金釵鈿合知何許。綠章紅淚辭偏苦。豈必九重知。傳看出衆時。可憐心獨矢。自銜誰家子。齟齬復啼妝。折腰伊太狂。

倦尋芳 送成容若扈從北行

鳳城東去。一片斜陽。千里紅葉。便不淒涼。早是淒涼時節。雲驄漸拋珠汗漬。桃花鞭影明滅。笑回頭。有蒲萄酒暖。當壚如月。算此去。金波正滿。何處關山。玉笛吹裂。古

鎖黃花。看卽滿頭須折。扈蹕長楊人自好。翠帷未慣傷離別。只歸來。古奚囊。儘添冰雪。

南鄉子 再送容若

歸語太匆匆。剛道看山落葉中。生把馬蹄都襯著。猩紅。應到重來更幾重。今古望長空。明月山前月似弓。澆酒長城飲馬窟。英雄。輸與儒生罵祖龍。

前調 擣衣

霜葉滿城頭。一片青砧萬古愁。唯有啼痕點點在。衣襟。夜夜隨君宿戍樓。誤妾定吳鉤。不是蕭郎愛遠遊。條脫旋寬雙杵重。封侯。消得金堂幾度秋。

金縷曲 題陳其年小照填詞圖有姬人吹玉簫倚曲

燕市悲歌者。論從來、英雄兒女。漫爭聲價。腸斷斑騅人欲去。剛道小喬初嫁。只半幅、春風圖畫。唱到天涯芳草句。看一聲、離鳳嬌鬢亞。紅淚泣。數行下。浮名自是誰真假。甚于思、花間蘭畹。一時方駕。不管秦娥簫咽後。又是茶蘼開罷。更何處、垂楊繫馬。

便遣玉人嗔急性。背華燈，扣損裙兒。研須罰爾，盡三雅。

摸魚兒 壽留仙

似仙源、桃花零亂。武陵一櫂重駐。玉堂鈴索花輒日，舊是先生遊處。愁如絮。消受盡五湖、烟月三湘雨。君恩再許。教領袖詞流，雙椽燭底，灑翰繼遷固。喜不改，張緒當年風度。柳弧依舊懸戶。交疏月轉，傳籌飲，墜遍玉河紅露。支機浦。早看取七香車上山眉嫵。離情休訴。只此恨重償，雙紋篋展，肯放早朝去。

一斛珠 鷹

雲羅萬里，側目烟霄何處是。自看六翮今如此。華絆朱纓，擎出人兒喜。奚騎紫髯探雀餽。平蕪灑血徒爲爾。微軀誓擬酬君子。一夜西風，夢落鍾山裏。

金縷曲 贈西溟次容若韻

畫角三聲咽。倩星前、梵鐘敲破，三生慧業。身後虛名當日酒，未穀消磨才傑。君莫歎，蘭摧玉折。多少青蠅相弔罷。鮑家詩，碧濺秋墳血。聽鬼唱，幾時徹。更誰炙手真堪



熱。只些兒、翻雲覆雨，移根換葉。我是漆園工隱几，也任人猜蝴蝶。憑寄語、四明狂客。爛醉綠槐雙影畔，照傷心、一片琳宮月。歸夢冷，逐迴雪。

前調 送西溟奔母喪南歸次韻

此恨何當住。也須知、王和生死，總成離阻。真使通都聞慟哭，廢盡蓼莪詩句。算母子、尋常歡聚。秔稻登場春韭綠，便休論、萬里封侯去。須富貴，竟何許。片帆觸處成悲緒。問從今、檣烏噪燕，幾番風雨。不爾置君天祿閣，未算人生奇遇。甚一種、世間兒女。畫荻教成羞半豹，早高堂、鸞誥偏無負。天可問，儻相語。

青玉案 雁字

丹青畫出秋容好。看題處、當殘照。一一銀鉤天外小。晚妝樓上，麝煤臨就，忒也疏斜了。浣花波影明如掃。弟子新傳王逸少。雨打風吹幾回老。斷行殘墨，被誰偷譜，排點銀筍巧。

臨江仙 寒柳

無多烟雨旗亭路。爲誰縈損風流。新來消盡兩眉愁。不知當日意。生怨隔紅樓。桃  
葉桃根同悵望。知他何處維舟。玉鉤斜畔女牆頭。昏鴉棲不定。霜月滿揚州。

一叢花 並蒂蓮

畫橈昨夜過橫塘。兩兩見紅妝。絲牽心苦。渾閒事。甚亭亭。別是難忘。澹月層城。影娥  
池館。生小怕淒涼。而今稽首祝空王。使落也雙雙。露寒烟遠。知何處。妥紅衣。忽認  
餘香。那夜簾櫳。雙紋繡帖。有爾伴鴛鴦。

留春令

萬山中劃長虹。飲處神州東屬。誰遣青青古猶今。睽不盡、風塵目。堪否築臺當一  
曲。看秋容濃綠。往事山僧莫重陳。待醉了、供歌哭。

臺城路 蕭后妝樓

憑君莫問妝樓處。御溝烟水如舊。滿目江山。古而無死。此日定應誰有。烏棲鹿走。只  
一段鉛華。芳名未朽。直道忘情。試來此地斷腸否。春風何限當日。下簾聲一派。遠

山青後。鳳脰燈昏。龍香撥暖。消得宿妝殘酒。寂寥清漏。早一曲迴心。幾時重奏。付與昏鴉。夜寒噴禁柳。

霜葉飛

故鄉他日。丹楓路、草堂斜轉山麓。繞籬清澗斷橋東。盡日汲寒玉。正欹枕、矮窗晴旭。山厨掃葉晨炊熟。醉卯酒如泥。把插架陳編。卷了不遣侵目。豈少擯落江山。蘆人漁子。容易伴我幽獨。爲探梅信愛衝風。挂蒲帆十幅。要游倦、歸來新浴。樵青扶醉移紅燭。待先生如此去。四十三年。問他陵谷。

南鄉子

烟月滿漁村。一道飛書下九關。聖主臨軒初試日。逡巡。白髮青衫謁至尊。隱矣又焉文。歸去空留土木身。何意片詞親簡自。楓宸。九死從今總負恩。

小桃紅 題汪蛟門禮部小照三好圖

一曲山香舞。門外桃花雨。清醪浮來玉山頹了。十眉愁嫵。最欺人還道有心情。覓羽

陵殘蠹。醒眼今何許。十丈東華土。偏只贏他。一編陳墨。商量今古。更何年二十四橋邊。問吹簫人處。

齊天樂 昇平嘉宴記恩

春來罷習昆明戰。甲兵洱海初洗。翠疊堯冥。青眠漢柳。魚鑰千門宵啓。爐薰鵲尾。裊火鳳流蘇。燭龍垂地。夢入鈞天。始知身是玉皇吏。宸游此時最喜。勅雲韶屢舞。鶴羽交醉。百和香濃。三光酒滿。拜手逡巡還起。昇平樂事。許殿上賡歌。柏梁新製。帶月歸遲。六街平似水。

南浦 送高澹人扈從東巡

披香侍從。鎮朝隨。宮漏莫宮鴉。忽報翠華春豫。紫塞度銀沙。千里旌旗。簪野。簇雞翹。五色亂晴霞。趁六龍飛處。極天紅雨。江水泛松花。纔是鳳城三五。共華燈。明月醉皇豕。此際長楊羽獵。獨自騁妍華。行矣青門鞭影。度關山。新柳萬行遮。待歸來。又早階翻紅藥。夢天涯。

金縷曲 澹人江村圖

秋色縈懷抱。正緘來、房山新繪。江村縹渺。甲帳前頭供奉客。盡日親承天笑。算縱有、長林豐草。除是功成頭并白。賜明湖、一曲容歸老。見卯計、笑君早。綠楊踈地平橋小。小問丹青、楓江轉處。阿誰歸棹。萬事後人吾分定。此計合教先了。待重見、濁醪相勞。七十二峯湖上路。隔姚江、烟雨無多少。眼底事、海鷗鳥。

喝馬一枝花 送沈融谷

綠鬢銅章吏。籍甚東陽才子。柘西傳樂府。滿燕市。合喚羅裙。鵝管調銀字。忽漫牽絲去。亂水荒山。迢迢六七千里。木榭濃陰底。情篋疏簾廳事。憑題翡翠硯。白籐紙。酒伴無人。蠻椀誰同醉。記取雙江外。第一是梅邊。莫忘小驛花使。

臺城路 送李分虎

秋來已是驚搖落。西風更催嘶騎。鯉淀通波。魚山斷壁。行盡燕齊千里。涼雲雁底。盼楚尾吳頭。一痕江水。挂片輕帆。鱸香斜日小亭子。溪堂樹根竹裏。惹鄰翁相報。寒

犬迎吠。白酒黃雞。芋魁菱角。樂事人生有幾。鄉心頓起。也擬向春前。便營歸計。並著  
蘭舟。醉吟同短李。

水龍吟 端州五日

惱人細柳新蒲。三年已掃金臺跡。繁臺塵土。釣臺烟雨。崧臺風日。淹冉年華。禁他揉  
弄。這般狼籍。算上林龍舸。掣標來。天笑處。誰簪筆。一片牂牁風急。便歸夢。怎教  
歸得。清尊空滿。朱顏難駐。浮名何益。多少當年。玉符綵縷。目胎心擲。正畫船迴處。金  
波十頃。一聲山笛。

菩薩蠻 題喬無功萬書園小照

湘簾葉几浮新綠。香緘燕尾同心束。舒卷不曾閒。名山咫尺間。好添圖外意。新樣  
元和字。迴筆畫雙蛾。春風樂事多。

補遺

南歌子

積潤初消砌。輕陰尙覆城。薔薇花外度流鶯。卻道年來、渾是不關情。青鏡人如昨。朱弦手盡生。斷腸天氣舊池亭。夢裏紅香、清露泣三更。

看花回 歸舟

不是山陰雪夜舟。爭便歸休。春花秋月三分景。去二分雨泣風愁。一分渾是病。算與從頭。縹緲峯前萬樹秋。儘待淹留。人生酒債尋常偏。放他禹穴重遊。而今先帶得。越吹江謳。

彈指詞納蘭詞俱有次秋水軒韻金縷曲。係用卷字韻起。翦字韻止。梁汾稱其一韻累百。皆淮南橋李二公與都亭諸摺紳韋布唱酬名作。今秋水集未載一闋。想另有雕本也。

上海图书馆藏书



A541 212 0014 9601B



